



STEPH. ANTONI MORCELLI

OPERVM EPIGRAPHICORVM

VOLVMEN II.



STEPH· ANTONI MORCELLI

OPERVM EPIGRAPHICORVM

VOLVMEN II·





STEPH. ANTONI MORCELLI  
DE STILO  
INSCRIPTIONVM LATINARVM  
LIBER II.

EDITIO ALTERA AVCTIOR ET EMENDATIO



PATAVII  
TYPIS SEMINARIII

AN · M · DCCC · XX ·

Digitized by the Internet Archive  
in 2014

## ELENCHOS LIBRI SECVNDI

## DE STILO INSCRIPTIONVM LATINARVM

LIBRO II. Qui est ΔΙΔΑΚΤΙΚΟΣ  
ΠΡΟΛΕΓΟΜΕΝΑ

§. I.	De veteri artificio inscriptionum . . . . .	Pag.	1
II.	De difficultate inscriptionum . . . . .	»	11
PARTITIO PRIMA.	De sex generibus inscriptionum . . . . .	»	14
CAPVT I.	de inscriptionibus sacris		
§. I.	De ratione generis universa . . . . .	»	15
II.	De titulis Dei immortalis Caelitumque sanctorum . . . . .	»	21
III.	De monumentis sacrorum . . . . .	»	35
CAPVT II.	De inscriptionibus honorariis		
§. I.	De ratione generis universa . . . . .	»	43
II.	De inscriptionibus honorariis clarorum virorum . . . . .	»	49
III.	De inscriptionibus honorariis primariorum feminarum . . . . .	»	64
CAPVT III.	De epitaphiis		
§. I.	De ratione generis universa . . . . .	»	71
II.	De epitaphiis virorum . . . . .	»	80
III.	De epitaphiis feminarum . . . . .	»	95
III.	De epitaphiis puerorum puellarumque . . . . .	»	104
V.	De epitaphiis sepulcrorum communium . . . . .	»	111
CAPVT III.	De inscriptionibus historicis		
§. I.	De ratione generis universa . . . . .	»	118
II.	De fastis . . . . .	»	120
III.	De inscriptionibus operum publicorum . . . . .	»	126
III.	De indicibus locorum publicorum privatorumque . . . . .	»	138
V.	De indicibus eorum, quae legata, donata, vendita aut empti sunt . . . . .	»	141
CAPVT V.	De ellogiis		
§. I.	De ratione generis universa . . . . .	»	145
II.	De ellogiis Caelitum sanctorum . . . . .	»	147
III.	De ellogiis virorum et feminarum illustrium . . . . .	»	150
CAPVT VI.	De constitutionibus publicis		
§. I.	De ratione generis universa . . . . .	»	155
II.	De legibus et edictis . . . . .	»	157
III.	De Senatus consultis et decretis civitatum . . . . .	»	165
III.	De tabulis foederum et hospitiorum . . . . .	»	172
V.	De rescriptis et diplomatibus Principum . . . . .	»	175
VI.	De inscriptionibus mensurarum et ponderum . . . . .	»	179
VI.	De decretis actisque collegiorum . . . . .	»	180

## PARTITIO SECUNDA. De quatuor consecrariis inscriptionum mixti generis

## CAPVT I. De inscriptionibus temporariis

§. I.	De ratione generis universa . . . . .	Pag. »	185
II.	De inscriptionibus sacris precationum votorumque caussa . . . . .	»	188
III.	De inscriptionibus ad festos apparatus atque pompas . . . . .	»	191
III.	De inscriptionibus funerum publicorum . . . . .	»	195

## CAPVT II. De inscriptionibus nummariis

§. I.	De ratione generis universa . . . . .	»	198
II.	De inscriptionibus nummorum aduersis . . . . .	»	202
II.	De inscriptionibus nummorum aversis . . . . .	»	205

## CAPVT III. De titulis rerum privarum

§. I.	De ratione generis universa . . . . .	»	211
II.	De inscriptionibus anulorum . . . . .	»	212
III.	De inscriptionibus poculorum . . . . .	»	214
III.	De inscriptionibus tesserarum . . . . .	»	215
V.	De inscriptionibus lucernarum vasorumque fictilium . . . . .	»	217
VI.	De inscriptionibus armorum et instrumenti bellici . . . . .	»	218
VI.	De inscriptionibus laterum et tegularum . . . . .	»	220

## CAPVT IIII. De inscriptionibus poetiis

§. I.	De ratione generis universa . . . . .	»	223
II.	De epitaphiis . . . . .	»	225
III.	De inscriptionibus sacris . . . . .	»	228
III.	De inscriptionibus historicis . . . . .	»	230
V.	De ellogiis . . . . .	»	233

## PARTITIO TERTIA. De regulis inscriptionum communibus

CAPVT I.	De nomenclatura inscriptionum . . . . .	»	236
CAPVT II.	De rerum delectu et dignitate inscriptionum . . . . .	»	250
CAPVT III.	De mensura inscriptionum . . . . .	»	257
CAPVT IIII.	De perspicuitate inscriptionum . . . . .	»	263
CAPVT V.	De dictionibus inscriptionum . . . . .	»	270
CAPVT VI.	De junetura verborum et particulis inscriptionum connexivis . . . . .	»	279
CAPVT VII.	De figuris inscriptionum . . . . .	»	288
CAPVT VIII.	De numeris modisque inscriptionum . . . . .	»	296
CAPVT VIIII.	De scriptura inscriptionum . . . . .	»	304
CAPVT X.	De loco et ornatu inscriptionum . . . . .	»	320



# DE STILO INSCRIPTIONVM LATINARVM

## LIBER II.

QVI EST ΔΙΑΔΑΚΤΙΚΟΣ

ΠΡΟΛΕΓΟΜΕΝΑ

§. I.

### *De veteri artificio inscriptionum*

I. **E**st apud Gallos in more positum, quum opera publica aut clarorum virorum tumulos inscriptione insignire opus sit, eam ut petant a collegio illo Parisiensi hominum doctissimorum, quod ab inscriptionibus et litterarum studiis nomen habet (1). atque id eo consilio fieri arbitror, ut illa de quibus posterī etiam iudicare debent, eam habeant ab elegantia et doctrina commendationem, quae huic quoque aetati et his studiis laudem aliquam nomenque afferat. quaerebam autem, num et Romani partem aliquam in hanc rem derivassent curae et cogitationis suae; quique tot rerum suarum monumenta publicis privatisque litteris consignarent, num id etiam cavissent, ne quid ex his usquam proponeretur, quod non antea lecti iudices comprobassent. ac de collegio quidem ejus cognitionis causa instituto nulla mihi indicia quaerenti oblata sunt: sed hoc tamen ipsum ita, opinor, obtinuisse dandum est, ut si minus in omnibus monumentis, nihil certe apud eos in operum publicorum frontibus figeretur inscribereturque, quod non aut a viro docto confectum, aut eruditorum iudicio probatum esset. nam quis ignorat, quanti olim honorem publicae inscriptionis aestimare viri illi clarissimi solerent? quum etiam inter se magistratus aliquando certarint, ad quem dedicatio novi operis pertineret (2). contentionem ut mittam, quam prope in exordio reipublicae inter Valerium et Horatium Cos. fuisse de dedicatione templi Capitolini, narrat Livius (3); Q. Catulo, cui Capitolii reficiundi curatio data fuerat, honorem eundem, rogatione promulgata, eripere conatus est in praetura Iulius Caesar, ut in Pompejum transferret (4): irritum licet incepto, quum Lutatii Catuli nomen, ut est apud Tacitum (5), inter tot Caesarum opera usque ad Vitellium manserit. quin hoc etiam videmus, qui a senatu impetraverant, ut operibus publicis nomen suum inscriberent, eos delatum ho-

(1) Acad. Inscr. t. 1. p. 524. etc.

(2) Dion. Halic. l. 5. p. 304.

(3) lib. 2. c. 4. n. 8.

(4) Svet. in Iul. c. 15. n. 1.

(5) Hist. l. 3. c. 72.

norem tanti fecisse, ut de ipso senatus consulto posteros aliquando monuerint. testis est Cajus ille Dexius Aedilis Curulis, qui, quum Interamnae Nahartium porticum theatri et cryptam perficienda curasset, in titulo adscripsit QVOI · IN · OPERIBVS · PVBLICEIS · QVAE SVpra · S · S · EX · S · C · INSCRIPTIO · DATA · EST (1): nimirum haud facile honorem impetrare inscriptionis quisque poterat: quae Sauro etiam Batrachoque Laconibus architectis negata dicitur (2), quum templa Octaviae porticibus inclusa construxissent impensa sua.

Age vero qui jus ponendae inscriptionis tanti facerent, quis eosdem ad ipsam inscriptionem conficiendam, ea praesertim doctorum hominum copia atque auctoritate, aut aliorum ingenio litterisque usos esse, aut suam ipsos facultatem ac diligentiam contulisse non putet? neque sane exempla desunt vel eorum, qui, quum essent ipsi ad litterarum hoc genus rudes, operam et studium egregii scriptoris requisiverunt; vel eorum, qui, quum litterarum gloria florerent, inscriptiones tamen a se confectas non ante proposuerunt, quam aliorum essent iudicio comprobatae. ac Decimus quidem Brutus, qui se magis in rebus gerendis, quam in scribendis exercuisset, Accii poetae carminibus, ut ait Tullius (3), templorum ac monumentorum aditus exornavit suorum. Cn. vero Pompejus, qui omnium disciplinarum studia cum rei militaris scientia conjunxerat, quamquam ad theatri sui dedicationem titulum ipse confecerat, tantum sibi non tribuit, ut aliorum iudicia contemneret: quumque ambigeretur, utrum *Consul tertio*, an *Consul tertium* inscribendum esset, eam rem exquisitissime, ut Tiro apud Gellium (4) loquitur, retulit ad doctissimos civitatis atque ad ipsum M. Tullium. tum hic quoque, quum aedis Telluris Curator esset, ad Pompejum se venisse, et cum eo non de operibus solum, sed etiam de *Inscriptionibus* egisse testatur (5) (a). quid leges, quas promulgari antea oportebat, senatus consulta, decreta, titulos honorarios, quae omnia recitari in curia solebant (6), de quibus sententiam dici necesse erat, quanto majore studio, aut quam multorum diligentia vel scripta esse vel examinata, fatendum est?

II. Iamvero, ut ut inscriptionum auctores prope omnium, quae nunc exstant, ignoramus, illud tamen certum exploratumque est, doctissimos viros in hoc se genere litterarum aliquando exercuisse. silebitur de Ennio ceterisque ejus aetatis poetis, de quibus alio loco disserui. at vel de seniore Africano, homine ingeniosissimo, accepimus (7), quum is rure apud Liternum in exilio esset, ubi et diem obiit, epitaphium, quod sepulcro ejus inscriberetur, reliquisset, cujus ea erat clausula,

INGRATA · PATRIA · NE · OSSA · QVIDEM · MEA · HABES

L. Cornelium Sullam, quem Salustius (8) *litteris Graecis atque Latinis juxta atque doctissime eruditum* dixit, quum publicis, quae fecit operibus titulos incidendos composuisse non dubito; tum ipsum etiam epitaphii sui scriptorem fuisse, didici a Plutar-

(1) Gud. p. 74. n. 5. Fabr. p. 619. n. 160. Don. cl. 2. n. 35.

(2) Plin. H. N. l. 36. c. 5. n. 4. §. 14.

(3) pro Arch. c. 11. n. 27.

(4) Noct. Att. l. 10. c. 1.

(5) ad Q. Fratr. l. 2. ep. 9.

(a) Ceterum hic Cicero cum Pompejo tunc temporis exsule egisse videtur, ut inscriptiones ad Telluris aedem in sui fratrisque honorem ponere sibi liceret, non ut ille eas legeret approbaretque.

(6) Grut. p. 444. n. 2. Cic. Philip. 5. c. 13. n. 36. c. 15. n. 40. c. 17. n. 46. c. 19. n. 53. etc.

(7) Val. Max. l. 5. c. 3. n. 2.

(8) Bell. Ing. c. 100.

cho (1), qui hanc esse summam tradit, ὧς οὐτε τῶν φίλων τις αὐτῶν εὐπρίων, οὐτε τῶν ἐχθρῶν κακῶς ὑπερεβάλετο: id est, *Quem nemo amicorum beneficiis, nemo inimicorum maleficiis superavit*. Caii autem Caesaris, cujus et eruditio praeclara fuit, et gloriae cupiditas maxima, nullam quidem exstare inscriptionem censeo, casque omnino rejicio, quas Pitiscus ad Svetonium suum adtexuit. sed multas sane operibus suis ille addidisse putandus est, quem et temporarias confecisse jam vidimus. quin etiam, quod neque Rutgersius vidit neque Fabricius, inscriptionum auctores et Iulium Caesarem et Caesarem Aug. facit Velius Longus Grammaticus (2): *Antiquis, inquit, varie etiam scriptitatum est, Mancupium, Aueupium, Manubiae: siquidem C. Caesar per I scripsit, ut apparet ex titulis ipsius: at Augustus I per V, ut testes sunt ejus inscriptiones.*

Quid de M. Tullio dicam, cujus animus semper ad immortalem gloriam nitebatur? non, si res ille suas multis voluminibus testatas seiebat, idcirco marmorea litterarum monumenta neglexisse duxerim. imo multos ab eo titulos in villis suis ac maxime in Tusculano, ubi Lyceum, ubi Academiam, ubi bibliothecam fecerat (3), et ad loci ornamentum, et ad posterorum memoriam positos esse arbitror. quis autem credat, non ipsius stilo perscriptum Tulliae epitaphium, filiae carissimae, cui etiam templum excitare decreverat (4)? quis non ipsum aut Tulliam legem scripsisse, quam consul pertulit, aut illa S. C. dictasse putet, quae saepe ipso auctore facta esse constat? sed memorat idem claros legum scriptores, qui tum florebant, Visellium et Sextium (5): ut omittam, quos ille insectatur, Clodianos scribas, atque ipsos etiam ejus aetatis disertissimos jurisconsultos, a quibus fere ceteras leges prodiisse arbitror. tum a Scipione Metello inscriptiones statuasque Scipionibus complures in Capitolio positas tradit: quamquam ἀνιστορησίαν ille Metelli notat (6), qui proavum suum P. Cornelium Scipionem, cui Serapio cognomen fuit, censorem non fuisse nesciret, quique etiam Africani imaginem et Serapionis subscriptionem conjunxisset.

Enim vero Augustus, quem paulo ante nominavi, et epitaphium Drusi ipse scripsit (7), et indicem reliquit rerum a se gestarum, quem in aeneis tabulis incidi, et ante Mausoleum suum statui jussit (8): idem fortasse auctor ellogiorum, quae in ejus foro legebantur, ut superiore libro adnotatum est. ibidem et de Verrii Flacci Fastis mentionem feci, quorum pars bona fausto omine nuper effossa Praeneste, lucem iterum adspicere coepit. epitaphia porro clarorum virorum alia ab aliis relieta, quae tumulo suo inscriberentur, satis constat: quos inter numeres Verginium illum Rufum (9), quem Plinius junior (10) perfunctum tertio consulatu scripsit, ut summum privati hominis fastigium impleret, quum Principis noluisset. adde etiam, si libet, Thessalum medicum, qui monumento suo, quod erat via Appia, *Iatronicen* se inscripsit (11): item cum, qui in infelicis monumenti inscriptione adjici voluit, *Turba se medicorum perisse* (12).

(1) in Sulla sub fin.

(2) Ed. Putsc. p. 2228.

(3) de Divin. l. 1. c. 5. n. 8. ad Att. l. 1. ep. 9. ibid. ep. 7.

(4) ad Attic. l. 12. ep. 36. etc.

(5) ad Attic. l. 3. ep. 25.

(6) ibid. l. 6. ep. 1.

(7) Svet. in Claud. c. 1. n. 12.

(8) id. in Aug. c. 101. n. 7.

(9) Plin. l. 6. ep. 10.

(10) lib. 2. ep. 1.

(11) Plin. H. N. l. 29. c. 1. n. 5.

(12) id. ibid.



Sed commemoranda potissimum Trajani Aug. quam Dio (1) celebravit, in pangendis inscriptionibus magniloquentia: οὕτω γὰρ πῦν καὶ μεγαλοφῶν καὶ μεγαλογνώμων ἐφυ, ὥστε καὶ τῷ ἱπποδρομῷ ἐπιγραφῆαι, ὅτι ἐξαρκούντα αὐτὸν τῶν Ῥωμαίων δὴμῶν ἐποίησεν, ἐπεὶ δὴ διαφθάρεντα πῆν, καὶ μείζω καὶ περικαλλέστερον ἐξείργασατο: quae me verba ut inscriptionem huic similem a Trajano prodiisse credam, facile adducunt (2):

IMP · CAES · DIVI · NERVAE · F · NERVA · TRAIANVS

AVG · GERM · DAC · PONT · MAX ·

TRIB · POT · VII · IMP · IIII · COS · V · P · P ·

CIRCVM · MAXIMVM · VETVSTATE · CORRVPTVM

OPERIBVS · A · SOLO · AMPLIATIS

IMMENSIVAE · LATERIS · AMBITV · EXORNATO

PAREM · POPVLO · ROMANO · FECIT

Ceterum Trajano praefendum jure dixeris, qui eum consequutus est, Hadrianum, virum studiis plane omnibus ac disciplinis excultum. hic vero hoc nostro scribendi genere mirifice delectatus esse mihi videtur: quippe quem equis etiam et canibus suis epitaphia aliquando condidisse accepimus (3). columnam ab eo prope Mantineam ad Epaminondae sepulcrum erectam, in eaque incisum epigramma ab eodem conscriptum, tradidit Pausanias (4). inscriptionem item pro Voconii poetae amici tumulo confecisse, testatur Apulejus (5). sed titulos ejus insignes in Tiburtina villa fuisse puto, in qua provinciarum ac locorum celeberrima inscripsisse nomina constat, ejusque partes, uti narrat Spartianus (6), *Lyceum*, *Academiam*, *Prytaneum*, *Canopum*, *Pocilen*, *Tempe* vocasse.

Plura jam conquirere opus non est, ut intelligamus, hisce auctoribus, alios quoque e doctis hominibus in hoc se artificio exercuisse: ea enim consecrari fere ac colere solemus, quae a viris principibus diligere probarique novimus. itaque illud etiam fatendum erit, inscriptiones veterum, quae exstant, magnam partem, non hominum imperitorum foetus habendas esse, sed doctorum potius virorum quaedam veluti exemplaria ad omnis posteritatis eruditionem relieta: quae sibi proponere ii omnes debeant, qui Latinos titulos facere velint. nam si veterum libros, quamquam veterum auctorum manu exarati haec aetate nulli sunt, assidue tamen, quales a librariis ad nos pervenerunt, et legimus et imitari conamur, quotiescumque latine aliquid scribimus; quanto nos magis exempla haec intueri atque imitari par est, quae nullo librariorum corrupta mendo, nulla verborum aut litterarum mutatione deformata, nobis magistri illi prope e manibus in manus tradiderunt?

nl. Sed hoc jam quaeratur, quum inscriptiones pleraeque a doctis viris olim prodiisse dicantur, arbitrione istas singulorum confectas, an communibus quibusdam praeceptis regulisque conformatas putemus? ego vero non diffiteor, si mihi ea res antiqui

(1) Xiph. l. 68. p. 1124.

(2) v. Plin. Pan. c. 51. n. 3. Svet. in Dom. c. 5. n. 3.

(3) Casaub. et Salmas. ad Spart. Hadr. c. 20.

(4) lib. 8. c. 11.

(5) Apol. pro se ipso prima p. 95.

(6) in Hadr. c. 26.



scriptoris testimonio declaranda sit, nullum in promptu me habere, quo dirimi controversia certo possit. verum ut ex poëtarum scriptis quia multi metro eodem usi, in singulis versibus eosdem singuli pedes numerosve sequuti sunt, syllabarum etiam in quolibet fere verbo alias omnino longas habuere, alias vero semper breves, idcirco suas regulas, sua pro carminibus versibusque conficiendis praecepta semper fuisse ducimus; sic etiam ex antiquarum inscriptionum exemplis, quum eorum singula genere suo contineri, et certa ratione perfecta esse videamus, quasdam etiam formulas in hoc aut illo genere usurpari constet, quae omnino in aliis desiderentur: utique non immerito ejus quoque scriptionis normam aliquam quasque artem olim fuisse existimemus. ac Maffejus quidem ex veterum inscriptionum lectione adeo id animo imbiberat, ut de ea re propemodum sententiam ferre (1) non dubitarit: *Habuerunt, inquit, cujusvis fere generis inscriptiones formulas suas: sollemnes modos et stata verba, quibus ut plurimum conciperentur.*

Quod si hujus tamen praescriptionis sive artis indicia quaedam et argumenta requiras, quum tot priscorum auctorum volumina vetustate perierint, facile adhuc in poëtarum, opinor, libris deprehendes. nam ubi opus fuit, ut titulum facerent aut de inscriptione aliqua loquerentur, ea fere protulerunt, quibus descripta a nobis genera designare ac distinguere putes: tum eas ipsas formulas nosse videntur, quae in his exemplaribus, quae nunc versamus, nunquam deesse solent: nec si quid metri necessitate adjecere, non illud ipsum stili hujus Latinam venustatem atque, ut Enniano utar verbo, breviloquentiam ostendit. primum enim animadvertas, quo pacto inscriptiones sacras vel effingant vel referant: ecce tibi inscriptio donarii Virgiliana (2),

*Aeneas haec de Danaïs victoribus arma.*

si versum dissolvas, nihil fere ab his titulis discrepet, quos libro superiore proposuimus. eandem autem simplicitatem imitatur Propertius, ubi ait (3),

*Armaque quum tulero portae votiva Capenae,*

*Subscribam, Salvo grata puella viro.*

item Ovidius, qui vota pro Corinnae puerperio munera Isidi se laturum promittens, *Adjiciam, inquit, titulum* (4)

*Servata Naso Corinna:*

nec aberrat Tibullus Venerem adloquens (5), etiamsi singularem dictionem exprimere videatur:

*Hanc tibi fallaci resolutus amore Tibullus*

*Dedicat, et grata sis, Dea, mente rogat.*

formulam *Ex Voto* donariis, quum vota solvebantur, adscribendam noverat Horatius, qui Cicirrum scurram inducit de Sarmento quacrentem, *Donasset jamne catenam*

*Ex Voto Laribus* (6)?

(1) Art. Cr. L. 1. 3. c. 2. p. 180.

(2) Aen. 1. 3. v. 288.

(3) l. 4. el. 3. in fin.

(4) Amor. 1. 2. el. 13. v. 25.

(5) l. 1. el. 9. in fin.

(6) l. 1. sat. 5. v. 65.

mitto alia exempla, quae vulgo quisque invenire possit. ad inscriptiones honorarias venio, de quibus idem Horatius loquitur; quum ait (1),

*Si quaeret Pater Urbium  
Subscribi statuis:*

itemque Tibullus ad Messalam (2),

*At tua non titulus capiet sub nomine facta:*

quorum alter inscriptionem dictionis simplicis, alter ornatae non obscure designat: quam et Iuvenalis notavit, ubi in nobilem virum *plenumque Nerone propinquo*, at ignavum otioque diffluentem, est invectus (3):

*Ergo ut miremur te, non tua, primum aliquid da,  
Quod possim titulis incidere praeter honores,  
Quos illis damus et dedimus, quibus omnia debes.*

quamquam vero titulorum horum exempla nemo fortasse e poetis expressit; difficilius enim versibus claudi poterant, dativo casu plerumque repugnante: in his tamen ipsis Horatii et Iuvenalis versibus inscriptionis honorariae forma latet: ut eam maxime honorum nominibus et praeclara aliqua virtutis appellatione constare intelligas: tum eorum etiam nomina adjecta esse, qui monumentum statuissent, Statius ostendit (4), ubi equestri statua Domitiani ingeniose descripta, ipsum denique Augustum adloquens, *Vtere*, inquit, *perpetuum populi magnique senatus munere*: quae verba declarant, in ejus basi subscriptum post Domitiani honores *S. P. Q. R.*

At qua in re magis convenire poetas dixeris, quam in epitaphii structura, sive tituli, ut ait Iuvenalis (5), *haesuri saxis cinerum custodibus?* nemo est fere, qui alia designet, quam quae in sepulchralibus veterum titulis passim legimus. primum enim non alio utuntur exordio: *Lygdamus hic situs est* (6), *Hic situs est Magnus* (7),

*Hic jacet immitti consumptus morte Tibullus* (8):

item *Manibus et cineri parentum* remissum Lausum pro sepulchro patrio dixit Virgilius (9). deinde virtutes iidem ac laudes defunctorum, quae celebrantur in epitaphiis, eodem modo attigere. Latinum mimum sic viatores e sepulchro adloquentem inducit Martialis (10):

*Dulce decus scenae, ludorum fama, Latinus  
Ille ego sum, plausus deliciaeque tuae. etc.*

haud infrequens in epitaphiis ea formula *Pius Vixit*: hanc Ovidius notabat, quum in epicedio Tibulli ait (11), *Vive pius, moriere pius*. quae mulieres post viri mortem novis nuptiis viduitatem praetulissent, eas *Vuiviras* aut *Vuivirias* fuisse, in titulo adscribebant. id Propertius sic expressit (12):

*In lapide hoc uni nupta fuisse legar,*

idemque ceteras laudes persequitur, quibus mulierum epitaphia carere non solent.

(1) Od. 24. l. 3. v. 27.

(2) l. 4. carm. 1. v. 33.

(3) Satyr. 8. v. 67.

(4) lib. 1. Silv. 1. v. 99.

(5) Satyr. 10. v. 144.

(6) Tib. lib. 3. el. 2. v. 29.

(7) Lucan. 1. 8. v. 793.

(8) Tib. 1. 1. el. 3. v. 55.

(9) Aen. 1. 10. v. 827.

(10) lib. 9. epig. 29.

(11) v. 37.

(12) l. 4. el. 11. v. 56.

Iam vitae annos pauci omisere, esto, numerum per figuras ex poëtarum more distinxerint. et quia filiorum saepe numerum parentibus adponebant, ne id quidem omisit Martialis in matronae epitaphio (1):

*Quinque dedit pueros, totidem mihi Iuno puellas:*

adjecitque idem, quemadmodum lapides habent aliquando, quot liberos superstites reliquisset:

*Clauserunt omnes lumina nostra manus.*

mitto sophorum sententias et postremas salutationes: ceterae quoque clausulae versibus expressae (2):

*Parce, precor, manes sollicitare meos.*

et quam libro primo jam protuli (3),

*Ossa quieta, precor, tuta requiescite in urna,*

*Et sit humus cineri non onerosa tuo.*

loei vero religiosi mensuram et sepulturae jus, quae tumuli plerique referunt, leges apud Horatium (4),

*Mille pedes in fronte, trecentos cippus in agrum*

*Hic dabat: haeredes monumentum ne sequeretur.*

multa denique simul complexus est Martialis in Glauciae epitaphio, quod subjiciam: est enim e bonis unum, quae ille edidit eum pluribus malis (5):

*Libertus Melioris ille notus,*

*Tota qui cecidit dolente Roma,*

*Cari deliciae breves patroni,*

*Hoc sub marmore Glaucias humatus*

*Iuncto Flaminiae jacet sepulcro.*

*Castus moribus, innocens pudore,*

*Velox ingenio, decore felix.*

*Bis senis modo messibus peractis*

*Vix unum puer applicabat annum.*

*Qui fles talia, nil fleas, viator.*

Enim vero historicas quoque inscriptiones poëtae agnovere. scio eos multa more suo luisse, opera publica et privata carminibus celebrantes: in quibus ab inscriptionum modo et simplicitate abiere. sed tamen, ubi titulos, qui aetate sua positi fuerant, commemorare opus fuit, pressius multo loquuti, elementa eorum sic retulerunt, ut ab exemplis, quae adhuc manent, nihil ii discrepare videantur. vias Messala Tuseulanam atque Albanam pecunia sua muniverat: idque inscriptionibus ibidem marmori incisis testatum esse voluerat: igitur de utraque sic scripsit Tibullus (6):

*Non taceam monimenta viae, quae Tuscula tellus,*

*Candidaque antiquo detinet Alba lare:*

(1) lib. 10. epig. 63.

(2) Ovid. Tr. 1. 3. el. 11. v. 32.

(3) id. Epic. Tib. dist. ult.

(4) l. 1. Sat. 8. v. 12.

(5) lib. 6. epig. 28.

(6) lib. 1. el. 7. v. 57.



*Namque opibus congesta tuis hīc glarea dura*

*Sternitur, hic apta jungitur arte silex.*

atque artis quidem suae coloribus usus est Virgilius, ubi portum Augusti ad Bajas descripsit; sed fortasse inscriptionis etiam, quam illic Augustus incidendam curaverat; verba idem et formulas delibavit, quae certe cum historicae inscriptionis dictione magna ex parte consentiunt (1):

*An memorem portus, Lucrinoque addita claustra,*

*Atque indignatum magnis stridoribus aequor,*

*Iulia qua ponto longe sonat unda refuso,*

*Tyrrhenusque fretis immittitur aestus Avernis?*

*Memores Fastos* Horatius nominat (2), nec alios designat, quam eos, quorum tot etiamnum reliquiae supersunt, exempla ejus generis et nobis et posteritati futura: quibus magistratum, bellorum, triumphorum, ludorum, censuum, lustrorum consignatam memoriam habemus.

Ab his ellogia idem distinxit, eaque quodammodo definivit, ut jam monui, hoc pacto (3):

*. . . incisa notis marmora publicis,*

*Per quae spiritus et vita redit bonis*

*Post mortem ducibus:*

quorum sane Augustus in foro suo memoriam renovavit. eam vero dictionem versibus expressit saepe Martialis (4), expressit et Ausonius: qui ut Imperatorum Romanorum, sic patris sui ellogium scripsit (5), quod ejus imagini subjiceret.

Leges denique ipsas atque edicta vix aliter poëtae extulerunt, quam in tabulis scriptae prostabant. quid enim aliud imitantur jocularia illa Horatiana (6)?

*. . . . . Ter uncti*

*Transnanto Tiberim, somno quibus est opus alto,*

*Irriguumque mero sub noctem corpus habento:*

α quae idem de poëmatis praescribit (7)?

*. . . . . dulcia sunt*

*Et quocumque volent, animum auditoris agunto.*

aut Persii ille versus (8)?

*Grande loquuturi nebulas Helicone legunto:*

iterumque Horatii musa (9)?

*. . . . . Vter aedilis, fueritve*

*Vestrum praetor, is intestabilis et sacer esto.*

Atque haec satis, opinor, quo intelligas, quum summi poëtae in urbe florerent, jamtum regulas quasdam exstisse inscriptionum conficiendarum, nec ignota his fuisse

(1) Georg. 1. 2. v. 161.

(2) 1. 4. od. 14. v. 4.

(3) 1. 4. od. 8. v. 13.

(4) lib. 9. epig. 103. etc.

(5) Edyll. 2.

(6) 1. 2. Sat. 1. v. 7.

(7) Art. poet. v. 99.

(8) Sat. 5. v. 7.

(9) 1. 2. Sat. 3. v. 180.



discrimina et formulas generum singulorum: quas quamquam alias in aliis ipsa argumenti ratio et natura postulare videbatur; haud tamen poetæ quasi certis iudiciis articulatim distincteque notassent, nisi sedem earum et distributionem vetus jam consuetudo ususque celebrasset.

III. Sed tamen definitam hanc inscriptionum formam, certasque singularum regulas, quas quisque Augusti ætate sequebatur, ante Tullii tempora obtinuisse, vix puto: ejus ætate primus fortasse M. Varro in Menippeis suis aliquid de Epitaphiis scripsit: quemadmodum titulus indicat ejus argumenti a Nonio bis memoratus (1): nam liber ipse paene totus interiit. Romæ utique a Punico bello secundo plus aliquid litteris datum esse temporis, itaque inscriptiones etiam elegantius scribi coeptas, nemo inficietur. nihilominus si cum his nostris, quas libro primo illustravimus, eas nunc comparemus, quæ a Livio in historiam suam relatae sunt; ut quaedam stili hujus elementa facile agnosceamus, sic ultro illud dabimus, minime ad eam normam exactas esse, ad quam deinde insignis Pompeii titulus ceteraque inscriptiones confectae sunt. prima sit, quam M. Aemilius Lepidus censor posuit supra valvas templi *Larium Permarinum* anno Varr. DLXXXII. quod templum voverat L. Aemilius Regillus navali proelio adversus praefectos regis Antiochi (2): ejus tamen exemplum abruptum vexatumque accepimus, ut ut Maffejus Saturniis id versibus scriptum esse perviderit (3):

DVELLO · MAGNO · REGIBVS · DIRIMENDO · . . .  
CAPVT · . . . SVBIGENDIS · . . . PATRANDAE · PACIS  
· . . HAEC · PVGNA · EXEVTI · L · AEMILIO  
M · AEMILII · F · REGILLO · PRAETORI · . . AVSPICIO  
IMPERIO · FELICITATE · DVCTVQVE · EIVS · INTER  
EPHESVM · SAMVM · CHIVMQVE · CLASSIS · REGIS  
ANTIOCHI · ANTE · D · XI · K · IAN · VICTA · FVSA  
CONTVSA · FVGATAQVE · EST · EA · PVGNA  
PVCNATA · REX · ANTIOCHVS · REGNVMQVE  
EIVS · . . . . .  
EIVS · REI · ERGO  
AEDEM · LARIBVS · PERMARINIS · VOVIT

bellum hic designabatur, ni fallor, inter Antiochum et Eumenem (4), quod Regillus ita derimendum suscepit, ut Eumenem adjuvans, hostes (5), quod *caput* erat, *subigeret*. itaque repudiatis *patrandae pacis* conditionibus, *exeunti* ad proelium, *pugna* illa, quam tabula votiva Larium templo affixa referebat, *Regillo praetori* oblata fuerat (6), qua *pugnata rex Antiochus regnumque ejus*, ut a Livio accepimus (7), pos-

(1) in Varr. fragm. p. 272. edit. Bipont.  
(2) Liv. l. 40. c. 28. n. 52.

(3) Diplom. p. 188. et Art. Cr. L. p. 34.  
(4) v. inscr. 312. lib. I.  
(5) Liv. l. 37. c. 16. n. 18. etc.

(6) ibid. c. 21. n. 29.  
(7) ibid. c. 22. n. 31.

sessione maris exclusum est. conferto haec, si libet, cum inscriptione xxxi. libri primi, in qua sane multo majora a Pompejo paucioribus conclusa sunt versibus, atque ita conclusa, ut nec demi quidquam nec addi posse videatur. facile, opinor, intelliges, M. Lepido multa et praeclara conanti dicere, si minus verba, at exempla certe defuisse, quorum ad normam res a Regillo gestas perpetua oratione numerose comprehenderet.

Nec vero dissimili oratione scriptus index tabulae ejus, quam Ti. Gracchus anno Varr. dlxxxl. in aede Matris Matutae posuit (1):

TI · SEMPRONII · GRACCHI · CONSVLIS  
IMPERIO · AVSPICIOQVE  
LEGIO · EXERCITVSQVE · POPVLI · ROMANI  
SARDINIAM · SVBEGIT  
IN · EA · PROVINCIA · HOSTIVM · CAESA · AVT  
CAPTA · SVpra · LXXX · MILLIA · RE · PVBLICA  
FELICISSIME · GESTA · ATQVE · LIBERATIS · SOCIIS  
VECTIGALIBVS · RESTITVTIS · EXERCITVM · SALVVM  
ATQVE · INCOLV MEM · PLENISSIMVM · PRAEDA  
DOMVM · REPORTAVIT · ITERVM · TRIVMPHANS  
IN · VRBEM · ROMAM · REDIIT · CUIVS · REI  
ERGO · HANC · TABVLAM · DONVM · IOVI  
DEDIT

Par etiam epitaphiorum ea aetate forma, quibus et aliquid detrahere videtur vetus illa scribendi ratio, loquentium saepe respondens sono, quam primum Sirmondus in Scipionis, Barbatii filii, monumento animadvertit (2): nuper vero nos quoque in ejusdem familiae titulis sepulchralibus vel minus antiquis deprehendimus. nam hic, exempli caussa, Scipionis Asiatici filio titulus positus est in familiari hypogeo ad ipsum sarcophagum, in quo ille conditus fuerat:

L · CORNELI · L · F · P ·  
SCIPIO · QVAIST ·  
TR · MIL · ANNOS  
GNATVS · XXXIII ·  
MORTVOS · PATER  
REGEM · ANTIOCO  
SVBEGIT

non Manium, ut vides, mentio facta, non tribus indicata; neque militiae tempus, ne-

(1) Liv. l. 41. c. 28. n. 28 Reins. Cl. 4. n. 1. (2) Vetust. inscr. etc. Romae 1617.

que, ut vitae anni, sic menses aut dies adscripti: non parentium aut filiorum nomina, non caussa mortis, non consulatus ac dies, quo decessit, non precatio aut salutatio subjecta est: quorum pleraque in recentioris aetatis monumentis recepta, et certis sunt legibus usurpata.

V. Nunc ad poëtas ut redeam, omnia eorum testimonia nullum inscriptionum genus novum, praeter ea, quae statuimus, fuisse indicant: ut poëtarum etiam auctoritas sex omnino genera antiquitus constituta demonstret. non igitur easu aliquo factum est, ut, vetustis inscriptionibus distributis, haec repente nobis existerent genera, quae suis singula limitibus descripta continerentur. fuisse potius homines literati dicendi sunt, qui ea consensu quodam atque iudicio definirent, distinguerentque, ac propositis demum exemplis ostenderent, quid cuique generi potissimum conveniret. qua in re quamquam ipsa fere argumenta indicio esse poterant, quae cuique generi partes, quae notae, quae formulae adsignandae essent, praeceptis tamen quibusdam ac regulis opus erat, quibus maxime collocationis ordo et dictionis contrahendae ratio traderetur. haec vero praecepta atque has regulas, quicumque tandem eam primi constituerant, alii deinceps atque alii e doctis viris, quorum tituli manent, non modo non repudiarunt, sed etiam ipso diuturni temporis usu et diligenti exemplorum imitatione comprobaverunt.

Quae quum ita sint, videant ii, qui arbitrio suo Latinas, ut ipsi vocant, inscriptiones facitare solent, quam bene quamque latine scribere dicendi sint, iis omnibus neglectis, quae Latini veteres diligentissime servanda ac retinenda esse existimaverunt. equidem sic censeo, quemadmodum qui elegiam scribit Latinam, aut Latinam odem, non alia mensura versus faciat, necesse est, quam quae veteribus poëtis placuit; sic qui Latinam inscriptionem se condere profiteatur, huic veterum rationem modumque esse sequendum, ut ab eorum exemplis ne transversum quidem unguem discedat.

## §. II.

*De difficultate inscriptionum*

1. **V**idear fortasse meam rem agere, et laudi, ut sit, velificari meae, qui Latinarum inscriptionum, quarum artificium componere coner, difficultatem verbis extollam. nam in paucorum verborum vel delectu vel conjunctione magnum esse laborem quis credat? praesertim quum exemplorum tanta sit copia, ut non modo rationem inde atque formam ediscere, sed etiam formulas quisque ac sententias haurire possit. verum qui animadverterit, post eruditam illam Augustorum aetatem quanta bonarum inscriptionum sit paucitas; non hic potius industriam a me venditari, aut ostentari artem putet, quam in ipsa re non exiguam difficultatem inesse fateatur. neque enim aliis post multa saecula expeditius atque facilius esse dicet, quod ab illis temporibus proximi recte imitari atque exprimere nesciverunt.



Scio fuisse quosdam e recentibus titulorum scriptoribus (1), qui quum vererentur, ne quae scripserant, creditis hominibus parum probarent, omnem in eos culpam fere contulerunt, quorum nomine et rogatu inscriptiones condidissent: nimirum quod sibi, ut aiebant, non res solum et versus, sed verborum paene ac litterarum numerum circumscripserant: vel quod, moribus jam ad nimiam ambitionem incumben- tibus, nihil iis moderatum, nihil justum placere posset. ceterum neque ex hoc genere hominum fuisse omnes dixeris, ut scriptoris iudicio numquam adquiescerent; et qui erant, non ita hunc obligare atque impedire poterant, ut stilo suo plerumque uti non posset. video tamen quosdam, quum aliorum vel levitati vel studiis dedissent, ut et multa detractis ornamentis inviti efferrent, et rursum, quae nollent, non justa inscriptione concluderent, parum aliquando vel in iis nihilominus profecisse, quae in ipsorum arbitrio esse ac potestate videbantur. quid enim erat praeterea caussae, quin ea ipsa, quaecumque essent, quae sibi illustranda sumpserant, quam aptissimis verbis numerisque deducerent? quis eos vetabat aut convenientia rebus vocabula praecoccupare, aut sollemnibus formulis loco uti?

II. Id nempe primum est illud, quod fieri sine summa difficultate non potest, veterum dictionibus ac formulis modice et scienter uti, et ut ne dedecet. nos quidem jamdiu in magna rerum novitate, et peregrina argumentorum insolentia versamur; Latini tamen sermonis minime propagati sunt fines; imo angustiores facti. neque enim omnia usurpare nunc licet, quae olim licuit, sublatis jam, quae vocabulis suberant, rebus, et plurimorum usu verborum cum vestigio imperii ac veteri illa superstitione deleta. itaque quum haud raro novi generis rebus praeas illas Romanorum dictiones aptare debeamus; sic nobis temperandus quodammodo, atque ad tempus et ad res moderandus est sermo, ut nec contra mores nostros nec contra veterum exempla peccemus: atque ut latine quidem et cum dignitate loquamur; neque tamen Romanos veteres adloqui, sed et civibus nostris et posteris omnibus scribere videamur. id vero maximam profecto diligentiam acerrimumque iudicium requirit, ut ex penu antiquorum thesauroque nec ea depromamus, quibus religio nos aut patrii mores uti vetant, et nihil non sumamus eorum, quae his non repugnant: res denique ac verba inter se nisi consentiant, non inani sono, non nimis exquisito dicendi genere teneamur.

Huc pertinet sacerdotiorum, magistratuum, munerum novorum appellatio, ejus causa inscriptionem saepe vel obscuram esse vel barbaram, paene necesse sit. nam si praeis vocabulis utamur, quum perraro nova cum veteribus convenient, sententia lateat obscuritate involuta verborum: sin autem ea vernaculis nominibus designemus, Latinam inscriptionem pollucere, splendoremque ejus maculis adspargere videamur. neque vero eos non saepe scopulos offendas: quippe nullum prope est inscriptionum genus, in quo ejusmodi nomina efferre non oporteat. quae res titulorum scriptores adeo torsit, ut numquam statuere potuerint, quam in his rationem viamque sequerentur: ac modo Latinis plane vocabulis, communi hominum sensu adversante ac repugnante, usi sunt;

(1) Zenus vol. 3. ep. 56. Marcell. epist. ad Ferrar. Inscrip. etc.



modo peregrina ac barbara nomina, quae omnium aures respuerent, nec verecunde nec dubitanter receperunt.

II. Accedit eodem inscriptionum a genere ipso recta distinctio, quam nulli adhuc nos eruditorum libri docuerunt: quum eam tamen qui nesciat, ab antiquorum norma saepe errare, necesse sit. vix enim fieri potest, ut is multa non misceat, et formularum discrimen nullum faciat, perinde quasi omnibus omnes generibus convenirent. quod multo secus esse, nos quidem quum ipsa libri superioris distributione satis ostendimus, tum hujus et sequentis non uno capite fusius demonstrabimus.

Ipsa etiam collocatio nexusque verborum non caret lege. alia veteres praecire, alia subsequi voluerunt: quaedam nullo jure dissociari possunt; quaedam contra intermediis vocabulis distinguenda sunt: quibus in rebus vel investigandis vel addiscendis antea scriptoris industriam versatam esse oporteat, quam ad scribendum se conferat. ii certe, qui haec omnia neglexerant, quamquam exigua videri solent, numquam in titulis pangendis illud praestare potuerunt, quod receperant: et pro Latina inscriptione orationunculam conficere nec iucundam nec opportunam.

Denique hoc quoque in isto litterarum genere molestissimum invenitur, ut vel imperiti de inscriptione judicent, ac temere plane, et nulla ratione, nullo auctore judicent. quippe, quod latine aliquid sciant, satis quidem se intelligere posse arbitrantur, inscriptione rei quadret, an non: eo fit, ut de stilo etiam judicare velint, quem plerumque ignorant, et ea fere damnant, quae non intelligunt. cuinvero vix ferri potest, quum tu inscriptionem eandem saepe fluxeris ac reflexeris, singulas partes ad prisca leges exegeris, nihil propemodum usurpaveris, quod non veteri auctoritate nitatur; esse tamen homines tanta impudentia, qui quod vix oculis semel perlegerunt, non modo sibi non placere, sed etiam ineptum esse aut obscurum aut parum Latinum, tamquam de sella ac tribunali pronuncient.

III. Haec, et si quae sunt hujusmodi, tantam olim vel difficultatem habere vel molestiam visa sunt, ut quidam ab his conatibus deterrendos adolescentes putarent. iidemque auctores essent, ut tituli lingua vernacula scriberentur. sed tamen ne animum despondeamus, aut in istorum sententiam adducamur, vel id unum valere plurimum debet, si eas nempe inscriptiones consideremus, quae aut sub initium saeculi superioris a Francisco Pola confectae sunt, aut hac ipsa aetate, ut alios mittam, a Matthaeo Egizio et Guidone Ferrario in lucem prodierunt: qui si novas res atque a Romanorum consuetudine remotas Latina fere dictione aptissimisque vocabulis efferre, atque ad veterum normam et prisco illo characterē saepissime explicare potuerunt; quid ni alii tentare nunc idem, atque adeo hos ipsos studio possint et diligentia superare? praesertim quum nova quotidie monumenta, quae sub terra latebant, in utilitatem nostram egerantur, et dictionis hujus opes atque optimorum verborum census in dies crescat: quare multo etiam verius dicere possumus, quam aut olim Quintilianus dixerit (1),

(1) Inst. l. 12, c. 11.

aut majores nostri dicere potuerint, *Tot nos praeceptoribus, tot exemplis instruxit antiquitas, ut possit videri nulla sorte nascendi aetas felicior, quam nostra, cui docendae priores elaboraverunt.*

Nam quae difficultas ab inscriptionis natura duci potest, ea non Latini sermonis propria, sed linguarum omnium communis est. nemo inempta oratione, nemo vulgaribus aut obsoletis vocabulis uti debet: nihil obseurum, nihil ambiguum sit, oportet: contractio autem et brevitās sic amanda, ut nihil de perspicuitate, nihil de dignitate detrahatur. at habet hoc proprium Latinus sermo, non modo ut humi numquam repat, nullisque sordibus obsolescat: sed etiam ut res ipsas, quae tractantur, nitore quodam illustret, ac numero orationis intendat.

V. Ergo quod inchoavi, absolvere conabor, daboque operam, ut tironum labor meo aliquid labore minuatur. habebunt hi hoc libro et quae ad singula inscriptionum pertinent genera, et quae omnibus communia sunt; eaque non tam argumentis nixa, quam exemplis, ut non meam, sed veterum auctoritatem sequenti, rectam ipsi et numeris absolutam inscriptionem et agnoscant et condant: quae scilicet non modo rem propositam Latina, justa, dilucida, numerosa oratione complectatur; sed etiam ad certum aliquod e sex illis generibus, quae statuimus, atque ad id potissimum, quod argumento convenit, referri possit. iisdem autem usi regulis exemplisque, obtrectatorum, qui semper difficiles et morosi sunt, judicia jam et refutare et continere jure poterunt. quamquam neutrum vel scriptis malo, vel ulla contentione faciant; sed, ut Aspendius ille (1), omnia intus sibi canant: nam in his raro altereando quisquam aut refellendo multum profecit.

## PARTITIO PRIMA

### DE SEX GENERIBVS INSCRIPTIONVM

Qui veteres Latinorum inscriptiones, unde nobis exempla petenda sunt, diligenter accurateque perpenderit, quum ex his praecepta quaedam oriri fatebitur, alia generum communia omnium, alia propria singulorum; tum vero in unoquoque genere quaedam ad ipsum genus pertinere intelliget, quaedam contra ad partes ejus, quemadmodum et in arte poetica non modo quaedam de poësi generatim, alia de singulis carminum generibus traduntur; sed nonnulla etiam de his subiei solent, quae eodem in carmine ob argumentorum varietatem modo usurpanda, modo omittenda aut inflectenda videantur. eniuvēro praeceptorum ratio ipsa atque ordo posebat, ut quae communia essent, primus his locus concederetur. sed quia, nondum demonstratis generibus inscriptionum, alia fortasse exemplis pluribus, alia longiori oratione explicanda fuissent: quaedam praeterea vel inutilia plane, vel fere inopportuna futura erant; ea hic parti-

(1) Cic. in Verr. l. 1. c. 20. et Ascon. in comm.

tionem mihi utendum putavi, quae libro primo facta est: ut cognitis singulorum generum proprietatibus, ea demum tirones arriperent, quibus artificium hoc totum absolvi numeris perficique videretur. at singulis tamen capitibus, quod pereommode cadet, primum de ipso genere, deinceps de partibus dicam: ut primum ea potissimum, quae generatim cavenda, tum quae singulatim praestanda sint, accurate tradantur.

## C A P V T I.

### *De inscriptionibus sacris*

#### §. I.

#### DE RATIONE GENERIS VNIVERSA

1. **A**ge vero, ad inscriptiones sacras quod attinet, veterum tibi exempla, quae primo libri primi capite proposita sunt, ob oculos ponito. ea sane Christianorum titulorum scriptori quamdam veluti formam ac regulam exhibent inscriptionum omnium sacrarum. quid tamen? quum ex contaminata illa superstitione desumpta sint, non solum propudiosorum Deorum nomina, sed quaedam etiam offerunt interdum, quae a Dei cultu atque a sacerorum nostrorum sanctissimis religionibus quam maxime abhorrent: cujusmodi sunt sacra, castus, sacerdotia, appellationes item et nomina quaedam, quae in Romanos mores turpis olim adsentatio impietasque induxerunt. quid igitur ipso initio admonendum duxerim, nisi ut veteribus exemplis sic utamur, ut ordinem ipsum verborum normamque teneamus: quae vero perversam religionem sapiunt, funditus repudiemus? nam si qui olim ex Italis nostris, scriptores laude ac memoria digni, plerasque ejus generis formulas, easque non parce detortas, antiquitatis amore quodam decepti, in libros suos derivare non dubitarunt; fuere etiam viri quidam eruditissimi, qui levitatem eorum siue potius superstitionem gravissimis verbis castigarent.

Ac mihi quidem plane furere videatur, si quis nunc ritus Christianos et sanctissimas caerimonias iis vocabulis efferre audeat, quae nulla majorum auctoritas, nulla vetus consuetudo sacraverit: ut qui olim historiam et epistolas scribens, tam multa miscuit; nec haesit erubuitque, summum Pontificis Maximi consilium appellaturus, *Collegium Augurum* dicere: aut sacrum demortui caussa faciundum dicturus, *Diis Manibus litandum* pronunciare: et qui haud multos ante annos de mira animorum conjuncture, quae ex affinitate orta esset, inscripsit in monumento publico *Ara Amicitiae Dicata Consecrataque Est*. tu vero, me quidem auctore, neque *Delubra* neque *Fana* nominaveris, quae Dei optimi maximi templa sint: illis enim vocabulis Christiani veteres abstinerunt (1): eademque de caussa neque *Flaminem* uni addietum templo sacerdotem, neque *Aquas lustrales*, quod Tertullianus alique Latini scriptores *Baptisma* appellarunt: ac ne *Vestales* quidem, quae se Deo virgines devoverunt: quamquam eas *Christianas Vestales* mira pugnantium verborum compositione dixit non semel Aguilera (2), auctor fere in scribendo et elegans et prudens. similia sunt, quum Iesus Dei filius *Heros* vocatur, Angeli vero *Genii*, Roma *Vrbs aeterna*: nonne ista omnia re-

(1) Baron. Ann. t. 1, an. 57, c. 101, in fin. (2) in Hist. Sicul. Soc. Ies.



spuunt aures, repudiat religio, sanae denique mentes adspernantur? atque hoc utique nomine Bembus potissimum multorum sermonibus vapulavit: de quo Lipsius ad Ianum Dousam (1): *Quid, inquit, quod etiam in divinis rebus haec sibi permittit? et Fides nostra non nisi Persuasio illi est? Excommunicatio Aqua et igni interdictio: Peccata morituro remittere Deos superos manesque illi placare. ipse Deus raro in stilo aut animo; sed prisco ritu Dii immortales: idque in seriis maxime sententiis aut rebus: atque adeo quod omnem stultitiam superet, prudens ille Senatus Venetus ad Iulium Pontificem publice scribit, Vti fidat Diis immortalibus, quorum vicem gerit in terris.*

Cetera tute jam noveris: sed illud tamen mihi praetermittendum non est, ne *Divos* quidem recte nominari, quibus caelestes honores decreti sint: quamquam ea vox in ore omnium esse solet, atque in titulis maxime frequentari: quam et in eo leges, qui Venetiis est, a Francisco Pola perscriptus, et ab Octavio Boldonio notatus (2):

D I V I S  
PRAESTITIBVS • INVANTIBVS  
GEORGIO • STEPHANOQVE  
QVI • EST • PROTOMARTYR  
CVM • DEO • OPT • MAX •  
DICATVM • DEDICATVM • ESTO • HOC • TEMPLVM  
QVOD  
SANCTVS • MONACHORVM • ORDO  
DE • SVA • IMPENDIA  
OPERE • CVLTVQVE • OMNI  
AMPLIAVIT  
EXEQVENTE • DOMINICO • COLONIEN •  
ARCHIMANDRITA  
M • D • C • X •  
LEONARDO • DONATO • PRINCIPE  
MAXIMO • FELICI • PERENNI

equidem quum hic Polae iudicium requiro, quod sanctos illos Caelites ante Deum optimum maximum recensuerit; quippe nil ei patrocinari debent exempla Gruteriana (3) de *Iove* post reliquos Deos scripto: tum cum probare non possum, quod eosdem *Divos* potius, quam Sanctos, nec solum adjectivo, ut alii, sed substantivo etiam nomine appellarit: neutrum enim convenire iis puto, qui ex hac vita caelo recepti apud Deum aevo sempiterno fruuntur. nam quos olim quaeso Latini *Divos* dixere, nisi eos, qui Dii habebantur, quibus sacra fiebant, quorum arae passim et templa et flamines in urbe erant? sive illi demum perpetui, sive ex hominibus Dii facti putarentur. quin etiam Varronis aetate, ut libro primo adnotavi (4), *Divi* dicebantur, qui perpetui: reliquam turbam Deos nominabant: itaque a Virgilio Iuno *Diva*, Iuturna *Dea* est appellata (5): *Dea* item Livia Tiberii mater post *Αποθεωσις* ut leges in Sicula inscriptione (6):

LIVIAE • AVGVSTI  
DEAE  
MVNICIPIVM

sed Tullius tamen Deos omnes nullo discrimine saepissime *Divos* vocat (7), vocat et

(1) Cent. 2. Misc. ep. 57.

(2) Pol. Inscr. p. 309. n. 7. Bol. Epigr. l. 2. n. 2. pag. 49.

(3) p. 2. n. 9. et 10.

(4) ad inser. 335.

(5) Aeg. l. 12. v. 138.

(6) Castel. Cl. 4. n. 4.

(7) de Nat. Deor. l. 2. c. 2. n. 4. etc.

Livius et Horatius et alii: iidemque eo semper vocabulo sic utuntur, non ut divinos homines, sed ut Deos plane appellare videantur.

Istam ne vero nunc de sanctis viris, qui obierunt, opinionem habemus, ut eos minime jam ad humanum genus pertinere, Deosque omnino factos arbitremur? profecto, si recte sentimus, nemo unus affirmabit: eo igitur vocabulo qui utatur, aliud animo cogitare, aliud verbo reddere videtur: quod non solum ineruditum est, sed etiam absurdum; praesertim quum ubi ab eo tibi vocabulo temperaveris, alia numquam deesse possint, quibus scite ac commode caelestes sanctorum virorum honores designentur: quemadmodum libro tertio deprehendes, quum exquisitam tibi ac lautam inscriptionum quasi suppellectilem ob oculos explicabo.

II. Nunc illud in disquisitionem veniat, recte ne quidam fecisse dicendi sint, qui in religiosis monumentis templa non Deo, sed sanctis tantum Caelitibus sacra aut dicata esse, inscripserunt. nam in Gratiani Decreto (1) saepe legas, *Deo templa dicari, Deo sacra esse*: et sunt, qui contendant, numquam olim nisi Deo templum esse dicatum, nec dicari oportere: ut eas ipsas aedes, quibus veteres Christiani fortissimorum Martyrum memoriam consecrarunt, uni Deo sacras in eorum honorem ac memoriam fuisse censeant. Eusebius certe templum a Constantino in urbe sua aedificatum *Μαρτυριον* appellat (2) *ἐπὶ μνήμῃ* tantum *τῶν Ἀποστόλων*, non Apostolis dedicatum: ac templa ipsa *Memorias* appellata animadvertit Baronius (3), *quod in memoriam, inquit, sanctorum Martyrum erigi, et Deo dicari consueverant*. horum sententiam ego quoque aliquoties sequutus sum: uti aliquot ante annis in ea inscriptione, quam amici optimi virique eruditissimi Michaëlis Catalani rogatu confeci ob novi templi dedicationem, quod Molliani in oppido agri Firmani exaedificatum fuerat. eam hic primam meis ex adversariis depromam: unde alias deinde, occasione data, confidentius proferam; nec tamen ut exempla, quis enim hoc sibi adroget? sed ut conatum tironi aliquem et adumbrationem exhibeam: quas item hoc libro, non ut alibi usquam incisae, sed ut a me exaratae sunt, sic describam. neque enim semper aut rescire potui, quales jam in marmore legerentur, aut cavere licuit, ne quid unquam ad aliorum libidinem mutaretur. porro Mollianum quam misi, haec fuit:

DEO • OPTIMO • MAXIMO • SACR •  
 IN • HONOREM • MARIAE • VIRGINIS • SIDERIBVS • RECEPTAE  
 ORDO • POPVLVS • QVE • MOLLIANENSIS  
 TEMPLVM • A • MAIORIBVS • OB • DEPVLSAM  
 PESTILITATEM • EX • VOTO • CONSECRATVM  
 VT • FREQUENTIAE • MVNICIPVM  
 ET • STATIS • SVPPPLICATIONIBVS • AVGVSTIVS • PATERET  
 PECVNIA • PVBLICA • ET • OMNIVM • SODALITATVM  
 NOVA • FORMA • REFIENDVM  
 LAXANDVM • QVE • CVRAVIT  
 DEDIC • VII • IDVS • IVN • ANN • M • D • C • C • LXXIII •  
 AB • VRBANO • PARACCIANO • CARD • ARCHIEP • PRINC • FIRM •  
 CIVIS • ETIAM • OPE • ET • INSTANTIA • PERFECTVM • EST

Sed tamen qui Virgini Matri, qui Martyribus ceterisque sanctis Caelitibus templa dicata esse, in monumentis inscribunt, Bellarmini summi viri auctoritate faciunt, cuius

(1) part. 3. de consecr.

(2) in V. Constant, l. 4. c. 58.

(3) H. E. an 57. c. 101. 2, n. 4. etc.

ea sunt verba (1): *Sacrae domus non solum Deo, sed etiam Sanctis aedificantur et dedicantur*. atque haec ille confirmat quum sacrorum Conciliorum decretis, tum scriptorum veterum testimoniis, qui saepe et Martyrum aedes, et Basilicas his dicatas commemorant. nam quod veteres Christiani, aliter sane, atque nunc facimus, Basilicas Memoriasque a templis distinguere solebant; non ideo alias fuisse aedes putaveris, quae sacrificiorum causa exstructae, *Templa* dicerentur, alias, quae ad preces festosque conventus aedificatae, *Memoriae* aut *Basilicae* appellarentur. in quolibet enim *Basilica* aut *Memoria* sacrum ad sepulcra Martyrum facere mos fuit: sed tum maxime, quum sacrificia in his fiebant, *Templa* vocabantur: eoque sensu dixit Basilius (2), *Παs δε ναs, Θεου ναs*: unde etiam Augustini mentem facile assequere (3): *Nos, inquit, Martyribus nostris non templa sicut Diis, sed Memorias sicut hominibus mortuis, quorum apud Deum vivunt spiritus, fabricamus: nec ibi erigimus altaria, in quibus sacrificemus Martyribus, sed uni Deo et Martyrum et nostro sacrificium immolamus*. templa igitur, quia etiam *Memoriae* sunt et tamquam regalia quaedam magnorum virorum monumenta, recte sanctis quoque Caelitibus dedicabimus, et in eorum frontibus sacra aut dicata esse inscribemus: utcumque, si sacrificium spectes, quod ibidem Deo fit, Dei aedes esse, Deoque sacras, fatendum est.

III. Quid tamen, de Altaribus idem ne statuas? Altaria Deo uni dicari certum est, quum ei sacrum ibidem soli fiat, ejusque numine omnia compleantur. nam, ut ait Augustinus (4), *Quis audivit aliquando fidelium stantem sacerdotem ad altare etiam super sanctum corpus Martyris ad Dei honorem cultumque constructum dicere in precibus, Offero tibi sacrificium Petre vel Paulle vel Cypriane, quum apud eorum Memorias offeratur Deo, qui eos et homines et Martyres fecit, et sanctis suis Angelis caelesti honore sociavit*. itaque in ipsa inscriptione sepulcrum ab altari distinguendum est: neque hoc ei dicatum recte dixeris, cujus illud cineres habet; quum Sepulcrum Martyri, Altare Deo positum fateamur. equidem inscriptionem concedere jussus ad Martyris tumulum in ipso altari incidendam, hanc aut hujusmodi satis probabilem meo judicio putarem;

DEO • MAGNO • AETERNO  
SACR •  
S • P • Q • R •  
SANCTIS • CINERIBVS  
SEBASTIANI  
MARTYRIS • INVICTI  
SOSPITATORIS  
IMPOSVIT  
MERITO

quod si sepulcrum nullum sit, sed imago tantum alicujus e Caelitibus, quid ni titulum in altari inscribas hujusmodi?

DEO • SACR •  
IN • MEMORIAM  
AGATHAE • VIRGINIS  
MARTYRIS  
GENS • CLAVDIA  
VOTO • SVSCEPTO

(1) de cult. Sanct. l. 3. c. 4. n. 56.  
57. etc.

(2) t. 3. epist. 8. n. 11.  
(3) de C. D. l. 22. c. 10.

(4) ibid. l. 8. c. 27.



Ceterum de ipsis templorum cellis, quas veteres Christiani *Basilicas* aliquando appellarunt (1), ante hos Latini *Aedes* etiam dixerunt (2), idem ego hic tradi posse arbitror, quod modo de templis dicebam. sunt enim monumenta ad sacros Martyrum cineres adservandos, atque ad memoriam sanctorum virorum recolendam exstructa: quo prope pacto Mausolea regibus ducibusque magnifica memoriae atque honoris causa excitantur: nisi quod ibidem a sanctis Caelitibus, ut religio nos docuit, opem etiam praesidiumque imploramus. quare his sive cellis sive aedibus basilicisve inscribas, si libet, *Angelis Custodibus Liberorum Domus Augustae, Apostolis Conservatoribus Pontificis Maximi, Laurentio Martyri Pollenti Victori*, et similia.

III. Nec vero Vota ipsa sanctis Caelitibus soluta minus recte dicentur. votorum siquidem his nuncupandorum antiquum plane morem apud Christianos declarat Fausti calumnia, quam contudit Augustinus (3): *Idola, inquit, vertistis in Martyres, quos votis similibus colitis*. atque horum votorum, quae Martyribus reddebantur, quis non meminit (4)? tabellae votivae, quas Christiani suspendebant, non omnes perire: e quarum una hic descriptus est titulus (5):

SANCTIS · MARTYRIBVS  
PAPRO · ET · MAVROLEONI  
DOMINIS · VOTVM · REDD · ꝥ ·  
CAMISIAS · QVI · ET · ASCLEPIVS · ET · VICTORIA

at vota, inquires, Deo fiunt: Deo utique; sed votum qui facit, sic fidem saepe suam obligat Deo, ut si compos voti fiat, non aliter liberare fidem possit, quam si donum Martyri sistat, cui, Deo teste, promiserat. itaque tum et Deo idem et Martyri verissime votum solvere dicitur, quum utrique praestet, quod receperat, promissum Martyri, promissi fidem Deo, quorum utrumque ipsa voti natura conjunctum est.

Nulla igitur de votivae inscriptionis initio controversia esse debet. sed in formulis peccare quis possit; ut, quae vota pro salute Domus Augustae suscepta sint, ea si dicas *pro salute Domus Divinae* suscepta esse, quae adsentatio fuit veterum, his temporibus non ferenda: vel si donum qui dedit voti solvendi causa, is *Voti Reus* dedisse dicatur; quae quidem formula est Latina et a Virgilio usurpata (6), sed Latinarum tamen inscriptionum indagatoribus ignota, cujus loco passim haec altera occurrit *Voto Suscepto*: item si quae vota civitas pro Principis incolumitate, quinquennio Principatus elapso, in alterum quinquennium nuncupet, ea appellentur *Nova Vota In Quinquennialia Secunda*; quippe *Quinquennialia* longe aliud sunt, quam *Quinquennium*, ut libro primo exposuimus (7). nec vero minus veterum formulis abutatur, qui optimas quasque iis conjungat, quae eruditae aetatis non sunt: quo e numero illas habeto e fornice Constantiano sic · x · sic · xx · sic · xxx · quique seriam rem agens *Annalia* inducat et *Quinquennialia* et *Decennialia*, quum nulla publice vota nuncupata sint. quam nunc riderent veteres illi studiorum et officiorum magistri, pagellas istas si legerent hominum otiosorum, quae in vulgus saepe sparguntur enim inscriptione *Vota Suscepta*, quae scilicet vota nemo unus novit aut somniavit; tum ea referentes, quae nullo usquam in marmore nulla in tabula legantur aut postea legenda sint: quibus item nulla magistratuum, nulla civitatis accessit auctoritas? atque hi tamen sibi plaudunt, et antiqua jam tempora se reddidisse gloriaunt. porro ceteras formulas, quibus Christianorum vota latine religioseque designentur atque exponantur, libro tertio commodius, ut arbitror, afferemus.

(1) v. inser. 226. lib. 1.

(2) v. inser. 329. l. 1.

(3) l. 20. contra Faust. c. 4.

(4) v. Euseb. Pr. Ev. l. 13. c. 7. Theo-

doret, Prudent, Paullin, etc.

(5) Cor. Symb. Flor. t. 4. p. XII. et  
Iacutus Chr. Antiq. p. 26. v. Grut.  
p. 1048. n. 1. etc.

(6) Aen. l. 5. v. 237.

(7) ad inser. 68.



V. Quæri etiam potest, ea ne inscriptionibus sacris conveniant, quæ veteres aliena religione in dedicationibus suis usurparunt (1), epuli, opinor, mentio et sportularum et viscerationis: quum hæc tamen ipsa et pie nunc et honeste ac laudabiliter alicubi in templorum dedicationibus aut sacris anniversariis celebrentur. ego vero, hæc improbare nemo quum possit, quod fiant; mentionem eorum veteribus formulis in titulo factam cur non probem? præsertim quum eadem ad priscos potius Christianorum ritus trahi possint, quam ad superstitiosas externasque caeremonias. audi, quid Sidonius Apollinaris, ad sacri Baptisterii dedicationem invitatus, scripserit ad Elaphium (2): *Epulum, inquit, multiplex, et capacissima lectisternia para plurimis viis, pluribus turbis. de iisdem epulis, quæ et festis Martyrum diebus iustaurabantur, hæc præter alios Tertullianus (3): Cena nostra de nomine rationem sui ostendit; vocatur enim Ἀγάπη, id quod Dilectio penes Graecos est. quantiscumque sumptibus constet, lucrum est, pietatis nomine, facere sumptum: siquidem inopes quoque refrigerio isto juvamus.* vix tamen hæc in templorum inscriptionibus locum habent, quæ breves simplicesque sint, oportet: at monumentis sacrorum maxime conveniunt, quibus supplicationum ritus aut dedicationum leges historice describantur.

Ac cetera etiam de genere hoc, si sententiae res subest, Latinaeque formulae Christianis respondent ritibus, repudianda non sunt: neque enim profanos tum ritus, sed verba tantum, quæ saepe communia sunt, in rem nostram transferemus. itaque haud me quisquam, opinor, reprehendet, quod ex particula Gruterianae inscriptionis (4), quam Norisius (5) Mazochiusque (6) germanam esse putarint, item ex Taciti loco, quem videsis ad inser. LXXVII. libri primi, formulas decerpsi quasdam, quibus indicem conficerem lapidis primi, unde nuper Sacarii Vaticani inchoata rite constructio est.

PIVS • VI • BRASCHVS  
PONTIFEX • MAXIMVS  
XII • KAL • OCT • ANNO • D • N • MDCCLXXVI •  
PONTIF • II •  
DEVM • OPTIMVM • MAXIMVM  
PALAM • POPVLO • ROMANO  
PRECATVS  
VTI • CAEPTA • PROSPERARET  
SPATIVM • SACRARIO • NOVO  
TEMPLI • VATICANI • EXCITANDO  
SOLLEMNIIVS • CAEREMONIIS  
DICAVIT  
INIECTISQVE • IN FVNDAMENTA • STIPIBVS  
AERIS • ARGENTI • AVRI  
LAPIDEM • SACRVVM • AVSPICALEM  
TANTORVM • OPERVM  
STATVIT

nihil hic esse puto, unde quisquam possit, quamvis religiosus, offendi: nisi forte primum illum lapidem vocari *Auspicalem* displicet, quasi prisca Romanorum auspicia designet, quæ religio nostra detestatur. at *auspicia* veteres saepe ipsa etiam rerum initia, et se *auspicari* dixere, quidquid vel sine ullis auspiciis inchoarent; diesque *auspicales*, aut *auspices* qui primi erant sive anni sive imperii: eodemque sensu *auspicem purpuram*,

(1) v. Plin. l. 4. epist. 1.  
(2) lib. 4. epist. 15.

(3) Apolog. c. 39.  
(4) p. 39. n. 5.

(5) Cen. Pis. diss. 4. c. 6. p. 485.  
(6) in tit. C. A. c. 8. n. ult.

*auspicem victoriam* et hujusmodi: quae tibi exempla in Latinis scriptoribus passim occurrent.

VI. Quod reliquum est, inscriptiones sacrae non modo carere debent his maculis, quae superstitionem veterem oleant; sed religionem etiam testentur, oportet, dedicantium, votumve solventium: nam religionis indicia si absint, non sacram, sed historicam tantum inscriptionem confeceris: quales esse duxi, quas attuli libro I. ducentissimas vicesimam sextam, sextamque tricesimam. indicia autem erunt religionis ipsa primum nomina Dei immortalis sanctorumque Caelitum praeposita, nisi forte inscriptiones iis prostent in locis, ubi imagines ipsae notaque simulacra se prodant, et quodammodo loquantur. deinde appellationes titulique, quibus eorum sanctitas, virtus, praesentia, beneficentia celebratur. eminebit etiam religio in illis verbis *Consecravit, Dedicavit, Donum Dedit, Votum Solvit Libens Merito*, et hujusmodi. tum si acceptum beneficium aut causa quaecumque dedicationis votique adscribatur: item si precatio aliqua atque carmen, si vota suscepta, si dies festi, si stata sacrificia, si sollemnes ritus memorentur: quae maxime in monumentis sacrorum locum habent.

Haec fere sunt, quae hoc articulo generatim praemonenda erant, ut cetera facilius expediremus. nunc singulatim, quae cuique parti tribuenda sint, quaeque ratio singularum et quasi textus esse debeat, mihi exponendum est.

## §. II.

DE TITVLIS DEI IMMORTALIS CAELITVMQVE  
SANCTORVM

I. Ab exemplis, quae libro primo protulimus, ab aliis etiam, quae, ne immodice liber excresceret, eodem congeri non oportuit, praecepta singulorum capitum desumpta sunt, quae hoc libro tradentur: eaque, quod semel admonuisse sit satis, simplicem maxime et ornatam dictionem aequae complectentur; quum utraque dictio, adjuncta alterius ornatumque si demas, eundem verborum ordinem, eandem formam structuramque sequatur. at in eorum deinde gratiam, qui singulari dictione delectati, communem hanc aequalemque adspernantur, de illa quid sentiam, eo potissimum capite exponam, quod de inscriptionum figuris partitioni tertiae inseretur.

II. Titulus sacer una Dei appellatione aut solis Caelitum nominibus et apposis constare fortasse potest. nam exemplo est prima libri primi inscriptio: qua etiam brevior haec altera (1):

MINERVAE  
CVSTODI

cui similes item aliquot Gruteri tibi et aliorum volumina exhibebunt. verum tituli hujusmodi aut minorum opusculorum fuerunt, aut integri fortasse non exstant, quod nomina eorum, qui opus dedicarant, vel infra vel ad latera monumentorum inscripta essent: quemadmodum in marmoreis aris et basibus, quae exstant integrae, saepe videre licet. quare pro exemplis eos proponere vix audeam; praesertim de sumptuoso opere si agatur: nisi quod primus ille Vestae titulus plus aliquid habet, quam unum Deae appositum: quippe signum ejus ab Helyidiis dictum esse, non obscure significatur: quemadmodum et hic alter ostendit titulus, in agro Tiburtino nuper detectus:

(1) Fabr. p. 464. D. XVII.

HERCVLI · DOMESTICO  
T · AELI · RVBRI · SVPERSTITIS

quin ipse etiam monumenti locus fari aliquid, et indicare interdum potest, qui posuerint: ut si in ergastulo stetisse dixeris Hereulis statuam cum inscriptione illa Gruteriana (1),

DEO · HERCVLI  
COMITI · ET  
CONSERVATORI  
DOMINORVM  
NOSTRORVM

servos jam posuisse appareat, ut dominis suis blandirentur.

Ianivero ipsa nomina eorum, quibus aliquid dedicamus, patrio etiam casu si efferas, non id contra veterum praescripta fiet; dummodo a dativo casu exordiare. exemplo sit hic titulus (2):

PRAESENTIAE  
MATRIS · DEVM  
P · SEPTIMIVS  
FELIX  
OB · CORONAM  
MILLESIMI  
VRBIS · ANNI

est autem *Praesentia*, si Pontederac adsentimur (3), a *Praes* et *sum*, quasi *Praedis subsidium*: ut, Matre Deum in ludis suis spondente, coronam Septimius sub Philippis Augg. abstulisse videatur. similes huic alii, quorum initia sunt *Numini Mercurii* (4), *Sanctitati Iovis Et Augusti* (5), *Pietati Fortunae Primigeniae* (6), et quae libro tertio afferentur.

Illud mirum apud veteres, quod tamen in nummis quoque factum animadvertimus (7), nomina interdum omissa esse Deorum, apposis non praetermissis (8): quum alias, si nomina desint, fere desiderentur (9).

DEO · AMABILI  
SACR ·  
AELIA · EHORTE  
FECIT

ita in arulae fronte inscriptum, et in ejus superficie KYRI · XAIPE: hunc autem *Deum Amabilem* quidam Antinuum fuisse putant (10). sed quicumque fuerit, nisi nomen in proximae statucae basi incisum putes, ita forsitan nota Dei illius facies habitusque erat, ut nomine appellandus non videretur, Graecorum artificum more, qui suum potius Deorum statuis adscribebant (11).

Eninvero communis ea consuetudo fuit, quae tenenda est, ut inscriptionem nomina distinguerent, haec vero apposis etiam et laude aliqua ornarentur: quemadmodum et multa libri primi exempla passim declarant, et plura libro tertio prolata demonstrabunt. ac primum Caelites iis prognatos, quibus caelestes item honores decreti sint, parentum etiam nominibus designare licebit: quo pacto Trajanus Titum inter Divos relatum nominavit (12):

(1) p. 45. n. 7.

(2) Grut. p. 28. n. 4.

(3) epist. 2. p. 16.

(4) Grut. p. 54. n. 12.

(5) id. p. 10. n. 1.

(6) id. p. 76. n. 8.

(7) ad inscr. 383. lib. 1.

(8) Grut. p. 88. n. 12. Don. cl. 1. n. 123.

(9) v. inscr. 18. 49. 51. lib. 1.

(10) Auct. Antiq. sac. et civil. p. 46. in *Πρξλ.*

(11) v. inscr. 18. l. 1.

(12) Donat. de V. R. l. 3. c. 4.



D · TITO  
D · VESPASIANI · F · AVGVSTO  
IMP · CAESAR · D · NERVAE · F · NERVA · TRAIANVS · AVG ·  
GERMANICVS · DACICVS · PONT · MAX · TRIB · POT · COS ·  
P · P · FECIT

et his autem et ceteris omnibus pleraque appositorum convenient, quae veteres usurpant. cur enim non dixeris exempli caussa VIRGINI · REDVCI, MARIAE · SOSPITAE · SALVTIFERAE, VIRGINI · MATRI · MVNIFICAE · EXORATAE, vel PETRO · ET · PAVLLO · MAGNIS · APOSTOLIS · CVSTODIBVS · PROPVGNATORIBVS, THERESIAE · LEGIFERAE · SANCTISSIMAE, STEPHANO · SANCTO · POLLENTI · VICTORI? *Victor* nempe appellatus aliquando etiam qui opem vita periclitanti attulisset: nam de M. Octavio Herennio, qui ex tubicine mercator, quum navigaret, a praedonibus circumventus fortissime repugnauerat, victorque recesserat, hanc tradidit Macrobius (1): *Hunc in somnis Hercules docuit sua opera servatum: cui Octavius impetrato a magistratibus loco aedem sacravit et signum, Victoremque litteris incisis appellavit.*

Mitto nunc cetera, quae suo loco afferentur (2): illud tamen non omittendum, apposita fere omnia ita inscriptionum initiis idonea esse, ut verborum sedibus rite variatis, iisdem ea nominibus non incommode in media aut extrema oratione adhaereant: sive illa simul omnia, sive etiam divisa adscribantur. exemplo tibi sint inscriptio tertia libri primi, et quas hic exhibeo (3):

DEO  
INVICTO  
SERAPI  
SERVATORI  
D · IVNIVS · D · F · PAPIR · (4)  
VAERGVLENVS  
AENEATOR · LEG · VII ·  
CL · GEM · P · (5) FIDEL ·  
NVMINI · SVO · VOTO  
SVSCEPTO · D · D ·

(6)  
SACRVM · SILVANO  
P · AELIVS · PHILETVS  
ET · P · AELIVS · PHILETIANVS  
CONSERVAT · (7) LARVM · PENATIVM  
D · D ·

nec similes harum inscriptiones desunt aliae, in quibus illud maxime appositum sub finem collocari animadvertes, quo monumenti aut donarii caussa et praesens Deorum auxilium significari videatur. quaedam tamen ex apposis praepone ipsi nominibus veteres solebant: itaque dixere *Virgini Dianae, Sancto Saeco, Sanctissimo Herculi*, uti libro primo videre licet. item sic (8):

DIS · MAGNIS  
MATRI · DEVM · ET · ATTIDI  
SESTILIVS · AGESILAVS

Appositorum autem rationem sequuntur cognomina quaedam aut externa nomina, quae veterum exemplo usurpare possis ad loci discrimen, vel ad monumenti causam aut ejus auctorem designandum: cujusmodi sunt, quae hisce in titulis leges (9):

LICINIA      LICINIA      OCTAVA  
QVINTA      PVRPVRIS      SATVRNIN ·  
IOVI · OPTIMO · MAXIMO  
PVRPVRIONI

*Purpurio* scilicet appellatus Iupiter de nomine *Licinia* *Purpuridis*, quae signum ejus una cum sororibus dedicarat: ut Dii alii aliorum nominibus (10) cognominati sunt.

(1) Saturn. l. 3. c. 6.

(2) lib. 3. p. 1. c. v. p. 1. §. 1. et 2.

(3) Grut. p. 85. n. 8.

(4) *Papiria tribu*.

(5) *Claudiae Geminae Pia*.

(6) Murat. p. 67. n. 4.

(7) *Conservatori*.

(8) Murat. p. 30. n. 7.

(9) Oderic. syll. p. 183. n. 6.

(10) v. insc. 39. lib. 1. et Fabr. de Col.

Tr. c. 8. p. 247.



(1)  
 NVM · DOM · AVG · (2)  
 SACRVM  
 GENIO · CONSERVATO  
 RI · HORREORVM · GAL  
 BIANORVM  
 M · LORINVS  
 FORTVNATVS  
 MAGISTER  
 S · P · (5) D · D ·

(4)  
 IOVI · REGI  
 GENIO · DOMVS  
 ISIDORI  
 LARINATIS  
 ARAM  
 EX · VOTO  
 L · CASTOR  
 D · D ·

sic a locis, quae in Deorum tutela esse putabantur; *Dianam Tifatinam, Iunonem Lanuvinam* dixerunt, et *Venerem Hortorum Sallustianorum* et *Silvanum Flaviorum* et *Herculem Conservatorem Domus Vlpiorum* et *Iovem Conservatorem Possessionum Rosciorum*. quare a loco etiam vel urbe denominare sanctos Caelites, et ab eorum cultoribus vario nomine distinguere saepe liceat.

Haec demum et cetera apposita consequitur plerumque dedicatio illa SACRVM, a quo fere verbo oratio reliqua non pendet: idque aliquando praecedit, ut modo in Silvani titulo, et in hoc (5), quo nullus cietur Deus.

SACRVM  
 POMPEIA · SEX · FIL ·  
 ELEVTHIS · ET  
 SEX · POMPEIVS · SEX · F ·  
 QVIR · IVSTVS  
 SOROR · ET · FRATER  
 DONVM · DEDER ·

sententia vero haec esse videtur, *hoc quodcumque vides, sive ara sive aedes, sive etiam signum vel donum*, SACRVM EST, vel SACRVM ESTO. deinde narratio incipit, qua saepe vota et dedicationum causae exponuntur, auctores monumentorum indicantur, tota, si libet, rei historia pertextitur.

U. Haecenus ea tantum, quae ad communia fere titulorum initia pertinent, exposuimus. alia enim praeterea sunt, unde illustrium praesertim inscriptionum exordium recte ducas: primumque veteres, si Principis nomen usurpare initio possent, haud temere omisere. legimus sane in praeclara inscriptione, quae Tarracinae est, in qua et decreti Quindecimvirosum post Principem mentio facta (6):

EX · AVCTORITATE · IMP · CAES ·  
 M · AVRELII · ANTONINI · PII · FELIC ·  
 AVG · PARTHIC · MAX · BRIT · MAX ·  
 PONT · MAX · ET · DECRETO · COLL ·  
 XV · SAC · FAC · SERVIVS · CALPVRNIVS  
 DOMITIVS · DEXTER · PROMAGIST · ARAM  
 CIRCES · SANCTISSIMAE · RESTITVIT  
 DEDICAT · XVII · K · IVL · IMP · ANTONINO  
 AVG · IIII · BALBINO · II · COS ·

enim vero idoneum etiam inscriptionis initium jure habetur nota aliqua temporis; quod Romae pari Consulium (7) aut uno saltem adscripto (8), significabant: item sacerdotio aut magisterio eorum notato, qui sacris praeerant (9). ad quorum hodie exemplar non modo annus Christianus, sed etiam Principum atque Antistitum nomina apposite inscri-

(1) Grut. p. 75. n. 1.

(2) *Numini Domus Augustae*.

(3) *Sua Pecunia*.

(4) Grut. p. 1065. n. 3.

(5) Grut. p. 1076. n. 6.

(6) Don. cl. 1. n. 51.

(7) v. inser. 39. lib. 1.

(8) v. insc. 40 et 41. l. 1.

(9) v. inser. 41. l. 1. et Don. cl. 1. n. 133.

bentur: quamquam sic initiis olim haec convenire visa, ut post nomina quoque Deorum, atque ad calcem inscriptionis probata esse videas (1). ipsa etiam vota (2) aliaque dedicationum additamenta initio indicata sunt (3): interdum et qui locum monumento adtribuissent, ut est in exemplo Maffeiano (4):

LOCO · PVBLIC · DAT · D · D ·  
 PARCIS · AVG · SACR ·  
 L · CASSIVS · VERVICI · F ·  
 NIGRINVS · VI · VIR · AVG · V · S · L · M ·

Sed insignium inscriptionum, quas in magnorum operum frontibus veteres incidebant, ea maxime ratio valuit, ut ab auctorum nominibus eorumque rebus gestis inchoarentur. Pompeii hoc inscriptio demonstrat Minervae posita (5), cujus ille persimiles etiam in Pyrenaei tropaeis inscripsisse videtur, in quibus testatum esse, scripsit Plinius (6), *octingenta quadraginta sex oppida ab Alpibus ad fines Hispaniae ulterioris in ditionem a se esse redacta*. similia in obeliscis suis inscripsit Augustus (7): idemque et Hannibal fecerat Poenus in templo Iunonis Laciniae, in quo aram, teste Livio (8), condiderat dedicaveratque *cum ingenti rerum ab se gestarum titulo Punicis Graecisque litteris insculpto*. neque vero id arrogantius elatinsve factum dixeris, quam ut imitari nos deceat: sic enim res gestae recensentur, ut eas Diis suis acceptas referre videantur; camque sibi causam fuisse ostendant monumenti dedicandi, quod in bellis gerendis praesentem Deorum opem se expertos esse putarent. id certe Pompejus illis verbis *Merito Minervae* haud obscure significavit, quum delubrum ei Deae tamquam voti reum se dicasse professus sit.

Ceteri autem, qui res gestas enumerare vel nollent vel non possent, curationes fere magistratusque et quos gesserant et quos gerebant, proferre soliti, ne iis quidem neglectis, quae parvi fierent (9):

CN · OCTAVIVS · TITIVS · CAPITO  
 PRAEF · COHORTIS · TRIB · MILIT · DONAT ·  
 HASTA · PVRA · CORONA · VALLARI · PROC · AB  
 EPISTVLIS · ET · A · PATRIMONIO · ITERVM · AB  
 EPISTVLIS · DIVI · NERVAE · EODEM · AVCTORE  
 EX · S · C · PRAETORII · ORNAMENTIS · AB · EPISTVL ·  
 TERTIO · IMP · NERVAE · CAESAR · TRAIANI · AVG · GER ·  
 PRAEF · VIGILVM · VOLCANO · D · D ·

nimirum praeclaram illam *αποτιωπησις* ignorabant, quae videlicet digna proximis temporibus formula est, ET CETERA ET CETERA.

Hic vero de honoribus mihi et muneribus dicendum esset, quo tandem ordine ex veterum praescripto numeranda sint. quia tamen eadem in omnibus monumentis est ratio, semel id capite sequenti susius exponam. illud tantum hoc loco in memoriam revocabo, claros aliquando viros exstitisse, qui amplissimis honoribus usi, magistratus tamen suos in titulis commemorari vel nollent, vel susque deque ferrent: de quibus dixi ad inser. cccxxv. quamquam plerique hominum vel ex infima conditione, atque in exiguis etiam monumentis, munus suum curationemve, quaecumque esset, quam diligentissime adnotarunt: quod tute multis in exemplis videre potuisti. quin servos ipsum quoque Domini sui nomen praesetulisse, quum alia exempla, tum hoc declarat (10):

(1) v. inscr. 38, 40, 41.

(2) v. inscr. 30.

(3) v. inscr. 47.

(4) Mus. Ver. p. 87. n. 1. Grut. p. 97. n. 10.

(5) v. inscr. 32.

(6) H. N. l. 3. c. 3. n. 4.

(7) v. inscr. 33.

(8) lib. 28. c. 26. n. 46.

(9) Grut. p. 61. n. 4.

(10) Cor. Inscr. t. 3. p. 8. n. 4.

HEDONE  
M · CRASSI · ANCILLA  
FERONIAE · V · S · L · M ·

at patriam, quae nunc semper adscribitur, nomini subungere veteres non solebant, nisi quum is, qui dedicabat, ex ea urbe non esset, in qua dedicatio celebraretur. itaque hanc in militum titulis, quod procul a patria mererent, saepe leges: qui etiam centuriam suam fere adnotabant, communi primum appellatione nominibus ipsis praeposita, post haec stipendiis etiam, quae fecissent, adscriptis (1):

MILITES · COH · XII · VRB ·  
A · APONIVS · SABINIANVS · TVDER · (2)  
C · VERI · (3) STIP · XVIII · (4) C · AVRELIVS  
ALEXANDER · DYRR (5) · C · TREBI · STIP ·  
VIII · L · AELIVS · DONATIVS · BENEV · (6)  
C · TREBI · STIP · XIII · IMAGINES · DOMINO  
RVM · N · N · ET · AEDICVLAM · ET · ARAM · DE ·  
SVO · FECERVNT · DEDICAVERVNT  
VII · KAL · OCTOB · DVOB · AVGG · SEVE  
RO · III · ET · ANTONINO · PIO · COS (7) ·

porro ubi plures nominandi essent, veteres quoque primo loco, qui primi dignitate essent, scribere solebant. quare, quum haud procul theatro Marcelli Livia Augusta effigiem Divo Augusto dicasset, Tiberiique nomen suo postscripsisset, *id ille credebatur*, inquit Tacitus (8), *ut inferius maiestate Principis, gravi et dissimulata offensione abdidisse.*

Iam et in sacris inscriptionibus locus aliquando datus patronis, propinquis, amicis, ut qui aliquid Diis dedicassent, id se vel eorum etiam nomine, vel in eorundem honorem aut memoriam Diis tribuisse profiterentur. exemplis (9), quae attulimus, adde monumentum hoc Saluti Aquilejensi Sacrum (10):

S · A · S ·  
IN · HONOR ·  
L · VALERI  
NYMPHODOT ·  
VI · VIR · ET · D · D · AVG · (11)  
ET · C · STATI · PRIMIC ·  
ET  
IN · MEMORIAM  
C · STATI · HEVRET ·  
VI · VIR · ET · D · D · AVG ·  
ALYPVS  
LIB ·

ae laudem praeterea addere aliquam iis, quos honoris causa nominarent, minime veteres absurdum aut a re alienum existimarunt: ut Cn. ille Octavius apud Maffejum (12), qui *nomine Clementis et Staberi Optumorum Fratrum Vdisnam Augustam Loco Privato Arusnatibus Dedit.* animadverti autem, qui se aliquid aliorum nomine fecisse testantur, eos nomen suum fere praeposuisse: contra qui in aliorum honorem aut memoriam, extremis versibus inscripsisse.

At ne illud quidem apud veteres novum, ut non modo affinium omnium, sed etiam auctorum ipsorum nomina omitterent: sic tamen, ut eos generatim, senatus puta

(1) Fabr. p. 150. n. XIV.

(2) domo Tudere.

(3) centuria Veri.

(4) stipendorum 19.

(5) domo Dyrrhachio.

(6) domo Benevento.

(7) anno Varr. 955.

(8) Ann. l. 3. c. 64.

(9) v. inser. 12. 13.

(10) Bert. A. A. p. 62. n. 37.

(11) Decurionum Decreto Augustalis.

(12) Mus. Ver. p. 89. n. 3.



aut populi aut collegii sodalitatise appellacione comprehenderent (1). itaque mihi etiam nuper fas esse putavi, quum inscriptionem, quae Tibure in aedibus Coecanariorum figeretur, conderem, sic unius gentis progeniem designare:

SANCTO • IGNATIO  
LOIOLAEQ  
PATRI • LEGIFERO  
CONFESSORI  
CONCLAVE • QVO • MAIORES  
HOSPITEM • ACCEPERE  
NEPOTES • SACRAVERVNT  
PATRONO • CAELESTI

enimvero, si quando ipsa auctorum nomina proferri non possint, formulas tibi non paucas ex hoc genere liber tertius opportune suppeditabit (2): ibidemque permultas etiam reperies, quibus ea, quae publice facta sint, aptissime designentur: ejusmodi sunt, quae in hae (3) aliisve inscriptionibus occurrunt (4).

IVNONI • AVG •  
SACRVM  
PRO • SALVTE • IMP •  
CAES • T • AELI • ANT •  
PII • PVBLICE  
D • D • (5)

verum illud expeditissimum, si dictione singulari utaris: quam nuper rationem mihi item amplectendam duxi, ut morem iis gererem, qui praeconium sui nullum, nullamque nominis mentionem in titulo fieri paterentur (6):

HONORI  
SANCTI • NICOLAI • MAGNI  
AEDIS • A • SOLO • INCHOATA • XVII • KAL • OCTOBR • AN • M • DCC • LII •  
LAPIDEM • AVSPICALEM • STATVENTE • FRANC • TORQVATO • SIMEONIO • ARCHIPRESB •  
ABSOLVTA • ET • RITE • EXPIATA • VII • KAL • IVL • AN • M • DCC • LXVIII •  
EANDEM • AVCTORE • V • E • HIERONYMO • SPINOLA • CARD • EPISC •  
HIERONYMVS • VOLPIVS • V • C • DOMO • BARIO • ARCHIEP • NEOCAESAR •  
INLATIS • ALTARI • MAXIMO • CINERIBVS • MARTYRR • SANCTISS •  
IVSTINI • ZOSIMI • VALERII • LVPERCI  
CONSECRAVIT • DEDICAVITQVE • XVI • KAL • SEPT • AN • M • DCC • LXXVII •  
CVIVS • DIEI • SACRVM • ANNIVERSARIVM • IN • FASTOS  
AD • DOMINICVM • MENSIS • OCTOBRIS • TERTIVM • RELATVM • EST

mI. Sequitur ut ipsa dedicationis causa atque ratio declaretur: ejus expositio, quum simplex est ac dilucida, inscriptionis auget dignitatem. ea autem quando attingenda videatur, nolim, id ante facias, quam nomen protuleris vel ejus, qui causam dederit, vel ejus, qui causam habuerit, id est vel Dei immortalis Caelitumve, a quibus beneficium collatum sit, vel dedicantium, qui beneficium acceperint. sic in libri primi exemplis post Deorum nomina legimus (7), PRO • SALVTE • ITV • AC • REDITV • DD • NN • . . . et (8) QVOD • IS • SCELERATISSIMI • SERVI • PVBLICI • INFANDO • LATROCINIO • DEFINIXA • MO-

(1) v. inscr. 2. 15. 25. 27. 57. etc.

(2) part. 1. c. 7. part. 7.

(3) Don. Cl. 1. d. 12.

(4) v. inscr. 15. 16. 37. etc.

(5) *Decurionum Decreto*.

(6) in vico agr. Praenest.

(7) v. inscr. 45.

(8) v. inscr. 47.



NUMMENTIS · ORDINIS · DECVRIONVM · NOMINA · NUMINE · SVO · ERVIT · . . . tum ibidem post nomina dedicantium, sic (1), AEGVPTO · IN · POTESTATEM · POPVLI · ROMANI · REDACTA · . . . et (2) PRO · REDITV · FELICISSIMO · EX · AFRICA · VIBI · FRATRIS · . . . id nimirum ad perspicuitatem orationis haud parum conferre, manifestum est. illud vero non minus commodum fiat, necessitas licet nulla compellat, ut nomina utrorumque praeponas, quemadmodum hoc titulo scripta sunt (3):

BONAE · DEAE · SANCTISSIMAE  
CAELESTI · L · PAQVEDIVS · FESTVS  
REDEMTOR · OPERVM · CAESAR ·  
ET · PVBLICORVM · AEDDEM · DIRVTAM  
REFECIT · QVOD · ADIVTORIO · EIVS  
RIVOM · AQVAE · CLAVDIAE · AVGVST ·  
SVB · MONTE · AEFLIANO · CONSVMMA  
VIT · IMP · DOMIT · CAES · AVG · GERM · XIII · COS ·  
V · NON · IVL ·

enimvero quibus formulis dedicationis causa efferri possit, libro tertio pluribus exemplis indicabimus: itaque ad alia veniamus. nonnullas interdum adtributiones antiqui nobis tituli exhibent, quas item novi haud respuant. adjectum exempli causa est, unde Diis donum missum esset, quod nempe religionem ejus, qui misisset, maxime testaretur (4):

DIS · DEA  
BVSQ ·  
VRBISALVI  
ENSIBVS  
T · FLAVIVS  
MAXIMVS  
PROC · AVG ·  
AB · ORIENT ·  
DONVM  
MISIT

nec praetermissum, si quis ab ipso numine, ut sibi videbatur, admonitus, aram illi signumve dedicasset (5), tum ex voto si quid Diis datum dicatumque esset, vix unquam in titulis omissam arbitror formulam, quae id significaret. exempla undique praesto sunt, quae inter hoc numeres (6):

IOVI · CONSERVATORI · SACRVM  
C · IVLIVS · C · F · QVIR · ARRIANVS · V · S ·  
DON · DED · XVI · KAL · MART ·  
CN · ACERRONIO · ET · PONTIO · NIGRINO · COS · (7)

addidere interdum, ubi votum susceptum, et ubi persolutum esset (8):

(1) v. inscr. 33.

(2) v. inscr. 40.

(3) Don. Cl. 1. n. 121. v. inscr. 47.

(4) rep. in pariet. Urbisalv. an. 1776.

(5) v. inscr. 7. 8.

(6) Grut. p. 18. n. 8.

(7) An. Varr. 790.

(8) Grut. p. 36. n. 15.

BELENO  
 AVG. SACR.  
 L. CORNELIVS  
 L. FIL. VELL. (1)  
 SECVNDINVS  
 AQVIL. (2)  
 EVOC. AVG. N.  
 QVOD. IN. VRB.  
 DONVM. VOV.  
 AQVIL. (3)  
 PERLATVM  
 LIBENS. POSVIT  
 L. D. D. D.

cui titulo similis alter ignoti viri (4), qui Neptuno *Votum In Siculo Freto Susceptum Solvit*. votum autem pro honesta missione Genio Centuriae nuncupatum sic miles voti compos expressit (5):

C. MARCIVS. C. F.  
 SERG. SALVIANVS  
 NORBA  
 GENIO. CENTVRIAE  
 COH. X. PR. 7. MARI. BASSI  
 IN. QVA. MILITAVIT. AN. XIII.  
 VOTO. SVSCEPTO  
 MISSVS. HONESTA. MISSIONE  
 PRID. NON. IANVAR.  
 Q. FABIO. CATVLLINO. M. FLAVIO  
 APRO. COS. (6)  
 ANIMO. LIBENS. ARAM. SVA. PECVNIA  
 POSVIT

quia vero vota non iidem semper solvebant, qui susceperant, ne hoc quidem negligendum docuerunt. itaque votum gentis Munatiae a Q. Munatio solutum hoc pacto explicatum est (7):

MERCVRIO  
 CAELESTI. FATALI  
 Q. MVNATIVS. TRICHORVS  
 EX. VOT.  
 MVNATIONVM  
 ARAM. SVA. PECVNIA  
 P. L. M.

at qui alteri mandata dederat, ut per eum fidem Iovi obligatam liberaret, hunc incidi titulum iussit (8):

I. O. M. FVLM. FVL.  
 SACR.  
 FL. VERVS. METROBAL  
 ANVS. PROC. AVG. N. PRAE  
 POS. VECT. FERR. (9) PER  
 ASCLEPIADEM  
 ARK. STAT. SISC. (10)  
 V. S. L. M.

Raro omissum est, unde sumptus operi faciundo suppeditati: nec si qui aliorum pecunia Diis aliquid posuissent, id illi, laudis praeferendi causa, siluerunt (11):

(1) *Velina tribu.*  
 (2) *Aquileja.*  
 (3) *Aquilejam.*  
 (4) Grut. p. 62. n. 6.  
 (5) Grut. p. 108. n. 6.

(6) An. Varr. 883.  
 (7) Grut. p. 54. n. 4.  
 (8) Donat. p. 1. n. 8.  
 (9) *Praepositus Vectigalium Ferrariorum.*

(10) *Arcariam Stationis Sisciae.*  
 (11) Nov. Fior. an. 1740. p. 335. Maff. M. V. p. 413. n. 2. v. inscr. 34. 36. 45.

VICTORIAE  
AVG.  
M · VALERIVS  
SEVERVS · PONTIF ·  
EX · STIPE  
VELA · ET · ARAM  
.....

adnotatum etiam, si qui aliorum opera usi essent (1):

IOVI  
IMP · VESPASIANVS  
AVG.  
PER · COLLEGIVM · PONTIFICVM  
FECIT

nisi forte Pontifices, quod sponte ipsi fecerant, Vespasiano tamquam Pontifici Maximo honoris causa adtribuuisse dicendi sunt. ii certe, qui jussi aliquid dedicabant, cum qui jusserat, patrio fere casu efferebant (2):

LARIBVS · AVG.  
REG · I.  
VICO · III · ARARVM  
IVSSV  
PONTI · FAVSTINI  
GRANIANI · PR.  
MAG · FECERVNT  
VALERIVS · ONESIMVS  
L · POMPEIVS · EVPHROSYNVS  
Q · GRANIVS · AVGVSTINVS  
TI · CLAVDIVS · HERMES

Quid si, non de opere ab inchoato exstrueto, sed de restituto agetur, ejus ne etiam nomen inscriptioni addemus, qui primus fecerit? id equidem perraro antiquis in titulis legi; sed legi tamen, quum is conditor fuisset, cujus nomen et operi et restitutori famam facere, ipsamque operis originem et vetustatem cuique prodere videretur: ut in Tiburtina inscriptione (3):

IOVI · PRAESTITI  
HERCVLES · VICTOR · DICAVIT  
BLANDVS · PR · RESTITVIT

ceterum notati aliquando sunt, qui in operum restitutorum titulis nullam conditoris, quicumque ille fuisset, mentionem fieri passi essent. sic Svetonius, quum scripsisset, opera a Domitiano plurima et amplissima, quae incendio absumpta fuerant, esse restituta, adjecit, *sed omnia sub titulo tantum suo, ac sine ulla pristini auctoris memoria* (4).

Quae res Diis datae, dicatae essent, eas fere in titulo, qui rebus ipsis inhaerebat, vix indicatas reperio. eminebant enim prodebantque se intuentibus. at si quid ex illis latere, nec plane a quolibet agnoscere poterat, tum vero diserte explicabant. sic Iulius Caesar, ut est apud Plinium (5), Thoracem, quem Veneri Genetrici in templo ejus dicavit, *ex Britannicis margaritis factum voluit intelligi*: sive, ut Solinus exposuit (6), *e Britannicis margaritis factum, subjecta inscriptione testatus est*: quod nimirum genus illud margaritarum dispicere oculis non poterant, qui donum sine monstratore con-

(1) Grut. p. 13. n. 11.

(2) Fabr. p. 672. n. 8. v. inser. 49.  
1. 1.

(3) Grut. p. 1065. n. 2.

(4) in Domit. c. 5. n. 1.

(5) H. N. l. 9. c. 35. n. 57.

(6) Polyhist. c. 76.



templabantur. sic etiam, quum simulacra duo Fortunae Praenestinae dicata essent e marmore Corolitico, siue, ut Plinius appellat (1), *Coralitico*, quod *candore proximo ebori et quadam similitudine erat*, idemque quo maioris mensurae esset, eo maiore in pretio esse debebat, quum *non ultra bina cubita* inveniri soleret; idcirco adscriptum, ea simulacra e Corolitico esse, quod fortasse, qua facie esset, pauci norant (2);

FORTVNAE  
PRIMIGENIAE  
TI · CLAVDIVS  
THERMODON · ET  
METIA · M · F ·  
LOCHIAS · EIVS  
SIMVLACRA · DVO  
SPEI  
COROLITICA D · D ·

eadem de caussa nec tacendum duxerunt, si quid ad alterius operis exemplum factum esset (3):

C · TORANIVS · SACERDOS  
HERCVLIS · LVCI · MONTANI  
ARAM · CVM · BASI · MARMOREA  
DIS · MAGNIS  
QVALIS · EST · IN · AVENTINO  
TEST · P · C ·

designabant autem res singulas propriis vocabulis: nisi quod statuas Deorum ipsa numinum appellatione interdum indicare maluerunt (4):

P · CORNELIVS · FAVSTVS  
SILVANVM  
CVM · BASE  
D · D ·  
DEDICAVIT  
IDIVS · APRILIB ·  
IMP · CAES · M · AVRELIO  
ANTONINO III · IMP · VERO  
AVGVSTO · COS · II · (5)

si rerum dedicatarum nomina praeternissa sint, dedicationis etiam verbum plerumque desideratur: praesertim quum Deorum nomina extremo versu leguntur (6). sed bina etiam tibi ac plura eodem in titulo occurrent verba, ubi res diversae requirere videantur (7). quo loco animadvertendum est, male aliquando consociari verba, quae diversis vel rebus respondent vel casibus. haeremus enim, quum legimus, nec sententiam statim arripimus. quare minus mihi probatur inscriptio haec, Romae quae prostat (8):

SANCTO · ELIGIO · TEMPLVM  
PICTVRIS · SIGNIS · VALVIS · MARMORE  
ATQVE · OMNI · ORNAMENTO  
CORPVS · AVRIFICVM · FECIT · ET · EXORNAVIT

V. Denique et illae nobis formulae considerandae sunt, quas saepe inscriptionibus subjectas, aut ad latera incisas videmus; quamquam earum exempla libro tertio exponuntur. huiusmodi sunt preces opem a diis implorantium (9):

(1) H. N. l. 36. c. 8. n. 13.

(2) Grut. p. 76. n. 9. v. Caryoph. de marmor. antiq. p. 28. ult. edit.

(3) Grut. p. 1063. n. 5.

(4) id. p. 63. n. 3. v. inser. 41.

(5) An. Varr. 914.

(6) v. inser. 32. 34.

(7) v. inser. 36. 38.

(8) Gallet. Inser. Rom. t. 2. Cl. 1 j. n. 376.

(9) Grut. p. 72. n. 4.

	IN · H · D · D · (1)	
	T · ALBANVS	
SALVOS	PRINCIPIA	SALVOS · VENI-
IRE	NVS · EVOK ·	RE
	AVG · N ·	

quo etiam pertinet titulus ille pedi fictili inscriptus in Passeri Museo, FAVSTOS · REDIRE (2).  
Subnotatum aliquando, quo die sacrum numini faciendum esset (3):

CERERI · AVGVST ·  
MATRI · AGR · (4)  
L · BENNIVS · PRIMVS  
MAG · PAGI  
BENNIA · PRIMIGENIA  
MAGISTRA · FECER ·  
GERMANICO · CAESARE · II ·  
L · SEIO · TVBERONE · COS · (5)  
DIES · SACRIFICI · XIII · K · MAI

saepe autem dies dedicationis adscriptus (6), item epuli eodem die dati mentio interdum facta est (7):

SILVANO · SACRVM · SODAL · (8)  
EIVS · ET · LARVM · DONVM  
POSVIT · TI · CLAVDIVS · AVG ·  
LIB · FORTVNATVS · A  
CVRA · AMICORVM  
IDEMQ · DEDICAVIT  
ET · EPVLVM · DEDIT  
DECVRIS · N · III ·  
K · AVGVSTIS · C · MINI  
CIO · FVNDANO · ET  
C · VETTENNIO · SE  
VERO · COS · (9)

fuere etiam, qui et inchoati et absoluti operis tempora designare voluerunt (10):

SILVANO · FLAVIORVM  
CASSIANVS · T · FLAVI · AVG · LIB ·  
CELADI · LIBERTVS · FECIT · VNA  
CVM · FLAVIS · CASSIANO · ET  
AMANDO · FILIS · INCHOATA  
ANTONINO · AVG · PIO · P · P ·  
DEDICATA · XV · KAL · APRIL ·  
SCIPIONE · ORPHITO · ET  
SOSIO · PRISCO · COS · (11)

delubrum, opinor, Silvano exstrui coeptum dicitur, quo anno Antoninus Pius a senatu *Pater Patriae* appellatus est, de quo haec a Capitolino accepimus (12): *Patris Patriae nomen delatum a senatu, quod primo distulerat, cum ingenti gratiarum actione suscepit*, hanc vero consuetudinem tum maxime imitemur, oportet, quum inscriptio magno in opere ac plane regio eminere debeat, quod, urgente propositum pietate, annorum paucorum spatio perfectum sit. inde enim major erit operis commendatio, et auctori ab ipsa etiam celeritate laus tribuetur. quidam vero id etiam referre putaverunt,

(1) *Honorem Domus Divinae*.

(2) Lucern. t. 2. tab. 73.

(3) Grut. p. 26. n. 9. v. Almelov. Fast.  
in praef. p. 29.

(4) *Matri Agrorum*.

(5) An. Varr. 771.

(6) v. inser. 38. 44.

(7) Grut. p. 63. n. 1.

(8) *Sodalis*.

(9) Cos. Suff. an. Varr. 804. secundum Almelov., sed Marin. Fr. Arv.

p. 142. probat, hos suffectos processisse an. Varr. 855.

(10) Fabr. p. 173. n. XXIII.

(11) An. Varr. 902.

(12) in Ant. Pio c. 6.

si in sacrarum aedium titulis indicarent, quot illae annos post primi templi constitutionem dedicatae essent: ut Cn. ille Flavius, qui fastos dies primus publicavit. is enim, ut auctor est Plinius (1), aediculae aereae, quam fecerat in Graecostasi, tabellam addidit, in qua inciderat, *Eam Aedem centum quatuor annis post Capitolinam dedicatam.*

Datum quoque aliquid municipalibus magistratibus, et praeter Romanos consules, duumviri etiam aliquando subjecti sunt, quem quidem morem si revoces, perjucundum, opinor, iis accidet, qui nunc quoque in municipiis magisterio aut praefectura funguntur, raro tamen nomina sua in monumentis inscripta legunt. exemplum e lapide descriptum est, qui Brixiae repertus, Veronam ad Maffejum est missus (2):

L · VIBIVS · VISCI · L · NYMPHODOTVS  
BERGIMO · VOTVM  
C · ASINIO · GALLO · C · MARCIO · CENSOR ·  
COS · (3)  
L · SALVIO · APRO · C · POSTVMIO · COSTA  
II · VIRIS · QVINQVENNALIBVS

neque hic semper finis fuit: praeter magistratus, separatim adscripti interdum, qui monumentum fieri aut collocari curaverant (4): et qui opus a redemptoribus absolutum probarant (5), aut locum operi exstruendo concesserant (6): nec omissa nomina clarorum virorum, quibus forte, honoris caussa, aedis sacrae dedicatio data esset:

(7)  
CONCORDANTIAE · AGRIGENTI  
NORVM · SACRVM  
RESPUBLICA · LILYBITANO  
RVM · DEDICANTIBVS  
M · HATERIO · CANDIDO · PROCOS ·  
ET · L · CORNELIO · MARCELLO · Q · (8)  
PR · PR · (9)

quidam etiam, quum signum Deo alicui in delubro ejus ita dicarent, ut id ad sodales Dei ejusdem pertinere vellent, a quibus potissimum coleretur, adscripsere infra, cui donum darent:

(10)  
FORTVNAE · PRAETORIAE  
SACRVM  
L · MCVIVS · NICEPHOR ·  
MAG · HERCVL · AVG ·  
CN · COPONIVS · EPAGATHVS  
CVRATORES · PRIMI · D · S · P ·  
CVLTORIBVS · D · D ·

Huc referas additamenta alia, quae ad inscriptionis sacrae argumentum vix pertinent: commodè tamen, occasione arrepta, subjiciuntur (11):

(1) H. N. l. 33. c. 1. n. 6.

(2) Maff. M. V. p. 109. n. 1. v. inser. 38. et 44.

(3) An. Varr. 746.

(4) v. inser. 44.

(5) v. inser. 38.

(6) v. inser. 46.

(7) Zaccar. Inst. Lapid. l. 2. c. 11. p. 336.

(8) Quaestore.

(9) Primae Provinciae.

(10) v. Inser. Sic. Cl. 1. n. 27. Don. Cl. 1. p. 48.

(11) Fabr. p. 744. n. 528.



NYMPHIS · GEMINIS  
SACRVM  
C · FVFIVS · GEMINI · F ·  
POLITICVS  
IDEM · AQVAM · PERDVXIT

fontem, credo, deducta aqua, exstruxerat Fufius, et Nymphis dedicaturus, quas de patris cognomine *Geminas* appellavit, earum signis ornaverat. utrumque una potius, quam binis inscriptionibus complecti voluit. hoc pacto multa interdum haud levi compendio congerere in unum fas erit, siquidem res ejusmodi tractentur, quae societate aliqua conjunctae sint. quod nuper ipse etiam feci, rogatus inscriptionem condere, qua partem aliquam attingerem munificentiae immortalis viri Alexandri Albani Cardinalis, quae etiam in sacris aedibus qua restituendis qua ornandis semper enituit (1):

SANCTO · LAVRENTIO  
MARTYRI · INVICTO  
SOSPITATORI  
SACR ·  
ALEXANDER · HORATI · F · ALBANVS  
PROTODIAC · CARDINALIS  
ABBAS  
ANNO · M · D · C · C · LXXVI ·  
TEMPLVM · VETVSTATE · CORRVP TVM  
SVA · IMPENSA · RESTITVENDVM · ORNANDVMQVE  
ALTARE · MARMOREVM · SACRARIA · TVRRIM  
AB · INCHOATO · EXSTRVENDA · CVRAVIT  
ITEM · DITIONEM · VETEREM · AGRVMQVE · VECTIGALEM  
CASTR · LEONIS · ET · MIRABELLI  
QVAE · NEGLIGENTIA · SVPERIORVM · TEMPORVM  
AMISSA · FVERANT  
DIVTVRNA · CVRA · ET · FORENSI · ACTIONE · VINDICATA  
EX · AVCTORITATE · PONTIFICIS · MAXIMI  
SIBI · ET · SVCCESSORIBVS · POSTERISQ · EORVM  
RECEPIT

Haec fere sunt, quae tiro si teneat, ad sacros titulos perscribendos accedere possit audentius, expeditiore tamen utetur stilo, ubi formularum ordines, quas libro tertio proferam, saepe perlegerit,

(1) ad S. Laurent, in Campo;

## S. II.

## DE MONUMENTIS SACRORVM

**P**artis hujus tres articulos quum fecerimus libro primo, prope eadem tamen primi ratio est, quae secundi; quippe utriusque exempla historicas inscriptiones maxime imitantur: tertii vero propriae quaedam regulae sunt.

I. Ac de legibus quidem dedicationum vix aliud praecipendum est, quam ut rem propositam latine dilucideque exponas; simplici autem utaris dictione, quae imitatrix sit ejus, qua plebiscita olim et leges populi Romani scribebantur. harum enim usus hic erit, ut templorum parietibus affixae non modo de locorum religione commoneant, et sacrum a profano secernant, sed stata etiam sacra sollemnesque ritus recenseant, et alia fieri vetent, alia singulis diebus aut mensibus aut annis praestari jubeant. quam in rem non inutiles tibi fore arbitror eas juris formulas, quas liber tertius suppeditabit (1).

Porro initium, unde libet, sumito: variant enim, quae supersunt, exempla. nomina tamen eorum, qui dedicationem celebraverint, sub initium recte ponentur, nisi a numinis invocatione exordium ducatur, uti apud Livium (2):

IVPITER · FERETRI  
HAEC · TIBI  
VICTOR · ROMVLVS · REX  
REGIA · ARMA · FERO  
TEMPLVMQVE · IIS · REGIONIBVS  
QVAS · MODO · ANIMO · METATVS · SVM  
DEDICO  
SEDEM · OPIMIS · SPOLIIS  
QVAE · REGIBVS ·  
DVCIBVSQVE · HOSTIVM · CAESIS  
ME · AVCTOREM · SEQVENTES  
POSTERI · FERENT

nota fere addita est, quae dedicationis annum designaret, eaque vel primo vel extremo versu perscripta. sed hanc praestat omittere, quotiescunque in ipso initio ad nuncium sermo convertitur: praesertim si tempus ab ipsa dedicantis persona satis significetur. quin ne tum quidem opus temporis nota, quum inscriptio publice posita est, ut de loci tantum religione hospites admoneat, animadversionemve violatoribus comminetur: cujusmodi est, quae in sacrario Deae Opiconsivae fuisse dicitur (3):

HOC · PRAETER · VIRGINES · VESTALES  
ET · SACERDOTEM · PVBLICVM  
INTROIRE · NEFAS · ESTO  
IS · CVM · INTROIERIT · SVFFIBVLVM · HABETO

et quae ad Silvani in introitu fuisse videtur (4):

EXTRA · HOC · LIMEN · ALIQVID · DE · SACRO  
SILVANI · EFFERRE · FAS · NON · EST

qua nempe lege cavebatur, ne quod Deo semel dicatum esset, ulla unquam de caussa

(1) c. 8. part. 10. 12. 13.  
(2) lib. 1. c. 5. n. 10.

(3) Fabr. de Col. Tr. p. 168. F. Scal.  
Conject. in Varr. l. 4. de L. L. c. 3.

(4) Inscr. Capit. t. 1. n. 35.

exportari alio posset. utar vero et exemplo, si datur, quod olim Caesaris fere ver-  
bis (1) a me expressum est:

ADYTA • SACROSANCTA  
QVO • NEMINI • PRAETER • SACERDOTES  
ADIRE • FAS • EST  
QVI • SCIENS • PEDEM • INTVLERIT • HVIC • SACRIFICIIS  
INTERDICTVM • ESTO  
AB • EOQVE • OMNES • DECEDVNT  
ET • ADITVM • EIVS  
SERMONEMQVE • DEFVGIVNT

Comminationes autem hujusmodi, item condiciones separatim etiam, et tamquam  
clausulae subijciebantur: quo e genere sunt Gruterianae illae (2),

SI • QVIS • FVRAVERIT (5)  
PROINDE  
OBLIGATVS • ERIT  
AC • SI • SACRILEGIVM  
COMMISERIT

(4)  
SI • QVI • CLIPEVM • PONERE • VOLET  
DABIT • ARCAE • HS • II • N •

at elegantiae aecedet non parum, siquidem in ipsam dedicationis narrationem precatio  
aliqua interponitur, qualem tibi exhibet inscriptio LXII. vel etiam, ni fallor, si, nar-  
ratione absoluta, seorsum dedicantis nomine subscribetur: quod veteri exemplo non  
caret (5). atque id mihi etiam adrisisse olim memini, inscriptionem eodenti, quam sub-  
jiciam:

(1) lib. 3. B. C. c. 32. n. 105. l. 6.  
B. C. c. 5. n. 13.

(2) Grut. p. 1076. n. 10.

(3) *Furo* pro *Furor* apud Plaut. Rud.  
1. 2. 23. et Trin. 4. 2. 22.

(4) Grut. p. 1072. n. 3.

(5) Insc. nov. Fr. Arval. Marin. Grut.  
p. 83. n. 15. etc.



ALOISIO • (1) GONZAGAE • ET • STANISLAO • KOSTKAE  
 PATRONIS • CAELESTIBVS • SALVTARIBVS  
 CVLTORES • EORVM  
 CLYPEA • EX • AERE • INAVRATA  
 NOSTRA • IMPENSA • POSVIMVS  
 ET • HAC • LEGE • DEDICAVIMVS  
 VT • NE • CVI • AMOVERE • TOLLERE  
 ALIOVE • EA • LOCO  
 ADFIGERE • LICEAT  
 VTIQVE • DIE • NATALI • VTRIVSQVE  
 FLORIBVS • ORNENTVR • AMBO  
 ET • CEREI • BILIBRES • DVO • AD • EA  
 ACCENSI • IN • DIEM • LVCEANT  
 VOS • CAELITES • SANCTI • NOVENSILES  
 QVI • HANC • VRBEM • HAS • SEDES • INCOLVISTIS  
 PRECAMVR • QVAESVMVSQVE  
 VT • ITA • NOBIS • VOLENTES • PROPITII  
 ADSITIS  
 RESQVE • NOSTRAS • BENE • IVVETIS  
 SI • OPIS • VESTRAE  
 NON • ALIENAE • LAVDIS • PROMERENDAE • CAVSSA  
 HOC • VOBIS • DEDIMVS  
 DONVM

primum nempe oratio ad eos convertitur, qui ad monumentum visendi caussa accedant, ne ignorent, quinam quibusve legibus dedicarint: deinde caelestes patronos, ut dedicantibus propitii sint. neque vero huic monumentorum generi indecorum aut inconueniens videtur esse, si auctores ipsi loquentes inducantur, quemadmodum in temporariis quoque inscriptionibus olim factitatum est.

Sed tamen si ea proponere debeas, quae publice constituta sint, graviore tibi sermone utendum existimo; nec alia fere enuncianda, quam quae in ipsis decretorum rescriptorumque verbis continentur: ut nuper ego etiam praestiti, quum Canonice Fabrianensium rogatu inscriptionem confeci huiusmodi, quae in porticu aedis s. Nicolai Magni figeretur:

EX • AVCTORITATE  
 PII • VI • PONT • MAX •  
 A • D • PR • IDVS • APRILES  
 ANNO • M • DCC • LXXVIII.  
 SODALIBVS • BONAE • MORTI • APPETENDAE  
 QVORVM • SEDES • AD • S • IGNATHI • AEDem • PERDIV • FVIT  
 TEMPLVM • S • NICOLAI • MAGNI • DATVM • ADSIGNATVM • EST  
 IN • QVOD • STATIS • DIEBVS • IPSI • LIBERI • POSTERIQ • EORVM  
 AD • SACRA • AD • CONCIONEM • AD • SOLLEMNES • PRECATIONES  
 VETERI • IVRE • CONVENIANT

(1) Aloisio sine Y scribebat Aldus senior.

ITEM · CETERIS · CIVIBVS · INCOLISQVE · QVICVMQVE  
 TEMPLVM · RELIGIONIS · PIETATISQVE · CAVSSA  
 CVM · SODALIBVS · ISDEM · ADIERINT · CELEBRARINT  
 TRIBVTVM · VT · EODEM · IVRE · DE · ADMISSIS · SVIS  
 PACEM · A · DEO · VENIAMQVE · AD · PONTIFICALIS  
 INDVLGENTIAE · MODVM · SINGVLI · IMPETRENT  
 VTIQVE · DEIVNCTORVM · ERRATA · ETIAM · ET · POENAS  
 EXPIARE · IDEM · SVPLICANDO · POSSINT

Huc referas, velim, eos quoque titulos, qui sacri diem designant: sunt enim veluti leges atque appendices dedicationum, rituumque sacrorum. exemplum huiusmodi antiquo in epistyllo legitur, quod in insula Tiberina effossum est (1):

VICI · CENSORI · LVSTRATIO · ERIT · IDIBVS · SEPTEMBR ·

eodemque non immerito pertinere dixeris particulam illam ex Aetis Fratrum Arvalium apud Fabretum (2):

QVOD · BONVM · FAVSTVM · FELIX · FORTVNATVM · SALVTAREQVE · SIT  
 IMP · CAESARI · DOMITIANO · AVG · GERMANICO · PONTIF · MAXIMO  
 ET · DOMITIAE · AVGVSTAE · CONIVGI · EIVS · TOTIQVE · DOMVI · EORVM  
 POPVLO · ROMANO · QVIRITIBVS · FRATRIBVSQVE · ARVALIBVS · MIHIQVE  
 SACRIFICIVM · DEAE · DIAE · HOC · ANNO · ERIT · A · D · XVI · K · IVN · DOMO  
 A · D · XIII · K · IVNIAS · IN · LVCO · ET · DOMO · A · D · XIII · K · IVN · DOMO

II. Iam ad alterum quod spectat articulum, qui veteribus indices erant ludorum votorumque publicorum, nobis erunt supplicationum votorumque sollemnium. neque enim ludos nunc veterum more facimus, qui religionis causa atque ad Deos placandos edere solebant. at supplicationes vel ad opem implorandam vel ad gratias agendas saepe constituuntur, quarum monumentum exstare aliquod maxime convenit: nec minus votorum publicorum, ut periculis divinitus amotis, et accepti beneficii et liberatae fidei memoria posteritati prodatur.

Indices autem huiusmodi aut anaglyphis tabulisve pictis subjiciuntur, aut soli pro stare solent. veteres imitari qui cupiat, indices picturis ac signis breves admodum simplicesque subscribat: effigies enim ipsae multa loquuntur, quae verbis exponenda veteres non putabant. sed tamen Pontificum nomina et magistratuum praetermittenda non videntur, nec tacenda supplicationum aut votorum causa; nisi forte ex inscriptione nota sint totius operis, ad quod signa picturaeve pertineant: nam haec quidem si deest, vix ea ullo sculptoris aut pictoris indicari artificio possunt. itaque si proposita tabula esset, quae pompam eam referret, quam nostra aetate Clemens XIII. Pontifex Maximus ad templum Liberianum rite deduxit, supplicatione ob impendentes calamitates decreta; equidem plura his subscribenda vix putarem:

CLEMENS · XIII · P · M ·  
 CVM · PATRIEVS · POPVLOQVE  
 PLACANDI · NVMINIS  
 CAVSSA

quid, si populum sculptor fecisset vota Virgini Matri Dei nuncupantem, quum ille

(1) Fabr. p. 672. n. 7. v. et Gell. N. A. I. 10. c. 24.

(2) p. 444. n. 51. et Marin. Frat. Arv. Inscr. Tav. XXIV.

idem Pontifex repentino primum est morbo tentatus? non aliud plane indicis loco adscriberem, quam haec aut similia:

PRO · SALVTE · CLEMENTIS · XIII · P · M ·  
OPTIMI · PRINCIPIS

reliqua nempe ipso in marmore oculis quisque legeret suis, sculptoris arte descripta: quam ob caussam, fortasse etiam ob titulum longiorem in fronte operis positum, paucioribus plane verbis conceptae eae sunt inscriptiones, quas attuli libro primo (1).

At si monumenta unis constare litteris debeant, nec rerum series nisi oratione in marmore exponenda sit; tum vero ex veterum penu multa promere, et totos si velis columnarum scapos implere liceat: praesertim si res magnae agantur, quae extra ordinem ac perraro fieri soleant. exemplum autem petendum maxime ex Ara Narbonensi, ut ut pulcherrimi monumenti particula aliqua, vetustate absumpta, perierit (2). haec in Arae fronte inscripta legimus:

T · STATILIO · TAVRO  
L · CASSIO · LONGINO (3)  
COS · X · K · OCTOBR ·  
NVMINI · AVGVSTI · VOTVM  
SVSCEPTVM · A · PLEBE · NARBONENSIVM · IN · PERPETVOM  
QVOD · BONVM · FAVSTVM · FELIXQVE · SIT · IMP · CAESARI · DIVI  
F · AVGVSTO · P · P · PONTIFICI · MAXIMO · TRIB · POTEST · XXXIII ·  
CONIVGI · LIBERIS · GENTIQVE · EIVS · SENATVI · POPVLOQVE  
ROMANO · ET · COLONIS · INCOLISQVE · C · I · P · N · M · (4) QVI  
SE · NVMINI · EIVS · IN · PERPETVVM · COLENDO · OBLIGAVERYNT  
PLEBS · NARBONENSIVM · ARAM · NARBONE · IN · FORO · POSVIT  
AD · QVAM · QVOT · ANNIS · VIII · K · OCTOBR · QVA · DIE · EVM  
SAECVLI · FELICITAS · ORBI · TERRARVM · RECTOREM · EDIDIT · TRES  
EQVITES · ROMANI · A · PLEBE · ET · TRES · LIBERTINI · HOSTIAS  
SINGVLAS · INMOLENT · ET · COLONIS · ET · INCOLIS · AD  
SVPPPLICANDVM · NVMINI · EIVS · THVS · ET · VINVM · DE · SVO  
EA · DIE · PRAESTENT · ET · VIII · K · OCTOBR · THVS · VINVM  
COLONIS · ET · INCOLIS · ITEM · PRAESTENT · K · QVOQVE · IANVAR ·  
THVS · ET · VINVM · COLONIS · ET · INCOLIS · PRAESTENT · VII ·  
QVOQ · IDVS · IANVAR · QVA · DIE · PRIMVM · IMPERIVM · ORBIS  
TERRARVM · AVSPICATVS · EST · THVRE · VINO · SVPPPLICENT · ET  
HOSTIAS · SINGVL · INMOLENT · ET · COLONIS · INCOLISQVE · THVS  
VINVM · EA · DIE · PRAESTENT  
ET · PRIDIE · K · IVNIAS · QVOD · EA · DIE · T · STATILIO · TAVRO  
M · AEMILIO · LEPIDO · COS · IVDICIA · PLEBIS · DECVRIONIBVS  
CONIVNXIT · HOSTIAS · SINGVL · INMOLENT · ET · THVS · ET · VINVM  
AD · SVPPPLICANDVM · NVMINI · EIVS · COLONIS · ET · INCOLIS  
PRAESTENT  
EXQVE · IIS · TRIBVS · EQVITIBVS · ROM · LIBERTINIS · VNVS · . . .

verba hic aliquot deleta puto, quibus significabatur, quid praeterea eo die ab uno e libertinis equitibus praestandum esset, exempli caussa MVLSVM · ET · CRYSTVLA · PLEEI · DET, aut similia.

Ad arae autem latus adjecta est dedicationis formula, cujus quidem initium desi-

(1) v. inscr. 66.

(2) Grut. p. 229.

(3) An. Varr. 764.

(4) Coloniae Iuliae Paternae Narbo-  
nis Martii.



deratur, sed litterae tamen, quae supersunt, indicio mihi sunt, Pontificem aut Flaminem in primo versu scriptum, qui *Nomine Plebis*

NARBONENSIS · ARAM · NVMINIS · AVGVSTI · DEDICAVIT

LEGIBVS · IIS · Q · I · S · S · (1)

NVMEN · CAESARIS · AVG · P · P · QVANDO · TIBI · HODIE · HANC · ARAM  
DABO · DEDICABOQVE · HIS · LEGIBVS · HISQVE · REGIONIBVS  
DABO · DEDICABOQVE · QVAS · HIC · HODIE · PALAM · DIXERO  
VTI · INFIMVM · SOLVM · HVIVSQVE · ARAE · TITVLORVMQVE · EST  
SIQVIS · TERGERE · ORNARE · REIFICERE · VOLET · QVOD · BENEFICII  
CAVSA · FIAT · IVS · FASQVE · ESTO · SIVE · QVIS · HOSTIA  
SACRVM · FAXIT · QVI · MAGMENTVM · NEC · PROTOLLAT · IDCIRCO  
TAMEN · PROBE · FACTVM · ESTO · SI · QVIS · HVIC · ARAE · DONVM  
DARE · AVGEREQVE · VOLET · LICETO · EADEMQ · LEX · EI · DONO  
ESTO · QVAE · ARAE · EST · CETERAE · LEGES · HVIC · ARAE  
TITVLISQ · EADEM · SVNTO · QVAE · SVNT · ARAE · DIANAE · IN  
AVENTINO · HISCE · LEGIBVS · HISQVE · REGIONIBVS · SIC · VTI  
DIXI · HANC · TIBI · ARAM · PRO · IMP · CAESARE · AVG · P · P ·  
PONTIFICE · MAXIMO · TRIBVNICA · POTESTATE · XXXV · CONIUGE  
LIBERIS · GENTEQVE · EIVS · SENATV · POPVLOQVE · R · COLONIS  
INCOLISQVE · COL · IVL · PATERN · NARB · MART · QVI · SE · NVMINI  
EIVS · IN · PERPETVVM · COLENDO · OBLIGAVERVNT · DOQVE  
DEDICOQVE · VTI · SIES · VOLENS · PROPITIVS

formula haec sollemnis fuisse, atque e libris pontificalibus sumpta esse videtur, quum sit ejus persimilis, quam habet ara Salonitana (2). hoc porro in exemplo quaedam tibi veluti norma praesto est, ad quam nonnulla aevi nostri monumenta referas: ea, opinor, maxime, quae posteros monere debeant de civitatis decreto, quo quis e sanctis Caelitibus inter caelestes urbis patronos adnumeratus sit: utramque enim, si libeat, inscriptionis partem imitari facile poteris; ut primum decretum, deinde votum adjecta precatione exponatur.

Quia vero contingit interdum, ut templa simul aut altaria excitentur, et religionis caussa multi fiant sumptus: haec etiam litteris consignanda sunt, describendaeque aedificii partes, et quae in unumquodque opus erogata pecunia, quamque stipem sacerdotum collegia aut sodalitates aut populus contulerint: quo etiam anno inchoata, quo absoluta opera sint. antiquus hic plane mos, quem barbari etiam aliquando tenuerunt. columnas memorat Strabo (3) aereas octo cubitorum, quae erant Gadibus in Mercuris delubro, sumptum in templi exaedificationem factum referentes. Romae vero nomina quoque incisa aliquando eorum omnium, qui pecuniam contulissent: praeter alia exemplum est apud Gruterum hoc initio (4):

IMP · CAESARE · T · AELIO · HADRIANO · ANTONINO · AVG ·

PIO · P · P · III · M · AELIO · AVRELIO · CAESARE · COS ·

ORDO · CORPORATOR · QVI · PECVNIAM · AD · AMPLIAND · TEMPLVM · CONTVLER ·

quae post verba distributi in classes leguntur singuli, a quibus pecunia collata fuerat: primum ejus ordinis *Patroni*, deinde *Quinquemales Perpetui*, e quibus A · ECRILIVS · FAVSTVS · TESTAMENTO · RELIQUIT · HS · III · M · N · SVB · EA · CONDICIONE · VTI · EX · VSVRIS · S · S · S · V · KAL · DEC · OMNIBVS · ANNIS · EPVLENTVR: tum reliqui sodales eo ordine, quo in collegium venerant.

(1) *Quae Infra Scriptae Sunt*,  
(2) v. inser. 65,

(3) l. 3. p. 170. A.

(4) Grut. p. 126. v. Falr. p. 540. n.  
514. p. 448. n. Xll. p. 601. n. 21. etc.

Quod reliquum est, si nil aliud, quam sacra aut supplicationes recensendae sint, quae ex voto aliquo aut decreto quotannis fiant, imitari liceat annales illos feriarum Latinarum, quos ex fragmentis in summo Albani montis, ubi celebrabantur, iugo reperi-  
tis, Gaspar Odericius vir doctissimus descripsit illustravitque (1): sunt autem lapides tres, sed litterae primi et secundi corruptae, in tertio hi versus prope integri:

C · MINICIO · FVNDANO  
C · VETTENNIO · SEVERO C . . . .  
LAT · FVER · PR · IDV · AVG ·  
P · AELIO · HADRIANO C  
M · TREBATIO · PRISC ·  
LAT · FVER · (2) · · K · IVL ·  
P · CALVISIO · TVLLO  
L · ANNIO · LARGO  
LAT · FVER · . . . .

sed plura aliquando dabit (a) Cajetanus Marius vir eruditissimus, cujus in mancipio lapides ipsi sunt. vides, opinor, scribi nihil posse simplicius: consules cientur ad indicium annorum, iique suffecti, quod eae feriae in vernum fere aestivumve tempus edicerentur: et quia conceptivae erant, non stativae, dies etiam adscribitur, quo sacrum in monte rite perpetratum. tu vero in ejusmodi monumentis vel annum scribito Dionysianae supputationis, vel regnum, si libet, pontificatum, magisterium eorum, sub quibus aut supplicatio instituta, aut sacrum singulis annis peractum est: diem item, nisi status hic sollemnisque sit: tum quae res acta fuerit: nec jam plura opus erunt.

III. Quae demum Kalendariorum forma et distributio esse debeat, ipsa, quae libro primo exhibita sunt, exemplaria satis demonstrant. nulla ibi exornatio est, nullus verborum ambitus: res quaeque ipsis tantummodo, quae necessaria essent, vocabulis expedita: omnia vero distincta notis litterisve, atque eodem semper ordine ac ratione digesta. sunt tamen priscorum Kalendariorum quaedam reliquiae, unde constet, veteres in his etiam monumentis longiore aliquando oratione usos esse, in primisque Verrium Flac- cum, quod ex Fastis ejus Praenestinis uberius nuper didicimus: atque id factum maxime, ut causas originesque feriarum ac festorum dierum exponerent. exempla hujusmodi multa congeram in librum tertium (5): unum hic describam, quod particulam esse e Verrii Kalendario desectam, non ambigitur: Praeneste enim lapis repertus est (4).

NON · N · (5) CONCORDIAE · IN · ARCE · FERIAE · EX · S · C · QVOD · EO  
DIE · IMPERATOR · CAESAR · PONTIFEX · MAXIMVS  
TRIB · POTESTAT · XXI · COS · XIII · (6) A · S · P · Q · (7) ROMANO  
PATER · PATRIAE · APPELLATVS

atque illud etiam animadvertas, velim, quae Kalendaria in municipiis dedicarentur, in his quoque Romanas ferias festosque urbis dies esse descriptos: quod non Praenestini solum, sed etiam Antiatini (8) atque Amerini Kalendarii (9) reliquiae deciarant: cujus consuetudinis non ea solum fuisse ratio videtur, quod municipales feriae et sacra sollemnia rariora essent; sed haec etiam, ne ignorarent municipes Itali, quo maxime tein-  
pore ludorum spectandorum causa, in urbem itare praestaret. at plura etiam licentius-  
que ab iis congesta et descripta constat, qui Kalendaria privata condebant: quale Theo-  
dosii et Valentiniani Augustorum temporibus (10) sibi fecit Polemeus ille Silvius, qui et natalem suum Idibus Iunius adscripsit hoc modo, NATALIS · MEVS · hi nimirum

(1) Syll. vet. Inscr. p. 231. n. 84. v.  
Grut. p. 234. n. 1.

(2) *feriae Latinae Fecerunt.*

(a) Et reapse dedit Frat. Arv. p. 129.  
unde fragmentum istud ab Odericio  
haud emendate editum deprompsi.

(5) part. 1. c. 8. p. 2. §. 1.

(4) Grut. p. 156. n. 2.

(5) *Nonis* nempe Februarii, *Nefastus*  
h. e. dies.

(6) An. Varr. 752.

(7) *A Senatu Populoque.*

(8) Tab. Antiat. Vulpii.

(9) Murat. p. 150. n. 1.

(10) Bolland. Act. Ss. Ian. t. 1. in  
praef. §. 5.

voluptatem sibi atque laudem ab eruditione quaerebant: simul memoriae subsidium sibi bellissimum parabant, ut quae cuique diei adtributa essent, uno adspectu perviderent.

Quamquam autem in antiquis ejusmodi monumentis multa sunt, quae nostra in Kalendaria derivare non licet, quaedam praeterea, quae paullulum inflectenda sint; antiquorum tamen ordinem nos textumque imitari, plerisque etiam formulis uti fas est et convenit. ac primum non calendarum dies solum et nonarum atque iduum adscribentur, quemadmodum eos refert Kalendarium libri primi, exsuecuni sane atque simplex; sed ceteri quoque addentur dies, ut in Praenestino inscriptos fuisse liquet, sic nempe, ut post calendas singulorum mensium numeri tantum adnotentur dierum ad nonas, III. III. Pridie, idemque fiat deinceps post nonas, idem post idus. porro dierum notis praeponas, licet, perpetuas litteras septem, quae pro octonis illis sint, quas vetera Kalendaria praeferunt: ut iisdem recurrentibus diurni hebdomas significetur, altera alteri perpetuo succedens.

Dies autem Comitiales atque Endotereisos non est causa, cur recipias, quippe nobis inauditi sunt: sed Fasti contra et Nefasti dies, quique Nefasti priore appellantur, ubi jus praetores dicunt, recte apponentur. item si Kalendarium in Lyceo prostare debeat, non omittenda dierum eorum nota, quibus in ludum conveniendum sit: eaque huiusmodi esse potest, L. P. id est *Ludi Patent*, quemadmodum in Kalendario Praenestino Verrius scripsit ORACLVM · PATET: atque ubi mane ferias esse indicandum fuerit, adscribere poteris, L. P. A. MERIDIE, si contra sit, scribes L. P. FERIAE A. MERIDIE. addendae vero diebus suis non feriae solum, sed annua etiam Caelitum sanctorum festa; expressis dativo casu nominibus singulorum, quibus hic aut ille dies sacer est. quae tamen de stativis festis dicta sint: nam quae conceptiva sunt, aut caelestes conversiones sequuntur, ea locum non habent, nisi in his Kalendaris, quae nova quotannis proponantur.

Quid ni vero et jejunia instituenda, ac si quae fuerint statae supplicationes pompaeque sollemnes, recte adjungantur? esto quaedam etiam non in municipio tuo, sed in urbe fiant: id enim veteribus quoque placuisse indicavimus, quidquid demum apud cives tuos quotannis fieri celebrarique publice solet, ludi potissimum opportune inserentur: qui si statim sollemnesque sunt, ubi alia desint nomina, a numero diei, quo edentur, appellari possint: nam de Quinquatribus haec Festus tradit (1): *Forma vocabuli ejus exemplo multorum populorum Italicorum enuntiata est, quod post diem quintum Iduum (Martiarum) est is dies festus: ut apud Tusculanos Triatrus et Sexatrus, et Septenatrus, et Faliscos Decimatrus. nec improbandus, qui et mundinas addiderit, sive ea in municipio, sive in finitimis fiant oppidis: nam et hae olim in Kalendaris interdum designatae: ut in veteri fragmento apud Gruterum (2):*

NUNDINAE · AQVINI · IN · VICO · INTERAMN · MINTVRN ·  
ROMAE · CAPVAE · CASINI · FABRATER ·

Haec fere sunt, e quibus Kalendarium existere possit utile plane atque elegans, quidam et cardinem temporum atque ortum occasumque siderum interponenda putaverunt: quae tu, si libeat, a mathematicis petes. Kalendarium huiusmodi, satis lepidum, scripsit olim vulgavitque Novidius Fraceus Ferentinus: quod Fastis sacris praeposuit, iis quos Ovidii more compositos, Paulo III. Pontifici Maximo dedicavit (3). ceterum liber hic, qui perrarus est, ad manum si venerit, Kalendariumque illud ob oculos habueris, voluptatem quidem legendo capies non medioerem, et scripta quaedam apposite, et quae imiteris, invenies: at non pauca etiam offendent; ac modo latinam dictionem, modo rerum delectum aut scriptoris judicium desiderabis.

(1) *V. Quinquatrus.*

(2) p. 136. n. 1.

(3) edit. Romae 1547.



## CAPUT II.

## De inscriptionibus honorariis

## §. I.

## DE RATIONE GENERIS VNIVERSA

**P**lana quidem omnia et certa esse videntur, quae huic inscriptionum generi aptissime conveniant; nec aliud fortasse reperitur, cuius exempla tam parum ordine inter se textuque discrepent. raro tamen id temporis honoraria occurret inscriptio, non tam quae probis veritatis inusta sit notis, qua de re alio loco dicendum est, quam quae mendo careat, antiquisque exemplis respondeat. vidi olim, et risi, initium honorariae inscriptionis factum ab illis litteris D · O · M., in alia subscriptam formulam LIBENTES · MERITO, item in alia S · P · Q · R · VOTA NVNCVPAT: quae singula inscriptionum sacrarum formulae sunt. nulla vero in honorariis inscriptionibus frequentior hac aetate clausula, quam tria illa D · D · D. sive *Dant Donant Dedicant*: quae unde petita sint, nescio (a): nam tria quidem D · D · D. saepe vidi in antiquis monumentis: sed ea sic legebam *Datum Decreto Decurionum*: nec si duo tantum incisa essent, aliud significari audieram, quam in sacris *Donum Dedit*, in ceteris *Decreto Decurionum*: in honorariis autem si scriptum esset DEDIC. ad statuae jam ab artifice absolutae destinationem atque ἀποδείξιν referendum esse didiceram (1). haud desunt tamen, qui tria illa D · D · D. respiciant, deprecantur: sed iidem subscribere solent MONVMENTVM · POSVERVNT, quod utique claris viris, quos honorant, omen jam proximae mortis esse possit.

Rursus inscriptionis initium quidam ducunt ab apposito aliquo atque laude: qui tamen quo se lare tueantur, vix reperio. exstant profecto inscriptiones aliquot his exordiis (2). sed quae crudita aetate non prodierunt. at eos fortasse binae Puteolanorum inscriptiones in fraudem induxerunt, quarum alteram Fabrettus edidit (3), alteram Muratorius (4). nempe initium primae est MAGNO · IMP · CAES · M · AVRELIO · ANTONINO: quid tamen? appositum illud MAGNO inter praenomina aut cognomina numerandum erat, ut illud alterum Augustorum commune IMP. nam Caracallam, cui ea posita inscriptio fuit, tamquam Pompejum alterum, vel post mortem *Magnum* esse appellatum, declarat numentus vultu ejus signatus cum titulo (5) DIVO · ANTONINO · MAGNO, in cuius fronte aversa rogis et titulus CONSECRATIO. en vero inscriptionem alteram:

MAGNO · ET · INVICTO  
IMP · CAES ·  
DIVI · TRAIANI · PARTHICI · F · DIVI · NERVAE · NEPOTI  
TRAIANO · HADRIANO · AVG · PONT · MAX ·  
TR · POT · V · COS · III · OPTIMO · MAXIMOQ · PRINC ·  
P · DECRETO · DECVRIONVM · ET · POPVLI  
CONSENSV

nihil quidem ad hanc inscriptionem Saxius adnotavit (6), sed primum illum versum

(a) Fortasse ex Cic. Act. 2. in Verr. l. 4. c. 29. n. 67. ubi rex Antiochus candelabrum, licet a Verre sibi ablatum, tamen in foro Syracusano se DARE, DONARE, DICARE, consecrare Iovi optimo maximo clavit.

(1) v. inscr. 38.

(2) Maff. M. V. p. 213. n. 1. p. 459. n. 3. Fabr. p. 720. n. 419. Don. Cl. 2. n. 175. etc.

(3) Fabr. p. 685. n. 88.

(4) Murat. p. 233. n. 2.

(5) Vaill. t. 1. p. 121.

(6) in Peric. Animadv. ad Thesaur. Murator.

insitutum ut credam, aevoque inductum recentiore, faciunt verba, quae infra sunt, OPTIMO · MAXIMOQ · PRINC · ob quae locus primis esse non videtur. adde, nusquam eam formulam aliis in titulis apparere, et Imperatores multo serius *Invictos* appellari coeptos. quare antiquo exemplo carere dixerim, qui ante nomina et quae cum his congruunt cohaerentque, praepropera laude communes titulos et apposita illa *γενικά* usurpant.

II. Antiquae contra eae formulae *Divi Filio*, *Divi Filiae*; at nobis quidem profanae, neque probare eos possum, qui Rege aut Imperatore natos eo titulo honestari posse putaverunt, simul atque parentes eorum decessissent: multoque minus eos, qui proavorum nostrorum memoria Principes ipsos Pontificesque Maximos, quum in vita essent, *Divos* appellaverunt. scio equidem, id vocabulum post Constantini Magni tempora tritum sermone factum esse, significationemque ejus fortasse atque vim immutatam: ut non solum Christianis Imperatoribus adtributum sit, sed a Christianis etiam hominibus aliquando usurpatum. nota enim illa inscriptio, cujus initium est DIVO · VALENTI (1): et a Symmacho scriptum constat (2), *Sollenne est Divo nostro Theodosio*: in Christianis autem epitaphiis legimus (3) his DIVO · IOVIANO · AVG · et *Varroniano Coss.* quem Iovianum etsi Eutropius (4) inter *Divos* relatum scribit, Ammianus tamen (5) nullam de eo *αποθεωσιν* commemorat, conditumque *inter Augustorum reliquias* tradit: quod Zonaras sic explicat: *εν τη των Αποστολων εταφη ναφ.* verum apud quos unquam, qui latine scribere vellent, temporum horum auctoritas aut interpretatio valuit? quis vero inscriptionum formulas ab eorundem temporum exemplis desumendas putavit, quum ea quisque lingua uti se profiteatur, quae et Latinorum fuerit, et erudita aetate probata sit? quo sane tempore nemo *Divus* unquam dictus, nemo latine dici posse creditus, nisi qui Deus haberetur: ut ut Servius *Divos* dici *ex hominibus factos* scripserit (6), *quasi qui diem obierint.* ad summam vocabulum id quum offendimus, stomachari plerique et moleste ferre solemus, vel quod minus religiose, vel quod putide nimis et adsentatorie usurpari videatur: et est sane indigna res atque intoleranda, homines adhuc inveniri, qui ea nunc probari putent posse, quae olim ipsae Imp. Tiberii aures respuerunt: de quo tradit Tacitus (7), acerbe inerepuisse eos, qui de ipso loquentes *Divinas Occupationes* dixerant, quos et verba mutare iussos, scripsit Suetonius (8).

Quid jam de numerosa illa conclusione dicam, quae nunc in deliciis est, DEVOTI NOMINI · MAIESTATIQUE · EIVS? dicebant olim NVMINI, totaque ea formula circa Severi tempora, aut sub extremum Commodi Principatum inducta est. nam inscriptio illa Tarracensis, quae apud Gruterum (9) Trajani (a) nomen praefert, et si quae aliae ejus aetatis existimantur, meo quidem iudicio falsae et commentitiae sunt. hisce autem verbis usi veteres mihi videntur, ut ex iis se esse ostenderent, qui vitam suam pro gloria et salute Principis Genio ejus devovissent. *Devotos* sane apud Caesarem (10) fuisse video, quos Galli Soldarios vocabant, homines paratos, cui fidem suam sacramento obstrinxissent, ejusdem ferre casum, aut sibi mortem consciscere. atque his persimiles in Hispania fuere: quorum more Sex. Pacuvium Romae in senatu Caesari Augusto se consecrasset, tradit Dio, ejusque exemplo Romanos se Imperatori *Devotos* dicere coepisse (11): Αφ' ούπερ και νυν προτρεπομενοι τον κρατουντα, λεγειν ειωθαμεν, οτι σοι καθεστωμεθα.

(1) Antiq. Benev. t. 1. p. 148.

(2) epist. 8. l. 3.

(3) Mus. Ver. p. 252. n. 2.

(4) lib. 10. c. ult.

(5) l. 26. c. 1.

(6) ad Aeneid. l. 5. v. 45.

(7) Ann. l. 2. c. 87.

(8) in Tib. c. 27. n. 3.

(9) p. 258. n. 6.

(a) At cit. inscriptio non Trajani, sed M. Antonini Veri nomen praefert, quotamen non imperatorem M. Aurelium, sed Caracallam indicari compertum est ex iis, quae attulit

Ios. Finestres in Syllog. Inscr. Rom. p. 47. licet Veri cognomen huic imperatori minime conveniat.

(10) B. G. l. 3. c. 14. n. 22.

(11) l. 53. p. 715. C. ex quo nunc etiam a Principe discedentes dicere solemus, ei nos esse devotos.

num igitur quispiam ut olim *Devotus Numini*, ita nunc *Devotus Nomini* recte dicatur? id Grammatici, opinor, aegre laturo sunt: nullam enim esse ajunt, aut excogitari posse voti sponsionem, quae cujuspiani nomini fiat: nam veteres quidem, qui se *Devotos* dicerent *Numini* et *Majestati* Principis, Genium ejus intellexisse, per quem et jurabant, ipsanique *Majestatem* in Dearum habuisse numero; de qua Ovidius multa cecinit (1): nihil vero suffragari vulgatum Horatii versum (2),

*Iurandasque tuum per nomen ponimus aras:*

in quo *NUMEN* legendum esse, jam ostendit Bentlejus. at contendes fortasse, leniori etiam sensu *Devotos* se dixisse veteres, ut fide nempe ac voluntate addictos se Principi deditosque significarent. ita plane, non repugno: expungi tamen illud *Nomini* longe praestat, primum quod et minus proprium et sine exemplo sit: deinde quod Christianorum Principum caussa veteres, repudiato *Numine*, aliis plane vocabulis usi sint (3):

DOMINAE · NOSTRAE · FLAVIAE · AVGVSTAE  
HELENAE · DIVI · CONSTANTII · CASTISSIMAE  
CONIVGI · PROCREATRICI · D · N · CONSTANTINI  
MAXIMI · PISSIMI · AC · VICTORIS · AVGVSTI  
AVIAE · DOMINORVM · NOSTRORVM · FL ·  
CONSTANTINI · ET · CONSTANTII · BEATISSI  
MORVM · AC · FELICIVM · CAESARVM  
ALPINVS · MAGNVS · V · C · CORR · LVCANIAE  
ET · BRITTIORVM · STATVIT · DEVOTVS · EXCELLEN  
TIAE · PIETATIQVE · EIVS

ceterum quum *Majestatem* veteres pro ipsa etiam amplitudine ac dignitate Augustorum usurpaverint, iusta etiam tibi formula esse potest, DEVOTI · MAIESTATI · EIVS, exemplo ex inscriptione Beneventanae coloniae (4) petito, quae se DEVOTAM · MAIESTATI · AVGG. esse gloriatur: ac si de Pontifice Maximo agetur, subscribere etiam liceat, DEVOTVS · SANCTITATI MAIESTATIQVE · EIVS.

II. Sacerdotia quidam et honores post nomen designant, quo loco veteres tribum scribebant, deinde cognomen addunt, hoc pacto: *Petro Cardinali Bembo, M. Antonio Canonico Boldetto, Aloysiò Ferdinando Comiti Marsilio*: sane insulse; quid enim hoc sapit? exemplum utique habent unum, quod proferant, sed tamen Hispalense (5): cujus auctoritatem singula prope elevant verba: ut Fabretto (6) nihil suboluisse, magnopere mirer. at in epitaphiis, iniquis, muneris artisve nomen aliquando ante viri cognomen legimus: est enim a Fabretto id exempli (7):

DIS · MANIBVS  
M · LATINIVS · M · L ·  
MEDICVS  
OCVLARIVS  
HERMES · VIXIT · ANNOS  
XXXX ·

ita sane: quin imo in altero ejusdem epitaphio *Regis* appellatio ante cognomen item usurpata (8):

(1) Fast. l. 5. v. 25.

(2) l. 2. epist. l. v. 16.

(3) Murat. p. 261. n. 1.

(4) v. inser. 117.

(5) Grut. p. 380. n. 7.

(6) p. 300. n. 278. v. Maff. Art. C.

L. l. 3. c. 4. p. 327.

(7) Fabr. p. 300. n. 277.

(8) id. p. 439. n. 44.



IVLIA · TYNDARIS  
 C · IVLI · REGIS  
 RHOEMETALCIS · L ·  
 FECIT · SIBI · ET · SVIS · ET  
 LIBERTIS · LIBERTABVS  
 POSTERISQVE · EORVM  
 IN · FR · P · XII · IN · AGRO · P · XII ·

quid tamen? volsellis pugnas, non gladio: stat enim, vel hoc ipsum semel iterumque nequaquam sine caussa esse factum: quippe Hermes ille M. Latini non libertus tantum, sed etiam Medicus oculusarius erat: Rhoemetalces vero, cui honoris caussa praenomen nomenque suum Augustus concesserat, ita plane appellandus fuerat, ne, si scripsissent *Regis C. Iulii Rhoemetalcis*, Romanae id aures respuerent, Latinum Regem laturae neminem, nedum hunc Thracem.

Nec vero minus inepte faciunt, qui sacerdotiorum et dignitatum vocabula, quae composita sunt, dividunt, ut appositum interjiciant. nam verbi gratia, quum Pontificem Maximum pulcherrimo Trajani cognomine ornare velint, *Pontificem Optimum Maximum* appellant: sic eum, qui *Pontifex Maximus* erat, formula distracta, in Pontificem minorum numerum detrudunt: quemadmodum de eo, qui Etruriae imperitat, si scribas *Magno Et Invicto Duci*, titulum plane eripis, quo gaudet, ut *Magnus Dux* appelletur: quippe nil jam aliud et *Maximus* et *Magnus* ob illam *τῆς* esse incipiunt, quam appositae mera; dignitatisque nomina *Pontifex* et *Dux* sola remanent, ac pristina jam potestate exeidisse plane videntur. at in exemplis, inquires, tuis (1) Septimius Severus dicitur *Pontifex* et *Parthicus Maximus*. meministi equidem, atque unicuique esse exemplum puto, quod afferri possit: nec tamen ejusmodi, ut ea, quae tradidi, infirmet. hoc enim loco *Parthicus* non est appositum, quo *Pontifex* ornatur, sed alterum veluti substantivum, cui tum idem appositum *Maximus*, ut vocabuli unius instar essent, jungebatur: Severus scilicet, ut ante ipsum M. Aurelius, et Pontifex Maximus erat et *Parthicus Maximus* appellabatur (2): ceterum quod in ea inscriptione semel euphoniae gratia omissum est, in altera quater leges (3), in qua Antoninus Severi filius appellatur *Parthicus Max.*, *Britannicus Max.*, *Germanicus Max.*, *Pontifex Max.*

Sunt et alii, qui sub ipsum inscriptionis initium magistratus efferre nullos solent sine illustri appposito, quum nemo tamen apud veteres aut *Consul Amplissimus*, aut *Censor Aequissimus*, aut *Aedilis Diligentissimus* dictus sit: quod illi servabant, non tam ne quod uni darent, ceteris quodammodo detrudere viderentur, quam quod eo loco non virtutes ejusque, sed honores tantum recenserent. scio non Trajanum modo *Optimum*, sed Antoninum etiam *Pium* esse dictum, Commodum vero *Nobilissimum* (4), et hunc et reliquos ex Augustis *Pios Felices*, eosdemque a devictis gentibus *Germanicos*, *Dacicis*, *Parthicis*, *Britannicis* et hujusmodi: tum horum filios *Nobiles* aut *Nobilissimos Caesares*, imo et *Beatissimos* vel *Praestantissimos*: at haec omnia Principum Caesarumque agnomina erant, titulique honoris caussa in perpetuum adtributi: quare vel ipsi sibi hos adscribebant usurpabantque, ut historicae passim inscriptiones declarant. e privatorum autem numero Plautianum vidimus appellatum esse *Pontificem Nobilissimum* (5), sed eadem ratione, qua Caesares *Nobilissimi* dicebantur, quod nempe ob filiae nuptias Augustos cognatione attingeret. apposita igitur hujusmodi si exceperis, quae perpetua et propria erant, nescio, an alia e communibus repereris, quae in recensione magistratuum munusque publicorum singulis eorum nonimibus adjuncta

(1) v. inscr. 118.

(2) ibid.

(3) v. inscr. 213.

(4) v. Spanheim, diss. 12. p. 337.

(5) v. inscr. 118.

sint, quum haec sub inscriptionis finem ad designandas virtutes, suo quasi loco veteres addere solerent, quemadmodum articulo sequenti exponemus.

III. Quae haecenus improbata sunt, facile quisque vitaverit, quotiescumque libitum erit. at plusculum est negotii in eligendis vocabulis, quum magistratus aut munera Latinis fere ignota latine tamen efferenda sunt. nihil enim profeceris, nisi quod propositum sit, non modo proprie vereque, sed clare etiam ac perspicue dixeris. id autem non ita cuique semper succedit, ut vel eruditissimos aliquando suspensos incertosque non teneat: sive quod minus videat fere qui legit, quam qui scripsit; sive quod ipsa rerum nomina non rem unam tantummodo, sed plures interdum propter verborum ambiguitatem significant. sed plurimum tamen in his valeat, qui sic antiqua praeoptet, ut nec recentia vocabula rejiciat omnia, et quae e veterum exemplis legit, proprie semper ac suo quaeque in genere usurpet. qua de re libro tertio ad singula prope capita agemus, quum de usu exemplorum et imitatione dicendum erit: rem hic tantum novitio confirmare titulo liceat, qui, dum hosce libros retractamus, in Albanorum praetorio positus est:

FERDINANDO • KAROLO  
 THERESIAE • AVG • F •  
 IMP • CAES • IOSEPHI • AVG • FRATRI  
 PRAESIDI • PROVINCIAE • AVSTRIACAE • TRANSPADANAE  
 PRAEFECTO • NVMERORVM • AVGVSTAE  
 IN • ITALIA • TENDENTIVM  
 ET • MARIAE • BEATRICI  
 RINALDI • F • ATESTINAE  
 CONIVGI • EIVS  
 OPTIMIS • IOCVNDISSIMISQVE • PRINCIPIBVS  
 KAROLVS • IIOR • F • ALBANVS  
 PRAEPOS • SACRAE • DOMVS • COMES • OMNIVM • ITINERVM  
 AD • MEMORIAM • FAVSTI • FELICISQ • DIEI • CONSIGNANDAM  
 QVI • FVIT • III • IDVS • MARTIAS • AN • M • DCC • LXXX •  
 QVO • DIE • FIDEICOMMISSARIAE • SVBVRFANI • HEREDITATIS  
 VSVCAPIONEM • AB • HOSPITIO • EORVM  
 AVSPICATVS • EST

Quid vero consilii capiendum putemus, quotiescumque aptam Latini formulam non suppediant? nam quosdam invenies adeo latinitatis studiosos atque amantes, ut animum inducere nullo modo possint, iis uti vocabulis, quae Latini non usurpaverint: qui si hoc statuunt, nihil cuiquam audendum nunc esse contra consuetudinem Latinorum, his me profiteor suffragari maxime. sed si verba barbarie hac nostra infuseata sic respuunt omnia, ut ne ex eo quidem genere ullum accipiant, cuius generis non pauca Latini scriptis suis celebrarunt; tum vero non possum, quin iis adverser atque repugnem. nam Romani quidem scriptores, quum gentium barbararum magistratus nominare oporteret, nomina eorum Latino more terminata quam parum horruerunt? nonne *Sufetem*, qui summus erat Poenis magistratus, et in Latinis inscriptionibus (1) et apud Livium saepe legimus (2)? nonne apud eundem occurrit Campanorum *Mediastuticus*, sive potius, ut Lipsius emendat (3), *Medixtuticus*: ab Ennio *Summus Medix* dictus (4)? quid Aeduorum *Vergobretus* (5), quid Persarum *Satrapes*, quid Graceorum

(1) v. inser. 314. et 315.

(2) l. 28. c. 19. n. 37. etc.

(3) Epist. Quaest. l. 1. ep. 19.

(4) Fest. v. *Medix*.

(5) Caes. B. G. l. 1. c. 11. n. 16.

*Archon* et *Prytanis*? nonne et externa omnia, et a Latinis tamen usurpata nihilominus? itaque istorum puto nimis delicatum esse fastidium, eosdemque quum minime opus est, difficiles ac morosos. eum vero satis commode fecisse iudicabo, qui Romanos scriptores imitatus, quidquid offenderit hujus generis, non ancipiti aliquo vocabulo, sed nomine suo, qualecunque id tandem futurum sit, ad Latinam normam deflexo haud multum haesitans appellaverit. Benibum certe nunquam imitandum proponam, qui quos *Duces* nunc appellamus, et *Tetrarchas* haud inseite quis nominarit, *Regem Urbini*, *Regem Mantuae*, *Regem Camertium* dicit (1): neque auctor ero, ut *Toparchas* a Graccia arcessas, qui pro *Marchionibus* sint. Heineccius etiam, qui fere pro Latina lingua pugnat acriter, et Latii fines contra peregrinitatem tuetur; non dubitat tamen, *ubi magna nos urgeat necessitas* (2), vel iis vocibus locum dare, quas Grammatici *hybridas* nominant, cujusmodi quaedam antiquitus receptae sunt, ut *Biclinium* et *Epitogium*: cosque probat, qui Austriae Principes maliut *Archiduces* appellare, quam *Magnos* aut *Supremos Duces*; quod neutro scilicet titulo satis vel designentur vel distinguantur.

V. Quaerendum et illud, recte ne his temporibus inscriptiones, quae claris viris publice ponuntur, eas litteras ubique praeférant s. p. q.? hanc enim formulam Heineccius (3) sic improbat, ut ludibrium debere putet, illa qui utantur, ubi populo nihil juris est in administranda republica; et ubi umbra potius collegii, quam senatus hoc nomine dignus occurrit. atqui nego, qui populus nihil in republica juris habeat, nullum ei locum esse in inscriptione legitimum. cur enim; si aere collato posita Principi statua est, populi, qui pecuniam contulit, nulla mentio fiet? non haec jubentis populi formula est, sed ei, cui paret, de suo gratificantis. ad senatus appellationem quod spectat, video quae res hominem offendat. quicumque litteris a pueritia dediti fuimus, quum voces illas s. p. q. r. auribus accipimus, nihil parvum nihil humile cogitare solemus: senatum illum meminimus aram fuisse sociorum, portum omnium gentium: ab eo praesides provinciis impositos, reges nationibus datos, regna adsignata aut adempta: quae omnia de nullo alio senatu praedicari vere possint: quare tota illa formula quasi quodam jure ad Romanos pertinere videtur. sed tamen quum senatus Romae esset, translatoque in eum comitiorum jure, magistratus etiam crearet, et Imperatores liceret; haud magnis in oppidis pauci patres et rara plebs audiebant *Senatus Populusq. Tiburs* (4), *Senatus Populusq. Timilignensis* (5), et hujusmodi: nec intelligo, cur munieipia haec impudentiae accusemus; quippe nihil tandem est aliud senatus, nisi summum populi consilium: ut in qua urbe seniores cogi solent, et de re aliqua communi deliberant, in ea senatum merito agnoscamus. si enim is tantum habendus senatus est, qui leges ipse ferat, et pro rege dominoque sit; ne Romae quidem sub regibus senatus fuit, siue quo tamen ne reges quidem, ut ait Tullius (6), esse potuerunt.

Ceterum demus, si libet, aliquid opinioni hominum, nec quae magna putantur, parvis temere rebus aptare audeamus. sunt adhuc in Italia, sunt alibi urbes aliquot, nec primariae, quorum tamen publicum consilium *senatus* vocatur. his tu praeclaram illam appellationem ne invidas: at quae alibi publice facta sunt, ea *Ordo et Plebs* fecisse dicatur: aut aliis utere formulis, quas liber tertius plurifariam exhibebit.

(1) v. Lips. epist. select. cent. 2. ep. 57.

(2) Fand. st. cult. part. 1. o. 2, n. 5.

(3) ibid. part. 2. c. 5. n. 6.

(4) Grut. p. 1025. n. 12.

(5) Reines. Cl. 7. n. 18.

(6) in Pis. c. 10. n. 23.



## §. II.

DE INSCRIPTIONIBVS HONORARIIS CLARORVM  
VIRORVM

I. Inscriptionum, quas veteres Imperatorum, Caesarum, ceterorumque illustrium virorum statuis subdiderunt, non idem semper initium fuisse, multis exemplis manifestum est. ex iis ipsis, quae Augusto positae sunt, quaedam hoc habent exordium IMP. CAESARI, aliae contra hoc S. P. Q. R. (1) nec Senatus solum primo versu legitur, sed aliquando etiam collegia, in his saltem, in quibus de privati hominis honore agatur (2):

COLLEGIA · FABR · ET · CENT ·  
L · CORNELIO · PROSODICO  
VI · VIR · AVG · BRIXIAE · ET  
VERON · SACERD · COLLEG ·  
IVVENVM · BRIXIAN ·  
PRIMUM · INSTITVTI  
OB · MERITA · EIVS  
HONORE · CONTENTVS  
IMPENDIVM · REMIS ·  
DATIS · IN · TVT · COLONIS · H · S ·  
N · D ·

in municipiis tamen primo semper versu nomen Imperatoris scripsere, plerumque et patronorum: quod imitari praestat, nisi forte honor a civitate aut provincia iis habeatur, qui nunquam ibidem cum imperio fuerint: horum enim tum nomina infra scribenda arbitror, ne quid de illarum dignitate atque auctoritate detrahere videamur. exemplum e municipio Gallicano petatur, inscriptio nempe Vasiensium Vocontiorum (3):

VASIEN · VOC ·  
C · SAPPPIO · C · FIL · VOL ·  
FLAVO  
PRAEFECT · IVLIENSIVM · TRIBVN ·  
MILITVM · LEG · XXI · RAPACIS · PRAEF ·  
ALAE · THRACVM · HERCVLANIAE · PRAEF ·  
RIPAE · FLVMINIS · EVPHRATIS  
QVI · HS · | XII | (4) REI · PVBLICAE · IVLIENSIVM  
QVOD · AD · HS · | XXXX | (5) VSVRIS · PERDV  
CERETVR · TESTAMENTO · RELIQVIT · IDEM  
HS · L · (6) AD · PORTICVM · ANTE · THERMAS  
MARMORIBVS · ORNANDAM · LEGAVIT

placuit et illud interdum, ut honoratorum nomina patrio casu efferrentur, hoc illis praeposito vocabulo HONORI, de quo dixi ad inscr. LXXXIII. nolim tamen, initium huiusmodi quoticumque tibi occurrat, inscriptionem statim honorariis adnunceres: quippe inde saepius historicae initium habent, ut suo loco dicemus. alia etiam virtutum nomina aliquando usurparunt, exempli gratia *Providentiae*, *Pietati*, *Clementiae*, eaque Graecorum more, qui, ut ait Tullius (7), virorum fortium memoriam honore Deorum

(1) v. inscr. 72. 88. etc.

(2) Grut. p. 397. n. 1. p. 468. n. 8.  
p. 469. n. 4. etc.

(3) Fabr. p. 644. n. 378.

(4) Scutat. numm. 30000.

(5) Scutat. numm. 100000.

(6) Scutat. numm. 1250. v. l. 5. c. 10.

§. 1.

(7) de nat. Deor. l. 3. c. 19. n. 50.

immortalium consecrabant: itaque non alia fuisse puto initia inscriptionum, quas Q. Tullio Proconsuli Asiatici posuerant: de quibus nempe Marcus frater ad eundem scribens, *Quoniam, inquit, in istis urbibus cum summo imperio et potestate versaris, in quibus Tuas Virtutes consecratas et in Deorum numero collocatas vides* (1): nec vero displicet quaedam Lipsii emendatio (2) ad Cornelii Nepotis locum in Attici vita (3): *Quamdiu adfuit (Athenis), ne qua sibi statua poneretur, restitit: absens prohibere non potuit: itaque aliquot ipsi et Fidei locis sanctissimis posuerunt.* legabant alii *Phidiae*, plane inepte: nec tamen satis apposite Manutius et Lambinus *Pi-liae*, Attici nempe uxori; nam cur *Fidei T. Pomponii* monumentum Athenienses posuissent, haud obscure protinus explicat Nepos his verbis: *Hunc enim in omni procuratore reipublicae actorem auctoremque habebant.* ceterum initia haec apud Latinos sacrarum inscriptionum propria magis, quam honorariarum esse videntur (4), eaque de causa non sine delectu usurpanda sunt, ne sensim in veterum superstitionem delamur.

At communior ea ratio est, ut inscriptiones honorariae ipsa honoratorum nomina primo versu, nec alio casu, quam dativo, referant: nisi quod in iis, quae Augustorum sunt, praenomina illa IMP. CAESARI fere antecedunt: quorum loco tu quoque scribes quidquid principalem majestatem designat: ut nuper a me etiam recte, opinor, in ea inscriptione factum, quam Apuanorum causa dictavi:

M · D · PETRO · LEOPOLDO · P · F ·  
 ARCHID · AVSTRIACO  
 THERESIAE · AVG · FILIO  
 IMP · CAES · IOSEPHI · II · AVG · FRATRI  
 DOMINO · OPTIMO  
 INDVLGENTISSIMO  
 QVOD · MVNICIPIVM  
 LEGITIMO · CIVITATIS · IVRE  
 ET · THRONI · PONTIFICALIS  
 SPLENDORE · HONESTAVERIT  
 ORDO · ET · POPVLVS · APVANVS  
 RESTITVTORI  
 PRISTINAE · DIGNITATIS

nam et eodem modo in fornice Segusino scriptum est (5) M · IVLIVS · REGIS · DONNI · F · tum Cicero ipse *Regis* appellatione ante nomina fere usus est, cujus illa sunt *Rex Antiochus, Rex Hiero, Rex Ariobarzanes, Rex Dejotarus*. praeterea in aliis inscriptionibus, quae minus antiquae sunt, hoc etiam initium reperies D · N · quo quasi praenomine primi Augustorum appellati videntur Antoninus et Geta (6): atque hac formula Romae utemur apposite in titulis Pontificum Maximorum, quae his jamdiu a majoribus dedicata est.

Iamvero post cujusque nomina, de quorum distributione separatim capite primo partitionis tertiae agetur, iis, quibus summa imperii tradita esset, adscriptum AVG · aut OPTIMO · AVG · aut AVG · PIO, et quae articulo superiore commemoravi: Trajanus autem et AVGVSTVS PERPETVVS (7), in nummis saltem dictus est, ut deiu

(1) l. 1. c. 10.

(2) Elect. l. 1. c. 14.

(3) n. 3.

(4) v. inser. 2. et 35.

(5) v. inser. 73.

(6) v. inser. 43.

(7) Spanheim. diss. 12. p. 383.

de Severus Alexander IMP. PERPETVVS (a): at formula illa SEMPER. AVGVSTVS. Diocletiani temporibus inventa esse videtur (b). quae porro e tot priscorum Augustorum agnominibus usurpanda nunc sint, tute videris: neque enim is sum, qui definite de his quidquam atque statuere vel possim vel debeam. sed non omittenda certe, quae claris Principibus ad virtutes eorum indicandas imposita sunt, quorum alii, puta, *Iusti*, alii *Boni*, alii *Magni* appellati: nec quae a maioribus suis parta, tamquam haereditaria usurpare adhuc solent. Francorum Reges antiquissimis temporibus *Augustos* quoque appellatos esse, adnotavit jam ex Gregorio Turonensi Spanhemius (1). neque sane hic titulus, ex quo Caesari Octaviano collatus est, ita Imperatorum proprius esse coepit, ut nemo dein alius tulisse putandus sit. mitto uxores sororesque Augustorum, quae fere *Augustae* dictae sunt: Germanicum Caesarem, qui rerum nunquam potitus est, *Augustum* appellavit Quintilianns (2) (c): et Lucillam M. Aurelii filiam, quum virgo esset, *Augustam* appellatam vidimus libro superiore (3). quare nostra quoque aetate iis etiam, qui regio nomine non utuntur, recte illi maxime tribuent qui in eorum dominatu sunt: nisi forte in eadem inscriptione Imperatoris Aug. mentio fiat; quippe illa tum appellatio, quum Caesarum ab origine propria sit, minus recte ob comparisonem communicari cum aliis videatur. tum eosdem Principes *Pios* etiam et *Felices* et *Parentes Patriae* merito ac multorum exemplo appellaveris. *Tribuniiciae* contra *potestatis*, *Consulatum*, *Censurae* nomina, quae veteres addebant, nobis externa sunt, et regia nunc majestate minora. sed annorum tamen numerandorum causa subjungas, licet, *Anno Regni V.* aut *Anno Principatus X.* et similia. victorias demum designare qui volet titulo adjecto IMP. III. IMP. VII. is Romanam, opinor, consuetudinem haud tempestive satis inducere videbitur, quam revocare nostrum non est.

II. Reliquae inscriptiones, quae claris viris, sed tamen privatis positae sunt, eae post eorum nomina, curationes protinus, sacerdotia, magistratus referebant: paucas quasdam si exceperis, illi similes, quam in aede Salutis Catoni majori affixam tradit Plutarchus (4), quae facta ejus tantum et virtutes recenseret. hic vero incertus, quam ipse viam sequaris, quaeres de me, quum et nos magistratus cuique suos et munera, quibus functus fuerit, adjungimus, sit ne ex veterum consuetudine primo ea loco recensere, quae prius suscepta, an potius dignitatis habenda sit ratio, et majora minoribus praeposenda? scripsit quidem Fabrettus (5), *tritum esse a prioribus exiguis titulis, prout cursus honorum postulat, semper ad insigniores crescentibus cum aetate meritis inscriptiones procedere*. neque id tute aliquoties non vidisti, quum libri primi inscriptiones perlegeres. sed hoc quoque sine controversia tradi potest, placuisse aliquando veteribus, primum ut minores magistratus omitterent, deinde ut sacerdotia, sive quia perpetua, sive quia sacra, vel maximo magistratui praeposuerent, majus item minori, nulla temporis habita ratione. docet haec nos, ut alia exempla mittam, statuae titulus, quam plebs urbana Druso minori statuerat (6):

(a) Eckhel. tamen Doctr. N. V. t. 8. p. 358. contendit *Perpetui imperatoris* titulum Probo, et *Perpetui Augusti* Constantino M. primum attributum fuisse in nummis.

(b) Ceterum haec formula tribuitur Claudio Gothico in arcu triumphali Firmi apud Reines. cl. 3.

n. 42., quin etiam Philippo, si fides marmori, quod Gruterus p. 272. n. 9. ex Caendeno hausit.

(1) Dissert. 12. p. 385.

(2) Inst. l. 10. c. 1.

(c) Iamdiu est, quum viderunt viri eruditi in cit. Quintiliani loco sermonem haberi non de Germanico

Caesare, sed de imperatore Domitiano, cui Germanici cognomen fuit.

(3) v. inser. 449.

(4) in Cat. M. p. 347. B.

(5) p. 434. ad inser. 12. c. 6.

(6) Fabr. p. 395. n. 276.



PLEPS · VRBANA · QVINQVE · ET  
 TRIGINTA · TRIBVVM  
 DRVSO · CAESARI · TI · AVG · F ·  
 DIVI · AVGVSTI · N ·  
 DIVI · IVLI · PRONEPOTI  
 PONTIFICI · AVGVRI · SODAL · AVGVSTAL ·  
 COS · ITERVM · TRIBVNIC · POTEST · ITER ·  
 AERE · CONLATO

nempe Augustorum filii quasi per gradus ad patrum fastigium ascendebant, ante in minorum, quam in majorum sacerdotum collegia cooptati (1): nec Drusus pontificatum, nisi inauguratus, cepisse putandus est, quum Pontifices a Dionysio (2) ἱερὸν αἱ διαφανεστάται appellentur.

Verum enim vero ne haec quidem certa omnia atque fixa, aliis alia probantibus. consulatus potissimum et duumviratus, interdum et gradus honorum militares, perscripti ante sacerdotia: obtinuit et ordo ille Homericus ὕστερον πρῶτον, ut honores, qui primi omnium fuissent, extremo loco, qui vero ultimi, primo enunciarentur, sacerdotiis nihilominus post consulatum aut duumviratum expressis: ejus moris exemplum esto tibi inscriptio Tiburtina, in qua plures, quam in plerisque aliis, honores cumulatos esse reperies (3):

C · POPILIO · C · F · QVIR · CARO  
 PEDONI · COS · VII · VIRO · EPVLON ·  
 SODALI · HADRIANALI · LLGATO  
 IMP · CAESARIS · ANTONINI · AVG ·  
 PH · PROPR · GERMANIAE · SVPER · ET · EX  
 ERCITVS · IN · EA · TENDENTIS · CVRATOR ·  
 OPER · PVBLICOR · PRAEP · AERAR · SATVR ·  
 CVRATORI · VIAR · AVRELIAE · VETERIS · ET  
 NOVAE · CORNELIAE · ET · TRIVMPHALIS  
 LEGATO · LEG · X · FRETENSIS  
 A · CVIVS · CVRA · SE · EXCVSAVIT  
 PRAETORI · TRIBVNO · PLEBIS · Q · DIVI  
 HADRIANI · AVG · IN · OMNIBVS  
 HONORIBVS · CANDIDATO · IMPERATOR ·  
 TR · LATICLAVIO · LEG · III · CYRENAICAE  
 DONATO · DONIS · MILITARIBVS · A  
 DIVO · HADRIANO · OB · IVDAICAM  
 EXPEDITIONEM · X · VIRO · STLITIBVS  
 IVDICANDIS · PATRONO · MVNICIPI  
 CVRATORI · MAXIMI · EXEMPLI  
 SENATVS · P · Q · TIBVRS  
 OPTIME · DE · REPVBICA · MERITO

primum enim Popilius *Decemvir* fuerat *stlitibus judicandis*: quem *Decemviratum* iis muneribus adnumerabant, quae ante *Quaesturam* suscipi oportebat, et *vigintiviratus* appellabantur (4), deinde *Tribunus Laticlavius* sive in spem senatoriae dignitatis apud exercitum meruerat. tum *Quaestor Augusti* factus, et in hujus et in ceterorum honorum petitione senatui ab Imperatore commendatus, Tribunatu plebis Praeturaque functus, per alios item honorum gradus ad Consulatum postremo pervenerat, quem gessit cum M. Valerio Messala, anno Varr. DCCCLXVII.

Quae quum ita sint, vix jam reprehendi jure poterit, quicumque in munerum recensione nec temporis rationem habuerit, nec dignitatis: siquidem hoc unum, ubi opus

(1) v. Svet. in Cajo c. 12. n. 1.  
 (2) Ant. R. 1. 8. p. 510.

(3) Bergier. 1. 3. sect. 23. n. 7. Grut.  
 p. 457. n. 6.

(4) v. Lips. ad Tacit. Ann. 1. 3. c. 29.

erat, praestiterit, ut sacerdotia conjungeret, reliqua munera, vel a maximis orsus vel a minimis, serie non interrupta contexeret.

nl. At fieri nunc potest, ut ei aliquando honoraria inscriptio ponenda sit, cui nulli plane magistratus adscribi possint: quorum potissimum enunciatione Romani illi veteres nobilitatem indicabant: quippe apud eos ii Nobiles habiti, qui jus imaginum haberent, quod utique honorum administratione adipiscebantur. num igitur, si nulli honores commemorari possint, nulla jam praesto erit formula, qua clarorum virorum nobilitas designetur? vix sane probandae, quibus quidam utuntur, *Viro Nobili, Viro Patricio*: quum haec vocabula in antiquis marmoribus alio sensu usurpata sint: nam *Nobiles* quidem Caesares solum ceterique e domo regnatrice dicti; si qui vero *Patricii* appellantur, ii post Constantinum fuere, quum eo nomine Consilarii Principis vocarentur, quasi *Patres Imperatoris* (1). iis tamen, quorum majores Equites Melitenses fuerint aut Mauritaniani aut alio ejusmodi in ordine decuriave censi, recte adscripseris EQVESTRI · NOBILITATE, quae Taciti formula est (2). tum aliae quaedam sunt formulae plane insignes, quas item antiquitas celebravit: primum enim prolatis illustrium majorum nominibus, sic interdum viri nobilitatem veteres demonstrarunt (3),

CN · ASINIO  
POLLIONIS · ET · AGRIPPAE · NEPOTI  
PVTEOLANI · PATRONO · PVBLICE

itaque et Servius Galba Imp. *statuarum titulis*, ut a Svetonio accepimus (4), *pronepotem se Q. Catuli Capitolini semper* adscripsit; quem locum Maffejus oblitus fuerat, quum Asinii inscriptionem inter suppositas rejecit (5). si cui vero *genus materna superbum nobilitas* dabat, addidere aliquando *Alfia Nato, Fibinnia Nato*, ut est in epitaphiis Maffejanis (6). quod si de homine novo ageretur, qui beneficio Principis aut Decurionum decretis in nobilium gradum pervenissent, formulis utebantur hujusmodi, quae item usui esse possint: *Adlecto In Amplissimum Ordinem Ab Imp. Caes. Hadriano Aug.* (7), *Honorato Splendidissimis Civitatibus Italiae, Ornamentis Decurionalibus Ornato* (8). ceteras tibi liber tertius suppeditabit. quibusdam denique generis novitate obscuris, nec ulla dignitate exornatis, qui tamen a filiorum amplitudine commendari possent, adscriptum reperies, *Patri Equitum Romanorum* (9), *Patri Senatoris* (10) et similia.

Enimvero in Romanis hujus generis inscriptionibus, quum fere senatorum status subjectae essent, haud scio, an unquam senatoriae dignitatis causa adscriptum cuiquam fuerit *Senatori*: quippe magistratus ipsi eum ordinem satis designabant. sed tamen a M. Aurelii Aug. temporibus usurpari in titulis quoque coeptae post senatorum nomina litterae illae v. c. quod eos jam *Viros Clarissimos* nominare instituerant (11). his etiam utendum equidem censeo, quotiescumque viris principibus aut senatoria dignitate exornatis honos habetur. in municipiis autem honoris appellationes largius iis divisae, qui e patribus essent. primum ordinis equestris facta mentio, quod in eum ii solum e Decurionibus adlegebantur, qui censum equestrem haberent (12). deinde inter ceterorum munerum titulos iidem *Decuriones* plane appellati: exemplo sit inscriptio (13) in Ostiae parietinis nuper reperta, nec edita:

(1) l. ult. C. de consul.

(2) in Agric. n. 4.

(3) Fabr. p. 703. n. 245.

(4) in Galb. c. 2. n. 1.

(5) Art. Cr. L. l. 5. c. 4. p. 432. et 460.

(6) Mus. Ver. p. 367. n. 9. 14. v. Cic.

pro Cluent. c. 9. n. 27.

(7) Grut. p. 348. n. 1.

(8) id. p. 1024. n. 5.

(9) Fabr. p. 659. n. 497.

(10) Murat. p. 719. n. 5. et inser. 106.

(11) v. inser. 50.

(12) v. Plin. l. 1. epist. 19.

(13) nunc in Vill. Alb.

L · LICINIO · L · FIL · PAL ·  
 HERODI  
 EQVIT · ROM · DECVRIALI  
 DECVRIAE · VIATORIAE  
 EQVESTRIS · COS · DECVRIONI  
 QVINQVENNALI · DVVMVIRO  
 SACERDOTI · GENI · COL · FLAM ·  
 ROM · ET · AVG · CVRAT · OPER · PVBL ·  
 QVAESTORI · AER · AEDILI · FLAM ·  
 DIVI · SEVERI · SODALI · ARVLEN · (1)(a)  
 PRAET · PRIM · SACR · VOLK · FACIV ·  
 ORDO · AVGVSTAL ·  
 OPTIMO · CIVI · OB · MERITA

tum vero maxime Decurionatus meminere municipes, quum eum honorarent, qui apud alias quoque civitates eundem esset honorem consequutus, designata simul urbe, ut de magistratibus etiam fiebat, in qua quis ea dignitate auctus esset (2):

L · COELIO · VALERIO  
 VI · VIRO · MEDIOLAN ·  
 ET · CALPVRNIAE · L · F ·  
 OPTATILLAE  
 VXORI · EIVS · ET  
 M · AEMILIO · COELIO  
 COELIANO · DECVR ·  
 MEDIOL · ET · NOVAR ·  
 ET · LVCILIAE · L · F ·  
 SABINIANAEE · ET  
 M · AEMILIO · COELIO  
 CATIANO · FILIIS  
 COLLEGIVM  
 CENTONARIOR ·  
 HONORE · ACCEPTO  
 IMPEND · REMISER ·  
 ET · IN · TVTELAM  
 DEDER · HS · II ·

Comi haec prostabat inscriptio, quo e municipio gens Coelia fortasse fuit, aut certe, ut alia ostendunt marmora (5), ex Insubria. idcirco autem, quia non ibi ille Sevir fuerat, ubi monumentum Centonarii dedicarant, additum est *Mediolan.* nec patria ejus expressa, quod vel Comensis esset, vel tota Insubria notissimus. sic et sacerdotia enuntiabantur, quae quis aliis in municipiis inivisset: etiamsi statua ibi posita esset, ubi et sacerdotium mandatum erat (4):

(1) *Sod. Arulen.* id est, opinor, e schola stoica Rustici Aruleni, de quo Plin. l. x. epist. 5.

(a) Cajet. Marinus, qui hanc affert in *Iscr. Alb.* p. 56., hoc in loco legit ARVLENSI, ideoque putat,

Herodem non fuisse e schola Rustici Aruleni, tunc enim legeretur vel ARVLENIANO, vel ARVLENSI, sed potius hoc nomine intelligendum esse vel nomen

aliquod, vel collegium Ostiae nobis ignotum.

(2) Grut. p. 393. n. 8.

(3) id. ibid. n. 7. p. 678. n. 6. etc.

(4) Fabr. p. 406. n. 315



L · AVRELIO  
 L · L · VICTORI  
 DOMO · AEQVO  
 AVG · ET · SENIAE  
 SAC · PRIM · CORP·  
 AVGVSTALIVM  
 ORNAT · ORNAM·  
 DECVRIONALIB·  
 PLEBS · SENIENSIVM  
 AERE · CONLATO  
 CVRANT · AVR · SECVND·

Porro ea dignitatis et laudis insignia tum maxime commemoranda mihi videntur, quum magistratus et publicarum rerum administrationes proferri nequeunt, unde viro-  
 rum dignitas et generis amplitudo agnoscatur. nec diu haesites, quo tandem nomine eos  
 appelles, qui aliis civitatibus adscripti, publicique consilii participes facti sint. *Decu-  
 riones* tu quoque rectissime appellaveris: siquidem manent adhuc plerisque in urbibus  
 ea summi ordinis jura, quae olim fuerant, quum Senatui Romano et Imperatoribus Au-  
 gustis parebant; quique ex eo sunt ordine, his latine *Decurionibus* nomen est. simul  
 autem ceteros sive honoris sive dominatus titulos appones, qui jamdiu consuetudine in  
 linguam Latinam inducti sunt: nec eum, ubi locus erit, omittes, quo veteres patrocini-  
 um urbium aut collegiorum delatum susceptumve declarabant: quo illis his aliquando  
 in eadem inscriptione usi sunt: nempe ut eo se patrono uti ostenderent, quem jam alii  
 sibi decretis suis patronum optavissent (1):

M · SILIO · EPAPHRODITO · PATRONO  
 SEVIRVM · AVG·  
 MAGISTRO · IVVENVM · ITERVM · IVVENES  
 LVCOFERO  
 NENSES · PATRONO · OB · MERITA  
 QVOD · AMPHITHEATRVM  
 COL · IVL · FELICI · LVCOFER · S · P · F·  
 DEDICAVITQVE · L · D · D · D·

sunt autem hoc loco *Iuvenes*, qui alibi *Sodales Lusus Iuvenalis* (2) appellantur, col-  
 legia nimirum a Nerone instituta (3), de quibus erudite scriptum est ab Odericio (4).

III. His jam post clarorum virorum nomina censis, quae non modo ad honores  
 et munera, sed etiam ad ordinem ac genus cujusque pertinent, quorum formulas in li-  
 brum tertium rejeci; laus subinde addi potest, quae viri praecipua sit (5):

A · ANTONIO · A · F · POM·  
 PELAGIANO · IIII · VIRO  
 EQVITI · ROM · RARISSI  
 MO · INNOCENTISSIMO  
 QVE · CVR · R · P · ET · PATRO  
 NO · DECVRIONES  
 AVGVSTALES  
 ET · PLEBS  
 PETILINORVM  
 L · D · D · D ·

quamquam veteres apposita hujusmodi saepe ad extremum versum reservarunt, credo, ut et numero orationis et dignitati servirent: in Principum certe titulis saepe ultimo legimus versu (6):

(1) Mazoch. Tit. Camp. Amph. c. 3.  
 p. 78.

(2) Maff. M. V. p. 321. n. 2.

(3) Tac. Ann. 1. 14. c. 15.

(4) Diss. 5. n. 2. p. 90.

(5) Fabr. p. 118. n. 1.

(6) Grut. p. 248. n. 8.

IMP · CAES · DIVI  
 TRAIANI · PARTHICI · F ·  
 DIVI · NERVAE · NEP ·  
 TRAIANO · HADRIANO  
 AVG · PONT · MAX ·  
 TRIB · POT · III · COS · III ·  
 IMP · II · P · P ·  
 R H O D A N I C I (1)  
 INDVLGENTISSIMO · PRINCIPI

quin et eos aliquando, quos *Patronos* habebant, extremo item versu eo nomine appellabant, appositum fere subjicientes, quo virtutem ejus aut merita designarent (2):

L · VARIO · PAPIRIA  
 PAPIRIANO  
 II · VIRO · I · D · Q · Q ·  
 PRAEF · FABR · ROMAE · ET  
 TERGESTE · FLAM · HADR ·  
 PONT · AVGV ·  
 COLLEGIVM · FABRVM  
 · PATRONO · MERENTI

sic aliis adscriptum *Optime de republica merito*, vel *Optimo Civi* et similia, vel etiam ipsae virtutes eodem, quo nomen, casu. ut videre licet inscr. euI.

Quid, si pueris statua posita esset? quum nihil de his proferre possent illustre atque magnificum, post patris avique appellationem, aetatis annos adscripsere (3):

M · AGRIPPAE · M · F ·  
 AVGVSTI · NEPOTI  
 ANNOS · NATO · VII ·  
 A · OCTAVIVS · A · F · LIGVS  
 M · GENICILIVS · M · F · SABIN ·  
 II · VIR ·

sub adolescentium autem simulacris, si maturius, quam alii solerent, honores adepti essent, non id praetermittendum videbatur. quamobrem Domitius ille Afer Caii Aug. imaginem quum poneret, inscripsit in basi, ut est apud Dionem (4), *ὅτι ἐβδόμην καὶ εἰκοστὴν αἰών εἶτος, δευτέρου ὑπάτευει*: Cajum scilicet anno aetatis xxvii. alterum jam consulatum gerere: satis tamen inepte, quod et Cajus vidit; neque enim erant ea tempora, quibus illa aetas vel ad quaesturam gerendam in quolibet candidato requirebatur.

Simulacra duorum uno nunc in monumento vix cernas: quod contra apud veteres fuit: crebro enim apud eos gemina spectare aut plura licuit, in fornicibus maxime, quibus bigas quadrigasque, et statuas qua equestres qua pedestres imponebant. neque id Romae solum, sed in provinciis quoque, nec sero tantum, sed ab ipsa Tullii aetate factum, qui de Verre Siciliae praetore scripsit (5): *Hujus fornix in foro Syracusis est, in quo nudus filius stat: ipse autem ex equo nudatam ab se provinciam prospicit*. ergo illi, si una honoris habendi causa erat, titulis cuique suis adscriptis, communi aliquando appellatione laudem eorum, quos simul honorarent, in fine subtexebant: quemadmodum Nemausi adhuc in templi fronte legitur (6),

C · CAESARI · AVGVSTI · F · COS · L · CAESARI · AVG · F · COS · DESIGNATO  
 PRINCIPIBVS · IVVENTVTIS

(1) *nautae Rhodani*.

(2) Grut. p. 483. n. 2.

(3) Fabr. p. 623. n. 211.

(4) l. 59. p. 923. E.

(5) Act. 2. l. 2. c. 63. n. 154.

(6) Clariss. mon. Nem. pl. 3.

et in Hadriani et Sabinae titulo, quem infra proferam, subscriptum est *Locupletatoribus Municipii*: quibus adde inscriptionem in Severi et Antonini arcu, e qua Getae nomine sublato, illa addita sunt *Optimis Fortissimisque Principibus* (1).

At verbum, quo honorem a civitate aut collegio delatum enunciant, plerumque desideratur, in exemplis praesertim antiquae notae. neque enim opus erat apud eos, qui titulorum decus parsimonia verborum minui non putabant. causa tamen monumenti saepe expressa est vel generatim, ut quum adscribebant *Ob Merita*, aut *Optime De Republica Merito* et similia; vel singillatim, ut quum addebant *Ob Praecipuam Ejus In Edendis Spectaculis Liberalitatem*, aut *Quod Ejus Opera Vniversum Municipium Ex Summis Periculis Et Difficultatibus Expeditum Et Conservatum Est*: quibus de formulis suo loco agendum erit (2). narrationes autem hujusmodi haud raro extremum occupant locum (3):

C · VESIDIENO · CN · F ·  
 BASSO · AED ·  
 III · VIR · IVR · DIC ·  
 III · VIR · QVINQ ·  
 PVBLICE  
 D · D ·  
 QVOD · AQVAM · NOVAM  
 CONQVIRENDAM · ET  
 IN · MVNICIP · PERDVCEND ·  
 ET · NYMPHAEVM · FACIEND ·  
 PEC · PVB · C ·

adde his exempla illa libri primi, quae quum a communi ratione aberrare viderentur, singularibus adnumeravi. ea tibi exempla commonstrant, quo pacto multa saepe et diversa satis scite et commode una possis inscriptione comprehendere. prae ceteris tamen ea potissimum inscriptio imitanda, quae ordine centesima quarta est, Hadriano ab Ostiensibus posita: quod ea rerum distributio neque stili dignitati, neque orationis numero adversetur. idcirco eam inscriptionem, quae in Capitolio nunc legitur, quum non unam sententiam complecti deberet, non aliter mihi efferebam putavi:

PIO · VI · PONT · MAX ·  
 ANNO · M · DCC · LXXX ·  
 A · VOLSCORVM · REGIONE · REDVCI  
 OB · CVIVS · PROVIDENTIAM  
 ITINERIBVS · COMMVNITIS  
 ET · AQVIS · PALVDIVM · CORRIYATIS  
 APPIA · ITALIAE  
 AGER · POMPTINVS · VRBI · REDDITVS · EST  
 S · P · Q · R ·  
 PERFECTVM · AB · OPTIMO · PRINCIPE  
 GRATVLATVS  
 QVOD · SAEPE · MAIORES  
 FRVSTRA · TENTAVERANT

sed tibi interdum ceteris potius exemplis utendum erit, ne quid nempe ex iis, quae praescripta fuerint, onisuisse videaris: nihil esse inscriptionem putantibus non paucis, si non omnia et singula perstringat.

(1) v. inscr. 95.

(2) part. 3. cc. 2. 6. et lib. 3. part. 1.

c. 8. p. 4. §. 1. 2.

(3) Grut. p. 485. n. 7.



Ceterum, quaecumque inscriptionis sit forma, morosis hominibus indulgendo hoc quoque fiet, ut multa saepe abundant, et quantum verborum addas, tantum detrahas dignitatis. disce hoc ex Beneventanorum inscriptione non longa, caque satis antiqua, unde tamen, si quinque extremas voces ademeris, exemplum repente existet pulcherrimum, in quo nihil sit, quod redundet, nihil, quod necessarium sit, deesse videatur (1).

CLAUDIO . IVLIO  
PACATO . V . C . CONS .  
CAMP . OB . AEQVITA  
TEM . IVDICIS . ET  
PATROCINIA . IAM  
PRIVATI . ORDO  
B E N E V E N T A N V S  
PATRONO . POST  
FASCES . DEPOSITOS  
CENSUIT . CONLOCANDAM

nimirum si Claudius ille erat *Iam Privatus*, quid opus fuit adscribere *Post Fasces Depositos*? et quum statua ejus jam in basi decreto Ordinis staret, quo pertinebat addere *Censuit Conlocandam*?

V. Ad eos jam veniamus, quorum vel impensa vel decreto honorarium monumentum constituitur: quorum quidem mentio in titulo semper facienda est; sed tamen si quid cuiquam ex privati voluntate post hujus mortem dedicatum sit, non ipse posuisse dicetur, sed id ex ipsius testamento positum esse, adjectis, si libet, quae dedicationis causa legaverit (2):

TI . CLAUDIO . DRVSI . F .  
CAESARI . AVGUSTO  
GERMANICO  
PONTIF . MAX . TR . POT . VIII .  
IMP . XVI . COS . II .  
PATRI . PATRIAE CENS .  
EX . TESTAMEN . MESSI . L . F . M . N . SENECAE  
MILITIS . COH . XIII . VRBANAЕ . ET  
DEDICATIONI . EIVS . LEGAVIT . MVNICIPIB .  
SINGVLIS . H-S . III . N .

Ceteri, a quibus honor habitus sit, sive nominatim sive generatim exprimendi fuerint, (nam et satis aliquando visum, si subscriberent *Decur. Decr.*) quocumque item inscriptionis versu eos perscribendos duxeris; recto omnes casu efferentur: tum de civitate si agatur, singuli ordines indicandi erunt, quorum maxime intersit (3):

Q . GAVIO . Q . FIL .  
Q . NEP . Q . PRON .  
Q . ABN . Q . ADN . FAL . (4)  
FVLVIO . PROCVLO  
TRIB . COH . XV . VOL . (5)  
TRIB . LEG . VIII . AVG .  
DECVRIONES . ET  
AVGVSTAL . ET . POPVL .  
CALATINVS . PATRON .  
MANIFICENTISSIMO

tres hic ordines cieri vides Romano more, ut aliquando in nummis *Consensu Senatus Et Equestris Ordlinis Populique Romani* (6). sed illud etiam plebis causa explicari

(1) Vit. Ant. Ben. cl. 4. n. 19.

(2) Mart. M. V. p. 350. n. 3. in aere incis.

(3) id. ibid. p. 354. n. 5.

(4) *Uerina tribu.*

(5) *Coh. 15. Voluntariorum.*

(6) Erizz. p. 105. v. Plin. H. N. l. 33. c. 2. n. 8.

interdum necesse fuit, populum fuisse, qui claro viro honorem statuac ab Ordine postulasset (1).

SEX · VENCIO  
 IVVENTIANO  
 FLAMINI · DIVI · AVG ·  
 ITEM · FLAMINI · ET · CVRA  
 TORI · MVNERIS · GLADI  
 ATORI · VILLIANI · ADLEC  
 TO · IN · CVRIAM · LVGV DV  
 NENSIVM · NOMINE  
 INCOLATVS · A · SPLEN  
 DIDISSIMO · ORDINE  
 EORVM  
 ORDO · VOCONTIOR ·  
 EX · CONSENSV · ET · POS  
 TVLATIONE · POPVLI  
 OB · PRAECIPVAM  
 EIVS · IN · EDENDIS  
 SPECTACVLIS · LI  
 BERALITATEM

atque hoc loco meminisse oportet, quum Civitas aut Ordo civium nominandus sit, non esse praetermittenda ea apposita, quibus compellari solent: quo pacto in antiquis exemplis occurrunt, *Resp. Municipi Severiani Antoniniani Liberi Thibursicensium* (2), *Colonia Vlp. Trajan. Aug. Dacica Sarmizegetusa* (3), *Ordo Splendidissimus Segunorum* (4), *Ordo Et Populus Splendidissim. Col. Aug. Himeraeorum Termit.* (5), *Corpus Fabrum Navalium Ostiens. Quibus Ex S. C. Coire Licet* (6) et alia huiusmodi bene multa, quae libro tertio reperies.

Quid vero is faciet, cui multae simul eodem in titulo urbes recensendae fuerint? quam primam, quam secundam aut tertiam scribet? tum nempe, quum dignitate fere pares sunt, et de principatu, aequo inter se jure, certant. tu quidem, si arbitrum ages, ut litem praecidas, sic describes, ut eam urbem alteri praeponas, cujus prima nominis littera potiore in ordine litterarum sibi vindicat locum. hanc enim rationem veteres quoque aliquando sequuti esse videntur (7): qua et percommode uti potuere in ara illa Lugdunensi, quae sexaginta gentium nomina referebat (8). ceterum commentitiis adnunceres Gruterianam inscriptionem Aquilaviensium (9), in qua decem populi, et Sponianam Fulginatum (10), in qua quindecim cientur, Maffei jam (11) et Muratorii (12) notis compunctam.

At sodales, sacerdotes, curatores, magistratus, ubi plures una nominandi essent, eo fere loco scripsere veteres, quem cuique aut aetas aut honores aut jus trium liberorum tribuebant: nec illud neglectum puto, quod de albo decurionum praescripsit Vlpianus (13), nomina ante scribi oportere eorum, qui dignitates Principis judicio consequuti essent: plerumque vero, qui nullo honore functi essent, ita descriptos, prout quisque eorum in ordinem collegiumve venisset. sic et in militibus, qui simplares essent, appellandis, nam Duplares et Sesquiplares praecedebant (14), annorum sive stipendiorum habita ratio: nisi quod animadverti, quum tres tantum nominandi essent, primo loco scriptum qui plura stipendia meruisset, secundo qui pauciora, tertio, qui minus a primo distaret (15).

(1) Grut. p. 484. n. 2.

(2) Maff. M. V. p. 453. n. 4.

(3) ibid. p. 242. n. 4.

(4) Grut. p. 275. n. 2.

(5) ibid. p. 433. n. 6.

(6) ibid. p. 437. n. 2.

(7) v. Maff. M. V. p. 425. n. 1. Fabr.  
p. 720. n. 419.

(8) Strab. l. 4. p. 192. B.

(9) Grut. p. 245. n. 2.

(10) Misc. p. 183. n. 3.

(11) Art. Cr. L. l. 3. c. 4. p. 325.

(12) p. 1800. n. 1.

(13) l. 2. D. de alb. Decur.

(14) v. Aram Corsin. a Rid. Ven. illust. a. 1733.

(15) v. Fabr. p. 130. n. XIV. quam inscript. legis supra p. 26.

contra vero in centuriis tribunalium nomina ejusque secundum litterarum seriem digesta leges: ita sane descriptae centuriae Octo *Tribus Succusanae* sive *Suburanae Iuniorum* in ea ara, quae dedicata dicitur *Paci Aeternae Domus Imp. Vespasiani Caesaris Aug. Liberorumq. Ejus* (1), centuriones dumtaxat excipias, qui ordinis quisque sui primi sunt.

Porro nominibus eorum, qui eodem e collegio sint, communis est appellatio praeponenda (2):

TI · CAISARI · DIVI · AVG · F ·  
 DIVI · IVLI · N · AVGVSTO  
 PONT · MAX · COS · V · IMP · VIII · TRIBVN ·  
 POTEST · XVIII ·  
 PONTIFICES · ALBANI  
 Q · IVLIVS · Q · F · FAB · RVFVS  
 C · IVLIVS · C · F · SCA · BASSVS  
 TI · IVLIVS · TIB · F · FAB · MERVLA  
 M · IVLIVS · C · F · FAB · SENICIO

extremo tamen loco appellati hoc altero in exemplo Seviri Augustales, ne scilicet ter *Augustal.* continuis versibus scriptum offenderet (3):

NERONI · CAESARI  
 GERMANICI · F ·  
 TI · AVGVSTI · N · DIVI · AVG ·  
 PRON · FLAMINI · AVGVSTALI  
 SODALI · AVGVSTALI  
 Q · NOVANIUS · Q · L · SALVIUS  
 C · CVLMINIVS · Q · F · FVSCVS  
 L · FVLVIVS · L · F · DOCIMVS  
 L · FVLVIVS · L · L · RECTVS  
 L · POPILLIVS · L · L · APOLLONIVS  
 L · FVRIVS · L · L · GEMELLVS  
 VI · VIR · AVGVST ·

Collegia autem hujusmodi, ut post Decuriones, si quid simul dedicarant, scribebantur sic ante plebem urbanam enunciari video, quum ea quoque nominanda esset (4):

L · DENTVSIO · L · F · PAP ·  
 APPOCVLINO · EQ · P ·  
 CVRAT · TIF · MET · (5) DA  
 TO · AB · IMPP · SEVERO · ET · AN  
 TONINO · AVGG · AED · IIII · VIR ·  
 FLAM · AVGVRI · PATRONO  
 COLL · CENT · (6) IIIII · VIRI · AVG ·  
 ET · PLEBS · VRB · OB · PLERAQVE  
 MERITA · EIVS · PATRONO  
 CVIVS · DEDICATIONE · DEC ·  
 X · III · SEVIR · ET · PLEB · X · II ·  
 CVM · PANE · ET · VINO · DEDIT  
 L · D · D · D ·

Haec jam plana omnia: verum si qua Principi statua a ducibus exercituque omni dicata fuerit, quo tandem pacto auctores monumenti describentur? ne hoc quidem in dubio jam est: nomina utique prima perscribito eorum, qui omnibus praesunt: at du-

(1) Grut. p. 259. n. 3.  
 (2) Grut. p. 235. n. 8.

(3) Grut. p. 257. n. 1.  
 (4) Maff. M. V. p. 362. n. 9.

(5) *Tifernatium Metaurensium*.  
 (6) *Collegii Centonariorum*.



ctores ordinum, cohortes, milites primarios generatim tantum appellato: quemadmodum hoc in exemplo factum esse videmus (1):

M · AVRELIO · CAESARI  
 IMP · CAESARIS · T · AELI  
 HADRIANI · ANTONINI · AVG ·  
 PII · FIL · DIVI · HADRIANI · NEP ·  
 DIVI · TRAIANI · PRONEP · DIVI  
 NERVAE · ABNEP · COS ·  
 PETRONIVS · MAMERTINVS · ET  
 GAVIVS · MAXIMVS · PR · PR · (2)  
 TRIBVNI · COHORTIVM · PRAETORIA  
 RVM · DECEM · ET · VRBANARVM · TRIVM  
 CENTVRIONES · COHORTIVM  
 PRAETORIARVM · ET · VRBANARVM  
 ET · STATORVM · EVOCATI  
 COHORTES · PRAETORIAE · DECEM  
 ET · VRBANAЕ · X · XII · XIII ·  
 CENTVRIAE · STATORVM  
 OPTIMO · AC · PISSIMO

honorariam tamen inscriptionem edidit Fabrettus, in qua non cohors tantum et Praefectus et Tribunus et Centuriones septem nominatim prolatis, sed omnes plane milites in sua quisque centuria: quodque mirum magis, horum nomina vocativo casu enunciata leguntur (3).

Quae jam statuae sumptu publico statuebantur, in earum basi modo additum, modo omissum video, *Publice* eas, sive *Pecunia Publica* constitutas: Collegia item quas in Scholis suis ponebant, nihil iis fere subscriptum de operis impendio, quotiescumque nummi e Collegii arca numerati essent: quippe res erat manifesta cuique, quibus tandem sumptibus ea opera perfici oportuerat. verum si pecuniam Decuriones singuli et ipsa plebs in eam rem contulissent, diserte explicatum est (4):

Q · ASISIENO · Q · F ·  
 TRO · (5) AGRIPPAE  
 AED · II · VIRO  
 PONTIFICI  
 EX · AERE · CONLATO  
 DECVRIONES · ET · PLEPS

item, ut par fuit, si Collegia etiam sumptus suppeditassent; idque ex inscriptione discas, quam a Grutero Pisarensibus adtributam vir ejus municipii nobilissimus et doctissimus Hannibal Olivierus Ariminensibus, quorum erat, ingenue adjudicavit (6):

C · SENTIO · C · F · PAL ·  
 VALERIO · FAVSTINIANO  
 II · VIRO · AVGVRI  
 VICANI · VICORVM · VII ·  
 COLLEG · FABR · ET · CENTONAR ·  
 EX · AERE · COLLATO · QVOD · IN  
 HONORE · II · VIRATVS · INDVSTRIE  
 ADMINISTRATO · OMNIBVS · PLEBIS  
 DESIDERIIS · SATISFECIT ·  
 L · D · D · D ·

(1) Grut. p. 258. n. 8. Fabr. p. 131, n. 68.

(2) *Praefecti Praetorio*.

(3) Fabr. p. 260. n. 91.

(4) Maff. M. V. p. 115. n. 1.

(5) *Troientina tribu*.

(6) Marm. Pisaur. n. 41. Grut. p. 467. n. 4.

nunquam vero ejus laudi invidere solebant, qui honore accepto, pecunia sua opus perficiendum curasset. id enim ipsum saepe subscriptum esse videmus (1):

DEC · IMM · VIR · (2)  
 AVGVST ·  
 P · OLITIO · APOLLONIO  
 IMM · VIR · AVG ·  
 ET · NAVIC ·  
 C · I · P · C · N · M · (3)  
 OB · MERITA  
 ET · LIBERALITATES  
 EIVS  
 QVI · HONORE · DECRETI · VSVS  
 IMPENDIVM · REMISIT · ET  
 STATVAM · DE · SVO  
 POSVIT

Verum desiderabatur adhuc formula, qua uteremur, ubi quis decreti honore accepto, auctor idem fuisset, ut statua, quae decreta esset, non sibi sed alteri poneretur. sed eam nobis jam exhibet Faleriensis inscriptio nuper reperta, cujus exemplum a Michaële Catalano doctissimo viro et amico optimo ad me Firmo transmissum est:

T · CORNASIDIO  
 T · F · FAB · SABINO · E · M · V · (4)  
 PROC · AVG · DACIAE · APVLENSIS · PROC ·  
 ALPIVM · ATRACTIANAR · ET · POENINAR ·  
 IVR · GLADI · SVBPRAEF · CLASS · PR · RAVEN ·  
 PRAEF · ALAE · VETER · GALLOR · TRIB · LEG · II ·  
 AVG · PRAEF · COH · I · MONT · P · C · AVGVRI  
 LAVR · LAVIN · AED · II · VIR · Q · Q · Q · P · P · (5)  
 COLLEGIA  
 FABRVM · CENTON · DENDROPHOR ·  
 IN · HONOREM  
 T · CORNASIDI  
 VESENNI · CLEMENTIS  
 FILI · EIVS · EQVO · PVBL · LAVR ·  
 LAVIN · PATRONI · PLEBIS · ET · COL  
 LEGIORVM · QVI · AB · IPSIS · OBLATVM  
 SIBI · HONOREM · STATVAE · IN  
 PATRIS · SVI · NOMEN · MEMO  
 RIAMQVE · TRANSMISIT

cujus quidem exempli illustrandi non hic locus: itaque vix illud adnotabo, versu septimo legendum mihi videri *Praefecto Cohortis Primae Montanorum Piae Constantis*: jamdiu enim Fabretti labefactata opinio est existimantis, nullam plane cohortem honorario cognomine auctam esse (6). nimirum praeter ea, quae a Blasio indicata sunt (7), longam mihi seriem cohortium ostendit Cajetanus Marinus, quae omnes appposito illustri gaudent, eoque omnibus fere litteris scripto, ut nullus dubitationi locus relictus sit: quem hic contra aliquis esse putet; legi enim posse, *Cohortis Primae Montanae Peditum Cataphractorum*: quippe non equites solum cataphracti, sed pedites quoque fuisse, de quibus mentionem fecit Vegetius (8). sed quia cohortes omnes Peditum tantum esse semper intelligebantur, nisi *Equitatae* appellarentur, idcirco nihil opus erat illud P,

(1) Grut. p. 445. n. 6.

(2) *Decreto Scipionum*.

(3) *Coloniae Iuliae Paternae Claudiae Narbonis Martii*.

(4) *Egregiae Memoriae Viro*.

v. inser. 375.

(5) *Quaestori, Quinquennali, Patrono Plebis*.

(6) p. 140. K.

(7) apud Oderic. p. 314. n. 7.

(8) l. i. c. 20.

siquidem Montana illa cohors, nisi e peditibus, esse non poterat. malo autem *Piae Constantis* legere, quam *Piae Claudiae*; nam et legio quaeque binominis imperatorium agnomen reliquis praeponebat.

Redeo in viam: non haec solum subscripsere veteres; sed quidquid etiam ad ejusdem operis perpetuitatem collatum esset. nempe si quid praeterea tutelae nomine quis dedisset, ne id quidem omittebant: quemadmodum paullo superius (1) in L. Coelii Valerii inscriptione vidimus: quam monumenti tutelam in se conferebant Redemptores ii, qui sarta tecta praestabant: quorum e numero fuit M. ille Aufidius, quem *Tutelae Capitolii Redemptorem* Plinius (2) appellat. *Tutelam* tamen si quis statuæ aut basis septum dici contendat, non repugnabo: nam Varro quidem (3) septa, quæ tutandi causa fundi fiant, *Tutelas* vocat; aræ vero *Septum Clusum* et *Caulas* in antiquis inscriptionibus legi, jam adnotavimus (4).

Vt ut se res habeat, in appendice hujusmodi mentio aliquando facta est *statuæ*: sed si nihil inscriptioni de impensa remissa addendum erat, vetustae consuetudinis fuit, quam erudita aetas diu servavit, ut *statuam* nullo modo nominarent, nisi forte quum in eo honoris monumento laus aliqua lateret, quam posterī sine indice assequuturi non essent. planam exemplo rem faciam (5):

P · ALFIO · P · F · CAM · (6) SEMNIANO  
EQVO · PVBLICO  
QVAESTORI · II · VIR · QVINQ ·  
HVIC · PRIMO · OMNIVM · OB · EXIMIAS  
LIBERALITATES · ET · ABVNDANTISSIMAS  
IN · EXEMPLVM · LARGITIONES · BIG · POS ·  
PLEBS · VRBANA · EX · AERE · CONLATO  
DECVR · DECR ·

Alfius Pisauri in municipio suo primus hoc meruerat, ut *Biga* ei poneretur; id erat simulacrum ipsius Alfii bijugo in curru sedentis: quem honorem non utique vulgarem rei novitas augebat, ut majorum merita excessisse Alfius videretur. at ubi eundem honorem alii consequuti essent, nisi hoc titulus admonuisset, unde posterī discere poterant, eum Alfio primum esse delatum?

VI. Quod superest, honorariis inscriptionibus, quæ privati honoris indicia sint, si loco publico prostare debeant, subscribendum est, a quibus locus datus, sive quorum permissu statua posita sit. notæ autem, quæ id designent, formulæ, nec varia tibi libro tertio exempla deerunt. contra si solo id factum privato fuerit et jure proprio; recte illud quoque indicaveris: exemplum egregium esto, quod subjiciam (7):

IMP · CAESARI · DIVI · NERVAE · F · NERVAE · TRAIANO · AVG · GERM · DACICO · PONTIF · MAX ·  
TRIB · POT · XII · IMP · VI · COS · V · P · P · PROPAGATORI · ORBIS · TERRARVM · LOCUPLETTORI · CIVIVM · CVLTORES · LARVM · ET · IMAGINVM · DOMVS · AVGVSTAE · SOLO · PRIVATO ·  
SVA · PECVNIA · FECERVNT

Temporis, quo veteres statuas suas honoris causa statuerint, nulla plerumque in titulis facta significatio: sæpe enim iis monumenta constituebant, qui tempora ipsi signabant. ceterum Dedicationis et annus et dies haud raro vel infra vel ad latera adscriptus est: quod nunc quoque loco usurpabimus: horum enim monumentorum *De-*

(1) hoc artic. n. 3.

(2) H. N. l. 35. c. 3. n. 4.

(3) de R. R. l. 1. c. 14.

(4) v. inser. 30.

(5) Don. Cl. 5. n. 16.

(6) *Camilia tribu.*

(7) Fabr. p. 447. n. 57.



*dicationes*, ut jam monuimus, nil erant aliud, quam apertio novi operis, et quaedam veluti *εγκαίνια*, quae his etiam temporibus sic celebramus, ut eam rem nemo habeat religioni. ceterum pro DEDIC. scribe, si vis, COLL. id est *Collocata*: hoc quoque satis antiquum est (1).

Dedicationi autem junxere aliquando veteres ipsa etiam nomina Curatorum; caque in utroque basis latere interdum incisa sunt, ut duobus de principe loco altercantibus, semel uterque primus esse posset. tantam litem Tibure olim sic compositam, haec declarat inscriptio (2):

	Q · HORTENSIO	
	Q · F · COL ·	
	FAVSTINO	
	ADVOCATO · FIS	
	CI · PRAEF · FABR ·	
	PATRONO · MVNICIPI	
	COLLEGIVM · FABRVM	
	TIBVRTIVM · OB	
	MERITA	
	L · D · S · C ·	
		CVRANTIBVS
		C · ALLIANO · TIBVRTINO
		M · HELVIO · EXPECTATO
		DEDIC ·
		III · ID · MAI · MAXIMO · ET
		ORFITO · CQS · (3)
CVRANTIBVS		
M · HELVIO · EXPECTATO		
C · ALLIANO · TIBVRTINO		

consules quoque idcirco in tabulis antiquis atque ipsis in nummis modo primo, modo secundo loco eosdem scriptos esse reperies, ne alter alteri praestare videretur: quod jam ab aliis animadversum est.

Denique quum Dedicationem statuæ epulo fere veteres aut sportularum divisione celebrarent, saepe de his etiam facta mentio, et satis quidem ad eam rem apposite: quum omnia ejus impensa fierent, cujus statua dedicabatur, aut certe haeredum, si is jam decessisset (4). haec vero, ubi res postulet, usurpari a nobis, iterumque induci, quis vetat? formulas liber tertius quacrenti exhibebit.

### §. III.

## DE INSCRIPTIONIBVS HONORARIIS PRIMARIARVM FEMINARVM

I. **P** Auca jam restant, quae hoc loco exponantur, ut instituti capitis exitum expediamus. nam quae articulo superiore de ordine textuque inscriptionis tradita sunt, ad hunc quoque sic pertinent, ut ad primarias feminas ex veterum praescripto titulis honorandas iisdem prope legibus, atque eadem ratione uti possis.

Primum igitur de inscriptionum initio nihil hic mihi dicendum est, quum antiquis in exemplis unum omnium sit, a nomine scilicet ductum earum, quibus statua posita sit: cui fere adnexum est patris praenomen et *Filiae* appellatio, deinde cognomen; interdum, his omissis, ea tantum addita, quae fastigii earum ac dignitatis apposita putabantur (5):

(1) Grut. p. 311. n. 1.

(2) Grut. p. 419. n. 5. v. Fabr. p. 487.

E. v. et Murat. p. 953. n. 4. 5.

et iter. Grut. p. 8. n. 3. et p.

1006. n. 5. etc.

(3) An. Varr. 925.

(4) Fabr. p. 486. n. 163.

(5) Don. Cl. 3. n. 46.

IVLIAE · AVG · MATRI · CASTROR ·  
ET · AVG · D · D · PVBL ·

jamvero Matronis, quae etiamtum in conjugio essent, Viri nomen protinus subjectum legimus, post quod ipsae perraro *Vxores* appellantur, ut jam ad inser. LII. adnotavimus: sic enim assueverant, nec jam quisquam in legendo haerebat: quippe cetera propinquitatis vocabula post propinquorum nomina nunquam mittebantur; scriptumque passim reperies *Filiae*, *Nurui*, *Matri*, *Sorori*, *Aviae*, *Materterae*. sed tamen et viri nomini, cui adscribendae dignitates essent, saepe praeposuerunt *Vxori* aut *Conjugi* (1):

FVRIAE · SABINAE · TRANQVILLINAE  
SANCTISSIMAE · AVGVSTAE · CONIVGI  
D · N · ANTONINI · GORDIANI  
PII · FELICIS · INVICTI · AVGVSTI  
DECVRIALES · AEDILIVM · PLEB · ET  
CERIALIVM  
DEVOTI · NVMINI  
MAIESTATIQUE  
EIVS

sic et patris nomini, cuius item honores recensendi essent, praepositum est (2) *Filiae*, ne turba illa verborum sequentium offenderet, et dictionem obscuritas aliqua infuscareret. tum servatum hoc quoque, ut primo Vir, deinde Pater ciceretur. non modo autem et viri et parentis commemoratione ad feminarum dignitatem ac decus prodendum usi sunt; sed filiorum etiam injecta mentio, eorum maxime, qui rerum potiti essent: itaque Iulia Severi multis in monumentis *Mater Aug.* appellatur, ut antea et Livia et Agrippina et Antonia non uno in titulo dictae fuerant. neque id in municipiis neglectum, si quis e matronarum filiis inclaruisset: quorum e numero fuit M. ille Nonius Balbus (3) apud Herculaneenses, quem praetura et proconsulatu functum esse constat: hunc nempe titulum Decuriones statucae matris subscripserunt (4):

VICIRIAE · A · F · ARCHADI  
MATRI · BALBI  
D · D ·

nec mirere, minime hic explicari, uter Balborum Viciria natus esset, praesertim quum ibidem et *Balbo Patri* (5) statuum posuissent: unus jam illis Balbus in ore erat, is nimirum, qui sellam curulem non modo in familiam suam, sed fortasse in municipium etiam illud primus attulerat. ceterum hoc plerumque vel in Augustarum titulis obtinuit, ut Imperatoribus ipsis, quorum illae *Matres* dicerentur, praenomina etiam et cognomina ac reliquas praeterea appellationes adscribendas curarent (6); quibus sane quum ad discrimen opus non esset, uti tamen malebant, quod et Matrum Augustarum amplitudinem illustrarent, et ipsam inscriptionem verborum splendore distinguerent.

Hoc vero etiam plerisque Augustarum tributum est, ut ne de ceteris quidem cognationis gradibus sciretur, quae cuique cum Imperatoribus esset vel demortuis, aut cum eorum uxoribus sororibusque. itaque *Neptes* interdum et *Sorores* et *Nurus* et *Materterae* Augustorum aut Augustarum sunt appellatae (7). atque haec consuetudo in municipia etiam imitandi studio introducta est, nisi forte nobis imposuit Panvinius, a quo inscriptionem hanc Gruterus accepit (8):

(1) Don. cl. 3. n. 49. v. inser. 118. 119.

(2) v. rursum inser. 118. 119.

(3) Maff. M. V. p. 350. n. 19.

(4) Gor. Symb. Rom. t. 1. p. 54. Viscont. Iconogr. Rom. P. 1. c. 5. §. 1.

(5) Maff. M. V. p. 350. n. 12.

(6) v. inser. 113.

(7) v. inser. 115. et 118. Grut. p. 252. n. 4.

(8) Grut. p. 344. n. 4.

ACILIAE · M' · F ·  
 MANILIOLAE · C · F · (1)  
 M' · ACILI · GLABRION ·  
 SEN · COS · (2) PRONEPTI  
 M' · ACILI · GLABRIONIS  
 COS · II · NEPTI  
 M' · ACILI · FAVSTINI  
 COS · F ·  
 ORDO · DECVRION ·

quamquam animadvertendum hic est, in Aciliae hujus titulo cur majorum mentio fieret, causam fuisse non exiguam. nam Acilii circa Severi Aug. tempora omnium patriciorum nobilissimi ferebantur; itaque de Aciliae avo scripsit Herodianus (3), ἢν δὲ εὐγενεστάτος μὲν πάντων εὐπατριδῶν· ἀνεφερέ γοῦν εἰς Αἰνείαν τῆς Ἀφροδίτης καὶ Ἀγχιόου τὴν τοῦ γένους διαδοχὴν· atque haec fere primariis olim feminis pro honoribus et muneribus publicis adscripta reperias, quorum expertes erant; ut quae rebus gestis clarescere non poterant, majorum et propinquorum laudibus eniterent. quo pacto et Tullius olim (4) Caeciliam *Balearici filiam*, *Nepotis sororem* commendavit, a genere potissimum, quo dein privatam feminae virtutem extolleret: *Quae*, inquit, *quum patrem clarissimum, amplissimos patruos, ornatissimum fratrem haberet; tamen quum esset mulier, virtute perfecit, ut, quanto honore ipsa ex illorum dignitate afficeretur, non minora illis ornamenta ex sua laude redderet.*

II. Habes igitur quae prima feminarum veluti apposita esse debeant. quarum viris, parentibus, filiis, majoribus quonam ordine honores apponendi sint, supervacuum est dicere; quum idem plane esse oporteat, atque is, de quo multa jam articulo superiore disseruimus.

Fuere nihilominus sua et feminis aliquando dignitatis apposita, quibus eas maxime ornatas video, quae minus claris ortae parentibus, nec magnis nuptae viris, decus tamen sibi aliquod virtute peperissent. primum enim quaedam ex his sacerdotia inibant, Flaminicae Divarum Augustarum proditae; id minime in earum inscriptionibus praetermissum est (5);

SAENIAE · CN · FIL ·  
 BALBILLAE  
 SACERDOTI · DIVAE  
 FAVSTINAE · DECVR  
 ONES · AERE · COLLA  
 TO · OB · MERITA · EIVS

aliae vero, quum bene nummatae essent, municipia etiam et colonias largitionibus demerebant. quare his aliquando urbium earum patrocinia deferebantur, unde nova sibi dignitatis et laudis apposita inveniebant (6);

CANTIAE · L · F · SATVR  
 NINAE · MATRI · COLON ·  
 FLAMINICAE · DIVAE  
 PLOTINAE · HIC · (7) ET  
 FORO · SEMPRONII  
 D · D · PVBLICE

sic *Coeliae Paternae*, quae forsitan Brixiae Iudaeos fovebat, adscriptum sub statua

(1) *Clarissimae Feminae.*  
 (2) *Senioris Consulis.*  
 (3) *Hist. l. 2. c. 3.*

(4) pro Rose. Amer. c. 50. n. 147.  
 (5) *Grut. p. 322. n. 5.*

(6) *id. p. 1088. n. 15.*  
 (7) *Arimini.*



*Matri Synagogae Brixianorum* (1), sic *Albiae Balbinae*, quae apud conterraneos suos gratia multum et auctoritate valuerat, adjectum est, *Flaminicae Pisauri Et Arimini*, *Patronae Municipi Pitinatium Pisaurensium* (2): aliae item a collegiis honoris caussa *Matres Numeri Nostri* (3) aut *Honorificentissimae Feminae* (4) appellatae, ne dum *Clarissimae*.

His tamen finibus circumscripta plerumque feminarum laus, aut non multo longius veteres nimio adsentandi studio prolapsi. eas certe laudes, quibus nunc vel infimi homines cumulantur, in antiquis exemplis difficile est invenire. nam quae Vestalium praeconia continent, et a Panvinio fere prodierunt; ut omnia germana sint, ad eruditam aetatem non pertinent: nisi forte Maximinorum temporibus adsignandum id est, quo *Flavia Publicia* celebratur; in quo consulum nomina sic deleta sunt, ut alterum Augustum, alterum Augusti filium fuisse manifesto deprehendas. equidem quibus aliis consulatus iste tribui possit, non invenio; Maximini contra hostes ambo a senatu iudicati sunt (5); nec vero utriusque ob eam rem, ut mos erat, erasa e monumentis nomina fuisse, quisquam ambiget. id exemplum quia vidit descripsitque Smetius, libenter e Grutero decerpam (6);

FL · PVBLICIAE · V · V · MAX · (7)  
 SANCTISSIMAE · ET · PISSIMAE  
 AC · SVPER · OMNES · RETRO  
 RELIGIOSISSIMAE · PVRISSIMAE  
 C A S T I S S I M A E Q V E  
 CVIVS · RELIGIOSAM · CVRAM  
 SACRORVM · ET · MORVM · PRAEDI  
 C A B I L E M · D I S C I P L I N A M  
 NVMEN · QVOQVE · VESTAE  
 COMPROBAVIT  
 Q · VETVRIVS · MEMPHIVS · V · E · (8)  
 FICTOR · V · V · DIGNATIONIS · ERGA · SE  
 HONORISQVE · CAUSA · PLVRIMIS  
 IN · SE · CONLATIS · BENEFICIIS  
 COLL · (9) V · IDVS · MART ·  
 IMP · CAES · : : : : : PIO · FELIC · II · ET  
 : : : : : NOBILISSIMO · CAES · COS ·

sed hoc etiam, et cetera exempla, quae Lipsius in eum librum conguessit, qui *de Vestae et Vestalibus* inscriptus est (10), ii demum suspicient, qui Latinae dignitatis gustum non habent. nos quidem antiquum morem retinebimus, et iis utemur formulis, quae pristinam brevilloquentiam imitentur; quum vel in longa inscriptione nihil inane, nihil sine caussa, nihil supervacuum esse solebat. etsi vero aliis nunc moribus, aliis vivimus institutis; munera tamen nunc quoque sunt quaedam, sunt dignitatis honorisque tituli, qui Matronis adscribi possint, quarum aliae sodalitatum magistrac sunt, aliae puellarum alimentariarum curationem administrant: quaedam insignibus ornatae nobilium ordinum, aut certe virorum titulis honestatae: quae etiam in regum aulis interdum cum imperio aliquo versantur: haec plane omnia in earum inscriptionibus commemoranda sunt. earundem autem munificentia collegia saepe, vici, oppida vel restituta vel aucta, ut eorum *Matres* atque *Patronae* merito dici possint. sed quae virtutis ap-

(1) Grut. p. 323. n. 3. v. Lup. Ep.  
 Sev. p. 178.

(2) Grut. p. 322. n. 8.

(3) Gor. Inscr. t. 2. p. 208.

(4) Don. Cl. 5. n. 33.

(5) Cap. in Maxim. c. 16. Herod. l. 7.  
 c. 7.

(6) p. 311. n. 1.

(7) *Virgini Vestali Maximae.*

(8) *Vir Egregius.*

(9) *Collocata.*

(10) c. 15. in not.

pellationes sunt, et vitae laudes pie ac puriter actae, earum plerasque in epitaphiis aptius usurpabimus.

nI. Caussam deinde, quare honor haberetur, saepe in exemplis afferri videmus: quae interdum externa est, atque e propinquis fere petita; nec tamen, nisi generatim, significatur (1):

MAGIAE · Q · F · SEVERINAE  
OB · MERITA · Q · MAGI · SEVERI  
PATRIS · EIVS  
ORDO · DEC · POPVLVSQ ·  
SIPONTINVS  
AERE · CONLAT ·

at etiam Matronae ipsius gratia, quae honorabatur, statuam aliquando decretam esse legimus, ut hoc in exemplo, quod *Tricliniares Trebulae Mutuescae* in basi ejus staturae, quam Patronae suae decreverant, incidendum curaverunt. id erat ejus oppidi sive vici (2) *Collegium Tricliniis*, ut arbitror, *Ad Epulum Deorum Parandis*: quod Romanae Septemviri Epulones praestabant: neque enim servos Tricliniares hic nominari verisimile est, quorum aliae inscriptiones apud Gruterum (3) et Donium (4) mentionem habent, quippe servis jus decreti faciendi quis tribuat (5)?

AVRELIAE · CRE  
SCENTIAE · HONESTISSIMAE  
ET · PVDICISSIMAE · FOEMINAE · PATRO  
CONVGI · AVRELI · FELICISSIMI · PROC ·  
E · V · (6) PATRONI · MVNICIPII · TREBVLANI  
MVT · OB · MERITA · ET · BENEFICIA · SAEPE  
IN · SE · CONLATA · STATVAM · PONENDAM  
EIDEM · TRICLINIARES · DECREVE  
RVNT

DEDICATA · NATALI · DIE · XVI · KAL · FEB ·  
ARRIANO ET · PAPO · COS · (7)  
I · D · D · D ·

quae vero beneficia, quae merita Patronarum essent, raro diligenti oratione traditum explicatumque reperies. singula enim persequi, saepe, ut arbitror, minus decorum esse ducebant; praesertim si neque nova neque magna beneficia memorare quis posset. tum quae prolata generatim, nec rei demonstratione sed significatione indicata essent, crescere quodammodo, et majus quiddam planeque Romanum sonare videbantur. hujusmodi est inscriptio pulcherrima, quam in Museo Vaticano descripsi, Hadriano et Sabinae Augustis posita:

HADRIANO SABINAE  
AVGVSTO · COS · III · P · P · AVGVSTAE  
LOCVPLETATORIBVS · MVNICIPII  
EX · D · D · PVBLICE

atque hanc plerumque rationem veteres sequuti sunt, dum stili hujus elegantia mansit et modus: ut prope singularia habenda ea exempla sint, in quibus multae minutaeque res exili quadam et concisa narratione exponantur.

Ceterum cave, eam inscriptionis formam repudiandam putes, quae, si res poscat,

(1) Murat. p. 1081. n. 6.

(2) v. Fabr. p. 400. D. et p. 676. n.  
29. et 30.

(3) p. 576. n. 6.

(4) Cl. 7. n. 35.

(5) Fabr. p. 699. n. 210.

(6) *Egregii Viri.*

(7) An. Varr. 996.

una veluti periodo et Matronae decora et monumenti causam diserte nec sine dignitate comprehendat. ea quidem forma clarorum virorum inscriptionibus adtributa videtur, quorum rebus gestis maxime conveniebat: sed ita tamen, ut primarias quoque feminas deceat non minus, quaecumque cum illis clarorum factorum gloria et egregiae virtutis laude certaverit. quamobrem probabilis, opinor, si reliqua constant, inscriptio tibi haec videatur, quam haud ita pridem a me vir clarissimus condi voluit, ut domi, honoris causa, spectatissimae matronae, filiae suae, simulacro subscriberet (1):

CLARAE • MARIAE • SPINVCCIAE  
COMITI • LVSATIAE  
QVAE • ANNO • M • D • C • C • LXIII •  
SERENISS • XAVERI • AVGVSTI • SAXONICI  
REGALI • CONIVGIO • DIGNATA  
VIRTUTE • PROMERVIT  
VT • TERTIO • DECIMO • POST • ANNO  
PRIDIE • EID • AVG •  
OMNIA • IVSTAE • VXORIS • IVRA • ATQVE • INSIGNIA  
SIBI • AB • REGIO • CONIVCE • IMPERTIRENTVR  
IOSEPHVS • SPINVCCIVS • COMES  
FILIAE • RARISSIMAE  
QVOD  
SPINVCCIAM • GENTEM • TANTAE • STIRPI  
INSERVERIT

haec quidem, et quidquid praeclare factum sit, injuria praetermiseris; ut ut inscriptiones hujusmodi feminarum causa perscriptae, in hac tanta exemplorum copia, sequioris omnes aetatis esse videantur. alia forsitan in lucem exempla aliquando prodeant notae melioris, in quibus ut virorum, sic mulierum quoque vel facta vel indolem virtutemque uberiori oratione commendari videamus.

Nam quod tituli nominibus saepe et appositis tantum constare solent, idcirco factum est, quia statuae olim levi etiam de causa nec magnis semper viris aut feminis ponebantur: ut more potius, quam voluntate expressus honor videretur. sic Ariminenses in eo exemplo, quod subijciam, nihil aliud adnotarunt, quam sumptum operis remissum: ut intelligas, non Decurionum studio, sed indulgentia statuam Lepidiae cupienti et subornanti esse decretam (2):

LEPIDIAE • L • F •  
PROCVLAE  
SACERDOTI • DIVAE  
FAVSTINAE  
AVG • ET  
DIVAE • MATIDIAE  
AVG • D • D • P •  
PECVNIA • AB • EA  
REMISSA

studii tamen plus aliquid et existimationis decreto suo Aquinates ostenderunt, qui ei statuam decrevere, quae jam obisset: nisi hoc ipsum propinqui ejus extorsissent (3):

(1) Firmi apud Spinaec.

(2) Grat. p. 1988, n. 11.

(3) Grat. p. 321, n. 4.



DENTRIAE · L · F · POLLAE  
 SACERDOTI · DIVAE  
 AVGVSTAE  
 POST · MORTEM  
 D · D ·

quo etiam pertinet Actii liberti titulus in basi statuæ, quam patronæ suæ posuit (1):

IVNONI  
 IVNIAE · C · SILANI · F ·  
 TORQVATAE  
 SACERDOTI · VESTALI  
 ANNIS · LXIII ·  
 CAELESTI · PATRONAE  
 ACTIVS · L ·

hoc enim indicare Actius voluit, honorem se patronæ suæ habere, quum jam illa ad plures abiisset: ut id non ejus demerendæ, sed honorandæ causa facere videretur (a) et inscripsit *Iunoni*, quemadmodum viris *Genio* scribebatur (2), quum decessissent. patronamque caelestem appellavit, quo eam inter Deos collocaret: ut mirer, Maffejo hæc in mentem non venisse, qui ne titulum hunc legitimum accenseret, illud etiam addidit (3), *Vestales Virgines perpetuo nuncupari, non Sacerdotes*: quum tamen et Livius ipsas virgines Vestæ *Sacerdotium* vocet *Alba oriundum* (4), et Tullius Fontejam Vestalem *Sacerdotem* nominet (5), et Gellius demum e libro primo Fabii Pictoris (6) formulam afferat, qua Pontifex Maximus Virginem capiebat, conceptis verbis, quæ sunt hujusmodi: *Sacerdotem Vestalem, Quæ Sacra Faciat, Quæ Ious Siet Sacerdotem Vestalem Facere Pro Populo Romano Quiritium, Vtei Quæ Optuma Lege Fouit, Ita Te Amata Capió*. exstat vero ad Museum Vaticanum in porticu hæc ipsa inscriptio Actii liberti iis incisa litteris, quas qui viderit, Maffejo minime auscultabit.

ml. Statuas feminis ponebant dedicabantque et privati homines, ut vidimus, et collegia; sic tamen ut locum a Decurionibus peterent, et datum esse subscriberent: Matronæ etiam dicarunt, ipsæ tantum (7): saepius Decuriones et populus. aliquando autem adjectum est, una mulieres cum viris constituisse, ut hic Tufficani testantur, quos Plinius (8) Tifernatium Tiberinorum finitimos facere videtur (9):

CAMVRENAE  
 C · FIL ·  
 CELERINAE  
 FLAM · FERON ·  
 MVNICIP · ET · INCOLAE  
 TVFFICI · VTRIVSQ · SEXVS  
 OB · MERITA · EIVS  
 H · A · I · R · (10)

De impensa remissa, ac de die annoque dedicationis, quæ veteres interdum adnotabant; de epulis item ac de divisione sportularum nihil attinet dicere: quum huc ea ipsa transferre possis, quæ de his omnibus articulo superiore prolata sunt.

(1) id. p. 25. n. 10. nunc inter Vatican.

(a) Barptolemaeus Borghesi Giorn. Arcad. T. 1. p. 186. putat, hanc inscriptionem positam fuisse Iuniae Torquatae, quum ea adhuc in vivis esset, eo quod hic tantum *Sacerdos Vestalis, non Virg. Vest.*

*Maxima* appelletur, quemadmodum legere est in alia inscript. apud eund. Grat. p. 319. n. 3. eidem Iuniae Torquatae posita.

(2) v. inser. 12. et 136.

(3) Art. Cr. L. 1. 3. c. 4. p. 274.

(4) l. 1. c. 8. n. 20.

(5) pro Font. c. ult. n. 37.

(6) N. A. l. 1. c. 12. quem locum Maff. affert Art. Cr. L. 1. 3. c. 3. p. 204.

(7) v. inser. 116. et Inscr. Sic. Cl. 4. n. 26.

(8) H. N. l. 3. c. 14. n. 19.

(9) Murat. p. 1120. n. 4.

(10) *Honore, Accepto Impensam Remisit.*

## CAPUT III.

## De epitaphiis

## §. I.

## DE RATIONE GENERIS VNIVERSA.

I. **D**e iis jam dicere aggredimur, quae nunc quoque ita vulgo usitata sunt et communia, ut ex his, qui latine sciant, invenire possis perpauca, qui epitaphium aliquando non scripserint. unde accidit perinecommode, ut abnormia quaedam et insulsa paulatim irreperant, quae usu jamdiu recepta ne ii quidem audeant rejicere, qui ea nec tuerentur nec probant. quare mihi agendum erit confidentius: ut vocem denique et ii mittant, quorum auctoritate vetus ille epitaphiorum nitor et elegantia revocari posse videatur. quum ea autem indicanda esse arbitror, quae maxime repudiari oporteat; tum ne illa quidem praetermittenda, quibus, contra ac fieri solet, minime abstinendum est: ut squalore jam sordibusque deteris, excellentium inscriptionum speciem aliquam sensim formamque adumbramus.

Epitaphiorum veterum, quorum ingens numerus et varia passim exempla exstant, unum plerisque initium est *Diis Manibus*, aut *Dis Manibus Sacrum*: interdum et *Manibus* tantum (1). *Manes* autem, quamquam non una de his fuit sententia veterum, ipsas etiam defunctorum animas apertissime vocaverunt. sic enim exposuit Horatius (2):

. . . . *Cruor in fossam confusus, ut inde*

*Manes elicerent animas responsa daturas.*

idemque Norisius jam (3) et Fabretti (4) ostendere, quibus et Maffejus assensus est (5). itaque vix audeam improbare, qui mortuorum animas *Manes* appellet: quemadmodum Egizius fecit, sic inscriptionem exorsus (6), *Piis Manibus Ad Expiationem Peccatorum*. nego tamen, ab eo vocabulo recte nobis inchoari epitaphium. corpora nempe defunctorum, non animae tumultantur; et sacra potius esse sepulera ducimus, quod ea sacro in loco excitamus, in iisque piorum, ut credimus, reliquias componimus; quam quia mortuis ritu aliquo ad veterum morem dicata sint.

Quid vero, inquires, de his sentis, qui majorum exemplo, ac tot ubique lapidibus conclamantibus, eo utuntur exordio, *D · O · M ·*? scio esse adhuc quosdam, qui hoc putent esse bellissimum: sed Maffejo (7) quidem ridiculum, mihi intempestivum certe atque *ατοπν* videtur. optimo illud jure praeferunt inscriptiones sacrae, in quibus etiam post eas litteras adscribitur *SACR ·* unde altare aut templum Deo sacrum esse discamus. at sepulera quamvis operosa ac magnifica, Deo dicari quis dixerit? afferes fortasse titulos quosdam ex Fabretti volumine, qui addubitare me cogant, num eodem prope initio veteres Christiani aliquando in sepulcrorum titulis usi sint. nam illi quidem exordia habent hujusmodi (8):

*D · ✠ M · et ✠ D · M · S ·*

(1) Grut. p. 470. n. 7.

(2) l. i. Sat. 8. v. 28.

(3) Cen. Pis. diss. 3. c. 4.

(4) Inscr. p. 79. B.

(5) M. V. p. 179. n. 2.

(6) Inscr. p. 312. n. 5.

(7) Art. Cr. L. 1.3. c. 3. p. 211.

(8) Fabr. p. 564. n. 107. et 108.

verum in hanc rem hoc primum adnoto, lapides hujus generis, urgentibus exsequiis, emptos fortasse a Christianis fuisse (1), quum jam litteras illas D. M. profani lapicidae de more insculpsissent: easque deinde non esse deletas, sed perinde habitas, ac si scriptae non essent, ut nunc quoque cum reliquis legendae omnino non sint: cujus rei exemplum sane luculentum apud Buonarrotum invenies (2). porro ita esse, Antonii Zaccariae fert opinio. quod si in eam Fabretti sententiam veniamus, ut illas litteras a Christianis ipsis vel inseulptas, vel certe, si profani inseripserant, ad religiosam significationem tractatas putemus; sic eas arbitror legi oportere una cum Graecis duabus, quae τῷ Χριστῷ initium nominis sunt, ut dicamus *Deus Christus Magnus*, et *Christus Deus Magnus Sanctus*, non utique *Deo* et *Christo*: neque enim dedicationis causa inscribebant, sed invocationis aut distinctionis tantum: quum nexum illum Graecarum litterarum X P modo in ipso initio cum A et Ω, modo ad latera, modo in fine appositum, et qua simplicem qua geminatum videamus.

Neutra tamen sententia mihi satis aridet, quum non modo apud Gruterum in Christiana inscriptione legitur (3) *Sacris Manibus*, sed hanc etiam ex veteri Museo Kircheriano Lupius protulerit in Praetextati arenariis inventam, eodemque totam litterarum ductu formaque perscriptam his verbis (4):

DIS · MANIBVS · PRINCI  
PIO · FILIO · DVLCISSIMO · SVO · PO  
SVIT · QVI · VIXIT · ANNIS · VI · DIES  
XXVII · IN · PACAE

cui alteram addo, quae adhuc in eodem Museo est, olim et Christiani et Martyris sepulcro dicatam: quippe in codicillis quibusdam meis, qui Contuceii fuere Praefecti diligentissimi, adscriptum ejus manu est, *Fuit et vas pro sanguine*: nam geminas quidem, quas habet, palmas nil moror: est autem hujusmodi, parva in tabella, litteris unius formae omnibus, nulla Christiani μονογραμματις nota insignis.

D · M ·  
CALOTYCE · OCTABIANO · COIV  
GI · BENEMERENTI · CVM · QVO · FECIT  
AN · XXX · QVI · BIXIT · AN · N · L ·  
DECESSIT · V · KAL · SEP ·  
OCTABIANO · PACE

quamobrem paene cum Mabillonio (5) fatendum dixeris, *primis illis temporibus, quibus cruda adhuc quorundam in cordibus religio esset*, tirones scilicet nonnullos ac rudes e Christianis *aliquid de paganici ritus superstitione retinuisse*.

II. Nec vero aliam fuisse causam existimo, cur aliquando in Christianis titulis *Factorum* facta sit mentio, uti malis in versibus leges apud Fabretum (6): quare neque Egizius (7) neque Ferrarius (8) arripere ista debebant, quae in veteribus quoque Christianis, quum sunt prolata, improbantur: qui tamen hoc loco, si eos verborum licentia liberiores fuisse argueris, jure quodam proprio se usos dicent; quod poetice loquuti sint: at illi non adstricti numeris, non modi necessitate coacti, quum optimorum verborum magna copia esset, mala et superstitionis plena vocabula praecoptarunt.

Quid, quod Egizius ita epitaphia exorsus est, *D. O. M. Et Quieti Aeternae* (9), *Memoriae Et Quieti Aeternae* (10), *Cineribus Et Quieti Aeternae*? Latinam utique

(1) v. Inst. Lap. l. 2. c. 7. art. 1.

(2) Veir. Ant. p. 167.

(3) p. 1058. n. 1.

(4) Lup. ep. Sev. p. 105.

(5) Itin. Ital. p. 75. vel 141. v. et Lup.

l. c. p. 108.

(6) p. 112. n. 275.

(7) p. 256. 240. 276. etc.

(8) p. 185. n. 382.

(9) Inscr. p. 244.

(10) p. 272. et 278. etc.



agnosco formulam, cujus vetera exempla saepe legi (1): sed quam religionis pietas deprecatur atque recusat. cur enim Christiani propinquorum cineris atque ossium aeternam esse quietem velint, qui eos revicturos credant, et quidem tali vita sperent, ut nulla beatitudini eorum allatura sit finem aetas? propterea Christiani veteres Noëmi, opinor, columbam, item ancoram in sepulcris effingi curabant (2). atqui sepulcrum illi *Domum Aeternam* appellarunt: ecce enim, inquis, e Fabretto exemplum (3):



DOMVS  
AETERNA · SEPTI  
MINI · ET · CRESCE  
NTINES

ita sane; quin alia sunt quaedam, quae proferri possint: haec nempe illi a majoribus acceperant, quorum superstitionem et mores pridem exsuerant: quae optime ad pravam eorum opinionem sectamque quadrabant, sive animum immortalem ducerent, sive una cum corpore exstingui morte putarent. sed quamquam Fabrettus Christianos quoque, hujus formulae caussa, a superstitionis nota vindicare conatus est; non eos tamen ego culpa liberem, qui e tot aevi illius beatissimi bonis haec optent potissimum, quae in nostros mores inducantur.

Illa etiam antiquis, velim, relinquo, *Somno Aeterno, Vale Aeternum, Sit Tibi Terra Levis* et similia: quae religionem scilicet doctrinamque nostram non produnt. itaque parum mihi Polae epitaphium probatur, quod pro filiola confecit, lepidum illud quidem, sed veteris tamen superstitionis affine (4):

HAVE · VALE  
ATTILIA · POLA · ANIMVLA · NOSTRA  
HEV · QVEM · NVNC · ABIS · IN · LOCVM  
PALLIDVLA · RIGIDVLA · NYDVLA  
EHEV  
O · IOCOS · NON · AMPLIVS · DABIS · TVOS · MELLITYLOS  
O · VAGVLA · O · BLANDVLA  
VALE · AETERNVM  
VIXIT · MENS · III · DIES · IV · HOR · XIX ·  
RHEVMA · MISELLAM · CONFECIT  
PARENTES · IAM · NON · PARENTES · MOESTISS ·  
P · P ·

noti cuique sunt Hadriani versiculi, quos ille moriens fecisse dicitur (5): ex his Pola multo plura delibavit, quam oporteret. neque enim animulam filiae suae, quae ad superos avolasset, *pallidulam* appellare debebat; neque ei *Vale Aeternum* dicere, quam caelo receptam brevi visurus esset.

II. Quaedam contra apud veteres multis in epitaphiis usurpata reperio, quae nostris in monumentis nusquam apparent; quum iis tamen neque religione vetemur uti, et brevitatis saepe aut elegantiae caussa si utamur, inscriptio jam quodam vetustatis colore ornari videatur. hujusmodi mos ille est veterum, quum sepulcrum pluribus po-

(1) Fabr. p. 53. n. 308. Maff. M. V. p. 244. etc.

(2) v. Lup. Epit. Sev. p. 136. 137. et

Buonarr. Vetr. Ant. p. 124.  
(3) Fabr. p. 113. n. XIV.

(4) Inscr. p. 436. n. 190.

(5) Spart. in Hadr. c. 25.

suissent, et ex his quidam jam compositi, quidam superstites essent, ut littera apposita vivi a mortuis secernerentur: vivi enim littera V., mortui Graecorum Θ designabantur, quod ipsi Graeci ejus rei causa non adhibebant (1): ac ne quis in legendo haereret, utramque litteram forma fere minore aut majore, quam reliquas, effingi curabant (2):

V · TI · LATINIVS · TI · L · DORI . . .  
 Θ · AGRASIA · T · L · RVFA  
 HOC · (3) MANSVM · VENI · III · K · SEPT.  
 P · SVLPICIO · C · VALGIO · RVFO  
 CONSVLIBVS (4)

vel etiam iis, qui obiissent, nihil praefigebatur, ceteris V. aut contra nihil iis, qui viverent, mortuis vero Θ. cujus moris exempla quaedam Gruterus, plura Fabrettus supeditabit (5). ac Θ quidem annorum etiam numero aliquando apposuerunt (6), ut quo quisque aetatis anno mortuus esset, indicarent, itaque ea mihi littera nuper ad brevitatem perutilis fuit, quum structo iterum pavimento templi Mariani ad Scholam Graecam in gentilis monumenti novo lapide nomina rursum, et tempus signandum esset, quo defunctorum quisque decessisset; nihil sane fieri poterat expeditius:

LOCVS · MONVMENTI  
 FELICIS · TRVLLI · PRAEF · COH · I · PR ·  
 Θ · AN · CL · I · C · C · XXXV ·  
 ANNAE · MARIAE · MORELLIAE  
 Θ · AN · CL · I · C · C · LXII ·  
 MICH · ANGELI · TRVLLI · CANON · BASIL · HVIVS  
 Θ · AN · CL · I · C · C · LXV ·  
 NICOLAVS · MARII · F · FELICIS · N · TRVLLIVS  
 PRAEF · COH · I · PR ·  
 AVO · ET · AVIAE · ET · PATRVO  
 BENE · MERENTIVS  
 POST · VETERIS · PAVIMENTI · RESTITVTIONEM  
 TITVLVM · RENOVAVIT  
 ANNO · CL · I · C · C · LXXVI ·

Vt autem nigrum mortuis theta praefigi, fas jusque est; ita rei non alienum videtur, si veteri more adscribamus, quantum pateat sepulcrum. nam si olim, quum tumulos propter militares vias fere excitarent, quot *in fronte* quot *in agro* pedes loci religiosi essent, in sepulchrali titulo notabant: minime tamen nobis, qui sepulcra nunc per Italiam plerumque in templis habemus, antiquarum formularum nulla restat, qua locum sepulchri causa emptum datumve designemus, primum enim ea nos uti licet, quae in Rusticeliorum epitaphio est (7), omnium planissima, SEPVLC · LONG · PED · XXX · LAT · PED · XXX · nec minus ea, quam tibi exhibet inscriptio CCXVII · litteris scriptam singulariis Q · Q · V · P · L · id est *Quaquaversus pedes quinquaginta*, vel etiam quae apud Fabrettum occurrent (8) L · Q · P · XVI · aut P · Q · XVII · id est *Latum quaquaversus pedes sexdecim*: et *Pedes quaquaversus septemdecim*. item quae desumi hinc facile possit (9):

(1) Hagemb. Ep. Ep. p. 604.

(2) Maff. M. V. p. 108. n. 2. v. et Cor.

Inscr. t. 1. p. 156. n. 83.

(3) Hoc pro Huc.

(4) An. Varr. 742.

(5) a p. 52. ad 55.

(6) Grut. p. 854. n. 9. p. 858. n. 4. etc.

Maff. M. V. p. 419. n. 4. etc.

(7) Fabr. p. 240. n. 639.

(8) p. 179. n. 371. et 372.

(9) Fabr. p. 179. n. 374.

C · CLODIVS · EVTHEMVS  
P · CORNELIO · MAVRO  
LOCVM · ARAE · DONAVIT  
QVAE · COLLIGIT · IN · SOLO  
POSITA · PEDES · QVADRA  
TOS · TOT · III ·

*pedes* nempe *quadratos Totos tres*, sive solidos: non ut Fabrettus a Scaligero dissentiens putabat *Tot numero*: Plauti enim loco (1) abutebatur *Tot*, *Quadraginta minis*; quum ibi Thesprio servus Epidico de eaptiva, quam Stratippocles dominus emerat, interroganti *Quot minis emit*, respondeat *Tot*, numerum scilicet digitis indicans, deinde explicet apertius, *Quadraginta minis*; non autem, ut ille ajebat, *elegantiae gratia*, *Tot* et *Quadraginta* jungat.

Similia sunt illa apud Gruterum (2), *Huic Titulo Cedunt Quoq. Ped. Q. Bin.* et quae Fabrettus collegit (3), *In Longum, In Longitudinem, In Partem Posterio-rem, Retro, Retroversus*: quibus nunc singulis pro veteri formula *In Agro* uti licet; addo et aliam ex Maffei inscriptione (4):

V · F ·  
L · CLODIVS · L · L ·  
ACTVS · SIBI · ET  
CLODIAI · AMPHALE  
CONTVB · ET  
CLODIAI · LIBERALI · F ·  
IN · F · P · VI · IN · R · P · XV ·

ad quam ille, *Nisi R.*, inquit, pro *A. ex errore subiit, legam* IN RECESSV: optime; nam et Quintilianus sic olim loquutus (5): *Grammatica plus habet in Recessu, quam in fronte promittit.*

Quia vero sepulcra nunc quoque modo uni tantum fiunt, modo familiae etiam et haeredibus aut toti genti parantur; quid ni, ubi opus est, formulam veterum more subseribemus, unde iura sepulcrorum quae sint, facile posteris ediscant? dixi autem *ubi opus est*; nam si paterfamilias in novo sepulcro incidi jussit, se fecisse *Sibi Posterisque Suis*; satis jam explicatum est, sepulcrum illud haereditarium esse, sive ad haeredes quoque pertinere quum suos ac necessarios, tum horum posteros ac successores. quare inepte quis addat *Hoc Monumentum Haeredes Sequetur*: quorsum enim haec recidant, nisi ut aliis verbis, quod jam expressum est, iterum designemus. hae certe formula veteres abstinebant, nec Fabrettus in haereditariis monumentis, nisi bis, usurpatam invenit (6). ceterum minus etiam probes, quod Platyna fecit: qui quum in fratris sepulcro (7) scripsisset, se fecisse fratri et sibi et posteris, subiecit protinus, qui sepulti essent, solos esse velle, nec aliis quibuscumque locum esse. sed tamen antiqui leporis epitaphium illud est, neque hoc loco praetermittendum.

(1) Epidic. 1. 9. 50.

(2) p. 823. n. 8.

(3) p. 178. B.

(4) Mus. Ver. p. 153. n. 3.

(5) Inst. l. 1. c. 4.

(6) p. 91. I. et n. 180.

(7) in Basil. Liber.



XYSTE • IIII •  
 PONT • MAX •  
 AN • VIII •  
 STEPHANO • QVI  
 VIXIT • AN • XXVII •  
 MEN • VIII • D • XII •  
 PLATYNA • FRATRI  
 BENEMERENTI  
 POSVIT  
 SIBI • QVE • AC • POSTERIS  
 QVISQVIS • ES • SI • PIVS • PLATYNAM  
 ET • SVOS • NE • VEXES • ANGVSTE  
 IACENT • ET • SOLI • VOLVNT • ESSE  
 ΘΑΡΣΟΝ • ΑΔΕΛΦΕ • ΚΑΛΩΣ  
 ΘΗΗΣΚΩΝ • ΠΑΛΙΝ • ΦΥΕΤΑΙ (1)

At si paterfamilias sepulcrum suum familiare tantum esse voluit, ac de nomine suo non exire; tum vero recte addes, *Hoc Monumentum Heredem Non Sequetur*, vel etiam apertius, *Hoc Monumentum Heredem Exterum Non Sequetur*: quibus formulis non absimiles illae, *Hoc Monumentum Ad Heredem Non Pertinet* (2), *Exterae Familiae Aditus Non Datur* (3): quae etiam litteris singulariis scribi possunt.

Nolim tamen, cum his eam quoque formulam revocemus, multorum famosas litibus, quam monumenta habent non pauca, *Sub Ascia Dedicavit* item equidem a Maffejo direptam (4) arbitror, nec aliud ea significari, quam *novum intactumque addixit*, sive *Ab Ascia* statim tribuit, adsignavit (5), nam et hoc modo loquuti sunt: idque ipse etiam novo exemplo confirmare possum: legi enim saepe in radula aenea Musei Kircheriani, quam templi donarium fuisse puto, SVB • ASCIA • P. ut si diceres, *instrumentum ante dicatum, quam quisquam uteretur*: unde hoc didici, *Asciam* pro quocumque instrumento accipi, quo opus quodlibet perficiatur. ceterum ea formula nimis exquisita videri possit: deinde antiqua ea quidem est, sed prope peregrina, quam scilicet Galli potissimum celebrarunt: Italica autem omnia, non Gallica pro Romanis se habere Quintilianus agebat (6).

III. Iam vero quum plerasque veterum formulas nostris aptas epitaphiis esse non dubitem; quaeret quispiam, num etiam Latinas et legitimas ducam ex iis quasdam, quae nusquam, nisi in tumulis Christianorum reperiuntur? sunt autem hujusmodi:

DORMIT • IN • PACE (7)	TE • IN • PACE (14)
DORMIENTI • IN • PACE (8)	VALE • IN • PACE (15)
IN • SOMNO • PACIS (9)	BENEMERENTI • IN • PACE (16)
IN • PACE • QUIESCIT (10)	IN • PACE • DEI (17)
REQUIESCIT • IN • PACE (11)	RECEPTA • IN • PACE (18)
CVIVS • ANIMA • IN • PACE • REQUIESCAT (12)	IN • PACE (19)
TE • IN • PACE • R • FACIAT (13)	

ego vero sermonis haec Latini studiosis cur displiceant, aut cur epitaphiis minus con-

(1) *Bono sis animo, pater, Vita functus reviviscit.*

(2) Fabr. p. 95. n. 210.

(3) id. p. 95. n. 212.

(4) M. V. p. 165. n. 1.

(5) ibid. p. 166. n. 1.

(6) Inst. l. 1. c. 5.

(7) Maff. M. V. p. 282. n. 11.

(8) Fabr. p. 553. n. 36.

(9) id. p. 553. n. 40.

(10) Maff. M. V. p. 281. n. 10.

(11) ibid. p. 261. n. 10.

(12) Fabr. p. 567. n. 116.

(13) Giovenazz. invenit.

(14) Fabr. p. 570. n. 135.

(15) Maff. M. V. p. 282. n. 5.

(16) ibid. p. 295. n. 7. 8.

(17) Fabr. p. 557. n. 62.

(18) Maff. M. V. p. 279. n. 8.

(19) ubivis.

venire videantur, causam reperio nullam. nonne mortem Latini Graecique *Somnum* appellavere, et mortuos *dormire* dixerunt? Catulli sunt hi versus (1),

*Nobis quum semel occidit brevis lux,*

*Nox est perpetua una dormienda.*

noti et illi ex Anthologia (2):

Τῇδε Σαὸν ὁ Δικῶνος Ἀκανθίδος ἱερὸν ὕπνον

Κοιμάται· θνησκειν μὴ λεγέ τοὺς ἀγαθοὺς.

itaque et Genios in sarcophagis saepe dormientes fecerunt, facibus inversis extinctisque, ut somnum illum suum *Aeternalem* significarent (3): et ipsos aliquando defunctos in epitaphiis *dormire* iusserunt (4):

DORMI  
CLAVDIAE  
HERMIONAE  
ARCHIMIMAE · SV  
I · TEMPORIS · PRI  
MAE · HERE  
DES

epitaphium minime Christianum leges apud Maffejum (5) hoc initio, PRO · DORMITION · in aliis saepe occurret SOMNO et QUIETI: quae nos eo magis arripere debemus, quod congruentius nihil ac verius eorum sepulcris inscribi possit, quorum aliquando corpora, quasi e somno excitata, ad vitam revocanda esse didicimus.

At dictio illa *In Pace* Christiana est tota: ut jam viri eruditi, quum oculis usurpaverint, nullum aliud requirere vestigium soleant, quo vetus epitaphium inscriptionibus Christianis adnumerent (6). ita sane: quamquam istam mortuorum pacem profanae quoque gentes aliquando agnoverunt (7):

PACI · ET · QUIETI  
ET · MEMORIAE · AETERNAE  
Q · ARISTIO · CHRESTO  
IVN · QVI · VIX · ANN · . . .  
MENS · III · DIEBUS · VII ·  
ATERIA · CHRESTE  
ET · ARIST · CHRESIME · FRATRI  
ET · ARISTIA · HELPIS · FIL ·  
DVLCISS · ΕΥΠΑΟΙ · (8)

sed ut Christiana tota sit, non ideo ea formula minus Latina est: nam si hoc Christiani significare voluerunt, quem *In Pace* decessisse scriberent, eum *Deo carum* sive *Deo propitio* obiisse; quid haec aliud sonabunt apud Latinos veteres? *Ni tua Pax* (Neptune) *propitia foret praesto* (9): *Divum Pacem votis adit* (10): *Quo juvenes, sine Pace Deum* (11)? sin autem *Pacis* nomine eam securitatem intelligi volebant, quam animi immortales apud Deum habent, ipsam etiam animorum tranquillitatem Tullius *Pacem* appellavit: *Temperantia*, inquit, *Pacem animis affert* (12): otium autem et quies publica non alio fere nomine designatur: *In pace fuleli* Mysas gentes tenuisse dicitur Flaccus Graecini frater apud Ovidium (13), et *placida compostus pace quiescere* Antenor apud Virgilium (14). quorum autem pax melior, eoque nomine digna magis, quam

(1) carm. 5.

(2) l. 3. c. 1. n. 10.

*Ecce Saon heic dormit Acanthius, una Diconis*

*Spes patris: haud dicas morte perire bonos.*

(3) v. Gor. Columb. Liv. p. 51.

(4) Fabr. p. 707. n. 285. Don. Cl. 4. n. 51.

(5) M. V. p. 567. n. 15.

(6) Mabill. de cult. Ss. in App. Lup. Ep. Sev. p. 76.

(7) Murat. p. 1436. n. 1.

(8) *Bene naviget.*

(9) Plant. Trin. 4. 1. 17.

(10) Lucret. l. 5. v. 1228.

(11) Val. Flacc. l. 4. v. 477.

(12) l. 1. de Fin. c. 14. n. 47.

(13) ex Pont. l. 4. ep. 9. v. 77.

(14) Aen. l. 1. v. 255.

corum, qui aevo aeterno beatissimi perfruuntur? porro duobus modis Christianos formula illa usos esse video, ut vel mortuos *In Pace receptos esse* affirmarent, vel Deum precarentur, ut eos *In Pace esse faceret*. quorum quidem vel in Latino sermone aliquid aliquando valere debet auctoritas: sunt enim ex eorum etiam monumentis quaedam non modo satis elegantia, sed etiam ab eruditis temporibus non remota, aut quae aliquid certe ex docta aetate olere videantur. exemplo haec sint (1):

✠ DOMINICO · FILIO · INNOCENTISSIMO ✠  
 ET · DVLCISSIMO · BONO · SAPIENTI ✠  
 PELAGIO · QVI · VIX · ANN · VI · M · VII · D · AIII ·  
 II · VIII · SOCRATIANVS · ET · HYRENE · PARENTES · B · QVES · (2)  
 IN · PACE

(3)  
 SOTERIS · MATER · FILIO · LEONI  
 ✠ ✠  
 QVI · VIXIT · ANNIS · PLVS · MINVS  
 ✠  
 XX · DORMIT · IN · PACE · DORMIT

(4)  
 MEMORIAE · VICTO  
 RINAE · QVAE · VIXIT  
 ANN · LXXXV · MENS · III · RVFVS  
 F · MATRI · KAR ·  
 B · M · IN · P ·

(5)  
 SEPTIMIA · ROMANA · QVAE · VIXIT · ANNIS · XIII · VITA  
 FVNCTA · DVODECIMO · KALENDAS · OCTOBRIS  
 DIE · NATALI · SVO · VIRGO · POEMENIA · MATER  
 DOLENS · POSVIT · FILIAE · BENEMERENTI  
 IN · PACE

His igitur formulis ne utaris, nulla, opinor, caussa est; quamobrem vero utaris, illam habes, quod epitaphia nostra, religionis ergo, aliqua omnino Christianorum nota ornanda esse videantur. at quaeres, num et illam Christianorum veterum formulam probem, quum eum, qui jam elatus esset, non mortuum non sepultum, sed *Depositum* esse dicebant. Ovidius certe non desperatum deploratumque, sed reapse mortuum sic appellasse videtur (6):

*Depositum nec me qui fleat, ullus erit.*

iterumque (7),

*Iam prope depositus, certe jam frigidus aegre*

*Servatus per te, si modo server, ero.*

Sed tamen Christiani veteres non tam ipsam mortem, opinor, quam ductum funus piosque sepulturae ritus eo verbo designare volebant: quod maxime discas ex epitaphio Fabrettino (8) *Pascasii* pueri sexennis, qui quum Baptisma *percepisset* *xi. Kal. Majas*, ut intelligeremus qua in veste elatus esset, octavo post die *Albas Suas Ad Sepulcrum Deposuisse* dicitur *Depositus* *iii. Kal. Mai.* id est rite conditus: albatus autem esse coeperat, ex veteri more, ipso Baptismatis die Sabbato, quem maiores *Sanctum* appellarunt. quin et apertius significatio illa apparet in epitaphio *Asurii Victoris* apud

(1) Grut. p. 1057. n. 2. Fabr. p. 582.  
 n. 168.

(2) *Bene quiescas.*

(3) Fabr. p. 554. n. 43.

(4) id. p. 562. n. 96.

(5) id. p. 323. n. 483.

(6) l. 3. Trist. el. 3. v. 40.

(7) l. 2. ex Pont. ep. 2. v. 47.

(8) p. 577. n. LXX.



Boldetum (1), in quo quum decessisse ille dicatur xi. Kal. Apr. *Depositio* ejusdem fuisse dicitur x. Kal. Apr. quare nova eo sensu vocabula esse videntur, nec a Latinis veteribus usurpata: multoque rectius scribes *Compositus Est*, *Elatus Est*, aut *Decessit*, *Excessit* et similia, mortem tamen ipsam, si ita libet, *δυσφημίας* vitandae caussa (2), ne appelles. ut veterum scilicet humanitatem, non ut superstitionem imitere, addes vero et diem ipsum sive funeris sive mortis, nedum annum: quae sane illi etiam ante Christianum nomen non raro incidenda curabant, qui et diem aliquando addidere absoluti sepulcri, sive arae tumulo impositae, hoc modo. *Ossa Posita Sunt vi. Idus Novembres Crispino Et Aeliano Cos. Ara xv. Kal. Ianuar. Isdem Cos.* (3) sed illum deinde morem studiosius pietas Christiana celebravit, quo anniversarii mortis dies retinerentur, ac statae preces et sacra instaurari quotannis rite possent.

V. Ad compositionem autem structuramque epitaphii quod pertinet, quum ex eruditorum numero multi sint, qui rogati epitaphia scribant; pace eorum dixerim, sunt tamen perpauca, in quorum titulis veterum simplicitatem, brevilloquentiam, verique similitudinem, non dicam expressam, sed adumbratam videamus. quotus enim quisque est, qui non profuso quodam orationis genere delectetur, nec alienis unquam laudibus, aut poetarum pigmentis abutatur? dico haec jamdiu in multis expertus, nec raro accidit, ut quae ego epitaphia clarorum virorum satis benigne pertexuissem, ea alii fucarent, comerent: idest inania fere verba quasi complementa numerorum inculcarent. et exstant in urbe phalerata ejusmodi epitaphia multis in templis, quae adeo longa, ut qui minime morosus est, vix ad dimidium legat, ceteri, ubi nomen primum oculis usurpaverint, addant gradum. sic verba et ornamenta consecrando, hoc tandem nactus videare, ut res etiam et facta ignorentur. at equidem in alia semper sententia fui, jejunumque epitaphium a me scriptum dici malui, quam verbosum: nempe Gellianum illud saepe reputans (4), unumquodque genus dicendi, quum caste pudiceque ornatur, fieri illustrius; quum fucatur atque praelinitur, fieri praestigiosum.

Quidam etiam sunt, quos non epitaphium scribere, sed vitam plane et historiam voluisse dixeris: adeo minuta quaeque persequuti sunt, indictumque nihil, nihil illaudatum esse voluerunt. qui tamen, si res postulasset, sine ulla reprehensione ea, quae in epitaphia congesserunt, proferre omnia separatim potuissent, fastos scilicet imitati, quos Augustus in Mausoleo suo prostare voluit, omnia his complexus, quae ab anno undevicesimo domi militiaeque gesserat. vel etiam exemplo esse poterat Mausolei Plantiorum inscriptio via Tiburtina ad pontem Lucanum (5), quae Ti. Plautii Silvani egregia facta haud brevi narratione comprehendit. ceterum quae epitaphia sepulcris, ut nunc fiunt, nec magnis nec operosis incidenda essent, eorum certus adhibendus erat modus, ad mediocritatemque revocandus: ut quae in operis sumptu parsimonia fuisset, ea in tituli etiam verbis esse videretur: exempla, opinor, legisti, quae attuli libro primo: quem ego librum epitaphiis, quam fieri potuit, et optimis et longissimis locupletavi: nihil enim hac aetate jucundius accidere iis posse intelligebam, qui novum hoc genus epitaphiorum induxerunt: videsne vero in his, non modo ut omnia fere attenuate presaeque dicta sint, ac nihil ut sonet grandius pleniusque, quam aequalis lenisque orationis ratio ferat; sed etiam ut plerisque eorum posthabitis, quae nunc singula diligentissime referri solent, clarorum quidem virorum honores ac munera recenseantur, at de factis deque virtutibus pauca admodum et praestantissima delibentur?

Ergo istam scribendi formam quum ipsi nobis Latini veteres expresserint, quorum

(1) l. 2. c. 6. p. 398. n. 3.

(2) v. inscr. 166.

(3) Grut. p. 575. n. 3.

(4) N. A. l. 7. c. 14.

(5) Grut. p. 453. n. 1.

lingua epitaphia scribimus; ille nobis est modus retinendus, illorum apud omnes et ratio et auctoritas valere debet. qui vel ingenio nimis vel consuetudini indulserit, is in aliorum regno plus ausus videatur, quam aut leges sinerent, aut verecundia pateretur.

## §. II.

## DE EPITAPHIIS VIRORUM

I. **Q**uod Horatius de temporum suorum poetis notavit (1),

*Scribimus indocti doctique poemata passim,*

idem omnino et ille et qui consequenti sunt viri eruditi, de epitaphiorum scriptoribus queri poterant. tam multa enim vel optimarum aetatum exstant adhuc epitaphia mendis deformata magnis, et textu etiam nimis et compositione inter se discrepantia, ut quilibet saepe paterfamilias, quilibet libertus aut servus epigrammata lapicidis dictasse, et eorum suorum sepulcris quem voluit aut potuit titulum inscripsisse videatur. quo fit, ut si exempla singula ponderis aliquid apud nos habere debeant, nihil prope relinquatur, quod epitaphii scriptor quum effuderit, non aliquo jam exemplo tueri possit. sed neque exempla habenda esse quis dixerit, quae olim ab imperito et inepto profecta sint; neque difficile admodum fuit ex eorum numero illa secernere, unde regulas nobis et praecepta hauriremus.

Iamvero quia horum etiam non exiguus est numerus, et quot epitaphia, totidem fere scriptores fuerunt, nec una omnes aetate aut eadem in urbe floruerunt; idcirco, quamquam in eodem scribendi genere nec valde dissimili in argumento versabantur, tamen non unam semper viam rationemque secuti sunt: itaque alia aliis aliquando placuisse videmus. quorum nos auctoritate si hoc statuimus, aliquam nobis etiam in epitaphii structura permissam esse licentiam; non haec tamen ita dissoluta paulatim atque impudens fieri debet, omnia ut sibi licere quisque putet.

Quaedam primum optimae notae epitaphia plane integra offendimus (2), quae nullum de monumenti auctore verbum habent (3):

C · VEDIUS  
PHILOMVSVS  
CVM · AVTRONIA  
SVA · FELICE  
HIC · EST

OSSA  
C · IVLI · LICINI  
L · TIRENI  
ET · DONATAE  
LIBERTAE

sed hi, opinor, ut alii plerique, sepulcrum ipsi sibi tantum construxerant; vel etiam in familiae monumento, cujus in fronte communis eminebat inscriptio, utriusque cineres olla una capiebat. epitaphium autem huiusmodi, quod introrsus in familiae monumento legi debeat, nunc quoque omnes probabunt. at si eorum causa feceris, qui sibi monumentum, quum in vita essent, ipsi pararunt, in eo veterum formulam non immerito requirunt (4):

(1) epist. 1. v. 117. l. 2.  
(2) v. inser. 122.

(3) Maff. M. V. p. 262. n. 12. Grut.  
p. 979. n. 9. v. inser. 141. l. 1.

(4) Nov. Fior. 1758. p. 170.

D · M · V · F · (1)  
 SEX · SAMMIVS  
 SEX · F · VVLTIN ·  
 APER · DOMO · NEMAVSO  
 IIII · VIR · IVRE · DICVNDQ  
 PONTIFEX · PVBLICORVM  
 SACRIFICIORVM  
 PRAEFECT · VIGILVM  
 ET · ARMORVM

ceterum si sepulcra, non ii, qui conditi sunt, sed filii, fratres, haeredes aut amici excitantur; vel ipsa eorum nomina adscribenda, vel certe communi aliqua appellatione designandi sunt (2). video autem id quoque obtinuisse, ut si monumentorum auctores dignitate praestarent, eorum nomina non raro prima scriberentur (3):

A · PLAVTIVS · CELADV  
 HERMETI · LIB ·  
 PISSIMO  
 EPITYNCHANVS · SER ·  
 FACIVNDVM · CVRAVIT

quin et plerosque infimorum, si sepulcrum sua impensa et sibi et aliis fecerint, primo item versu scriptos invenies (4):

Q · CLODIVS · Q · L · NIGER  
 MEDICVS · OCVLAR · SIBI · ET  
 Q · CLODIO · Q · L · SALVIO · PATRONO  
 Q · CLODIO · FRONTONI · CONLIB ·  
 Q · CLODIO · CLEMENTI · CONLIB ·  
 HIGINO · L · TESTAM · FIERI · IVSSIT

Communem tamen epitaphii formam exprimes, si cujus gratia sepulcrum exstructum apertumque fuerit, nomen ejus primum inscribes: quod sane ne iis quidem, qui epitaphium legent, incommode accidet, id fere primum scire cupientibus, quis in sepulcro conditus fuerit. sed casu nomina veteres extulere non uno: nam recto interdum efferre placuit (5):

P · CAECILIVS  
 PP · L · (6) FELIX  
 VIX · ANN · LVII ·  
 ZETHVS · SERVVS · MERENTI  
 DOMINO · FECIT

et patrio etiam casu aliquando delectati sunt, quod nempe recto ipsum sepulcrum subaudiretur (7):

L · AEMILI · L · F ·  
 IN · FRON · PED ·  
 XIX · IN · AGR ·  
 PED · XX ·

quo quidem casu, aut certe recto utendum tibi etiam est, si sepulcrum solitarium esse debeat, et auctor monumenti nomen suum in titulo incidi nolit. quippe si defuncti nomen dativo efferas casu, jure cives hospitesve requirere possint, *Quis posuit?* in ejusmodi autem titulis patrio interdum casui sic rectum veteres praeponabant, *Corpus T. Baebii, Ossa Ti. Clodii*. jam in ceteris epitaphiis, quae auctoris nomen habent, aut

(1) *Vivus fecit*.

(2) v. inser. 123. et 124. et l. 3. part.  
 A. C. 7. p. 7.

(3) Grut. p. 951. n. 1. v. inser. 133.

(4) Fabr. p. 300. n. 275. at hic emendatior ex Trinagio Vicent. Inscr. p. 49.

(5) Fabr. p. 360. n. x.

(6) *Publiorum duorum libertus*.

(7) Falr. p. 176. n. 349.



quae in communi familiae sepulcro legebantur, patrum fere casum illa praecedunt *Dis Manibus*, *Diis Propitiis*, *Quieti*, *Memoriae*, *Cineribus* et similia: quae in unum congesta libro tertio proferentur. saepius autem dativo usi sunt nominum casu, et dedicationem illam suam D · M · aut D · M · S · ab ipsis nominibus sejuuxerunt (1).

DHS · MANIBVS  
T · VALERIO · T · F ·  
VEL · VICTORI  
DECVRIONI · SVTRI  
II · VIR · I · D · ITERVM  
QVINQVENNALI  
CVRATORI · PECVNIAE  
PVBLICAE · PONTIFICI  
PATVL CIA · EXOCHE  
CONIVNX  
FECIT

1f. Porro nominibus non seeus, atque in honorariis inscriptionibus fiebat, honores, sacerdotia, munera adscripta esse videas: quae quidem in municipalium magistratuum epitaphiis saepe leges, rarius in Romanorum; quod ea jam in statuarum suarum basibus, nec uno in loco legerentur. ex his tamen est exemplum, quod in Gruteri volumine (2) mendosum quum sit, hic tibi expiatum tersumque propono:

SEX · TADIVS · SEX · F · VOL · LVSIVS · NEPOS · PAVLLINVS · PROCOS ·  
SORTITVS · PROV · CRET · CYR · LEG · PRO · PR · PROV · AFRIC ·  
PRAEF · FR · D · LEG · PR · PR · PROV · ASIAE · LEG · PR · PR · PROV · MAC ·  
PRAET · CAND · AED · CVR · Q · PROV · PONT · ET · BIT · TR · MIL · LEG ·  
III · F · F · X · VIR · STLIT · IVD · VIII · VIR · II · Q · Q ·  
MVLVIA · C · F · PLACIDA · MARITO · OPTIMO · ET · SIBI

atque hoc loco animadvertas, in defunctorum item honoribus enumerandis non temporis semper rationem habitam, sed aliquando etiam dignitatis: nempe ab honorum postremo, qui et summus fuerat, instituta hic quoque recensio est. nam *Sex*. hic *Tadius*, affinis fortasse *Lusii Quieti*, qui novissimo Trajani principatu inclaruit, et *Lusius* quoque vel ob adoptionem vel ob haereditatem dictus, in colonia, opinor, Reatina, quum haud procul Reate conditus fuerit, *Quinquennalis* in adolescentia fuerat, atque *Octovir* iterum, qui summus forsitan in patria magistratus habebatur. deinde Romae in republica versari coepit, creatus *Decemvir stlitibus judicandis*, unde alios etiam honorum suorum curriculum auspicatos esse videmus. militavit postea *Tribunus Legionis quartae Flaviae Felicis*. tum sago deposito, iterum togam sumpsit, ut *Quaestor* fieret *Provinciae Ponti et Bithyniae*. quaestura administrata, *Aedilis Curulis* designatus est, ac post aedilitatem *Praetor Candidatus*, eum scilicet honorem Imperatoris suffragio consequutus (3). hinc jam in provincias Caesaris mitti coeptus. primum enim *Legatus pro praetore* fuit *provinciae Macedoniae*, deinde *Legatus pro praetore provinciae Asiae*: quumque Romae post haec *Praefectus frumento dando* fuisset, iterum ab urbe discessit, *Legatus pro praetore provinciae Africae*: ac denum, provincia ei a senatu deereta, *Proconsul*, qui honorum ejus maximus fuit, *provinciam Creticam Cyrenaicam* sortitus est: Creta enim et Cyrenae jam a Tullii aetate (4) una provincia erat.

At saepius utique honores, quo quisque ordine consequutus esset, eodem perscri-

(1) Manut. Orth. p. 267.

(2) p. 471, n. 6. hic ex autograph.

(3) v. inser. Murat. p. 1103. n. 7.

(4) v. or. pro Plauc. c. 5. n. 13. et c.

34. n. 85. Svet. in Vesp. c. 2. p.

7. Strab. l. 17. p. 837. C.

ptos reperias. quam nuper rationem mihi etiam servandam putavi, epitaphium scripturus viri clarissimi, quem omnes boni amissum lugent:

IOANNI · BERNARDINI · F · POTENTIANO · V · C ·  
 DOMO · REATE  
 PRAEF · TIFERNATIVM · TIBER · PRAEF · AESINATIVM  
 PRAEF · CAMERTIVM · PRAEF · LAVRETANORVM  
 SVMMO · MAGISTRO · COLLEGI · SANCTI · SPIRITVS  
 MAGISTRO · ADMISSIONVM · CLEMENTIS · XIII · P · M ·  
 PRAEFECTO · VRBIS · PER · INTERREGNVN  
 CVNCTIS · SVFFRAGHS · PATRVN · CARDINALIVN · FACTO  
 ET · REFECTO A · PIO · VI · PONT · MAX ·  
 PRAESIDI · PROVIDENTISSIMO  
 ET · CVM · SVMMA · BENIGNITATE · IVSTISSIMO  
 QVI · VIX · ANN · LXI · M · VI · D · III ·  
 DECESSIT · IN · MAGISTRATV  
 XI · KAL · DECEMBR · ANNO · SACRO · M · DCC · LXXV ·  
 PROXIMVS · FASTIGIO · HONORVM  
 FECERVNT · FRANCISCVS · EQVES · MELITENSIS  
 PRAEPOS · PRAESIDIAR · CASTRI · VRBANIANI  
 FRATRI · KARISSIMO  
 ET · ANTONIVS · MARCHIO · PATRVO · BENEMERENTI  
 PIETATIS · CAVSSA

Militibus autem ille tantum gradus interdum adscriptus, quem ultimum adscendissent (1):

Q · NVMENIO · Q · F · Q · N · OVF ·  
 CALVO · LATINO  
 PRIMOPLO · LEG · MINER ·  
 MILIT · ANN · XXVI ·  
 VIX · ANN · XLII ·  
 NVMENIA · VIVANIA  
 MAT · F · C ·  
 IN · FR · PED · XIII ·  
 IN · AGR · PED · XIX ·

puer enim annorum sexdecim militare hic coeperat, ut ceteri fere tirones: militem quippe castris pubescere, scripsit Silius (2). at vero in aliis exemplis gradus singuli descripti, et quot in singulis annos meruerint (3):

C · ANINIVS · C · F · POM · GALLVS  
 DOMO · ARRETIO · C · LEG · III ·  
 SCYTH · MILITAVIT · IN  
 PR · AN · XVII ·  
 EVOC · AN · II ·  
 C · IN · LEG · III · SCYTH ·  
 AN · XVIII · VIXIT  
 AN · LX · MERV · AN · XXXVIII ·  
 H · S · E · ATIMETVS · L ·  
 EX · TESTAMENTO · F · C ·

quod annos triginta novem meruisse Gallus dicatur, quum in praetoria cohorte militaverit annos septemdecim, duos Evocatus fuerit, et undeviginti Centurio, qui sunt anni

(1) Fabr. p. 178. n. 366.

(2) l. 2. v. 318.

(3) Grut. p. 520. n. 3.

triginta octo tantum; noli mirari: militiae menses reliquos si colliges, quos singulis annorum numeris Atimetus non adjunxit, annus tibi tricesimus nonus existet.

Cetera etiam munera, quae in honorariis inscriptionibus vix leges, in epitaphiis olim addita passim (1):

T · FLAVIO · AVG · LIB ·  
EVSCHEMONI  
QVI · FVIT · AB · EPISTVLIS  
ITEM · PROCVRATOR  
AD · CAPITVLARIA  
IVDAEORVM  
FECIT  
FLAVIA · APHRODISIA  
PATRONO · ET · CONIVGI  
BENEMERENTI

Capitularia iste exegerat, tributum scilicet drachmarum duarum in capita, quod Vespasiani jussu Iudaei quotannis Capitolino Iovi pendere cogebantur, quemadmodum in templum Hierosolymorum undique antea mittebant (2). enimvero multas hujusmodi appellationes, quae muneribus hisce nostris et publicis et privatis aptari possint, libro tertio reperies: quamquam eae minus nunc usui esse solent, quod plerique jam sine tituli honore in communia sepulera inferantur; minusque nunc de liberorum atque ingenuorum fama laboremus, quam olim plerisque memoria servorum et vicariorum cordi fuit.

Patriam porro, quae iis semper adscribenda est, qui solo peregrino defuncti humanique sint; quo pacto enunciari oporteat, capite primo partitionis tertiae trademus.

II. Iam et de laudibus defunctorum dicendum est, quae hodie epitaphia implent, olim uno fere aut altero appposito constabant (3).

DIS · MANIBVS  
TI · CLAVDI · AVG · LIB ·  
ZOSIMI · PROCVRAT ·  
PRAEGVSTATORVM  
CLAVDIA · ENTOLE · CONIVNX  
VIRO · BENEMERENTI  
ET · CLAVDIA · EVSTACHIS · FILIA  
PATRI · PIENTISSIMO

(4)  
L · SITTIO · OPTATO  
EQ · R · DOCTO · IVVENI  
QVI · VIXIT · ANN · XXIII · M · II ·  
D · V · L · SITTIVS · DIO  
NYSIVS · PATRO  
NO · INCOMPARA  
BILI

plus aliquid tamen sibi mater sumpsit ad pietatem filii declarandam (5):

(1) Oederic. Syll. inser. p. 33.

(2) Ios. B. I. l. 7. c. 6. Cic. pro Flaec.  
c. 28. n. 67.

(3) Manut. Orth. p. 269. Grut. p. 581.  
n. 13.

(4) Fabr. p. 647. n. 402.

(5) Grut. p. 409. n. 1.



L · FADIO · L · F ·  
 CAEDIANO · EQVITI  
 ROMANO · PIETATIS  
 RARISSIMAE · FILIO  
 CAEDIA · FESTA · MATER  
 INFELICISSIMA  
 MONVM · ET · ARAM · FECIT  
 VIX · ANNIS · XXV ·  
 MENS · V · DIEB · III ·

nec raro gemina aut terna junguntur apposita, quae egregios defuncti mores extollant. sed nulla fortasse occurrent, quibus disciplinarum aut artium cognitio celebretur, siquidem uno scientiae artisve nomine designari potuerit (1):

TI · CLAVDIO · HERMAE  
 RHET ·  
 CLAVDIA · MAGNA · VXOR  
 ITEM · TI · CLAVDIVS  
 TROPHIMVS · ET · APOLAVSTVS  
 CAESARIS · N · SER · FRATRES  
 OPTIMO · PISSIMO

atque ut hic *Hermas Rhetor* tantum appellatur, sic *Curtianus* quidam in lapide, qui nuper sub Praeneste inventus, vel ab amico *Medicus* sine ullo apposito dictus est:

D · M ·  
 P · AELIO · PIO  
 CVRTIANO  
 MEDICO · AMICO  
 BENE · MERITO  
 A · CVRTIVS · CRISPINVS  
 ARRVNTIANVS

quique nunc acutissimus aut praestantissimus philosophorum appellaretur, *Philosophus* tantum et ob sectam *Stoicus* hoc in exemplo dictus est (2):

DIS · MANIBVS  
 M · TIBILI · M · L · AETLI  
 PHILOSOP · STOICI  
 Q · TIBILIVS · M · F · MASSI  
 CVS · FR · KAR · F · C ·

itaque nuper in epitaphio viri doctissimi, qui haec dum scribimus, omnibus bonis mementibus, Viterbii diem suum obivit, munerum ejus appellationes nullo auxi apposito, ut ut pauci numerentur, in quibus tantum fuerit doctrinarum:

(1) Grut. p. 619. n. 3.

(2) Gud. p. 224. n. 2.

A                      P                      Ω

CINERIVS • ET • MEMORIAE  
IOANNIS • BAPTISTAE • FAVRAE  
DOMO • ROMA  
PRESBYTERI • DOCTORIS • THEOLOGI  
DOCTORIS • SACRARVM • LITTERARVM  
SCRIPTORIS • OPERVM • PLVRIMORVM  
VIRI • FRVGI • INTEGERRIMI • PIENTISSIMI  
CVIVS • ERVDITIO • MAGNIS • IN • CONTENTIONIBVS  
VIRTVS • ADVERSI • IN • REBVS • ENITVIT  
VIX • ANN • LXXVI • M • VI •  
IN • SOC • IES • QVOADVSQVE • EA • MANSIT  
ANNOS • XXXXV •  
DECESSIT • VII • K • MAIAS • AN • MDCCLXXXVIII •  
PRIDEM • DE • RE • PVBLICA • VITERBIENSI  
OB • VETVSTAE • ORIGINIS • DIGNITATEM  
BINIS • VOLVMINIBVS • VINDICATAM  
OPTIME • MERITVS  
HVIC • ORDO • VITERBIENSIS • HONOREM • DECVRIONATVS  
IMAGINEM • IN • CVRIA • FVNVS • PVBLICVM  
LAVDATIONEM  
LOCVM • SEPVLTVRAE • DECREVIT

neque vero exempla desunt, in quibus nullum omnino laudis appositum, nulla appareat virtutis significatio: quod sane vel quodam veritatis studio factum dixeris, vel etiam ex veteri similitudine, quae cum mortuo etiam exercebatur (1):

DIS • MANIBVS  
M • VLPIO • AVG • LIB •  
GRESIANO • AN • XXXXV •  
TABVLARIO • XX • (2) • HERE  
DITATIVM • ITEM • TABV  
LARIO • PROVINCIAE • LVGV  
DVNENSIS • ET • AQVITANI  
CAE • ITEM • TABVLARIO • PRO  
VINCIAE • LVSITANIAE  
H • S • E • S • T • T • L • VLPIA • PIA  
CONIVGI • F • C •

sed amorem saltem suum erga viros pleraeque uxores testari solebant (3):

DIIS • MAN • SACR •  
PACHINO • DOMITIANI  
AVGVS • SERVO • A • BAL • PRIVAT •  
RHODIA • CONIVGI • DELICIO  
SVO • FECIT

quidam etiam iis appellationibus usi, quae ad defunctorum pueritiam referendae essent, ut in Tribuni militum epitaphio longaevus nutritor qui illum *Infantem* etiamtum vocat (4):

(1) Don. Cl. 5. n. 126. Fabr. p. 178.  
n. 366. etc.

(2) *Vicesimae*.  
(3) Don. Cl. 7. n. 142.

(4) id. Cl. 6. n. 58.

C · IVLIO  
INGENVO

C · F ·

TRIB · LEG · III · ITAL ·

TRIB · COH · VICTOR

INFANTI · BENIGN ·

PLVRA · DE · SE

MERENTI

rectius sane *Alumno* scripsisset, quo nomine ii quoque apte appellantur, qui jam adoleverunt.

Narrationes, quibus defunctorum vita aut res gestae describantur, non modo breves omnino in epitaphiis sunt, sed etiam rarae. neque enim quod quisque gessisset, sed si quid pie a quoquam vel liberaliter vel fortiter gestum esset, quod et magnum videretur, nec fere de aliis praedicari posset; id veteres commemoratione ac praeconio dignum putabant. sic *Urbinius* ille, apud *Macrobius* (1), in agro *Reatino* olim latitans, quem occidi iussum servus ut morti eriperet, anulo ipsius et veste insignitus militibus cubiculum domini ingredientibus cervicem praebuerat; jure utique, monumentum conservatori suo fecisse dicitur, *Titulo scriptiois adjecto, qui tantum meritum loqueretur*. sic etiam, exempli gratia, in *Archigalli Salonitani* tumulo adnotatum est, sacra ab eo *Matri Deum Berecynthiae* confecta annis septendecim in ipsa senectute, id est ab anno quinquagesimo octavo ad annum septuagesimum integrum: quod rarum aut singulare videbatur (2):

D · M ·

L · BARBVNTEIO

DEMETRIO · ARCHIG ·

SALONITANO · QVI

ANNIS · XVII · VSQ · AD

ANN · LXXV · INTEGR ·

SACRA · CONFECIT

BARBVNTEIA · THALLV

SA · C · L · ISTERA · PATRONO

PIENTISS · POSVIT

haec tamen continua, ut vides, oratione exposita sunt: ut altero item in exemplo, in quo multa sane comprehensa: est autem *M. Lupi* epitaphium, ejus, quem *Commodus Aug.* interemit: *Anitium Lupum* *Lampridii* libri editi habent, quum jam *Salmasius* (3) in *Palatino Codice* legisset *Antium Lupum* (4):

D · M ·

M · ANTONII · ANTH · LVPI · PR ·

PATRICII · AVGVRI · QVAEST · SODAL · TITH · TRIB ·

MIL · LEG · II · ADIVTR · PIAE · FIDEL · X · VIR · STL · IV · D · PRAEF · FER ·

LAT · CIVIS · MEMORIA · PER · VIM · OPPRESSI · IN

INTEGRVM · SECVNDVM · AMPLISSIMI · ORDINIS

CONSVLTVM · RESTITVTA · EST · SEPVLCRV · AB · EO · COEPTVM

CLAVDIAE · REGILLAE · VXORI · ET · ANTHIAE · MARCELLINAE · FIL ·

PIETATIS · SVAE · ERGA · EVM · TESTIFICANDAE · GRATIA · ET

NOMINIS · EIVS · IN · PERPETVVM · CELEBRANDI · PERFECERVNT · ATFINES

M · VALERIVS · BRADVA · MAVRICVS · PONTIF · ET · ANTONIA · VITELLIA

AMICI

Q · FABIVS · HONORATVS · T · ANNAEVS · PLACIDVS

(1) *Saturn.* I. 1. c. 11.(2) *Fabr.* p. 347. n. 10.(3) in *Comm.* c. 7.(4) *Grut.* p. 356. n. 1.



In militum tamen sepulcris narratiunculae etiam leguntur quaedam intermediae, quamquam nec ornatae nec uberes; sunt enim fere huiusmodi (1):

D . M .  
 AVREL . . . M VCIANO  
 MIL . COH . V . PR . 7.  
 BARBATI . (2) MILITA  
 RE . COEPIT . POMPE  
 IANO . ET . AVITO . COS . (3)  
 ANN . XV . VIXIT . ANN .  
 XLV . NATVS . TREM  
 ONTIAE . (4) CL . PAVLINA  
 CONIVGI . KARISSIMO  
 EX . . TESTAMENTO  
 FECIT

praeter militares autem titulos nescio, an epitaphium occurret aliud accuratius perscriptum, quam hoc hominis libertini, multa plane de eodem varie complectens (5):

M . VLPIO . AVG . LIB . PHAEDIMO  
 DIVI . TRAIANI . AVG . A . POTIONE  
 ITEM . A . LAGVNA . ET . TRICLINIARCH .  
 LICTORI . PROXIMO . ET . A . COMMENT .  
 BENEFICIORVM . VIXIT . ANN . XXVIII .  
 ABSESSIT . SELINVNTE . PRI . IDVS . AVGVS .  
 NIGRO . ET . APRONIANO . COS . (6)  
 RELIQVIAE . . TRAIECTAE . . EIVS  
 III . NONAS . FEBR . EX . PERMISSV  
 COLLEGII . PONTIFIC . PIACVLO . FACTO  
 CATVLLINO . ET . APRO . COS . (7)  
 DVLCISSIMAE . MEMORJAE . EIVS  
 VALENS . AVG . LIB . PHAEDIMIANVS  
 A . VESTE . BEN . MER . FECIT

obiit autem Phaedimus ea in urbe, in qua et patronus ejus Trajanus decessit (8): item consulibus iisdem, ac tertio fortasse post die, quam ille obiisset (9), mocreore, ut Tristanus opinabatur (10), ac desiderio patroni sui.

Enimvero epitaphiorum, quorum uberior materia sit, alia quaedam exempla habes libro superiore (11): nec jam plura quaerenda: frustra enim, dico expertus, veterum inscriptionum libros pervolutabis: nisi forte singularis dictionis exempla quaeras, aut vulgarium sepulcrorum titulis insignes quasdam mausoleorum inscriptiones adnumerare libeat. eae maxime sunt, quarum superius memini, monumentum scilicet Ancyranum Augusti et Tiburtinum Plautii Silyani. sed neutrum tamen in epitaphiorum numero habendum esse mihi videtur. nam Ancyranum quidem, quod nullam habet formulam sepulcralem, diserte a Svetonio (12) *Index rerum ab Augusto gestarum* appellatur, quem ille incidere voluit in aeneis tabulis, quae ante Mausoleum statuerentur: ut *Fasti* potius aut *Annales Augusti* dicendi sint: praesertim quum et tempora ad singulas res adscriptis consulatibus designentur. Tiburtinum autem, in quo res a Plautio in Moesia gestae describuntur, honorariam plane inscriptionem initio imitatur: credo, quod ejus potissimum causa Mausoleum exstructum esset, at in eo nullum item verbum de manibus,

(1) Don. Cl. 6. n. 155. v. et Maff. M. V. p. 461. n. 2. et Fabr. p. 394. n. 274.

(2) *Centuria Barbatii*.

(3) An. Varr. 962.

(4) Thraciae oppid.

(5) Grut. p. 578. n. 1. Fabr. de Col. Tr. p. 185.

(6) An. Varr. 870.

(7) An. Varr. 883.

(8) Dio l. 68. p. 1147. C.

(9) v. Tillem. Hist. des Emper. t. 2. p. 205.

(10) comm. Histor. t. 1. p. 376.

(11) Inscr. 156. 159. 141.

(12) in Aug. c. 101. n. 7.

de vitae annis, de sepultura, de loci religiosi dimensione, de monumenti auctore: ut, quemadmodum in mausoleorum structura consulto veteres sepulcri similitudinem effugiebant (1), sic dedita opera in hanc inscriptionem nulla epitaphii formula recepta esse videatur. atque id in Planci etiam monumento animadvertas, licet, cuius ego inscriptionem jam inter ellogia recensui (2).

Ceterum exemplorum illorum utrumque usui nobis esse potest, si quid ejusmodi aliquando in regum aut pontificum maximorum mausoleis inscribendum sit. nempe in ipsa molis fronte epitaphium incidetur brevissimum; ad latera autem in pilis fasti inscribentur quamvis longi: et defunctum, si libet, ipsum facta sua narrantem induces, quemadmodum Augustus in monumento suo ipse loquitur (3):

ANNOS · VNDEVIGINTI · NATVS · EXERCITVM · PRIVATO  
CONSILIO · ET · PRIVATA · IMPENSA · COMPARAVI  
.....

plerasque vero ejusdem monumenti formulas liber tertius dabit: nam ne totum describam, faciunt tot illae liturae lacunaeque hiantes, nec pauca adhuc loca post ipsas Cossonii Gronoviique curas obscura. sed in fastis hisee condendis cavendum est maxime, ne quem res suas narrantem induxeris, eum ita sibi indulgentem facias, ut idem et praeco laudum suarum esse videatur.

Quod si res gestae in primo totius operis titulo exponendae fuerint, auctoribus monumenti vel infra vel ad latera inscriptis, a defuncti nomine exordium duces, et Plautianae inscriptionis (4), quam subijciam, exemplo post honoris appellationes, pronomi- nibus usus demonstrativis aut relativis, narrationem subtexes,

TI · PLAVTIO · M · F · . . . .  
SILVANO · AELIANO  
PONTIF · SODAL · AVG ·  
III · VIR · A · A · A · F · F · Q · (5) TI · CAESARIS  
LEGAT · LEG · V · IN · GERMANIA  
PR · VRB · LEGAT · ET · COMITI · CLAVD · CAESARIS · IN · BRITANNIA  
CONSVLI · PROCOS · ASIAE · LEGAT · PROPRAET · MOESIAE  
IN · QVA · PLVRA · QVAM · CENTVM · MILL · EX · NVMERO  
TRANSDANVVIANOR · AD · PRAESTANDA · TRIBVTA · CVM · CONVIGIB ·  
AC · LIBERIS · ET · PRINCIPIB · AVT · REGIBVS · SVIS · TRANSDVXIT  
MOTVM · ORIENTEM · SARMATAR · COMPRESSIT · QVAMVIS · PARTE  
MAGNA · EXERCITVS · AD · EXPEDITIONEM · IN · ARMENIAM · MISISSET  
IGNOTOS · ANTE · AVT · INFENSOS · P · R · REGES · SIGNA · ROMANA  
ADORATVROS · IN · RIPAM · QVAM · TVEBATVR · PERDVXIT · REGIBVS  
BASTARNARVM · ET · RHOXOLANORVM · FILIOS · DACORVM · FRATRVM  
CAPTOS · AVT · HOSTIBVS · EREPTOS · REMISIT · AB · ALIQUIS  
EORVM · OPSIDES · ACCEPIT · PER · QVEM · PACEM · PROVINCIAE  
ET · CONFIRMAVIT · ET · PROTVLIT · SCYTHARVM · QVOQVE · REGEM  
A · CHERRONENSI · QVAE · EST · VLTRA · BORVSTHENEM · OPSIDIONE  
SVMMOTO · PRIMVS · EX · EA · PROVINCIA · MAGNO · TRITICI · MODO  
ANNONAM · P · R · ADLEVAVIT · HVNC · LEGATVM · IN · HISPANIAM  
AD · PRAEFECTVR · VRBIS · REMISSVM · SENATVS · IN · PRAEFECTVRA  
TRIUMPHALIBVS · ORNAMENTIS · HONORAVIT · AVCTORE · IMP ·  
CAESARE · AVGVSTO · VESPASIANO · VERBIS · EX · ORATIONE · EIVS  
Q · I · S · S ·  
MOESIAE · ITA · PRAEFVIT · VT · NON · DEBVERIT · IN · ME · DIFFERRI

(1) v. inscr. 145. et Cic. ad Attic.  
l. 12. ep. 35. 36. 37. 41. etc.  
(2) v. inscr. 294.

(3) Grut. p. 230.  
(4) id. p. 453. at nunc emendatio ex  
Demiici de Sauctis Dissert. de

Plautiis tab. 2.  
(5) *Triumviro Auro Argento Aeri  
Fludio Feriundo, Quaestori etc.*

HONOR · TRIUMPHALIVM · EIVS · ORNAMENTORVM · NISI · QVOD  
 LATIOR · EI · CONTIGIT · MORA · TITVLVS · PRAEFECTO · VRBIS  
 HVNC · IN · EADEM · PRAEFECTVRA · VRBIS · IMP · CAESAR · AVG ·  
 VESPASIANVS · ITERVM · COS · FECIT

ad versum xviI. ne haereas: ὑπερβατον sive trajectio verborum est Graeco more, idem-  
 que ac si scriberes, *Summoto quoque rege Scytharum a Chersonensi, quae in Tau-  
 rica Chersoneso urbs est, obsidione, per quem regem Scytharum summotum pacem  
 provinciae et confirmavit et protulit.*

Inscriptiones alias eodem in mausoleo fuisse, quibus praestantissimus quisque e  
 gente Plautia celebraretur, parietinae ejus et loculamenta demonstrant. quam tamen Gru-  
 terus affert (1) *P. Plautii Pulcri*, eam eum Maffejo (2) fietam puto, Smetii etiam ju-  
 dicio adductus, qui neglexit, haec contra sine dubio germana est: quae tamen iusti epi-  
 taphii mensuram vix implet (3):

M · PLAUVIVS · M · F · A · N ·  
 SILVANVS  
 COS · VII · VIR · EPVLON ·  
 HVIC · SENATVS · TRIUMPHALIA  
 ORNAMENTA · DECREVIT  
 OB · RES · IN · ILYRICO  
 BENE · GESTAS  
 LARTIA · CN · F · VXOR  
 A · PLAUVIVS · M · F ·  
 VRGVLANIVS  
 VIX · ANN · IX ·

eodem nempe M. Plautii et Lartiae uxoris ejus et filii Vrgulanii cineres illatos esse do-  
 cemur. atque haec satis de narrationibus iis, quae magnorum sepulcrorum molibus magis,  
 quam exiguis ac vulgaribus tumulis convenire videantur.

III. Ad epitaphia ut redeam. ea nunc ratio exponenda, qua vitae anni ex veterum  
 more subseribantur; quae sane varia et multiplex fuit. nam primum aetatem aliquando  
 indicabant, annos ipsos non addebant (4):

MEMORIAE  
 L · ALFI · L · F · OVI · MARCELLINI  
 VI · VIR · AVG · PATRON · COLLEGI  
 DENDROPHOR · COMENS ·  
 IN · PRIMO · AETATIS · FLORE · PRAEREPT ·  
 AELIVS · RESTITVTVS · PATER  
 MISERRIMVS · ET · SIBI

anni alias adscripti sed minus certi, quod formula illa *Plus minus* numerum praece-  
 dat (5): quam Graeci sero imitati, Πλεον Ελαττεον reddidere (6). plerumque tamen aut  
 nihil de vitae tempore adjectum est, aut anni simul et menses et dies, quos quisque  
 vixisset, numeris designati: nisi quod menses interdum sic omissi, ut dierum numero  
 comprehenderentur (7):

(1) p. 452. n. 5. et p. 454. n. 1.

(2) Ar. Cr. L. 1. 5. c. 4. p. 341.

(3) Grut. p. 452. n. 6. Fabr. p. 171.  
 p. 325. at nunc emendatior ex mo-

do cit. dissert. Domini de San-  
 ctis tab. 1.

(4) Grut. p. 350. n. 6.

(5) v. inser. 124.

(6) Fabr. p. 588. n. ciii.

(7) Dou. Cl. 8. n. 5. v. et Cl. 12. p. 15.



C · OCTAVIO  
 C · F · PAL · FRVCTO  
 ARCHITECTO · AVG ·  
 VIX · ANNIS · XXVI ·  
 DIEBVS · L ·  
 C · OCTAVIVS  
 C · F · PAL · EVTYCHVS  
 PATER  
 FILIO · PISSIMO  
 FECIT

saepe autem in annorum, mensium, dierum enumeratione casus alternant: *Vixit Annos L. Mensibus III.* aut *Annis LXX. Dies X.* quam casuum mixturam antiquitus *instar deliciarum* habitam esse, scripsit Hagembuehnius (1): nec tamen mihi persuadeat, ut ne istas aliis delicias relinquam. ceterum veteres cum alio saepe casu, tum alio etiam usu verbo sunt: scripsere enim non modo *Vixit Annos XXX.* sed etiam omisso verbo *Annorum XXX.* vel *Natus Ann. XXX.* aut *Agens*, sive *Quum Ageret Ann. XXX.* illud singulare, quod Similis sub Hadriano Aug. Praefectus Praetorio, in sepulcro suo, ut est apud Dionem (2), inscribi iussit in hanc sententiam: *Σιμιλις μὲν ἐνταυθα κεῖται, βίους μὲν ἐτὴ τσσα, ζῆσας δὲ ἐτὴ ἑπτα*: nempe *Similis Hic Situs Est Annorum tot*, LX. puta aut LXX. (neque enim horum Dio numerum tenebat) *Qui Vixit Annos Septem.* vixisse ille eos tantum annos sibi videbatur, quos, praefectura praetorii abdicata, ruri securus honoribus suis supervixisset. in maritorum autem epitaphiis uxores saepe et annos matrimonii subjici voluerunt, adjecta non raro formula, quae posteros de convictus sui concordia doceret (3).

D · M ·  
 D · IVNIO · PRIMIGENIO  
 QVI · VIX · ANN · XXXV ·  
 IVNIA · PALLAS · FECIT  
 CONIVGI · KARISSIMO  
 ET · PIENTISSIMO  
 DE · SE · BENEMERENTI  
 CVM · QVO · VIXIT · ANNIS  
 XV · MENSES · VI ·  
 DVLCITER · SINE · QVERELLA

At vero consules ad annum, quo quisque decessisset, indicandum, perraro inscripti leguntur: praeterquamquod in exemplis, quae antiqua putantur, paria aliquot consulum, non veteris lapicidae scalpro, sed Pyrrii Ligorii sulo inscripta sunt (4). enimvero notam hanc temporis ideo neglectam fere omissamque arbitror, quod vel de eorum epitaphiis ageretur, quibus aetas sua nihil debebat, vel de eorum, qui tempus vitae ipsis muneribus, quae adscribebantur, designabant: cujusmodi fuere liberti omnes Domus Augustae, aut clarorum virorum, de quibus fasti loquebantur: servi etiam, quorum domini in titulis omitti non solebant: item milites fere et sacerdotes omnes municipalesque decuriones, quorum alicubi elenchos exstare aliquis debebat ad memoriam posterorum. quorum autem cineres in sepulera familiaria inferebantur, ex ipso ollarum ordine tempora cujusque satis indicabantur.

Sed tamen Christiani veteres mortis tempus multo diligentius in suorum sepulcris consignarunt, in quibus saepe non modo consules, sed mensem etiam ac diem et alias praeterea notas deprehendimus. quorum quidem exemplo in epitaphiis, quae nunc fere

(1) Ep. Ep. p. 43. et p. 490.  
 (2) l. 69. p. 1167. C.

(3) Grut. p. 797. n. 6.  
 (4) v. Donat. praef. ad Art. Cr. L. Maff.

p. 6. n. 1. et Maff. ibid. p. 579.

nisi nobilibus clarisque viris non ponimus, historiae consulendum est, nec solum de vitae cuiusque spatio, sed de mortis quoque anno et die posteritas edocenda.

V. Sub epitaphii finem auctores monumentorum prodantur: his enim plerumque veteres extremo loco sedem esse voluerunt, sic autem efferre solebant, ut suos quisque cum defuncto consanguinitatis aut proximitatis gradus indicaret (1):

DIS · MANIBVS  
C · TERENTIO · C · F · PAL ·  
DEXTRO  
VIX · ANN · XXIV · M · VIII ·  
ET · C · TERENTIO · C · L · SEMNO  
VIX · ANN · XXXXV ·  
TERENTIA · C · L ·  
THALLVSA  
FECIT · FILIO · ET · CONIVGI  
KARISSIMIS · ET · SIBI

codem modo, si plures uni titulum posuissent (2):

IVSTINVS · MENANDRI · FILIVS  
FAB · NEAPOLITANVS · ANNO ·  
XLVI · H · S · E · S · T · T · L ·  
SABINA · MARIT · OPTIMO · ET  
MERENTISSIMO  
ET · MENANDER · FILIVS  
CVM · SORORIBVS · SVIS  
RECERIA · ET · SABINA  
PATRI · PISSIMO  
F ·

et conjux quidem ante passim inscripta occurret, quam filii, quam ipsa defuncti mater (3):

DIIS · MANIBVS  
NYMPHODOTO · CAES · N · SER ·  
DISPENSATORI · LVDI · MAGNI  
CONIVGI · OPTIMO  
AELIA · PELAGIA · CONIVNX  
ET · AELIA · SYNERVSA · MATER

atque uxori adjectum aliquando, quot aucta liberis esset (4):

D · M ·  
ET · QVIETI  
AETERNAE  
LVCILI · METROBI  
SIGNO · SAPRICI  
STATOR · CIVITATIS  
VIENES · QVI · VIXIT  
ANN · XXXVIII · M · II ·  
DIVICIA · DOMITI  
OLA · MATER · FILI  
OR · III · CONIVGI  
KARISSIMO · ET  
I N C O M P A R A  
BILI · PONENDVM  
CVRAVIT · ET · FILI  
SVB · ASCIA  
DEDICAVERVNT

(1) Grut. p. 833, n. 1.

(2) Maff. M. V. p. 426, n. 8.

(3) Fabr. p. 293, n. XXI.

(4) Grut. p. 631, n. 7. v. Reines, Cl. 1. n. 19.

Iam quos defunctus haeredes instituisset; ii in titulo haeredes *se* profitebantur. quin et haeres secundus simul aliquando nominatur: qui fere *Secus Haeres* dicitur (1): id est, opinor, *Haeres*, si *Secus* accidat, et qui primus scriptus est, moriatur (2):

D · M ·  
P · AELIVS · AVITVS  
TRAIANOPOLI  
TVBICEN · EQ · SING · AVG ·  
TVRM · AELI · IVCANI  
NATIONE · THRAX  
V · A · XXXV · MIL · A · XV ·  
P · AELIVS · AVRELIVS  
HER · ET · IVLIVS · MAXIMVS  
DECVRIO · SECVS · HER · OPTIMO  
AMICO · FACIEND · CVRAVER ·

honores etiam et munera quisque sua auctores monumentorum sibi adscribenda curabant: milites praecipue, qui simul cum defuncto stipendia meruissent (3):

D · M ·  
SEX · COSSVTIO  
SEX · FIL · QVIRIN ·  
PRIMO · EMERITO  
EX · COHO · XIII · VRB ·  
T · SILIVS · HOSPES  
SIGNIFER · COH · EIVS  
DEM · AMICO · POSVIT

neque id libertini homines neglexere, quo scilicet munerum suorum memoriam proro-garent (4).

DIS · MANIBVS  
M · ANTONI · PALLANTIS · L ·  
NOBILIS  
ABASCANTVS · AVG · DISP ·  
A · FRVMENT · DE · SVO · FECIT

quidni vero nos quoque ista praestemus? praesertim quum monumenti auctores ii sunt, qui egregiis titulis ornari possint: quippe id etiam honori defunctis tribuetur, quod suprema illis officia a praestantibus viris persoluta sint. sepulcrum item si ejus arbitratu exstructum sit, quem defunctus in testamento nominarit, ne id quidem omittes: hoc quoque veteres diligenter adnotarunt (5):

L · AMPIVS · L · F · SEVERVS · SIBI · ET  
L · AMPIO · L · F · PATRI  
PVBLICIAE · SEX · F · PAVLLAE · MATRI  
TESTAMENTO · FIERI · IVSSIT  
ARBITRATV · EROTIS · L ·

quin etiam, si monumentum operosum sumptuosumque fuerit, non aliter, quam olim in operibus publicis saepe fiebat, eos adscribes, qui illud jam perfectum probarint; ecce enim tibi ex Museo Veronensi vetus exemplum (6);

L · ANNIVS · C · F · POB · SIBI · ET  
M · ANNIO · C · F · FRATRI · FIERI  
TESTAMENTO · IVSSIT · PROBAVERE  
DIOMEDES · ET · ANTHVS · LIBERTI

(1) Fabr. p. 395. C.  
(2) id. p. 353. u. 82.

(3) Grut. p. 539. n. 4.  
(4) Maff. M. V. p. 130. n. 7.

(5) Fabr. p. 750. n. 567. v. inscr. 157.  
(6) Maff. p. 149. n. 6.



at de verbo illo praecipuo, quo sepulcrum factum significari solet, non est, cur magnopere labores. in epitaphiis quoque non raro omissum est, ut in honorariis inscriptionibus fere semper.

VI. Denique epitaphiorum non una est clausula: honorarii sepulcri propria videtur, quam hoc in exemplo legimus (1):

DIS · MANIBVS  
C · SEIO · M · F · QVIR ·  
CALPVRNIO · QVADRATO · SILIANO  
PROCOS · PROVINC · NARBONENSIS  
PRAET · PEREGRINO · TRIB · PLEBIS  
QVAESTORI · PROVINC · AFRIC · III · VIRO · CAPITALI  
CVIVS · CORPVS · HIC · CREMATVM · EST

quamquam, quia ubi crematum corpus, ibidem aliquando cineres condebantur, quem locum Festus *Bustum* appellatum esse tradit; idcirco sepulcrum quis sive bustum hoc loco designari fortasse contendat. sed aperte cenotaphium hoc altero in exemplo proditur (2):

D · M ·  
LOCI · IN · QVO  
CORPVS · T · LV · . . .  
SABINIANI · LV  
CIANI · CREMA  
TVM · EST

unde etiam discas, licet, ustrina ipsa quasi Deorum Manium sedem apud veteres in honore fuisse. porro formula fere eadem apparuit pridem tribus etiam in cippis Mausolei Augusti (3), in quibus haec tantum incisa legimus:

C · CAESAR  
GERMANICI · CAESARIS · F ·  
HIC · CREMATVS · EST

TI · CAESAR  
GERMANICI · CAESARIS · F ·  
HIC · CREMATVS · EST

. . . . . AR  
GERMANICI · CAESARIS · F ·  
HIC · CREMATVS · EST

de his a me quaedam libro superiore adnotata sunt (4). formulam porro imitari liceat, si, ubi exsequiae defuncto celebratae fuerint, ibi cenotaphium ei exstruatur, corpus ipsum alio loco conditum sit: subscribes scilicet, CVIVS · FVNVS · HIC · CELEBRATVM · EST: sed cenotaphiorum, quae saepe veteres statuerunt (5), aliae etiam formulae propriae habebantur: de quibus dixi ad inscr. CLXXVI. Graeci olim adscribebant *Μνημὸς χάριν* (6), unde est Latina formula *Memoriae Causa*. ac cenotaphium fortasse veteres tum quoque designant, quum tituli initio *Memoriae* tantum scriptum est, nec additum *Et Quietum* aut *Et Cineribus*. illud certe animadverti, in hisce epitaphiis, quae in honorariis tumulis incisa fuisse dicimus, mensuram loci religiosi fere desiderari: quia nempe cenotaphium religiosum non erat: quod et *Divi Fratres*, ut auctor est Vlpianus (7), *rescripserunt*.

Cetera epitaphia aliis distincta sunt clausulis: nam et pedes referunt, quot locus

(1) Fabr. p. 704. n. 250. v. Tac. Ann. l. 2. c. 83.

(2) Oler. Syll. Inscr. p. 224. n. 65.

(3) Anthol. Rom. lul. 1777. n. 2.

(4) ad inscr. 195.

(5) Svet. in Claud. c. 1. n. 7. Liv. l. 38. c. 35. n. 56. Finest. Syll. Inscr. praef. p. 3. et Class. 3. n. 41.

(6) Murat. p. 1325. n. 4. et p. 1373. n. 1. etc.

(7) l. 6. D. de rel. et sumpt. fun.

monumenti pateat, qua de re egimus articulo superiore: et dolum malum abesse declarant, quod jam attigi ad inscr. cxxxx. tum sepulcrum testamento factum indieat, aut locum sepulcro acceptum ab aliis vel emptum esse: quod aliquando extra titulum, atque ad latus adnotabant, ut hoc in exemplo (1),

POMPEIA · SEX · L ·  
MELISSA · SIBI · ET  
SEX · POMPEIO · CILICI  
PATRONO · SVO

EMP ·  
DE · C · TROSSO  
EPIGONO

et salutationes multis placuisse videas, quae interdum initio etiam leguntur: de quibus illud tiro admonendus nunc est, ne veterum more defunctos inducat cum *Viatore* colloquentes: quod inapte quidam fecere, obliti sepulera propter vias nulla nunc esse. omnia idem quae imitetur, inveniet, precationesque et sententias e philosophia petitas, quae singularis fere dictionis propria, aut certe privati studii et exiguum sepulcrorum haberi possint. clausularum honorificentissima fuit, et insignibus inscripta tumulis, quae de sepultura publica admoneret (2):

L · OVIDIO · L · F · SER · (3)  
VENTRIONI · TR · MIL · PRAEF ·  
FABRVM · IIII · VIR · I · D · IIII ·  
VIR · QVINQ · PRIMA · L · DE  
SVO · FECIT · HVNC · PRIMVM  
OMNIS · ORDO · MVNICIPVM  
IN · LOCVM · PVBLICVM · INTVLIT  
ET · SEPELIENDVM · CVRAVIT

Deereta etiam ipsa aliquando (4), item caput aliquod ex testamento vel infra epitaphium, vel ad latera scripsere veteres: haec quidem epitaphii partes non sunt, de quibus hoc loco dicendum sit: at exemplum tamen articulis sequentibus aliquod proferetur. unum hic subjiciam, in quo defunctus ipse sepulcrum suum Manibus dicans inducit (5).

L · CARTORIVS · P · F · FAB · HIC  
SEPVLTVS · EST · HIC · LOCVS  
PATET · IN · FR · P · XX · ET · A · ME  
DIA · FOS · INTROVERS · P · XXV ·  
HVNC · LOCVM · MONVMENTVMQ ·  
DIS · MANIBVS · DO · LEGOQVE

## §. III.

### DE EPITAPHIIS FEMINARVM

**Q**uae hactenus de virorum epitaphiis dicta sunt, ea faciunt, ut de feminarum titulis brevius nobis disserendum esse videatur. neque enim in his, quae sunt utrisque communia, caussa jam est ulla, cur iterum immoremur: cetera vero, structurae ratione indicata, exemplis facilius demonstrari tradique possunt.

Ac primum de initiis epitaphiorum nihil fere peculiare reperitur. eeee enim tibi epitaphium, in quo de auctore sepulcri nulla mentio: quamquam id ego in patroni mo-

(1) Don. Cl. 7. n. 89.

(2) id. Cl. 5. n. 228. v. inscr. 138.

(3) tribu *Sergia*.

(4) Fabr. p. 463. n. 95.

(5) id. p. 84. n. 150.

numento fuisse puto (1): et mater enim et filia ejusdem viri liberta dicitur; libertis autem suis patroni plerique locum in monumento familiae esse voluerunt:

DOMATIA · L · L ·  
 ZOSIMA  
 VIXIT · ANNOS · XII ·  
 DOMATIA · L · L · LEVCADIA · MATER  
 MORTVA · EST · POST · BIENNIVM  
 DIE · NATALI · FILIAE · SVAE  
 VTRAEQVE · HIC · SEPVLTAE · SVNT

in alio viri nomen, a quo sepulcrum uxori positum est, ipsos ante Manes ciatur (2):

L · PASSIENIVS · SATVRNINVS · FECIT  
 D · M ·  
 PASSIENIAE · GEMEL  
 LAE · COIVGI · ET · LIB ·  
 SVAE · CARISSIMAE  
 OBSEQUENTISSI  
 MAE · ET · L · PASSIE  
 NIO · DORYPHORO  
 FILIO · ET · PASSIENIO  
 SABINO · FILIO · ET · LIB ·  
 SANCTISSIMIS

in alio item nomen defunctae patrio casu praecedit, idque nullo plane appposito insigne, ut filii pietatem jure desideres (3).

CORNELIAE · FAVSTAE  
 OSSA · HIC · SITA · SVNT  
 M · CORNELIVS · M · F · MATRI · FECIT

haec fere in virorum etiam epitaphiis observata superius et notata sunt. at consules initio scriptos non vidimus, quod hoc in exemplo usurpatum est (4):

GERMANICO · CAESARE · C · VISELLIO · COS · (5)  
 XIII · K · OCTOBRIS · OSSA · CONDITA  
 TITIAE · T · L · PHOEBENIS  
 T · TITIVS · T · L · ANTEROS

communis tamen hic quoque ea ratio, ut, appellatis Manibus, a defunctae nomine protinus initium sit (6):

D · M ·  
 CLAVDIAE · PONTICES  
 CL · EVSTROPHVS  
 PATRONAE · ET · CONIVGI · OPTVMAE  
 ITEM · FLAVIA · THREPTE  
 CL · APHRODISIVS  
 ET · TIMOTHEVS · MATRI · PISSIMAE

interdum et pro *Manibus* inscriptum *Cineribus*, ut in exemplo, quod Gorius (7) a Fabretti (8) nota vindicavit,

(1) Maff. M. V. p. 259. n. 4.

(2) Fabr. p. 7. n. 31. at nunc emendatior ex Amad. Vet. Monum. Matthaerjor. t. 3. p. 141.

(3) Murat. p. 2065. n. 4.

(4) Fabr. p. 477. n. 144.

(5) An. Varr. 765.

(6) Fabr. p. 289. n. 218.

(7) Don. Cl. 7. n. 6.

(8) p. 294. n. 241.



CINERIBVS  
 GEMELLAE · TORQVATAE  
 ORNATRICIS · AVGVST ·  
 SEX · SERVILIVS · TORQVA  
 TVS · DISPENSATOR  
 H · M · F · ET · SIBI  
 DEDIC · K · IVNIIS  
 SEX · GLABRIONE · ET · C · OMOL  
 LO · VERIANO · COS · (1)

Alia hujusmodi initia libro tertio reperies. ad ipsa vero nomina quod attinet, quum ea nunc quoque in appellandis feminis diminuta saepe usurpemus, praeternittendum non est, haud raro veteribus et nomina earum et cognomina in epitaphiis etiam diminutive usurpata placuisse. et cognomina quidem, ea maxime, quae a numero desumpta, non una illi ratione mollicbant, fiebat enim, uti post alios Hagembuchius animadvertit (2), a Prima Primilla et Primina, a Secunda Secundina et Secundilla, a Tertia Tertulla et Tertullina, a Quarta Quartina et Quartilla, et sic deinceps usque ad Octavillam; et a Decima vel Decuma Decimina et Decumina, Decimilla et Decumilla; quin et Undecimilla legitur, quae socia fuit Vrsulae martyris. sunt et cognomina quaedam a parentum cognominibus orta, ut ab Agrippa Agrippina, ab Attico Atticilla, a Basso Bassilla, a Gallo Gallitta, a Prisco Priscilla, et alia hujusmodi, quae jam Fabrettus (3) indicavit. a nominibus autem illa sunt, Claudilla, Livilla, Sosiola et similia. haec feminis, quum puellae essent, fere per blanditias imposita, postquam illae in matrimonium ierant, manebant etiamtum: itaque in ipsis epitaphiis sic appellabantur, quum jam compositae essent (4);

IVLIAE · PROCILLAE · Θ · ANN ·  
 XLVIII · L · COCCEIVS · CVPITVS  
 MARITVS · ET · IVLIA · IVNIANA  
 ET · COCCEI · PROCVLVS · FLOR  
 ENT · CVPITVS · FILI · FEC ·

haec porro imitari si libeat, quis vetet? tum nempe, quum feminae epitaphium scribendum sit, quam omnes, quum in vita esset, diminuto nomine appellarint. Latina haec consuetudo fuit, quae in Latino epitaphio reprehendi non debet.

II. Iam post nomina feminis quoque curationes et munera, artes et ministeria recte adscribes. haec veteres, vel quum infima erant, saepe diligenter adnotarunt. Ornatricem Augustae paullo ante protuli; at libro primo (5) Monodiarum: ecce tibi ex Grutero (6) etiam Vestificam,

AGRIAE · TRIPHOSAE · VES  
 TIFICA · LIVIVS · THEONA · AB  
 EPISTVLIS · GRAEC · SCRIBA  
 A · LIB · PONTIFICALIBVS  
 CONIVGI · SANCTISSIMAE  
 B · D · S · M ·

quin et obstetrix prodit, non illa vulgarem mentita titulum (7):

(1) An. Varr. 905.  
 (2) Ep. Epigr. p. 603.  
 (3) p. 172. 173.

(4) Grut. p. 795. n. 3.  
 (5) inser. 169.

(6) p. 578. n. 6.  
 (7) Grut. p. 636. n. 1.

DEIS · MANIBVS  
IVLIAE · Q · L ·  
SABINAE  
MEDICAE  
Q · IVLIVS · ATIMETVS  
CONIVGI  
BENEMERENTI

Quod si haec veteres, quae leviora sunt, mentione tamen digna putaverunt; quis ea omissa putet, quae feminis honoris causa delata fuerant, et matronarum decora et ornamenta habebantur? Flaminicas sane sacerdotesque non paucas leges apud Gruterum (1), e quarum epitaphiis describatur hic quod Sarsinae sive Sassinae est, Cetranae Severinae positum, ut etiam testamenti caput in ejusdem sepulcro ad laevam incisum, quod jam promisimus, in medium proferatur (2):

D · M ·  
C E T R A N I A E  
P · F · SEVERINAE  
SACERDOTI  
DIVAE · MARCIAN ·  
T · BAEBIVS · GEMELLI  
NVS · AVGUST ·  
CONIVGI · SANCTISS ·  
CAPVT · EX · TESTAMENTO  
CETRANIAE · SEVERINAE  
COLLEGIS · DENDROPHO  
RORVM · FABRVM · CENTO  
NARIORVM · MVNIC · SASSI  
HS · SENA · MILIA · N · DARI  
VOLO · FIDEIQ · VESTRAE · COL  
LEGIALI · COMMITTO · VTI  
EX · REDITV · HS · QVATERN · M ·  
N · OMNIBVS · ANNIS · PRID ·  
IDVS · IVN · DIE · NATALIS  
MEI · OLEV · SINGVLIS  
VOBIS · DIVIDATVR · ET  
EX · REDITV · HS · BINVM  
MILIVM · N · MANES  
MEOS · COLATIS · HOC  
VT · ITA · FACIATIS · FIDEI  
VESTRAE · COMMITTO

si quae etiam a collegiis Patronae dictae essent, eo item titulo in epitaphiis ornabantur; ut est in Firmano Allienae sepulcro, quod ei ut loco publico fieret, Decuriones permiserunt (3):

ALLIENAE · T · F ·  
BERENICAE  
C · VETTIVS · POLVS  
VXORI  
SANCTISSIM · ET  
C · VETTIVS · POLVS  
MATRI  
PIISSIMAE · PATR ·  
COL · FABR · ET · CENT ·  
L · D · D · D ·

(1) a p. 317.

(2) Grut. p. 322. n. 3.

(3) id. p. 351. n. 4.

quibusdam vero, quum nihil fortasse aliud suppeteret, a patris et viri muneribus decus aliquod quaesitum est (1):

DIS  
MANIBVS  
LICINIAE · CRASSI  
FRVGI · PONTIFICIS · F ·  
MAGNAE  
L · PISONIS · PONTIFICIS · VXOR ·

item a numero filiorum, ut Iuliae cuidam Doridi apud Gruterum (2), quae decessisse dicitur *Relictis Liberis Superstitibus IIII*.

Denum Severi Aug. aevo, aut paullo antea, quae senatorum uxores essent, *Matronae Clarissimae* aut *Clarissimae Feminae* appellari coeptae sunt (3), ceterae vero *Honestae Matronae* aut *Honestae Feminae* dictae (4).

nI. Age nunc quae feminarum laudes esse debeant, videamus. his enim veteres saepius, quam viris, indulgere; quumque alii aliam rationem sequuti sint, pauci tamen summas eis laudes inviderunt. breve quidem, at elegans in primis est Tettiae libertae epitaphium apud Fabretum (5):

TETTIA · NICEPHORIS  
L · PRIMA  
PATRONO · PROBATA  
P · Q · XII · (6)

multa etiam paucis de uxore in hoc altero praedicantur (7);

D · M ·  
MATTIENAE  
MYRALLIDIS  
Q · COMEATRO  
Q · L · EXORATVS  
CONIVGI · PLVS · DE · SE  
MERITAE · QVAM · TI  
TVLO · SCRIBI · POTVIT

est, cui laudi vertitur, quod nutrix fuerit senatorum duorum (8):

D · M · S ·  
CRISPINAE · COIVGI  
DIVINAE · NVTRI  
CI · SENATORVM  
DVVM · ALBVS  
COIVNX · C · Q · F · (9)  
AN · XVII · H · VIX · (10)  
AN · XXX · M · II ·  
B · M · F ·

et habes exemplum libro primo (11) laudes ejus complectens, quae filios suos ipsa lactaverat; item apud Gruterum (12) *Cornelia* quaedam *Tyche* fuisse dicitur *Et Incomparabilis Erga Maritum Adfectus Sanctitatisque, Et Eximiae Erga Liberos Pietatis*. nonnullae a forma simul et moribus commendantur, ut *Helpis* illa *Caenidiana* (13), *Quae Cum Vixit, Dea Et Sanctissima Dicta Est*. celebrantur aliae, quod in viduitate

(1) Grut. p. 306. n. 1.

(2) p. 1100. n. 4.

(3) Don. Cl. 5. n. 34. Grut. p. 379.  
n. 2. v. Casaub. ad Lampr. in  
Helag. c. 41.

(4) Grut. p. 1087. n. 9. v. Salmas. ad

Lampr. in Alex. c. 48.

(5) p. 179. n. 370.

(6) *Pedes Quaquaversus* 12.

(7) Fabr. p. 616. n. 141.

(8) id. p. 266. n. VIII.

(9) *Cum Qua Fecit*.

(10) *Haec Vixit*.

(11) inser. 170.

(12) Grut. p. 690. n. 4.

(13) v. inser. 209.



relictæ, nemini jam post viri sui mortem jugali vinculo sociari voluerunt: *Vniviras* eas aut *Vnivirias* appellabant (1); quo dein vocabulo Christiani etiam usi sunt (2). mitto alia hujusmodi; sunt enim exigua plane atque levia, si cum his comparemus, quæ sæpe hodie de virtutibus clarissimarum matronarum prædicari jure possunt; quorum tamen præcipua malim, quam omnia in epitaphio proferri; ne aut historiam pro titulo confecisse, aut etiam vero majora jactasse videamur. quippe si laudandi studium eminet, facile homines, an vera narrentur, nec ne, addubitant; contra ex unius tantum facti significatione nihil sæpe in reliqua vita nisi præclarissime gestum autumant.

Enimvero de appositorum etiam usu aliquid delibemus. qui sepulcrum simul excitarent, non communi fere, sed sua quisque laude defunctam cumulare solebant (3);

CLAVDIAE · TI · F ·  
SECUNDAE  
SEMPRONIA · L · F · FORTVNATA  
AMICAE · CARISSIMAE  
F · ET  
C · LARGIVS · EUPHEMIVS  
CONIVGI  
SANCTISSIMAE

uno tamen communique tantum apposito ornata aliquando mulier a duobus, quod hi sibi appellationem propinquitatis, quisque suam, praesumpsissent (4);

D · M ·  
VLPIAE · PETILLIAE · P ·  
SPELLIVS · SECVNDVS  
CONIVNX · ET · M · VLPI  
VS · MAXIMVS · FRA  
TER · PIENTISSIMAE  
FECERVNT

sæpius vero appositorum nullus erat modus, ut quas fortasse vivas parum pie coluerant, easdem mortuas hac saltem amoris significatione prosequerentur (5):

SALVIANVS · AVG ·  
LIB · FILIVS  
VLPIAE · DORCADI  
MATRI · DVLCISSIMAE  
ET · SANCTISSIMAE · ET  
INCOMPARABILI · FEC ·

multoque hæc largius mariti uxoribus suis divisere (6):

AVREL · ARETHIVSAE  
VXORI · SANCTISSIMAE  
INTEGRAE · FIDEI  
FRVGI · MODESTAE  
VERAE · INNOCENTIAE  
OLYMPIVS · MARITVS  
ET · SIBI · POSVIT

indemque annos matrimonii sui simplici, sæpe dictione adscripserunt (7):

(1) Fabr. p. 324. n. 450.

(2) id. p. 31. n. LIX. et p. 523. n. 439. etc.

(3) Grut. p. 865. n. 17.

(4) Maff. M. V. p. 290. n. 9.

(5) Grut. p. 618. n. 2. v. Fabr. p. 251.  
G.

(6) Fabr. p. 254. n. 55.

(7) Grut. p. 830. n. 7.

D · M ·  
 STENIAE · VENERIAE  
 C · STENIVS · AVLAX · VXORI  
 SANCTISSIMAE · FECIT  
 FVIT · IN · MATRIMONIO · EIVS  
 ANNOS · QVINQ · MENSIB · VI ·  
 DIEB · IIII ·  
 VIXIT · ANN · XXVII ·  
 HIC · SITA · EST

interdum vero circumloquutione usi quadam, scite officioseque designarunt (1):

D · M ·  
 MARIAE  
 MAXIMILLAE  
 CONIVGI  
 KARISSIMAE  
 TERT · DECIVS  
 SECVNDIVS  
 MARITVS · OB  
 INTEGR · FIDEM · EIVS  
 CIVS · OPE · ET  
 OBSEQVIO · ANNIS  
 XVIII · VSVS · SVM

in titulo autem uxoris, quam post primum conjugium vel morte vel divortio solutum secundam quis duxisset, ne hujus quidem rei significatio onissa est: itaque leges apud Reinesium (2), RECONIAE · C · F · TERTVLLAE · CONIVGI · II · atque his demum epitaphiis formula fere aliqua adnecti solebat, quae maritalem concordiam testaretur; quemadmodum uxores quoque in virorum suorum sepulcris id ipsum affirmantes audivimus: sed haec jam libro etiam superiore (3) indicata esse memini.

III. Vitae annos sub epitaphii finem adjectos saepe vidimus: at leporis inest aliquid una in vocula *Tantum*, annorum haud multorum numero apposita, ut de nimis brevi uxoris vita maritus queratur: quae formula a Graecis (4) profecta est, et loco usurpata probabitur (5):

DONATILIA · VIXIT · ANNOS  
 XXXII · TANTVM

praeterea in vetustissimis quibusdam feminarum epitaphiis consules quoque in fine apparent, quibus illae decessere aut humatae sunt (6):

OPPIAE · C · L ·  
 THEANONIS  
 OSSA · HIC  
 SVNT · SITA · AD  
 VII · K · IVL ·  
 CN · LENT · M · CRASS · COS · (7)

qui consules iterum scribi coepti in epitaphiis Christianorum: quamquam hi aliquando mortis annum non consulibus, sed Pontificis Maximi nomine designare voluerunt, qui tum Ecclesiae sanctae praecesset: uti legimus in titulo *Erenis, Quae Recessit III. Non. In Pace Sub Damaso Episcopo* (8). ergo nos etiam et annos, quos quaeque vixerit, et quo item anno decesserit, hoc nostro aut prisco more consignabimus. verum praeter

(1) Fabr. p. 24, n. 105.

(2) Cl. 13, n. 22.

(3) v. inser. 160, 168.

(4) Grut. p. 700, n. 2. Fabr. p. 425, n. 2.

(5) Fabr. p. 428, n. 3.

(6) Vignol. Inser. Select. Cl. 3, p. 331, v. sup. §. 1, n. 3, et hoc §. n. 1, bis etc.

(7) An. Varr. 740.

(8) Maff. M. V. p. 306, n. 6.

mensis ac dies, horas etiam si quis addat sive vitae sive matrimonii, ut haec antiquitus probata fuerint (1), multis nunc inepte diligens videatur. ejusmodi autem notae non utique semper ad calcem scriptae: nam ipsa nomina eorum, qui sepulcrum fecisse dicuntur, modo mediis, modo extremis versibus sedem habent. ceterum plerisque in exemplis ea distributionis est ratio, quam in virorum epitaphiis animadvertimus, ut consanguinitatis et proximitatis vocabula suis cum appositis post auctores monumentorum scribantur; notae vero annorum aut in fine, aut post defunctae nomen vel laudes legantur: quod tibi exempla libri primi satis declarant (2).

Hoc addam, in feminarum quoque epitaphiis munera non raro inscripta legi hominum vel infimorum nominibus adjuncta, qui monumentum faciendum curaverunt: quae tamen sibi nunc pauci adscribi patiantur; quum plerique nobilitatem animo praesumant, et filios jam, nedum nepotes, uno aut altero ante se gradu sedere velint. exemplum ex Museo Veronensi proferam mimi, qui in grege urbano Stupidum agebat (3):

D · M ·  
AEMILIAE  
IRENE · QVAE  
VIXIT · ANN · XXVI ·  
DIEBUS · XIII ·  
AVRELIVS · EVTY  
CHES · STVPIDVS  
GREG · VRB · CON  
IVGI · KARISSIMAE

Doloris significatio, quae saepe in puerorum epitaphiis apparet, raro a viris ob amissam uxorem data: exemplum enim e paucis unum hoc est, quod subijciam (4):

D · M ·  
TONGILIAE · TERTIAE · CO  
IVGI · INCONPARABILI  
ET · PIAE · QVAE · VIXIT · MECVM  
ANN · III · M · VII · D · XIII · BENE  
MERENTI · DOLENS · ANIMO  
LIBENS · FECI · SEXTVS  
TRVTIEIVS · AMIANTHVS

nec tamen eos non probem, qui subscribant *Contra votum* aut *Cum Lacrimis Posuit* et similia, quibus veteres ad animi dolorem prodendum utebantur: sic in parentis tumulo recte monumenti auctores appellentur *Filii Miserrimi*, *Filii Infelicissimi*; sunt enim formulae, quae omnino ad hoc inscriptionum genus pertinent.

Illud crebro in antiquis exemplis occurret, qui sepulcrum in solo suo fieri passus sit, sive locum ad monumentum exstruendum concesserit, donaverit: quod fere in extremo versu significabant, formulis tamen variis, quas in librum tertium rejeci: hanc excipe, quae minime obvia vulgarisque est (5):

(1) Fabr. p. 185. n. 417. etc.

(2) v. inscr. 165. 167. 168. 170. 171.

(3) Maff. p. 127. n. 3.

(4) Fabr. p. 152. n. 216. v. Maff. M.

V. p. 270. n. 5.

(5) Nov. Fior. an. 1748. p. 707.



DIS · MANIBVS  
 MODIAE · ZOSIMAE  
 MODIA · THISBE · ET  
 IVLIA · CANDIDA  
 MATRI  
 BENEMERENTI  
 FECERVNT · ET  
 ADIVTRICI  
 SORORI · BENEFICIO  
 SVLPICI  
 APOLLINARIS

similis vero huic formula apud Odericium (1), sed initio tituli legitur.

V. Reliquum est, ut de clausulis quoque aliquid subnectamus. eae non unius generis sunt: quaedam enim exceptiones sunt, quae sepulturae jus explicant (2):

P · HERENNIVS · P · L ·  
 CHRESTVS · PRAECO  
 TRIBVNICIVS · SIBI · ET  
 CASSIAE · L · ET · VXORI · ET · SI  
 QVIBVS · CASSIA · VOLET  
 IN · HOC · MONVMENTVM  
 HEREDI · MEO · IVS · INFERENDI  
 PRAETER · ME · NON · DO  
 CASSIAE · VXORI · MEAE · DO

quae quidem verba quum a superiore oratione discrepent, particulam ex testamento Chresti fuisse puto; ut haec alia epitaphio subjecta in lapide praegrandi, qui haud ita pridem in agro Tusculano repertus est;

ANTALCIDES  
 AVGVSTORVM  
 LIBERTVS  
 AELIAE  
 CONIVGI  
 ET · SIBI  
 ITA · VT · POST · MORTEM · MEAM  
 PERTINEAT · HOC · SEPVLCRVM  
 AD · POSSESSIONEM  
 FVNDORVM · NAEVIANI · ET · CALPVARNIANI

clausulae vero aliae cenotaphii tantum indicia sunt, eaeque honorarii tumuli maxime propriae (3):

DECIMIAE · L · L ·  
 LIBERALI  
 TI · CLAVDIVS  
 AVGVSTI · L ·  
 PHILOLOGVS  
 AB · EPISTOLIS · VXORI  
 IN · HONOREM

quaedam aliae a communi dictione abeunt, et jocos, dicta, salutationes exhibent, quae aliquando non solum iustis sub epitaphiis scribebantur, sed in parvis etiam cinerum ollis arculisque:

(1) Syll. Inscr. p. 224. n. 67.

(2) Don. Cl. 8. n. 26.

(3) Murat. p. 2043. n. 2.

(1)  
PAMPHILES  
ANIMA · SANCTA · SALVE

(2)  
AVFIDIAE · C · L · VENUSTAE  
VIATORES · SALVETE  
ET · BENE · VALETE

precationes etiam et omina huc pertinent; cetera item, de quibus jam articulis superioribus actum est: sunt enim epitaphiorum fere omnium communia.

Feminis porro ipsis funus alicubi publice olim decretum, ut Narbone; itaque hoc etiam epitaphiis earum subscriptum est (3):

LIGVRIAE · Q · FIL ·  
FRONTINAE  
Q · HORTENSI · KATVILI  
HVIC · ORDO · NARBONENSIS  
PVBLICE · FVNVS · ET · OMNES  
VECTIGALES · DECREVIT

sunt autem hic *Vectigales* funeris, opinor, sumptus, quod alibi (4) *Funeraticum* appellari vidimus, vectigal scilicet Libitinariorum. funus autem matronarum etiam, Romae potissimum, sine laudatione nullum erat. sic Iulius Caesar quaestor Iuliam amitam uxoremque Corneliam defunctas laudasse dicitur e more pro rostris (5); et ab Octaviano, quum annum ageret duodecimum, laudatam aviam Iuliam, item accepimus (6). ea deinde laudatio, quod mirere, in marmore aliquando incisa est tota. huiusmodi certe fuit oratio illa funebris, a Fabretto in lucem edita (7), quae in villa Albana nunc legitur (a), viri, ut apparet, minime vulgaris, et Augusti aetate scribentis; in qua oratione uxorem ille suam semper adloquitur. at ea, malum! non modo exordio caret, sed omnibus etiam singulorum versuum ultimis verbis, quae plura fuisse, quam terna aut quaternaria mihi videntur. ceterum haud hisce nunc exemplis opus est.

### §. III.

## DE EPITAPHIIS PVERORVM PVELLARVMQVE

I. **Q**uia saepe liberorum cineres in familiae olim sepulcra a parentibus inferebantur, arculaeque a conspectu abditae in hypogeis latebant; idcirco multa puerorum ac puellarum epitaphia nec longa sunt, neque ornata dictione scripta; quaedam ne solitaria quidem, sed uno in cippo gemina leguntur (8):

D · NICONI · FILIO DVLCISSIMO QVI · V · MENS · XI · DIEBVS · VIII PVBLICIA · GLYPTE · FECIT	M · EVTYCHETI VERNAE QVI · VIX · AN · I · MENS · V · · DIEB · X ·
--	---

(1) Maff. M. V. p. 281. n. 2.

(2) Fabr. p. 705. n. 262.

(3) Grut. p. 430. n. 7.

(4) v. inscr. 329.

(5) Svet. in Iul. c. 6. n. 1.

(6) id. in Aug. c. 8. n. 1.

(7) p. 168. n. 325.

(a) Hanc edidit et commentario illustravit Marinus Iscr. Alb. p. 136.

(8) Fabr. p. 6. n. 27.

nonnulla etiam nominibus carent eorum, qui titulum posuerint (1):

D · M ·  
SECVRITATI  
C · VALERI  
CAPITOLINI  
QVI · VIX · ANN ·  
VI · MENS · II ·  
DIEB · III ·  
HOR · XI ·

GRANIA  
PVELLA  
DECESSIT  
BIMA · ET  
DIERVM  
XVI ·

NOSTIA · L · L ·  
MVSA  
ET · NOSTIVS · L · L ·  
PHILOMVSVS  
COSMVS  
DELICIVM  
IN · FR · P · XII ·  
IN · AGR · P · XIIS ·

quaedam autem ad parentes etiam pertinent; quippe id in eorum solatium cessurum videbatur, si filii eodem in tumultu conderentur (2);

MEROE · VIXIT · AN · XLVIII ·  
PORPHYRIS · F · AN · I · M · V · D · XXV ·  
MEROE · F · AN · IIII · M · V · D · XXIX ·  
L · BAEBIVS · THALLVS  
CONTVBERN · PIENISSIM ·  
ET · NATIS · KARISSIM · ET · SIBI

Plerumque tamen in iis etiam sepulcris, quae pueris dicata solis, propter vias aut celebri alio in loco exposita, ante oculos commeantium erant, quum auctores monumentorum inscripti sunt, tum amor eorundem et dolor conceptis verbis significatur (3);

M · PLOTIO · C · F ·  
ANN · VI · AGENTI  
ANIMAE · DVLCISSIMAE  
IVCVNDISSIMAEQVE  
INFELIX · MATER  
POSVIT  
AEMILIA

qui etiam, ut eos animi affectus proderent, epitaphia interdum a salutatione inchoant (4); esto haec dictionis singularis exemplis magis conveniat:

HAVE · HAVE  
HEROTION  
ET · VALE  
AETERNVM  
C · GESTIVS · FILIAE  
F · C ·

quam item salutationem sic quoque iteratam reperies, ut *Have* initio, *Vale* in fine legatur (5);

HAVE · EVPHROSYNE  
C · STATIVS · PHORIMVS · ET · SENTIA  
SATVRNINA · PARENTES  
FILIAE · PIENISS ·  
VIX · ANN · XII · D · XXVI ·  
VALE

tum puellas quidem diminutis fere nominibus appellarunt (6);

(1) 1. et 3. ex advers. Hor. Orlandi, 2.  
ex Fabr. p. 712. n. 334.

(2) Fabr. p. 315. n. 387.

(3) id. p. 700. n. 212.

(4) Grut. p. 1123. n. 2.

(5) Don. Cl. 10. n. 62. Grut. p. 1122.

n. 8.

(6) Grut. p. 677. n. 7.



D · M ·  
 CL · VICTORILLAE  
 FIL ·  
 PIENTISSIMAE  
 · VIX · ANN · V · D · XX ·  
 FLAVIVS · MAGNVS  
 ET  
 CLAVDIA · VICTORINA  
 PARENTES · FECERVNT

tam vero puella, quam puer parvulus saepe *Delicium* dicitur (1); et addita aliquando vox altera est, blandiendi causa (2);

L · APONIVS  
 ABASCAN  
 TVS · V · A · III · M ·  
 VI · T · FLAVIVS  
 ANICETVS · ET  
 APONIA · SYR  
 ILLA · ISSVLO  
 ET · DELICIO  
 SVO · FECER ·

de cujus vocis significatione nil dicam, nisi quod ingeniose a Fabretto animadversum est, *Issam* apud Martialem (3) catellae nomen esse, itemque in puellae epitaphio legi *ISSA HAVE*; ut blanditiarum causa pueri etiam puellaeque hisce interdum nominibus appellati videantur. singulare etiam est alterum apud eundem appositum *Margarition*, quo bimus puer ornatur, quod eum nutritores, quia hilarulus erat, quasi parvum margaritum amarent carumque haberent (4),

D · M ·  
 SEX · BRITTID ·  
 IVVENI · MAR  
 GARITIONI · CARIS  
 SIMO · VIXIT · ANNIS  
 II · MENS · VII · DIEB · XVIII ·  
 FECIT · L · VERGIL · ITALIC ·  
 ET · CLAVDIA · LAVDICE

puer alter, *Gordianus* nomine, apud Reinesium *Dulcis Mustella* (5) appellatur, de qua quidem animante satis lepidas in Phaedro fabellas legeris, ad quas Gordiani parentes adludendo respexisse veri ego simile puto.

II. Mihi alia apposita, quae communia sunt. est et sua pueris puellisque laus. atque hae quidem saepe a forma laudatae: singulare tamen exemplum est, quod proferam (6),

ARABIA · FIRMA  
 VENVS · AFRA  
 VIXIT · ANNIS  
 XVII · M · III · DI  
 ES · TRES

nonnullae simul a moribus atque a doctrina etiam commendatae, ut *Iulia* quaedam *Secunda* apud Gruterum (7), cui adscriptum est, *Et Forma Singulari Et Moribus Pissimis Doctrinaque Super Legitimam Sexus Sui Aetatem Praestantissimae, Quae Vi-*

(1) Fabr. p. 43. n. 240. etc.

(2) id. p. 45. n. 254.

(3) l. i. ep. 110.

(4) Fabr. p. 44. n. 253. v. Macrob. Sat.

l. 2. c. 4.

(5) Cl. 20. n. 363.

(6) Fabr. p. 267. n. 114.

(7) p. 690. n. 4.

*xix Annis* XI · M · VIII · D · XX · item de virginitate non raro mentio facta, additumque puellarum nominibus *Virgini Innocentissimae*, *Virgini Sanctae*, aut *Virgini* (1) tantum.

In puerorum autem epitaphiis hoc primum servatum est, ut quae quis munera in vita obiisset, ea statim a nomine unicuique adscriberentur (2); et adnotatum etiam legimus, quot mensibus puer quidam alimentarius frumentum publicum accepisset (3). tum, ubi fas erat, ingenium quoque laudibus efferebatur (4),

D · M ·  
P · SCANTIO · IULIANO  
P · SCANTIVS  
AVGVSTALIS · PATER · ET  
SERVILIA · C · F · ISIAS  
MATER · FILIO · PISSIMO  
FECERVNT  
QVI · VIXIT · ANN · VIII ·  
MENS · V · DIEB · XII · HOR · VI ·  
CAIVS · ANNOS · INGENIVM  
EXCEDEBAT

nec omissum, quae puer litterarum studia attigisset (5):

Q · CAECILIO  
FEROCI  
KALATORI · SACERDOTH  
TITIALIVM · FLAVIALIVM  
STVDIOSO  
ELOQVENTIAE  
VIXIT · ANNIS · XV ·  
MENSE · I · DIEBVS · XXIII  
FILIO · OPTIMO · AC  
REVERENTISSIMO  
M · CAVIVS · CHARIVS

commemorata etiam parentum dignitas, qua filiorum memoria nobilitari videretur (6):

D · M ·  
MEMORIS · FILI · AVRELI  
CANARTHAЕ · PRINCIPIS  
GENTIVM · BAQVATIVM  
QVI · VIXIT · ANN · XVIII ·

haec autem gentes Mauritaniae Tingitanae oram maritimam incolebant (7). haec fere, aut non multo plura in antiquis puerorum epitaphiis occurrunt: nam quae alicubi leguntur ineptiae, otiosorum pigmenta esse puto, qualia apparent in *Crispi* titulo apud Capacium (8), et in altero *Melioris Calculatoris* apud Fabretium (9), de quo alibi dicam. huiusmodi enim argumenta praeoptare solebant praeclari illi condendarum inscriptionum artifices, qui superiori aetate posteros omnes commentis suis lepide omnino et pulchre ludificari sibi videbantur: in iis nempe exspatiari latius, ingenioque indulgere suo magis poterant; itaque et facilius, opinor, se nobis imposituros sperabant.

II. Iam quia puerorum funera miseranda omnibus videri solent, in horum epitaphiis saepe et causa indicatur, quae luctum auxerit, atque ad dolorem acerbior fuerit (10).

(1) Fabr. p. 144. n. 164. 166. 167.

(2) v. inscr. 187. 189. etc.

(3) v. inscr. 193.

(4) Grut. p. 618. n. 5.

(5) Beger. Spicil. Ant. p. 106. at nonne emendatior ex Mariu. Inscr. Alb. p. 72.

(6) Fabr. p. 379. n. XXXII.

(7) Ptol. lib. 4. c. 1.

(8) Antiq. et Hist. Neap. c. 22. n. 9.

(9) p. 88. n. 165.

(10) Grut. p. 832. n. 8.

D · M ·  
 L · TERENTII · ASCLEPI  
 ADIS · ET · L · TERENTII  
 FELICIS · FILII · MISERRIMI  
 QVI · FATVM · PATRIS · IMMA  
 TVRA · MORTE · SVBSECVTVS  
 EST · HELLANICA · MATER  
 MOESTISSIMA · POSVIT  
 ET · LAELIAE · TERENTIAE  
 FILIAE · INNOCENTIS  
 SIMAE · ET · SIBI

atque illud etiam crebro a parentibus adnotatum est, quod Cato quoque apud Tullium (1) de filio suo dicit, *cujus, inquit, a me corpus crematum est, quod contra decuit ab illo meum* (2):

NONIA · M · F · MAXSIMA  
 VIXIT · ANN · X · D · XV ·  
 ET · QVOD · MISERRIMVM · EST  
 MATER · FECIT · FILIAE  
 CANTRIA · C · F · POLLA

triste etiam veteres, neque in epitaphio omittendum putarunt, si quis die ejus anniversario obiisset, quo natus erat (3);

D · M ·  
 T · FLAVIO · PARIDIONI  
 VIXIT · ANN · XVIII ·  
 DECESSIT · NATALI · SVO  
 T · FLAVIVS · PARIS · ET · FLAVIA  
 PITHVSA · PARENTES · FILIO · SVO

et luctuosum item ac memoria dignum visum est, duos simul una in domo obiisse (4).

EVEMERONI  
 Q · V · A · III · D · XV ·  
 ET · FORTVNAT ·  
 Q · V · A · XIV · M · V ·  
 APPIVS · CELER  
 ET · CAECILIA · SVC  
 CESSA · VERNIS  
 FECERVNT  
 HI · VNO · DIE · MORTVI  
 PVERI

Vitam vero, quam quisque vixisset, atque ipsam mortem eorum potissimum, qui infantes adhuc rapti, haud semper communi formula designarunt; discrepat enim, qui sequitur titulus (5):

SEX · RVTTEDIO · SEX · FIL  
 POL · MAXIMIANO  
 FVIT · APVD · SVPEROS · MENS · VI ·  
 T · RVTTEDIVS · CLEMENS  
 TRIB · COH · II · VIG ·  
 ET · MARTINA · PROCVLA  
 FILIO · KARISSIMO

in alio non menses, non anni adscripti, sed haec tantum (6), *Aetatula Prima Heic*

(1) de Senect. c. 23. n. 84.

(2) Grut. p. 697. n. 8. v. inscr. 167.

(3) Fabr. p. 329. n. 482.

(4) Oderic. p. 219. n. 56.

(5) Fabr. p. 264. n. 93.

(6) id. p. 99. n. 222.



*Requiesit.* et vitae spatium aliquando e fastis erui voluerunt; id enim unum expressum est, quibus consulibus puer natus, quibus mortuus esset (1),

D · M ·  
PHOEBVS  
QVI · ET · TORMOGVS  
HISPANVS  
NATVS · SEGISAMO  
NE · III · K · MARTIAS  
C · BELLICIO · TORQVA  
TO · TI · CLAVDIO  
ATTICO · HERODE · COS ·  
DEFVNCTVS · IIII ·  
NONAS · AVGVSTAS  
Q · MVSTIO · PRISCO  
M · PONTIO · LAELIANO · COS ·  
PHOEBION · ET · PRIMI  
GENIA · FILIO · KARISSI  
MO · FILIO · DVLCISSI  
MO · FECERVNT

de cuius quidem aetate, non ut olim, sic nunc facile est dicere, quot annorum fuerit. primos consules in fastis reperies ad annum Varr. DCCCLXXXVI. ceteri e suffectis sunt, quorum annum hactenus ignoravimus (a).

Commemorandum porro et Christianum epitaphium, in quo pueri mors nova quidem, sed plane eleganti formula enunciatur (2):

SEVERO · FILIO · DVL  
CISSIMO · LAURENTIYS  
PATER · BENEMERENTI · QVI · BI  
XIT · ANN · IIII · ME · VIII · DIES · V ·  
ACCERSITYS · AB · ANGELIS · VII · IDVS · IANVA ·

In annis enumerandis accusativo aeque casu atque ablativo veteres usu: ubi vero puer unum tantum vixisset annum, scribebant fere *Vixit Annum* aut *Anno*; *Vnum* aut *Vno* perraro addebant; quod jam Hagembuchius indicavit (3): itaque et *Mensem* et *Diem* elegantius scripseris, quam *Mensem Vnum*, *Diem Vnum*. iidem *Dies XXX*. aliquando scribere maluerunt, quam *Mensem* (4).

D · M ·  
APPIAE · VERNAE  
KARISSIMAE  
RASINIA · MVSTICE  
BENEMERENTI · FECIT  
VIXIT · ANNIS · XVII ·  
D · XXX ·

diebus vero si et horas addideris, quot pueri vixerint, id concinne factum videri possit, ubi de vita brevissima agatur. at semihora etiam et scrupulos adscribere, ineptum plane; quamquam haec etiam antiquis in exemplis leguntur (5).

III. Denique extremis inscripti versibus ii plerumque, qui tumulum exstruxerunt, nisi quod honores quoque aliquando adjecti; et si cui locum eodem in sepulcro esse voluerunt, ejus etiam nomen additum est (6);

(1) Maff. M. V. p. 420. n. 5.

(a) Marinius Fr. Arv. p. 792., praecunte Murator. p. 335. n. 1., paululum addubitat, num hi consules processerint an. Varr. 916. quod

tamen confirmare videtur locus Frontonis ad Verum ep. 4. l. 2. p. 113. edit. Mediolan.

(2) Fabr. p. 581. n. LXXXVI.

(3) Epist. Epigr. p. 494.

(4) Maff. M. V. p. 265. n. 6.

(5) Fabr. p. 96. n. 217. seq.

(6) Don. Cl. 5. n. 145.

L · AVILLIO · L · F · SER ·  
 CRASSO · ANNORVM · XIII ·  
 L · AVILLIVS · SEX · F · SER ·  
 CRASSVS · III · VIR · I · D ·  
 PATER · FILIO · ET · VETTIAE  
 L · F · SECVNDAE · VXORI

neque unus aut alter tantum, sed plures interdum, tamquam monumenti auctores, subscripti; quod puerum multis eorum obisse ostendebat (1):

DIS · MANIBVS  
 EVBVLIONIS  
 FLAVIAE · ARTEMIS · VERNAE  
 VIXIT · ANNIS · VII · MENSIBVS  
 II · DIEBVS · XIII ·  
 DORYPHORVS · ET · MYRTALE  
 PARENTES · ITEM  
 FLAVIA · PARAPSYCHE · ET  
 ADIAPTOTVS · PARENTIVM  
 FRATRES

*Fratrum* scilicet nomine sorores etiam veniunt, quum simul enumerantur; *Lucius et Titia fratres*, dixit Paullus jurisconsultus (2). itaque et Flavia Doryphori soror, et Adiaptotus Myrtales frater recte simul, appellatione sumpta a potiore, *Fratres* eorum appellantur.

Quia vero sepulera pueris, non ex testamento, sed sponte sua quidam et gratis, etiamsi filii non essent, faciebant; idcirco additum aliquando, qua quis causa impulsus fecerit (3):

D · M ·  
 RUFINAE · ALAMNAE · PIENTISSIMAE  
 ET · INCOMPARABILI · QVAE · VIX · ANN ·  
 XVII · M · X · DIES · II · FIDE · COGNITA · MEMOR

At parentes id maxime studuisse videas, ut magnum se detrimentum filiorum morte fecisse declararent: haec enim saepe subscripta legimus, *Relictis Parentibus Suis Infelicissimis* (4), *Relictis Parentibus Miserrimis* (5), *Patrem Et Matrem In Luctu Reliquit* (6), et similia, ut hoc in exemplo (7):

VICTORI · QVI · VIX · AN · XVII · M · VI ·  
 VICTOR · PATER · FILIO · CARISSIMO · B · M ·  
 P · ET · SIBI · CVI · RELIQVIT · LACRIMAS

modo autem parentes, modo filii ipsi *Infelices* aut *Infelicissimi* appellantur (8);

D · M ·  
 ACELLIO  
 IANVARIO  
 DEF · A · XI ·  
 ACELL · SEPTI  
 MILLA · FILIO  
 INFELIC ·

et sunt e parentibus, qui *Crudeles*, *Impios*, *Sceleratos* se vocant (9), quod ipsi filios extulerint, non ipsi a filiis elati sint, at haec apposita veteribus relinquemus.

(1) Grut. p. 1046. n. 2.

(2) l. 58. D. Fam. ercisc.

(3) Fabr. p. 550. n. 27. v. inser. 191.

(4) Fabr. p. 199. n. XLV.

(5) Grut. p. 765. n. 1.

(6) id. p. 621. n. 8.

(7) Fabr. p. 255. n. 621.

(8) Maff. M. V. p. 373. n. 4. v. Fabr. p. 257. etc.

(9) Fabr. p. 255. n. 623. p. 257. n. 631. etc.

Clausulae porro eadem his, quae aliis epitaphiis convenire visae sunt, salutationes etiam et quietem precantium formulae. de loco item dato saepe fit mentio (1):

D · M ·  
T · AVRELI · FELICI  
ANI · FIL · DVL · Q · V ·  
AN · II · M · XI · D · XXIII ·  
FECERVNT · FELIX  
ET · ZOSIME · PAREN  
TES · INFELICISSIMI  
LOC · DON ·  
AELIA · TYCHE

contra cenotaphium hoc altero in titulo significari videtur (2):

MEMORIAE  
P · AELI · OLYMPIACI  
QVI · VIX · A · XVI ·  
M · II · D · XI ·  
RELICTA · MATRE  
INFELICISSIMA

puerorum nempe, quos amisissent, ut luctum suum parentes aliquo solatio levare possent, imagines fere in cenotaphiorum frontibus insculpi curabant, quas adhuc multis in monumentis videmus; eaeque memoriae puerorum dicatae dicebantur: interdum et cippi ipsi, in quibus tamen anaglypta plerumque eminebant.

## §. V.

### DE EPITAPHIIS SEPVLCRORVM COMMVNIVM

I. **H**aec bifariam dividi possunt: alia enim monumentum familiae et haeredibus sic adtributum esse declarant, ut unius maxime aut paucorum caussa exstructum indicent: alia contra, nemine nominatim appellato, ad unam tantum familiam aut gentem pertinere demonstrant, sive ii jam conditi, sive condendi sint. ac priora quidem illa a ceteris epitaphiis, de quibus superius actum est, parum discrepant (3): quum aliud proprium vix habeant, quam formulam eam, qua jus sepulturae consanguineis, libertis, posteris tribuitur. sed tamen hoc quoque aliquando referunt, quorum decreto aut consensu monumentum sit constitutum (4):

IVLIAE · EVTYCHIAE  
IVLIVS · FORTVNATVS  
CONIVGI · CARISSIMAE  
B · M · ET · SIBI · ET · SVIS  
LIBERTIS · LIBERTABVSQVE  
POSTERISQVE · EORVM  
MONVMENTO · ADSIGNATO · EX · DECRETO  
MAGISTR · Q · Q · COLLEGI · FAMILIAE  
IVLIANAE  
HOC · MON · HERED · EXTER · NON · SEQVET ·  
H · M · D · M · A ·

(1) Maff. M. V. p. 297. n. 7. v. inscr. 136. 192.

(2) Grut. p. 665. n. 2. v. inscr. 181.  
(3) v. inscr. 201. 202. 203. 208. etc.

(4) Don. Cl. 9. n. 14. v. inscr. 200. 211. etc. et Fabr. p. 156. n. 251.



praeterea in aliis, non, ut hic, uxorem tantum ejus, a quo monumentum est conditum, sed parentes etiam et fratres et filios, ipsis quoque e libertis aliquos nominatim interdum perscriptos esse video. tum vero si quis e consanguineis munere aliquo aut sacerdotio insignis esset, ne id quidem veteres omittendum esse duxerunt. exemplum Gruterus suppeditat (1), ad haec quoque tempora maxime appositum, quo percommode uti liceat, libertos nempe si demas, quorum loco in antiquis etiam titulis saepe legimus *Et Suis Omnibus*, vel *Et Suis Posteris*, *Et Propinquis Ejus*, *Et Nuribus*, *Et Nepotibus*, *Et Pronepotibus*: quae tibi formulae libro tertio in promptu erunt.

PITVANIA · L · L · DELPHIS  
 FECIT · SIBI · ET  
 P · MVCIO · NEDIMO · VIRO · SVO  
 REDEMPTORI · OPER · CAESARVM  
 L · PITVANO · ELEGANTI · PATRI  
 VI · VIR · AVG · REATE  
 PITVANIAE · SECVNDAE · MATRI  
 FRONTIDI · SORORI  
 PITVANIAE · MARCELLAE · FILIAE  
 L · PITVANO · AMANDO  
 L · PITVANO · LATINO  
 L · PITVANO · REATINO · L · SVO · ET  
 LIBERTIS · LIBERTABVS · POSTERISQ · EORVM

quaedam denique ex hujusmodi epitaphiis reperies, in quibus non modo auctor monumenti, et ii, quibus potissimum paratum est, nominatim leguntur; sed etiam singuli ex ipsa familia enumerantur, quorum cineres superstes dominus jam intulerit (2).

Q · CORNELIVS · Q · L ·  
 PHILOMVSVS · SAGARIVS · A · THEATRO  
 MARCELLI · FECIT · SIBI · ET · SVIS  
 CORNELIAE · DAPHNE · CONLIBERTAE · SVAE  
 ET · CORNELIAE · NYMPHE · SORORI · EIVS · L ·  
 SE · VIVO · INTVLIT  
 CORNELIAM · PROCVLAM · FILIAM · ANN · VII ·  
 CORNELIAM · HELPIDEM · CONLIBERTAM · ET  
 CALLITYCHEN · MATREM · EORVM · ET  
 C · PINARIVM · GEMENVM

II. Epitaphiorum autem, quae in sepulcris fuere genti aut familiae uni dicatis, varia plane structura, ac dissolutior paullo, quam in ceteris, esse solet. diversa in primis initia sunt, quod tute in libri primi exemplis animadvertere potuisti (3). deinde quaedam brevissima, ut hoc (4):

DIS · MANIBVS  
 MEVIORVM

aut certe sine apposis, et nullo ornatu, nulla temporis nota insignia, ut hoc alterum (5),

D · M ·  
 LIBERTIS · PETRONIORVM  
 MAMERTINI  
 ET  
 SEPTIMIANI  
 POSTERISQVE · EORVM

(1) p. 451. n. 8. Fabr. p. 437. n. 36.  
 (2) Spon. Misc. p. 226. n. 2.

(3) v. insc. 200. 204. 205. 206. 213. etc.  
 (4) Maff. M. V. p. 363. n. 2.

(5) Grut. p. 950. n. 9.

alia vero satis longa, et adjunctis distincta non paucis. primum enim enunciatur, ad quos monumentum pertineat: deinde quis illud vel fecerit vel restituerit vel donarit: tum quo die et quo sit anno dedicatum, post haec quot idem pedes religiosi habeat loci (1). porro in his, quia et nemo cietur nominatim, nec de simul inlatis agitur, sed de iis, qui alii post alios conditi aut condendi essent; nulla communis addita laus: neque addi sane debebat, vel quod sua intus cuique scriberetur, in ollae nempe aut sarcophagi fronte; vel quod nulla omnibus convenire posset. at non hanc omittebant in militaribus tumulis, quum celebrari virtus eorum poterat, qui pro patria pugnantes occubuissent. factum id, jam monuimus (2), a Nursinis, qui tumulo civibus Mutinensi acie interemptis publice exstructo adscripserunt, ut est apud Dionem (3), ὅτι ὑπὲρ τῆς ἐλευθερίας αγωνιζόμενοι ἐτελεύτησαν. neque fortasse non aliqua item laude digni Germanico Caesari visi sunt, qui Variana clade perierant, quum ille veteres ac dispersas eorum reliquias uno tumulo humavit (4): quamquam ne commemoranda quidem hic puto Hispana eorum epitaphia, quae Gruterus ipse fictis jam et suppositis adnumeravit (5). verum praeclaras hujusmodi epitaphiis reliquit formulas Tullius (6), ubi de honore legionariorum egit, qui contra Antonium in acie pugnantes occubuerant: quibus ille censuit, ut moles opere magnifico exstrueretur, et ut litterae inciderentur *divinae virtutis testes sempiternae*. nec vero ejus hic sententiae verba describi, non operae pretium fuerit. *Placet igitur mihi, P. C., legionis Martiae militibus et eis, qui una pugnantes occiderunt, monumentum fieri quam amplissimum. magna atque incredibilia sunt in rempublicam hujus merita legionis. haec se prima latrocinio abrupit Antonii: haec tenuit Albam: haec se ad Caesarem contulit: hanc imitata Quarta legio parem virtutis gloriam consequuta est. Quarta victrix desiderat neminem, ex Martia nonnulli in ipsa victoria conciderunt. o fortunata mors, quae naturae debita, pro patria est potissimum reddita. vos vero patriae natos judico, quorum etiam nomen a Marte est. ut idem Deus urbem hanc gentibus, vos huic urbi genuisse videatur. in fuga foeda mors est, in victoria gloriosa. etenim Mars ipse ex acie fortissimum quemque pignerari solet. illi igitur impii, quos cecidistis, etiam ad inferos poenas parricidii luent: vos vero, qui extremum spiritum in victoria effudistis, piorum estis sedem et locum consequuti. brevis a natura nobis vita data est; at memoria bene redditae vitae sempiterna. lege et reliqua, si libet: e quibus omnibus egregium plane epitaphium ad militaris sepulcri ornamentum nullo negotio confici potest.*

Porro et aliae hujusmodi inscriptiones sepulcris communibus aptae erunt. equidem sicubi monumentum exaedificatum publice esset, sacerdotum inlatis cineribus, quos aegrorum saluti intentos pestilentia sustulisset; eos quoque hoc aut simili ornandos epitaphio censerem:

✠ SACERDOTIBVS • MAGNAE • ANIMAE • PRODIGIS ✠  
 QVOS • AEGRORVM • CORPORIBVS • ET • ANIMIS  
 OPITVLANTES • VIS • PESTIS • ABSVMPSIT  
 D • D • PVBLICE  
 Q • Q • V • P • LX •

Sodalibus vero, qui ubique sunt, Caclitum sanctorum cultoribus, id maxime apponendum, quo a ceteris distinguantur. veteres Dei saepe nomine, quem illi colerent,

(1) v. inscr. 212. 213. 215. etc.

(2) v. inscr. 207.

(3) l. 48. p. 556. A. quod pro liber-

tate depugnantes vitam profu-

dissent. (4) Svet. in Cajo c. 5. n. 8.

(5) p. 12. n. 7. 8.

(6) phil. 14. c. 12. n. 31.

et si geminae sodalitates, loco etiam, quo convenirent, indicato designabant (1). ego eos quoque probabo, qui munus eorum praeceptum proferant, quemadmodum aliis in titulis legimus, *Qui Sacris Publicis Praesto Sunt* (2), *Qui Ipsi* (Hadriano Aug.) *Et Sacerdotibus Et Magistratibus Et Senatui Apparent* (3). quare epitaphium huiusmodi confici poterit:

LOCVS • SEPVLTVRAE  
SODALIVM • MARIALIVM  
QVORVM • SVMPTV • ET • CVRA  
PEREGRINI • OMNES  
IN • VRBE • IN • AGRO • MORTVI  
EFFERVNTVR  
IN • FRONTE • P • LXX •  
IN • RECESSV • P • XXXX •

quidam contra sodales istos ab amictu appellandos duxerunt, quo induti supplicationes habere, atque in funus prodire solent. Polae epitaphium est, quod subijciam, a Boldonio etiam prolatum (4),

PVILLATI • SODALES • CRVCIFIXI • CHRISTI • PIENTISSIMI  
HOC • SIBI • CONDITORIVM • HABENTO  
IOSEPHVS • AVRIFEX • FLAMINVS • PADVANVS  
MAGISTRI • SODALITATIS  
FECERYNT  
ET • SIBI • M • D • C • V •

appositum autem consulto ante nomen scripsisse videtur, ne quis illud temere ad sequentem casum referret.

At quae tandem, inquires, inscriptio in communi miserae plebis sepulcro incidetur? quum vetera exempla, quae exstant (5), minus certa sint, eaque dictionis plane singularis, nemo reprehendat, opinor, si quis titulum inscribat huiusmodi:

A      ✕      Ω  
DOMVS • MORTALITATIS  
CINERIBVS • ATQVE • OSSIBVS  
REVICTYRIS

III. Sepulcrorum communium epitaphia omnis generis proprias interdum habent clausulas, de quibus etiam hoc loco dicendum est; quamquam pleraque formularum, quae nostris convenient moribus, libro tertio describentur. eae fere sunt testamentorum particulae, mandata, exceptiones et huiusmodi, quae crebro quidem apud Gruterum aliosque leges; at perraro sine mendo, saepe nec latine nec grammaticae scripta reperies. sed digna omnino, quae describatur, epitaphii appendix quaedam et clausula ex lapide nuper Ravennae invento, quem olim in familiaris monumenti latere inclusum fuisse puto, Cajetani Marini haec quoque symbola est (a).

(1) v. inser. 205. 206. 215.

(2) Grut. p. 269. n. 2.

(3) Fabr. p. 450. n. XIII.

(4) Pol. inser. p. 372. n. 102. Bold.

Epigr. l. 2. p. 49.

(5) v. inser. 220. 221.

(a) Haec postea Marinus edidit Fr.

Arv. p. 270. quam prius vulgaverat Spretius inser. Ravenn. t. 1. p. 253.



LIBERTI · LIBERTAE  
 PRISCI · AVG · L · GAMIANI  
 EX · TESTAMENTO · DESCRIPTV · ITA · VT  
 CAVTVM · ERAT · SVBSCRIPSER ·  
 LOCVS · MONIMENTI · SIVE · AGER · EST · VIA · LATIN ·  
 AD · MILLIARIVM · V · SVpra · PONTEM · AD  
 MONIMENTVM · GAMI · CAESARIS · AGATHOCLIANI  
 DO · LEGO · LIBERTIS · MEIS · VTRIVSQVE · SEXSVS  
 POSTERISQVE · EORVM · ET · IIS · QVOS · MANV  
 MITTI · ROGAVI · IBIQVE · TABERNAM · FIERI  
 INQVE · EAM · CONSVMI · HS · N · MCCO · (1)  
 ARBITRATV · AGATHANGELI · COLLIB ·

jamvero liberti quidam aliquando excepti, quod male de patronis suis meriti essent (2). sapius vero exclusi a monumento haeredes exteri, ii nempe, qui gentiles non forent; et caussa interdum, cur excluderentur, adjecta est (3):

D · M ·  
 T · AELIVS · AVG · LIB · FAVSTVS  
 ET · AELIA · ARCTE · VXOR · FECERVNT  
 VIVIS · SIBI · ET · LIBERIS · SVIS · ITEM  
 LIBERTIS · LIBERTABVSQVE · SVIS · ET  
 POSTERIS · EORVM · ITAVT · NE · DE  
 NOMINE · SVO · AVT · FAMILIA · EXEAT  
 VT · POSSIT · MEMORIAE · SVAE · QVAM  
 DIVTISSIME · SACRIFICARI

iis scilicet sacrificiis, quae alibi *Profusiones Parentales* vocantur (4).

Deinde ipsi aliquando defuncti posteritatem de haereditario sepulcri jure docentes inducuntur: sic apud Fabretum in libertorum Valeriae gentis sepulcro post multa eorum nomina subscriptum inferius est (5):

L · VALERIVS · PAPIA · HVNC · LOCVM · MONV · RELIQVIT · L · VAL · HIERONI · HEREDI · SVO  
 HIERO · L · VALERIO · AMPHIONI · ET · DIOGENI · HEREDIBVS · SVIS  
 INDE · NOBIS · REL · EST

quia vero nonnullis locus monumenti et in urbe a senatu, et in municipiis a Decurionum ordine honoris caussa adsignabatur, ipsa aliquando decreta ad monumenti latus incisa esse videmus, e quibus est, quod Fabretus (6) vulgavit, Decurionum municipii suburbani, nunc vici, quem Marinum appellant: qui universi LOCVM · QVI · EST · EXTRA PORTAM · MEDIANAM · IN · QVO · COLUMNAR · FVIT · AB · EO · LOCO · IN · QVO · SCHOLA · FVIT · LONG · P · LXVII · AD · RIVOM · AQVAE · ALBANAЕ · LATVM · A · VIA · PVBLICA · IN · AGRVM · P · X · M · IVNIO SILANI · L · MONIMO · POSTERISQVE · EIVS · HONORIS · CAVSSA · DARI · CENSVERVNT · eodem pacto veteres eas quoque litteras, quibus sibi locus monumenti ac jus inferendorum corporum vel a Principe vel a patronis aut ab amicis concessum esset, in ipso monumento incidendas aliquando curabant: quarum litterarum exempla exstant (7).

Comminationes etiam et multae in sepulcrorum violatores non raro adjectae, quicumque locum monumentumque donare, vendere, abalienare ausi essent; formulas ipsas libro tertio leges (8). spatium vero sepulcri religiosum eodem modo descriptum, quemadmodum in ceteris epitaphiis saepe indicatur. illud hic proprium, ut si monumentum a pluribus communi sumptu aedificatum, ac loca deinde singulis sua adsignata essent,

(1) *sestertius n. 50000.*

(2) v. inser. 214.

(3) Fabr. p. 715. n. 367.

(4) v. eumd. p. 221. H. et Maff. M.

V. p. 146. e. 1.

(5) Fabr. p. 158. n. XXVII.

(6) p. 463. n. 95.

(7) v. inser. 157. et Grut. p. 874. n.

5. etc.

(8) v. inser. 210.

id quoque adscriberetur, quantum scilicet spatii cuique pro portionibus debebatur (1),

D · M ·  
T · FLAVIVS · HERVETVS  
FECIT · SIBI · ET  
FLAVIAE · AELIANAE  
FILIAE · KARISSIMAE  
ET · CONLIBERTIS · SVIS  
POSTERISQVE · EORVM  
P · P · ≍ ≍ ET · T · FL · PHILETVS · C · S · P · P · ≍ ≍  
ET · T · FL · EPITYMETVS · C · S · P · P · ≍ ≍

ad Hervetum nempe, et quos nominarat, monumentum pertinebat *Pro parte tertia* sive uncis quatuor, quae trientem faciebant. quia vero eum Herveto Philetus et Epitymetus *Communi Sumptu* illud extruxerant, pars item tertia utrique, sive unciae quatuor tribuuntur: veteres enim ut haereditatem quasi assem, sic res plerasque in duodecim partes dividebant. ceterum qui sepulcra haeredibus communia fecerant, hoc solum aliquando inscribendum curarunt, quantum cuique ex haereditate obvenisset, tantum ei loci in monumento relictum esse (2):

DIS · MANIBVS  
CLODIAE · T · F · SATVRNINAE  
HOC · MONIMENTVM · SIVE  
SEPVLCRVM · SE · VIVA · FEC ·  
IN · FRONTE · P · VIII · IN · AGR · P · VIII ·  
HVIVS · MONIMENTI · SIVE  
SEPVLCRI · IVS · AD · HERE  
DES · EIVS · PERTINET · PRO · POR  
TIONIBVS · QVA · QVIS · TESTA  
MENTO · EIVS · SCRIPTVS · EST

III. Expositis jam iis, quae ad hominum epitaphia pertinebant, erit fortasse, qui nolit, ea indieta esse quae aliquando in animantium tumulis incisa sunt: quippe tumulos utique, nedum effigies his et simulacra veteres posuerunt. mitto Graecos, quos inter Alexander Bucephalon suum extulisse, et urbem nomine ejus tumulo circumdedit dicitur (3); Augustus quoque, inquit Plinius (4), equo tumulum fecit, *de quo Germanici Caesaris carmen est*. de Hadriano autem haec Spartianus: *Equos et canes sic amavit, ut eis sepulcra constitueret* (5); *Borystheni* in primis Alano equo, in quem non unum epigramma ab eodem scriptum est. et *Volucris* equo factionis prasiniae Lucius Verus simulacrum aureum vivo, sepulcrum mortuo item fecit, ut a Capitolio traditum est (6); nec mirum videri debet, id in ea urbe obtinuisse, in qua et corvo *funus*, utar Plinii verbis (7), *innumeris celebratum exsequiis, constratum lectum super Aethiopum duorum humeros praecedente tibicine et coronis omnium generum, ad rogam usque, qui constructus dextra viae Appiae ad secundum lapidem in campo Rediculi appellato fuit*.

Haec et alia hujusmodi veteres scriptores memoriae prodidere, quae deinde quibusdam imitatione digna visa sunt. sive ex levitate, sive quod ingenium experiri voluerunt (8): itaque et libellus olim prodit in lucem hoc titulo, *In Obitum Aldinae Castellae Lacrimae Poeticae* (9). quae catella fuerat Hieronymi Aleandri junioris: nec jam alia desunt exempla, quae proferri possint.

(1) Anecd. Litt. Rom. vol. 1. p. 473.  
n. 33.

(2) Grut. p. 866. n. 7. v. et p. 871.  
n. 8.

(3) Plin. H. N. l. 8. c. 42. n. 64.

(4) ibid.

(5) in Hadr. c. 20. v. ibid. Salmas.

(6) in Ver. c. 6.

(7) H. N. l. 10. c. 43. n. 60.

(8) V. Nov. Fior. an. 1752. p. 550. etc.  
et Polam Inscr. p. 462. et Lips.  
Cent. 3. ad Belg. ep. 90.

(9) Paris. 1622.

Ceterum epitaphia animantium multa quum exstent sive graece sive latine scripta; quae quidem antiqua et germana jure putes, ea versibus omnia constare videas: at quae ficta aut certe sublesta fide habentur, haec stilo nostro perscripta esse reperies; ut carminis plane atque poetarum argumentum antiquitus id habitum videatur. edidit quaedam Fabrettus (1); sed de omnibus fere et ipse et Maffejus addubitant. quare si quis hujusmodi scriptione ludere velit, antiqua exempla ne quaerat, eaque utatur licentia, qua usi alii sunt. nihil haec ad rem nostram.

Adnotabo tamen, si cui haec placeant, in venatorum sepulcris canes aliquando effectos esse, atque sub his nomina eorum incisa (2);

DIDIO  
AVRA THREMMATIO CHRYSIS  
ALVMNO  
EDVCATORES

atque *Aura* quidem, ut anaglypta ostendunt, apros, *Chryside* vero lepores venabatur Didius; quae canum nomina in veteri etiam gemma se legisse testatur Fabrettus Graecis inscripta litteris.

Praeterea cippum in museo Capitolino saepe vidi *Manibus* dicatum *Conditoris Gregis Russatae*, id est, ut Turnebus volebat (3), ΑΛΕΙΠΤΩ ΤΩΝ ΙΠΠΩΝ, quo in cippo non modo equi duo insculpti, et nomina eorum adscripta, sed color etiam et genus cujusque et circenses victoriae leguntur (4):

AQVILO · N · K · AQVI  
LONIS (5) · VICIT · CXXX ·  
SECVND · TVLIT  
LXXXVIII ·  
TER · TVL (6) · XXXVII ·

HIRPINVS · N · AQVI  
LONIS · VICIT · CXIII ·  
SECVNDAS · TVLIT  
LVI · TER · TVL ·  
XXXVI ·

D · M ·  
CLAVDIA · HELICE  
FEC · L · AVILL · DIONYSIO  
COND · GR · RVSSATAE  
CONIVG · DIGNISSIM ·

nec jam plura de his: ne modum, qui magnis etiam in argumentis orationi adhibendus est, levi tenuique in re excessisse videamur.

(1) a p. 331. n. 491.

(2) Fabr. p. 350. n. 48°.

(3) Advers. l. 18. c. 33.

(4) Grut. p. 338. n. 5. Fabr. p. 276. n. 167.

(5) *Niger Kaesius Aquilonis pullus*,

(6) *Tertius Tulit*.



## CAPVT III.

*De inscriptionibus historicis*

## §. I.

*DE RATIONE GENERIS VNIVERSA*

I. **G**enus jam inscriptionum aggredimur, quod non rebus celebrandis, sed memoriae publicae retinendae inventum est. sive enim clarorum virorum magistratus aut res gestae recensentur, sive operum publicorum auctores produntur, sive dominorum jura privataeque conventiones indicantur; ita semper narratio institui solet, ut exornationem quidem non respuat, sine ulla tamen virorum aut rerum commendatione absolvatur. porro eandem ob causam nullum hic initiales dedicationum formulae locum habent, faciuntque inepte, qui sacrarum inscriptionum initio illo D · O · M · tamquam omnium titulorum communi proprioque temere utuntur. quamquam ii magis etiam reprehendendi, qui ad poëtarum ineptias abiere; a quibus sic aliquando historica inchoata inscriptio est (1), *Loci Genio Et Nymphis Sacrum*, aut *Loci Genio Amoenique Littoris Hospitibus Nymphis*, et aliis hujusmodi initiis, quae antiquis quidem inopportuna visa essent; vobis et irreligiosa videri debent. exemplum ex his unum liceat subjicere (2),

L · GENIO · ET · NYMPH · S ·  
 QVAS · OLIM · AQVAS · CIVIVM · COMMODIS  
 MAIORES · HVC · DERIVARANT  
 DEHINC · LABRI · ANGVSTIA · IN · PERNICIEM  
 VERTERAT  
 INNOCENTII · XII · PONTIF · MAXIMI  
 PROVIDENTIA  
 LXXIVS · FLVITARE · SIVIT · CRATERE · AMPLIATO  
 AD · AETERNAE · VRBIS · SALVERITATEM  
 ET · ORNAMENTVM  
 ANN · D · N · MDCC ·

ecquid Genio et Nymphis cum Pontifice Maximo? addo etiam, cur Roma *Vrbs Aeterna* appellatur, quam idem, qui terrarum orbi, exitus maneat?

Id equidem juris sacra et profana miscendi ne poëtis quidem tribuendum censeo. majorum utique illi habent exempla multo plura, quam vellem, qui avitae religionis et sacrarum disciplinarum prope obliti esse videbantur: adeo a veterum commentis, Christianas etiam res quum ornarent, abstinere non poterant. sed tamen, pace eorum dixerim, nemo id ex antiquis, nobiscum si viveret, facere auderet. nam quis inter eos vel hoc unum admisisse arguatur, ut quum se Epicureum in carminis exordio professus esset, in medio deinde aut in extremo carmine in Stoicorum praecepta relaberetur? si quis adhuc fictis fabulis delectatur, ludat ille versibus quantum libet; at sic veterum sequatur vestigia, ut in eorum commentis totus sit, sacris nostris et religioni omnino pareat: ita fiet, ut vel in joco atque ludo sapere aliquid et sibi constare videatur (3).

(1) v. Egiz. Opusc. p. 235. 249. 252.

(2) Egiz. p. 233.

(3) v. Racin. Acad. Inscr. t. 15. p. 244.

Quod si poëtae sermo, postquam Christianum se indicio aliquo professus sit, ejus religioni semper ac moribus convenire debet; quanto id diligentius praestandum est in eo litterarum genere, quod etiam dignitatis plenum esse oporteat? in quo sane ipsa dictio poëtica deformare inscriptionem possit, et scriptori notam levitatis imponere, etiamsi religioni minus institutisque nostris adversari videatur. itaque haud miror, repudiatam olim esse Egizii inscriptionem (1), quam ille confecerat, ut Romae ad Tiberinam stationem ripae minoris figeretur: quippe in ea, quum fluvius nominandus fuisset, pro *Tiberi* maluerat scribere *Tiberino Patri*, quod satis insulsum est: esto aliam ipse causam attulerit, cur inscriptio ejus rejiceretur.

II. Neque vero poëticas tantum loquutiones, sed eas etiam reete vitaveris, quae, quum nulla necessitatem res afferat, novae omnino sint, nec propriae hujus generis censeri possint. habet enim hoc maxime genus formulas suas plane multas ac varias, in quarum locum ut ut Latinas dictiones atque optima verba substituas, ineruditus videre, quod proprias sollemnesque ignoraveris. sed tamen haud multum tibi in his vel quaerendis vel eligendis adlaborandum erit, quum magnam earum copiam libro tertio sic adlaturi simus, ut non modo quae cujusque partis propriae sint, ab reliquis separemus, sed etiam quae singulis prope rebus conveniant, totidem fere in articulos tribuamus. tuum erit, his ut contentus sis, quas antiqui probarunt; nec eorum morem sequare, qui narrationem non tam verbis ornare suis solent, quam onerare alienis: quasi vero vel majus aliquid ipsi narrent, quam quod populus Romanus viderit, vel iis, qui olim inscriptiones condiderunt, verba interdum et formulae defuerint, quae factis aut rebus omnibus responderent.

Porro verbosos hujusmodi homines si contempseris, inscriptiones historicas antiquis plane similes et veteri scriptore dignas perfacile conficies. nam in hoc genere non alia fere tractantur, quam quae veteres suis in titulis exposuerunt: ut quum magistratuum quorundam appellationes exceperis, vix aliud jam reliquum sit, quod priscis tantummodo formulis efferrī non possit, quae nimirum ad rempublicam atque ad felices bellorum exitus pertinent, quid fere ab his discrepant, quae nunc etiam monumentis mandanda esse ducimus? opera autem publica nonne in eos nunc quoque usus sunt, in quos olim excitabantur? veterum item ritu fines describimus, loca adsignamus, multa eodem modo alienantur, multa emuntur. quare in ipsis veterum exemplis satis ampla nobis dictionum supellex parata est, ut quidquid ad hoc inscriptionum genus spectat, antiquis germanisque formulis designemus.

III. At quibus utemur temporum notis, qui consules non habeamus? neque enim in hujusmodi titulis negligi hoc potest, nisi forte quum ii nominantur, e quorum magistratibus ipsa sive factorum sive monumentorum aetas cognosci potest. nec vero non his quoque regnum aliquando aut pontificatum adscribi liceat eorum, sub quibus res gestae aut opera absoluta sint, quemadmodum superius diximus, quum de monumentis sacrorum ageremus. at saepe contingit, quod semper in fastis fieri debet, ut ille omnino consignandus sit annus, quo vertente res quaeque peracta est. quapropter erit fortasse ex eruditorum numero qui percontetur, hi ne, quibus plerique tempora distinguunt, communis supputationis anni, an potius qui ab urbe condita, aut alio ab exordio numerantur, Christianis in monumentis consignandi sint? nam Christi annum, inquit, qui dum ista scribis, MDCCLXXVII. dicitur, abhinc quatuor aut quinque annos fuisse, nemo jam ignorat: quos tamen summae si addas, a comuni consuetudine recedas, quin veram temporis notam te invenisse certo scias: non enim in una omnes sententia sunt, qui de his disputant; sed alii aliam et habent et confirmant.

(1) opusc. p. 237.

Ego vero nec annos urbis, quos Romani ipsi perraro addiderunt, recte nunc inscribi putaverim, postquam eorum memoriam abiecinus; nec aliam *εποχὴν* quaerendam dixerim, quum Christianam omnibus notam communemque habeamus: cuius quidem annis quadriennium aut quinquennium ad inanem ostentationem si quis addat, non ille eruditus, sed amens videatur: etsi autem eos probo vel maxime, qui annorum numerum Graeco more solitarium ac sine apposito scribunt; haud tamen improbem, si quis malit scribere *Anno Dionysiano*, aut ANNO · D · N · vel, ut Lipsius (1), *Anno Christiano*, non tam quod annos amplius mille consuetudinem haec majores retinuerunt, quam quod annorum initium, quibus tempora distinguimus, a quarto etiam vel quinto aetatis Christi anno sumi, ab eoque anni Christi vocari potuerunt: quum iis non Christi vita, sed annorum ab eo exordio intervalla designentur. ceterum minus vere quidam inseribunt *A Partu Virginis*, *A Die Natali Christi*; inseite autem nec latine, qui malunt *Anno Aerae Vulgaris*: quippe vocem eam aevi sequioris scriptores extuderunt: quamquam veteres aliquando numerorum notas *Aera* appellarunt (2).

## §. II.

## DE FASTIS

I. *Annales Maximi* antea dicti esse videntur, qui deinde *Fasti* appellati sunt, primaque populi Romani historia fuerunt. *erat enim historia*, inquit Tullius (3), *nihil aliud, nisi annalium confectio: cuius rei memoriaeque publicae retinendae causa, ab initio rerum Romanarum usque ad P. Mucium pontificem maximum res omnes singulorum annorum mandabat litteris pontifex maximus, efferebatque in album, et proponebat tabulam domi, potestas ut esset populo cognoscendi: ii, qui etiam nunc Annales Maximi nominantur.* quo autem stilo confecti essent, paucis idem subinde declarat, *Hanc*, inquit, *similitudinem scribendi multi sequuti sunt, qui sine ullis ornamentis monumenta solum temporum, hominum, locorum gestarumque rerum reliquerunt:* quibus in verbis fastorum veluti definitio proponitur; nisi quod veteres haec ipsa diviserunt, atque alia in magistratuum fastis, alia in triumphalibus recensuere.

In illis reges primum descripti, quo quisque anno creatus, quo mortuus: et quae singuli reipublicae causa domi maxime gessissent. post hos eodem modo magistratuum nomina subiecta sunt et ordinariorum et eorum, qui extra ordinem creati, adjectumque quam hi ob causam creati essent: tum qui in magistratu mortuus, qui in praelio occisus, et si quis ob illustre aliquod facinus inclaruisset: et quo etiam anno ludi facti aut lustrum conditum aut bella suscepta essent. horum autem fastorum satis expedita ratio est latine scienti, nec aliud fere admonendum est, nisi ut breviter et dilucide et propriis omnia formulis exponamus: quas quidem opportune liber tertius in unum congestas exhibebit.

At vero in triumphalibus fastis duces bellorum recenseri videmus, et quos illi populos nationesque vicerint, quo de his anno, quo die triumpharint. tum si quid ab illis gestum, quod nunquam aut perraro alii fecissent, ut qui opima spolia retulerant, id quoque expressum est.

II. Ceterum haec aetati huic nostrae minus conveniunt, aut certe tam raro contin-

(1) in epitaph. suo Antaeo.

(2) Nonius c. 2. n. 42.

(3) de Orat. l. 2. c. 12. p. 52.



gunt, ut fastis conficiendis materia non sufficiat. quapropter et quae magistratuum et quae triumphorum fastis olim adtributa sunt, recte nunc conjunguntur, quo fastos nostros urbanos sive municipales ipso rerum numero pleniores instructioresque efficiamus: in quos ea nempe liceat referre, quae ad civitatem aut ad Principem pertinent, cui oppidum paret: quemadmodum in municipiis olim coloniisque factum esse, fastorum nobis reliquiae quaedam declarant (1); post ea magistratibus municipalibus locus tribuatur suus, cetera etiam signentur, quaecumque memoriae prodenda videantur: quae tamen omnia sic distributa sint, ut cuique appareat, quem ad annum singula spectent. id certe antiquis tantae fuit curae, ut geminis aliquando notis usi sint. effossi nuper Praeneste lapides sunt, partes fastorum municipalium exiguae, e quibus tamen didici, ante municipales magistratus inscriptum in illis Imperatoris nomen cum imperii sive potestatis tribuniciae anno, ac primum simul e consulibus ejusdem anni: ita enim se habet lapidis unius inscriptio (a):

..... VI · C · ATEIVS .....  
 IMP · CAESAR · XXIIX .....  
 M · AEMILIVS · LEPIDVS .....  
 SVF · I .....  
 IMP · CAESAR · X .....  
 Q · CAECILIVS · M .....  
 .....

Romani porro fasti satis ostendunt, qui annus M. Aemilium Lepidum consulem habuit, eundem tribuniciae potestatis Augusto delatae annum fuisse vicesimum octavum, vicesimumque novum cum Q. Caecilii Metelli consulatu congruere: qui fuit urbis annus Varr. DCCLX. neque hoc autem, neque superiore anno Augustus consulatum gessit.

Iam sacros quoque fastos probarim, in quibus Pontifices unius Ecclesiae describantur omnes, rebus, quae quisque gesserit, adjectis, et quum templorum conditoribus ac restitutoribus, tum rituum etiam municipalium dierumque festorum originibus indicatis: quae sane in aedium sacrarum atriis prostare, haud parum referat, nedum cupide ab omnibus legantur: quamquam haec in monumentis sacrorum separatim describi possunt.

Neque vero fastos tantummodo scribes, in quibus multorum annorum magistratus, rei publicae vicissitudines aut bella a multis confecta recenscas; sed etiam in quibus non longi temporis res vel ab uno tantum Principe aut duce gestas describas. exemplo enim tibi, ut aliis fuit, Ancyranum monumentum esse potest, praeclara unius Augusti facta complectens. ac fuit etiam aetate nostra, qui res uno bello unoque ab duce gestas scite partitus, quamquam intra sexennium debellatum fuerat, justos tamen et elegantes plane fastos confecerit. is est Guido Ferrarius, quem alibi a stili elegantia commendavimus: scripsit autem fastos rerum a Venetis gestarum Peloponesiaco bello; quod ad bellum Franciscus Mauracenus imperator delectus fuerat. eos ego, quia veteri exemplo caremus, quales ille edidit, non invitus describam: annos tantum suo quosque loco praeponam, quos ille, qua de causa, nescio, notis minoribus conscriptos in libelli marginem rejecit (2):

(1) Grut. p. 299.

(2) Hanc pleniorē edidit Marinus

Frat. Arv. p. 24, unde ipse deprecandam putavi.

(2) Ferrar. Inscr. p. 105, prim. edit.

FASTI • RERVM • GESTARVM • A • VENETIS  
PELOPONESIACO • BELLO  
MAVRACENO • IMP •

AN • M • D • LXXXIII •

ICTO • FOEDERE

CVM • CAESARE • ET • SARMATIS

CONTRA • TVRCARVM • REGEM

FR • MAVRACENS

OB • VIRTUTEM • CRETICO • BELLO • PERSPECTAM

IMPERATOR • DESIGNATVR



REIPUBLICAE • EXERCITVS

CLASSE • IN • IONIVM • NAVIGAT

LEVCADIA • INSVLA • POTITVR

LEVCADEM • EXPVGNAT



REGIVS • PRAEFFECTVS

IN • ACIE • CAESVS

BARBARORVM • COPIAE • DISIECTAE

ANACTORIVM • ACTIVM • HALYZAEA

OMNIS • ACARNANIA

RECEPTA



REIPUBLICAE • CLASSIS

PROVETA • IN • SINVM • AMBRACIVM

EDVCTVS • E • NAVIBVS • EXERCITVS

BARBARI • REPVGNANTES

IN • FVGAM • DATI

NICOPOLIS • CAPTA



TINVS • INSVLA • IN • AEGAEQ

ADVERSVS

IMPETVM • REGIARVM • NAVIVM

DEFENSA



AN • M • D • C • LXXXV •

CLASSIS • ALTERA

IN • AEGAEVM • IMMISSA

REGIAE • CLASSIS • PRAEFFECTVS

NON • AVSVS • CONFLIGERE

VSQVE • IN • HELLESPONTVM

ET • PROPONTIDEM

FVGATVS



MAVRACENS

CLASSE • PROTECTVS

IN • MESSENIACVM • SINVM

EDVCTIS • COPIIS

CORONEN • OPERIBVS • CLAVSIT

OMNIQVE • COMMEATV • PRIVAVIT



HOSTES • AD • M • XII •

PROPE • VIREM • CASTRA • METATI

NOCTV • IN • MVNITIONIBVS • OPPRESSI

OPIMA • SPOLIA

RELATA



CORONE • VI • CAPTA

VRBS

OB • VIOLATAM • INDVCIARVM • FIDEM

CLADE • MVLTATA

CONFIRMATI • LACONES

AD • GERENDVM • BELLVM • CVM • BARBARIS



BARBARORVM • M • X • CAESA • FVGATA

ABEA • GERENNIA

PLERAQVE • MESSENAE • CASTELLA

RECEPTA • IN • REIPUBLICAE • FIDEM

LACONVM • FINES • EXPLICATI

PROPVLSIS • HOSTIBVS



AN • M • D • C • LXXXVI •

BARBARI

REFECTIS • VIRIBVS

IRRVENTES • IN • MESSENIOS

SOLO • ADVENTV • REIP • CLASSIS

ET • MAVRACENI

FVGATI



SENATVS • CONSVLTVM

DE • PELOPONESO

IN • REIP • POTESTATEM • REDIGENDA

HOSTIVM • M • XI • DISIECTA

PILOS • MESSENIACA • ET • METHO

SVBACTAE



REIP • CLASSE  
SINVM • MESSENIVM • ET • LACONICVM  
PRAETERVECTA  
ARGOLICVM • INGRESSA  
NAVPLIA • PELOPONESI • CAPVT  
OBSIDIONE • CLAVDITVR



REGIVS • PRAEFECTVS  
ADVOLANS • SVBSIDIO • VRBIS  
PROPVLSVS  
ARGOS • RECEPTA



CASTRA  
AD • NAVPLIAM • COMMVNITA  
SI • HOSTES • REFECTO • EXERCITV  
AVDERENT • ACCEDERE



HOSTES  
A • MVNITIONIBVS • REPVLSI  
ITERVM • FVSI  
NAVPLIA  
AD • DEDITIONEM • COMPVLSA



AN • M • D • C • LXXXVII •  
CLASSIS  
IN • ACHAIAM  
TRIEMES  
IN • SINVM • CORINTHIACVM • IMMISSAE  
ADITVM • EXSCENSIONEMQVE  
HOSTE • NEQVIDQVAM • PROHIBENTE



BARBARI • VICTI • IN • ACIE  
PATRAE • NAVPACTVS  
CORINTHVS • ADIECTAE  
IMPERIO • REIPVBLICAE  
HOSTES  
TRANS • ISTHMVM  
PVLSI



SPARTA • SVBACTA  
CLASSIS • LACONICO • EGRESSA  
SARONICVM • SINVM • INVEHITVR  
PIRAEVM • APPELLIT  
ATHENAS • EXPVGNAT



AN • M • D • C • LXXXVIII •  
MAVRACENVVS  
APVD • AEGINAM • INSVLAM  
LEGATIONE • ACCEPTA  
TOTIVS • REIPVBLICAE • SVFFRAGIO  
VENETIARVM • PRINCEPS • SALVTATVR



CHALCIDIS  
OPPVGNATIONEM • FRVSTRATAM  
SARCIVNT  
RES • FORTITER • IN • ILLYRICO  
GESTAE



AN • M • D • C • LXXXVIII •  
M • D • C • LXXXX •  
EPIDAVRIA  
INACCESSAE • RVPI • INSIDENS  
PERTINACI • OBSIDIONE • PERDOMITA  
OMNIS • PELOPONESVS  
REDACTA  
SVB • POTESTATEM • REIPVBLICAE



PVGIO • PILEVSQVE  
SOLLEMNI • RITV • SACER  
AB • ALEXANDRO • VII • P • M •  
DONO • MISSVS  
MAVRACENO • PELOPONESIACO  
PRINCIPI • VENETIARVM  
OPTIME • MERITO  
DE • CHRISTIANA • REPVBLICA

porro alios item fastos a Ferrario, eosque perelegantes, nuper editos audio, quibus Regis Karoli Emmanuelis domini sui res gestas complexus est; cujus antea opera, quae Novariae idem fecerat, historicis inscriptionibus illustrarat.



Sunt et quidam veluti fasti rerum uno bello a rege Ludovico Magno gestarum, quos Carolus Ruæus (1) Attico plane stilo perscripsit. sed ne fastis adnumerem, forma ipsa vetat: singulae enim eorum partes singulas honorarias inscriptiones referunt, quales fere in temporariis apparatus proponi, et qua in statuarum basibus, qua in arcuum frontibus inscribi solent, non tam ut res gestae, quam ut honos ob res gestas habitus designetur. de his autem suo loco dicendum est.

II. Huc jam quis referat, quae *Acta Senatus et Populi* dicebantur, quae quidem Acta diurna ut conficerentur et publicarentur, C. Iulius Caesar Imp. teste Svetonio (2), primus omnium instituit. sed quia haec in Codice referebantur, non in marmore aut in aere incidebantur; nusquam vestigium eorum relictum est. fuere tamen, quod mirum plane videri debeat, qui germana et legitima putarent esse Acta quaedam a multis edita (3), multo antiquiorem C. Caesare aetatem simulantia, in quibus consules legas anni Varr. DLXXXVI. L. Aemilium Paullum, C. Licinium Crassum, quin nullum cetera in his verbum antiquum, nulla vetustatis nota appareat: in quibus praeterea earum rerum fit mentio, quas nunc in librum si quis referat, amens videatur: quae etiam intra paucos annos codices jam tot implevissent, quot nullum plane tabularum capere posset. ea audacter rejicio, nec primus tamen: ea Saxius quoque (4) repudiavit, et ab aliis antea in suspicionem fraudis vocata esse animadvertit. sed si quis acta civitatis suae ad eum modum scribere velit, paginas quidem, ut libet, vel multas impleat; marmora tamen et publicas tabulas parcius fatiget, ac fastis inserenda diligentius eligat.

Fastis item adnumeres, licet, indices decurionum atque sodalium. exemplo esse potest Album Canusinum, de quo dixi ad inscr. xxxvii. sunt et alia ejusmodi exempla, quamquam perraro integra: ut apud Gruterum (5) Albi particula nescio cujus, unde tamen discas, quae sodalium describendorum ratio fuerit: nam post initium, quod ita deletum est, ut Curatores ibi scriptos fuisse satis liqueat; sic deinde legitur, ORDO SACER · DOMVS · AVG · PALAT · quorum sacerdotum nomina protinus subjecta: post quae scriptum est, ITEM · CLARISSIMI · VIRI, quae post verba senatorum nomina leguntur: tum haec, ITEM · X · PRIMI, subjectis pariter horum nominibus: denique, ITEM · ORDO: post quae cetera sodalium nomina descripta.

Indicem Pontificum Sutrinorum, qui Decuriones creati fuerant, apud eundem Gruterum reperies (6), mutilum illum quidem, sed tamen initio hujusmodi prope intacto:

PONTIFICES · A · COLONIA  
CONIVNC · IVLIA · SVTRIN · IN · ORD · RELAT ·

nomina deinde subscripta singulorum ceris tribus, adjectumque cujus in locum sublectus esset. marmor praeterea habet villa Albana, de quo duo viri eruditi scripsere (a), Rodulphus Venetus (-) et Iosephus Scutillus (8): id Gladiatorum indicem refert, qui Silvani sacris, ut opior, iuncti erant, exordio hujusmodi:

IMP · CAES · L · AVRELIO · COMMODO · M · PLAVTIO · QVINTILLO · COS · (9)  
INITIALES · COLLEGI · SILVANI · AVRELIANI

duo deinde Curatores cientur et Gladiatorum decuriae quatuor. porro alios etiam, si

(1) exst. int. carmina p. 226. ed. Paris. 1680.

(2) in Inl. c. 20. n. 1.

(3) post Graev. Reines. etc. Murat. p. 610.

(4) in peric. animadv. ad Thes. Murat.

(5) p. 302. n. 2.

(6) p. 302. n. 1.

(a) Post Vennum et Scutillum doctam edidit dissertationem eodem super marmore Franciscus Antonius Vitale Romae a. 1763. et Marinus

iterum idem vulgavit inter Inscr. Alb. p. 12. et quaedam ad illud illustrandum adnotavit.

(7) Marm. Alb. p. 1.

(8) de Coll. Glad. p. 11.

(9) An. Varr. 930.

quid hoc refert, ejus generis indices fuisse constat, colonorum nempe (1) et servorum (2). ceterum in his omnibus sola fere nomina legi videas, nec annorum seriem ullam expressam esse: ut fasti proprie vereque dici non possint. at fortasse alii non deerant et gladiatorum et anrigarum indices, in quibus victoriae eorum notatis consulibus proderentur: quemadmodum apud Graecos *Διδασκαλῆαι* illae fuerunt, eruditissimis Odericii commentariis nuper illustratae (3), in quibus Tragoedorum et Comoedorum victoriae consignatae erant, et poëtarum et magistratuum nominibus adscriptis: quos quidem fastos Tiberini Arcades imitari possint, ut praestantissimorum poëtarum memoria posteritati propagetur.

Similitudinem quoque aliquam speciemque fastorum gerere videantur inscriptiones quaedam in Aegypto superstites, quas simul edidit Pocockius (4), quamquam, ut a Brotiero adnotatum est (5), omnino mendosas: eas dico, quas exstare voluerunt ii, qui apud Thebas statuiam Memnonis vocalem sonum reddentem ex more invisentes, sonum ejus audisse sibi videbantur. qua de re, si vacat, Strabonem (6) legito et Plinium (7) et Tacitum (8) et Spartianum (9). harum nempe inscriptionum non paucae, quum maneat adhuc Memnonium et saxea Memnonis effigies, in utroque hujus crure incisae olim ab advenis, nunc quoque leguntur: e quibus binas proferam, ut edidere eruditi Lipsienses (10), alteram e dextro Memnonis crure, alteram e sinistro descriptam:

ANNO · V · HADRIANI  
IMP · N · T · HATERIVS  
NEPOS · PRAEFECTVS  
AVDIT · MEMNONEM  
XIII · MART · HORA · IS · (11)  
MITHRIDATICVS · TRIBVNVS  
LEG · XXII · DEIOTARIANAE  
MEMNONEM · AVDIVI · HORA · I ·

III. Nullum tamen post marmora Capitolina fastorum exemplum haberi verius possit, quam inscriptiones olim in Vaticano repertae (12), in quibus descripta per decurias sodalium nomina, adjectique anni, quibus in collegium quisque cooptatus, et qui ex illis *Ad Numerum* sive *super Numerum* adlecti essent. utinam monumenti pulcherrimi nulla deleta pars foret! quantum inde lumen veteri afficeretur historiae? sed pars maxima periit; haec e reliquiis:

DEC · XXVII ·  
... DLECTVS · AD · NVMERVM · EX · S · C ·  
..... CAES · AVG · ...  
GERMANICVS  
.... CLAVDIO · CAESARE · AVG · GERMAN · V ·  
... R · CORNELIO · ORFITO · COS ·  
P · R · C · ANN · DCCCIII ·

is erat *Ti. Claudius Caesar Augusti Filius Germanicus*, qui deinde, ut a Svetonio (13) traditur, *Britannicus* dictus est, ille utique idem, quem Nero rerum potitus veneno sustulit. sequuntur aliorum nomina, qui *Cooptati* tantum dicuntur, ac singuli consulatu diverso. at Titi Caesaris causa nova Decuria instituitur:

(1) Martorell Th. Cal. p. 441.  
(2) Vulp. Tab. Antiat.  
(3) Romae 1777.  
(4) in Irin. Aegypt.  
(5) ad Tac. Ann. l. 2. c. 61.  
(6) l. 17. p. 816.

(7) H. N. l. 36. c. 7. n. 11.  
(8) Ann. l. 2. c. 61.  
(9) in Sever. c. 17.  
(10) in Nov. emend. ad Graec. Murat.  
Inscr. p. 75. et 82.

(11) XIII. cal. Martias Hora Prima  
Senis.  
(12) Grut. p. 500. n. 1. v. et Fabr.  
p. 494. n. 188.  
(13) in Claud. c. 27. n. 1.

DEC · XXVIII ·

· · ADLECTVS · AD · NVMERVM · EX · S · C ·  
 T · CAESAR · AVG · F · IMPERATOR  
 IMP · CAESAR · VESPASIANO · AVG · III ·  
 M · COCCEIO · NERVA · COS ·  
 P · R · C · AN · DCCCXXIII ·

Hos ego fastos ad Sodales Augustales pertinuisse crediderim: hoc certe constat, in illud collegium ab ipso initio super numerum cooptari coeptos, qui e domo Caesarum essent: tum enim sorte quidem ducti, ut ait Tacitus (1), e primoribus civitatis unus et viginti; at Tiberius Drususque et Claudius et Germanicus adjecti. ac de Claudio quidem accuratius traditur a Svetonio (2); *Senatus quoque, ut ad numerum Sodalium Augustalium sorte ductorum extra ordinem adjiceretur, censuit.*

Enimvero haec quoque exempla usui haud raro esse possunt: quum tabulae huiusmodi nunc etiam latine scriptae proponantur, quae urbium decuriones, quae collegiorum sodales exhibent, quo quisque die cooptatus, ejus in locum lectus sit: quoties magistratum gesserit, aut magisterio sit functus: interdum quid hic reipublicae, quid ille sodalitati legarit donaveritve, ejus publici operis aut ejus instituti auctor fuerit: quibus rebus designandis proprias demum formulas liber tertius suppeditabit.

## §. nI.

## DE INSCRIPTIONIBVS OPERVM PVBLICORVM

I. **E**tsi operum publicorum multa sunt genera, inscriptionum tamen una plerumque forma esse solet: quumque exemplorum vel optimorum non exiguus sit numerus, ita dictionis varia est ratio, idem ut fere in omnibus verborum ordo reperiatur.

Ac primum ab auctore operis exordium esse sumendum, exempla prope omnia clamant: nisi quod non modo senatus aut Princeps, sed ipsi saepe magistratus, quorum cura opus absolutum esset, pro auctoribus habebantur, ut ut sumptus respublica ex aerario suppeditasset: idque in municipiis etiam, quae urbis mores et instituta, quoad poterant, adumbrare conabantur, passim obtinuisse constat (3); hac tamen ubique lege, ut quibus inscriptio patrum decreto data esset, ii se opus tantummodo faciundum aut restituendum curasse, vel certe pecunia publica se fecisse, restituuisse significarent. ceteris modo exemplis addito inscriptionem inter Corfinium et Sulmonem nuper inventam in oppido, cui nunc *Prezza* nomen est, olim *Lavernas* fuisse, discas (4).

L · STATIVS · CN · F · CHILO  
 L · PETTIVS · C · F · PANSA  
 C · PETTIVS · F · F · (5) GEMELLVS  
 L · TATTIVS · F · F · COX  
 MAGISTRI · LAVERNEIS  
 MVRVM · CAEMENTICIVM  
 PORTAM · PORTICVM  
 TEMPLVM · BONAE · DEAE  
 PAGI · DECRETO · FACIENDVM  
 CVRAVERVNT · PROBARVNTQ ·

Collegiorum tamen sodalibus, qui in magisterio essent aut fuissent, communis ap-

(1) Ann. I. r. c. 54.

(2) in Claud. c. 6. n. 4.

(3) v. inser. 250. 251. 246.

(4) Anecd. Litt. Rom. t. 2. p. 466. n. 15.

(5) *Fausti Filius.*



pellatio aliquando praeposita est. exemplo sit lapis Forosempronensis: in quo quidem Augustales Seviros tredecim inscriptos esse puto, ut viam intra biennium stratam, sive sex prioribus Seviris inchoatam, sex posteriorum annuo magisterio absolutam esse constaret: ex his vero unum in seviratu obiisse, ejusque loco factum, qui tertius decimus numeratur (1).

AVGVSTALES · VI · VIR ·  
 C · PESCENNIVS · C · L · CLEMENS  
 C · VETTIENVS · C · L · TIRO  
 L · MAENVS · L · L · PHARNACES  
 C · VERNASIVS · C · L · EVMOLPHVS  
 C · VEIANVS · C · L · EPAPHRA  
 L · LVCILIVS · C · L · CHRESTVS  
 CN · VETTIDIVS · CN · L · OPTATIVS  
 C · VTTIEDIVS · C · L · QVARTIO  
 C · CVPPIENVS · C · L · SVCCESOR  
 L · MAELIVS · L · L · AGATHOBVLVS  
 L · CATELLIVS · L · L · BARBARVS  
 SEX · FIRMIVS · SEX · L · PRIMIO  
 CN · RVSTIVS · CN · L · CLARVS  
 VIAM · LONG · P · ∞ · CLXV · EX · D · D ·  
 SVA · PECVNIA · STERNEN ·  
 CVRAVERVNT

Sunt et inscriptiones quaedam optimae notae, quae ante ipsos operum publicorum auctores nomen Principis referant: quod duplici ratione factum esse reperio. alii enim, ac milites maxime, ad indicium temporis inscripserunt: quemadmodum hic habet titulus, quem ad ripam Danubii ultra Orsovam legit Marsilius (2) in ipsa rupe, quam legiones duae exciderant, viae muniendae causa:

TI · CAESARE · AVG · F ·  
 AVGVSTO · IMPERATORE  
 PONT · MAX · TR · PONT · XXX ·  
 LEG · IIII · SCYTHIC · V · MACED ·

cujus item consuetudinis specimen habes hoc altero in titulo, quem ad vallum Britannicum posuere milites Vexillarii legionis sextae Victricis, postquam pro sua parte opus passuum quatuor millium centum quadraginta et unius perfecissent, murum scilicet alium cespititium, quem Antoninus, ut a Capitolino accepimus (3), ultra Hadriani vallum submotis barbaris, duci jusserat (4).

IMP · C · T · (5) AELIO  
 HADRIANO · ANTONINO  
 AVG · P · P ·  
 VEX · LEG · VI · VIC ·  
 P · F · (6) OPVS · VALLI  
 P · ∞ · ∞ · ∞ · ∞ · C · XLI ·

porro eodem referas initium illud EX · AVCTORITATE, quum opera auctore Principe extructa refectave sunt: quod a Vespasiani Aug. aeo saepe in titulis usurpatum reperias (7). itaque nuper iisdem verbis inscriptionem Musei Kircheriani inchoavi:

(1) Fabr. p. 406. n. 316.

(2) Danub. t. 2. p. 127. u. 3.

(3) in Ant. Pio c. 5.

(4) Fabr. p. 756. n. 619.

(5) *Caesare Tito.*

(6) *Per Fecerunt.*

(7) Grut. p. 190. n. 5. p. 197. n. 4. 5.  
 p. 198. u. 3. 4. p. 199. n. 1. etc.

EX · AVCTORITATE

PII · VI · PONT · MAX ·

FRANC · XAVERIVS · ZELADA · CARD ·

III · VIR · COLLEGIO · R · MODERANDO

MVSEVM · KIRCHERIANVM · RESTITVENDVM · CVRAVIT

Alii autem Principis nomen ita initio usurparunt, ut opus suum illi se dedicare significarent: perinde quasi eo potissimum consilio inchoassent ac perfecissent, ut Principis esset ac diceretur. atque haec quidem municipiorum consuetudo fuit ad gratiam ab Augustis ineundam, vel ut opus suum gloriae sempiternae commendarent. itaque sententiam suam aliquando indicabant, exorsi inscriptionem ab ea formula HONORI vel IN HONOREM (1): quam ego nuper consuetudinem, Tarracinae quum essem, revocandam putavi in ea inscriptione, quam ibidem rogatus feci: quae scilicet in novae portae fronte poneretur, in eam municipii partem patentis, quae PII · VI · PONT · MAX · hospitales aedes novo murorum ambitu amplectitur:

HONORI

PII · VI · PONT · MAX ·

PARENTIS · PATRIAE · ET · MVNICIPI

OB · CAELI · SALVBKITATEM · RESTITVTAM

VBERVMQ · AGRORVM · FINES · PROLATOS

ORDO · ET · POPVLVS · TARRACINENSIS

ADVENTV · OPTIMI · PRINCIPIS

POMOERIVM · AMPLIAVIT

alias veteres ipsum Principis nomen, ut honorariis in titulis fiebat, dativo casu efferebant. exemplum tibi ex Grutero subijciam, quod ad viam aliquam aut pontem pertinuisset, manifestum est (2):

IMP · CAESARI · DIVI

TRAIANI · PARTHICI

FIL · DIVI · NERVAE · NEP ·

TRAIANO · HADRIANO ·

AVG · PONT · MAX · TRIB ·

POTEST · COS · II · P · P ·

III · VIR · VIAR ·

Q · TAMVDIVS · Q · F · PALAT · GRAIVS · VIENNA

L · AVRELIVS · L · F · OVF · TYRANNVS · INTERAMN · NAHAR ·

TI · IVLIVS · TI · F · STEL · VERECVNDIANVS · BONONIA

Q · TAMVDIVS · SEX · F · ARIVS · REATE

FAC · CVR ·

Haec tamen initia sic in municipiorum inscriptionibus usurpata, ut ne Romae quidem peregrina essent. ipse Augustus, Plinio si credimus (3), HONORI · OCTAVI · PATRIS SVI in Palatio super arcum in aedicula columnis adornata opus Lysiae dicaverat: id erat quadriga currusque et Apollo ac Diana ex uno lapide. atque eodem deinde modo, sed tamen ut privatos decebat, modestius, honoris causa carorum quisque suorum nomina coepit inscribere, quae modo inferius (4), modo in ipso tituli exordio legebantur (5):

(1) v. inser. 244. 245. et Maff. M. V. p. 210. n. 5.

(2) p. 248. n. 6.

(3) H. N. l. 36. c. 5. n. 4. §. 10.

(4) v. inser. 247.

(5) Maff. M. V. p. 125. n. 5.

NOMINE  
Q · DOMITH · ALPINI  
LICINIA · MATER  
SIGNVM · DIANAЕ · ET · VENATIONEM  
ET · SALIENTES · T · F · I ·

Iamvero quae opera alius fecerat, alius restituerat, sive etiam alius inchoaverat, alius absolverat, in eorum inscriptionibus utriusque facta mentio est: etsi hanc aliquando laudem Augustus neglexit, cuius illa sunt verba in monumento Ancyrano: *Sertorium Et Pompejum Theatrum Vtrumque Opus Impensa Grandi Refeci Sine Vlla Inscriptione Nominis Mei*. Tiberius certe absoluto Brixianorum aquaeductu, quem Augustus inchoaverat, et suum et Augusti nomen in titulo inscribi iussit (1):

DIVVS · AVGVSTVS  
TI · CAESAR · DIVI  
AVGVSTI · F · DIVI · N ·  
AVGVSTVS  
AQVAS · IN · COLONIAM  
PERDVXERVNT

sic balineo apud Fanestres iterum restituto, in nova inscriptione et conditoris mentio facta et primae restitutionis (2):

T · VARIVS · T · F · POL · RVFINVS  
GEGANIVS · FACVNDVS · VIBIVS · MARCELLINVS  
EQVO · PVBL · QVINQVENNALIC · NOMINE · SVO · ET  
T · VARI · LONGI · FILII · SVI  
BALINEVM · A · L · RVFELLIO · SEVERO · P · P · TR · (5) FACTVM  
QVOD · RES · PVBLICA · A · NOVO · REFECERAT · INCENDIO · EX · MAXIMA · PARTE  
CONSVPTVM · OPERIBVS · AMPLIATIS · PEC · SVA · RESTITVIT

recte autem et operum auctoribus iam vita functis titulos adscribes aliquos ex iis, qui-  
bus in vita quum essent, quasi propriis utebantur. numquam enim a veteribus omnes  
omissi, quin potius additi aliquando omnes, ut Nervae a Trajano (4):

IMP · CAESAR  
NERVA · AVG · CEN ·  
PONTIF · M · TRIB ·  
POTEST · III · COS · III · P · P ·  
VIAM · A · TRIPONTIO · AD  
FORVM · APPI · EX · GLAREA  
SILICE · STERNENDAM  
SVA · PECVNIA · INCOHAVIT  
IMP · CAESAR  
NERVA · DIVI · NERVAE  
FILIVS · AVG ·  
GERMA · . . .  
TRIB · POTEST · COS · III ·  
CONSVMMAVIT

Titulorum vero et magistratuum munerumque omnium is ordo est, quem in ho-  
norariis inscriptionibus adhibitum esse diximus. nullam tamen his laudem addidere, nul-  
lumque appositum, nisi quod dignitatis ac muneris proprium perpetuumque videretur.  
quippe inscriptionis non alius auctor putabatur, quam qui et operis erat: quem sane  
plaudere sibi et res suas laudibus praedicare non decebat. nam quod operis auctor non

(1) Maff. Ver. III. I. 11. n. 27. v. inscr.  
258. 259. et 242. lib. 1.

(2) rep. Fani an. 1779.  
(3) *Pecunia Publice Tributa*.

(4) Champ. Vill. Horat. t. 3. p. 391.  
sed hic emendatio.



primae sed tertiae personae figura loquens inducatur, Latinae id consuetudinis erat, quam etiam in epistolarum titulis servatam esse videmus. nec tamen exempla desunt, in quibus auctori persona prima tribuatur: quae inter mutilam Pollae in Lucania inscriptionem recenseas, a Morisano Reginis suis adnumeratam: in qua post nomen M'. Aquilii, sive ejus, quicumque fuit, qui illam provinciam suscepit, protinus haec sequuntur (1): *Viam Fecit Ab Regio Ad Capuam Et In Ea Via Ponteis Omneis Meiliarios Tabelariosque Poseivei*. enimvero vel hac una de causa falsam fietamque Emeritae in Hispania inscriptionem jure edixeris, quod Augustus res suas celebrans inducatur: haec enim in ea leguntur (2): ORBE · MARI · ET · TERRA · PACATO · TEMPLO · IANICLYSO · ET · REP · PO · ROM · OPTIM · LEGIB · SANCTISS · INSTIT · REFOR · VIAM · · · · · GADES · VSQVE PERDVXIT: quibus utique verbis Augustus historicis in monumentis semper abstinuit. sed ei jam inscriptioni auctoritatem eripuit nec volens Norisius, quum in numerorum notis haud leve mendum deprehendit (3); id est, COS · XII · TRIBVNIC · POTEST · X · IMP · VIII · dicit Augustum, qui quo anno COS · XII · factus est, eodem tribunicia potestate XVIII · ornatus et IMP · XIII · sit appellatus. multo autem eam gravius notavit Maffejus (4), cui ne Latina quidem videtur, ne dum eo scripta saeculo, quod a scriptorum praestantia aureum nominamus. Quae quum ita sint, quis hac aetate oscitantem eruditorum quorundam doctrinam non increpet, qui saepe historicam ab honoraria inscriptione non distinguentes, magnorum operum conditores, quos laudare volebant, jactantes et gloriosos fecerunt! neque tamen eos etiam a me perstringi putes, qui Principis nomini perpetuos illos addidit titulos, PIVS · FELIX · AVG · PATER · PATRIAE et similia: haec enim Principi vel a Majoribus cum regno imperioque tamquam haereditaria obvenere, vel populorum studio et quodam nationum consensu ac voluntate tributa sunt. itaque his quum utuntur, propriis utuntur appellationibus, quibus non virtutem ipsi suam, sed dignitatem enunciant, ut qui olim *Pii* aut *Frugi* aut *Maximi* nominati sunt, quum in epistolis nomen suum praescribebant, non laudem sibi sed cognomen apponere putabantur; ob eamque rem vel ab inimicis sic appellatos invenias: ut a C. Graccho L. Pisonem, quem quum ille, ut auctor est Tullius (5), in concionem vocari juberet, et viator quaereret, *quem Pisonem?* quod erant plures: *cogis me*, inquit, *dicere inimicum meum, Frugi*.

Illud deinde animadvertendum est, non quia eas in historica inscriptione laudes interdictas contendimus, quas sibi operum auctores adrogare videantur, idcirco ne locum quidem ullum commendationi relictum clarorum virorum de quibus mentio ob eorum merita facienda sit. imo vero laus tum aliqua apprime conveniat: qua scilicet operis auctor alium commendat, cujus opem expertus aut consilium sequutus sit. quare olim, quum Senatus Firmanorum, munita jam via, qua ad templum maximum itur, inscriptionem decrevisset; non ego praestantissimum virum ac de illa urbe optime meritum, qui mihi nominandus erat, sine laude commemorandum esse putavi:

(1) Marm. Reg. p. 172.

(2) Grut. p. 149. n. 4.

(3) Cen. Pis. diss. 2. c. 10. p. 196.

(4) Art. Cr. Lap. l. 3. c. 4. p. 294.

(5) pro Fontejo c. 13. n. 29.

S · P · Q · F ·  
 AVCTORE · VRBANO · PARACCIANO  
 CARD · ARCHIEP · PRINCIPE  
 EODEMQVE  
 OB · SOLVM · EMPTVM · OPERIQ · ADTRIBVTVM  
 ADIVTORE · MVNIFICENTISSIMO  
 LOCI · MAIESTATI · AVGENDAE  
 TEMPLOQVE · METROPOL · CELEBRANDO  
 EGESTIS · ANTIQVAE · ARCIS · RVDERIBVS  
 SVBACTO · CLIVO  
 SVBSTRVCTISQVE · MARGINIBVS  
 VIAM · NOVAM · A · FORO · AD · IVGVN  
 AERE · COLLATO · STERNENDAM  
 CVRAVERVNT  
 ANN · M · D · C · C · LXXI ·

id certe ipsum veteribus quoque aliquando placuisse, superius ostendi (1): esto, appositis illi usi non sint, nisi perpetuis, quum Principem appellarent (2):

COLLEGIVM  
 AVGVRRVM · AVCTORE  
 IMP · CAESARE · DIVI  
 TRAIANI · PARTHICI · F ·  
 DIVI · NERVAE · NEPOTE  
 TRAIANO · HADRIANO  
 AVG · PONTIF · MAX · TRIB ·  
 POT · V · COS · III · PROCOS ·  
 TERMINOS · POMERII  
 RESTITVENDOS · CVRAVIT

quo pacto ipsi etiam Principes in operum suorum titulis eos interdum adscribi voluerunt, quorum instantia, ut dicebant, et cura usi essent (3):

IMP · CAESAR  
 DIVI · NERVAE · NEPOS  
 DIVI · TRAIANI · PARTHICI · F ·  
 TRAIANVS · HADRIANVS  
 AVG · PONT · MAX · TRIB ·  
 POT · VII · COS · III ·  
 VIAM · A · CARTHAGINE  
 THEVESTEN · STRAVIT  
 PER · LEG · III · AVG ·  
 P · METILIO · SECVNDO  
 LEG · AVG · PR · PR ·

Quae jam opera privatorum sumptu fiebant, eorum maxime tituli id quoque non raro referunt, quae auctorem causa impulerit, quidve ille potissimum spectarit. exempla habes libro primo (4): quibus hoc adde, quod nuper Tibure prodit (5) (a):

(1) c. 1. §. 2. n. 3.

(2) Grut. p. 198. n. 1.

(3) Nov. Fior. an. 1740. p. 111.

(4) v. inscr. 237. 249. 254.

(5) in Mus. Vatic.

(a) Ea nunc emendatior ex Marin. Iscr.

Alb. p. 231. v. quae de eadem adnotavi ad lib. 1. p. 1. c. 2. p. 123.

FVRIVS · MAECIVS  
GRACCHVS · V · C ·  
CORRECTOR · FLA  
MINIAE · ET · FICE  
NI · ORNATVI  
THERMARVM  
DEDICAVIT

DEDICATA · XI · KAL · MAI  
GALLO · ET · FLACCO · COS · (1)

et atua nempe veteris artificii, Venerem, opinor, aut Pallidem referens, in Tiburtinis thermis locata a Maecio fuerat: quippe et manus muliebris prope basim reperta, ipsa-que in basi pedum vestigia apparent.

Principes contra, cui bono aut qua adducti ratione opera quisque sua facienda curassent, perraro indicarunt. exemplum e paucis est Gruterianum illud, cujus initium vetustas deleuit: itaque alii Elagabalo et Alexandro Caesari, alii Maximino et filio tribuerunt; quibus quum plane deberi Gudius contendat, horum nominibus praescriptis subiiciam, uti a Ligorio prodierunt (2):

IMP · CAES · MAXIMVS  
PIVS · FELIX · AVG ·  
PONTIF · MAX · GERM · MAXIM ·  
TRIB · POTEST · IIII · IMP · V ·  
COS · PROCOS · P · P · ET  
IMP · CAESAR · MAXIMVS · F ·  
GERM · MAX · DAC · MAX ·  
PRINCEPS · IVVENTVTIS  
LITVS · VICINVM · VIAE · SEVERIANAE  
ADSIDVIS · MARIS · ADVENTIS  
FLUCTIBVS · AD · LABEM · RVINAE  
LABEFACTATVM · AGGERIBVS  
MARINI · OPERIS · A · FVNDAMENTIS  
VT · PERICVLVM · COMMEANTIBVS  
ABESSET · EXTRVI · CVRARVNT

quid vero caussae sit, cur haec et similia ceteris in titulis non legamus, partitionis tertiae capite altero inquiremus.

II. Animadvertimus supra, in honorariis inscriptionibus auctores monumentorum verbo nunquam fere usos esse, quo se honorem claris viris deferre significarent: at contra est in historicis: vix enim unquam veteres omisere verbum, quo aut susceptam curam, aut opus perfectum, aut sumptus factos indicarent. legi quidem ad pontem Metauri inscriptionem huiusmodi (3):

AETERNI · IMPE  
RATORES · DIOCLE  
TIANVS · ET · MAXI  
MIANVS · AVGVSTVS  
TI · ET · PERPETVI  
CAESARES  
CONSTANTIVS  
ET · MAXIMIA  
NVS · PONTEM  
MATAVRO

at quo tempore studia humanitatis et litterarum celebrabantur, haec in eodem ponte inscripserat Trajanus (4):

(1) An. Varr. 927.  
(2) Grut. p. 163. n. 8.

(3) Fabr. p. 393. n. 288.

(4) id. p. 393. n. 289.



IMP . . . CAESAR  
 DIVI . NERVAE . F.  
 NERVA . TRAIANVS  
 OPTIMVS . AVG . GER.  
 DACICVS . TRIBVNIC.  
 POTEST . XIX . IMP . XI.  
 COS . VI . P . P.  
 FACIENDVM  
 CVRAVIT

res potius ipsa, ut vides, nomenque operis praetermissum, quum incurreret in oculos, nec quisquam legendo haerere posset. nam quod P. Pollio in Beneventana inscriptione Caesarei sui nullo usus sit verbo (1), aliquam ei fuisse causam, eamque minime communem esse iudicavi. itaque facilius exempla reperies, in quibus et operis nomen et verbum etiam desideretur (2), quam quae res ipsas sine ullo verbo enuncient.

Verum si de operis parte aut restituta aut adjecta, non de toto opere ageretur, tum fere accuratius veteres explicabant, quid ipsi tandem faciendum aut restituendum curassent: cujus consuetudinis multa tibi exempla in promptu sunt (3). perraro tamen opus ipsum pronomine *Hoc*, quod nunc vulgo fit, demonstrabant: merito; amens enim sit, oportet, qui alio quaerat, quae ipse tituli locus, ubi sint, satis declarat. equidem pronomina ejusmodi tum probem, quum non res ipsa appellatur, sed communi tantum nomine ostenditur, ut in Graeco illo Diogneti Rhodii titulo a Vitruvio latine reddito, quem scilicet Diognetus ipse helepoli Demetrii Poliorcetae inscripserat, postquam eam machinam hosti ereptam reduxisset in urbem (4):

DIOGNETVS  
 E . MANVBIS  
 ID . POPVLO . DEDIT  
 MVNVS

tum autem potissimum in antiquis inscriptionibus opera publica nominibus designabantur suis, quum ea titulum legenti non omnia coram obversabantur: ut quae in Reatina inscriptione recensentur (5):

M . M . LARTIENI . SABINI . PATER  
 ET . FILIVS . QVINQVENNALES . AQVAM  
 IN . FANVM . SVA . IMPENSA . PERDVXE  
 RVNT . SALIENTES . QVADRIFARIAM . SVO  
 LOCO . RESTITVERVNT . CANALES . VETVS  
 TATE . CORRVPTOS . ET . DISSIPATOS . RESTI  
 TVERVNT . FISTVLAS . OMNES . ET . SIGILLA  
 AHENEA . POSVERVNT . TECTA . REFECE  
 RVNT . OMNIA . SVA . IMPENSA . FECERVNT

praeterea ad operis ipsius commendationem id quoque interdum significatum est, quam brevi temporis spatio absolutum esset (6):

(1) v. inscr. 234.

(2) v. inscr. 235.

(3) v. inscr. 226. 231. 232. 237. etc.

(4) Vitr. l. 10. c. 22.

(5) Don. Cl. 2. n. 17. v. inscr. 230.  
 244. etc.

(6) id. Cl. 2. n. 31.

C · VALERIVS · C · F · CLAVD · Pansa · FLAMEN  
DIVORVM · VESPASIANI · TRAIANI · HADRIANI · P · P · (1) BIS  
TRIB · COH · VIII · PR · PROC · AVG · PROVINC · BRITANNIAE  
BALINEVM · QVOD · VI · CONSVPTVM · FVERAT · AMPLIATIS · SOLO  
ET · OPERIBVS · INTRA · BIENNIVM · PECVNIA · SVA · RESTITVIT · ET · DEDICAVIT  
IN · QVOD · OPVS · LEGATA · QVOQVE · REIP · TESTAMENTO · ALBVCAE · CANDIDAE  
VXORIS · SVAE · HS · CC · CONSENSV · OBDINIS · AMPLIVS · EROGAVIT

Porro quia tituli fere absoluto jam opere ponebantur, verba plerumque in praeterito usurpabant: suspensio tamen usi verbo aliquando videntur, affixo ante titulo, quam opus perfectum esset (2):

C · CAESAR  
AVGVST · F ·  
COS ·  
VIAS · OMNES  
ARIMINI · STERN · (5)

summa etiam pecuniae non raro subscripta, si quid sumptuosius a privatis factum esset, ut constaret, quanto id auctori stetisset (4).

A · RITIVS · A · L · TERTIVS · AVGVSTALIS  
TESTAMENTO · VIAM · STERNI · IVSSIT  
IN · QVOD · OPVS · EROGATA · SVNT · HS · XXX ·

alias vero si minus summa pecuniae, genus certe explicatum; unde ea nempe obvenisset, aut quomodo parata esset (5). in fastigiis fori Trajani, scripsit Gellius (6), simulacra sita fuisse circumundique inaurata equorum atque signorum militarium, subscriptumque EX MANVBIEIS. pecuniae multatitiae meminit Livius (7), ex qua et signa dedicata et ludi aliquando facti: atque id etiam in antiquis titulis expressum esse, indicat tabella aenea Musei Vcronensis (8) Firmi olim reperta, in qua legimus *Quaestores Aere Moltaticod Dederont*. illa demum communia *Ex Aere Collato, Pecunia Publica, De Sua Pecunia* et similia, quae libro tertio proferemus.

Inscriptionibus operum publicorum, ad quae sumptus ex aerario datus esset, saepe adjecti magistratus, qui de senatus sententia opus perspexissent, et recte factum pronuntiassent. nota est Fabricii pontis illa inscriptio (9)

L · FABRICIVS · C · F · CVR · VIAR · IDEMQVE  
FACIVNDVM · COERAVIT

PROBAVIT

Q · LEPIDVS · M · F · M · LOLLIVS · M · F · COS · (10) EX · S · C · PROBAVERVNT

in alijs soli fere Curatores probasse dicuntur (11): neque tamen haec in Principum inscriptionibus invenies, ut ut ipsi quoque opera non modo *se fecisse*, sed etiam *se facienda curasse* dicant: quibus deinde formulis repudiatis, quidam se *jussisse* inscripserunt (12):

(1) *Praefectus Praetorio*.

(2) Murat. p. 2006. n. 3.

(3) *Sternebat*.

(4) Fabr. p. 708. n. 293.

(5) v. inscr. 235. 237.

(6) N. A. l. 13. c. 24.

(7) l. 10. c. 16. n. 23. l. 30. c. 30.  
n. 39.

(8) Maff. p. 469. n. 2.

(9) Grut. p. 160. n. 3.

(10) An. Varr. 733.

(11) v. inscr. 229. 230. 240.

(12) Maff. M. V. p. 241. n. 2.

IMP · CAES · L · SEPT · SEVERVS · PIVS · PERT · AVG ·  
 ARAB · ADIAB · PART · MAX · PONT · MAX · TRIB ·  
 POT · VIII · IMP · XII · P · P · COS · PROCOS · ET · IMP ·  
 CAES · M · AVR · ANTONINVS · PIVS · FEL · AVG ·  
 PART · MAX · BRIT · MAX · GERM · MAX · PONT ·  
 MAX · TRIB · POT · XVII · IMP · III · COS · III · P · P ·  
 PROCOS · MILIARIA · VETVSTATE  
 CONLABSA · RESTITVI · IVSSERVNT

primum nempe Severus pater; post hunc Antoninus filius: qui quidem simul *Augustus*, at non simul *Pontifex Maximus* fuerat, nec tribuniciam potestatem ante Severi imperium ceperat, aut capere potuerat.

Tempora denique consulibus adscriptis vix inquam designari solebant, quum opera publica vel Principes vel primarii magistratus facienda curassent: quid enim opus erat, quum ea ipsorum honoribus satis indicarentur? in aliis non id semper neglectum est: exemplo sit inscriptio Vrbanae, quae Colonia Sullana fuit, at Capuae demum (1) Plinii aetate contributa (2):

C · VIBVLLIVS · C · F · STEL ·  
 LABEO  
 PRAEF · ALIM · ET · DECVR ·  
 COL · VRBAN ·  
 AQVARVM · CVRSVS · REST ·  
 EX · S · C ·  
 M · SILVANO · ET  
 AVGVRI · COS · (5)

ac nota quidem temporis nunc opus maxime est, quum fasti magistratuum nulli sint, aut certe nemo annos elapsos ex horum nominibus facile internoscit.

III. Inscriptionum, de quibus hic agimus, nullae plerumque sunt clausulae: ut narrationem ab auctoris nomine inchoatam, insertis, quae conveniant, apposis, enunciatoque operis argumento, unum fere verbum numerose concludat. in iis tamen, quae opera in solo publico a privatis aut a magistratu, sed privato sumptu, constituta declarant, formula subscripta est, quae locum decurionum decreto datum admoneat (4). tum in publicis municipiorum operibus infra titulum vel dividuis litteris ad latera legitur EX · S · C. qua de re dixi ad inscr. cccxxxvi. iis vero titulis, qui operibus inscripti sunt ex testamento factis, subjectum aliquando legas, cujus arbitrato opus confectum sit (5). sententiam item aliquam ad latera monumentorum inscriptam nonnunquam invenias, ut in Donii et Maffei exemplis (6) Graecum illud adagium *Ὁρα Καὶ Τύχην*. singularis vero Nolana est inscriptio, quam Gruterus a Scaligero accepit: in ejus enim fine acclamatio siue ominatio legitur (7):

C · CATIVS · M · F · IIII · VIR · CAMPVM · PVBLICE  
 AEQVANDVM · CVRAVIT · MACERIEM · ET · SCHOLAS  
 ET · SOLARIVM · SEMITAM · D · S · P · F · C · GENIO · COLONIAE  
 ET · COLONORVM · HONORIS · CAVSSA · QVOD  
 PERPETVO · FELICITER

Quia vero nova opera quum primum aperiebantur, sive, ut Latini aiebant, dedicabantur, sportulae decurionibus et populo dividi solebant; idcirco hoc etiam in fine aliquando adnotatum est (8), nedum dedicationis annus et dies, quae tamen raro in operis fronte inscribebant.

(1) H. N. l. 14. c. 6. n. 8. §. 2.

(2) Prat. V. App. l. 2. c. 10.

(3) An. Varr. 909.

(4) v. inscr. 249.

(5) v. inscr. 248.

(6) Don. Cl. 2. n. 11. Maff. M. V.

p. 126. n. 1.

(7) Grut. p. 109. n. 4.

(8) v. inscr. 249.



Curatores quoque operum publicorum nominatim adscripti, quum auctores generatim appellati essent, quemadmodum Praenestina ostendit inscriptio (1):

LANI · DANT · MAG · COERAVERE  
L · LIGURIUS · L · L · ANTIOCHVS  
P · DINDIVS · P · L · DAVOS · CALIDVS  
Q · PETRONIVS · Q · L · SALVIVS  
SEX · PONTIVS · SEX · L · STABILIO

nec unum occurreret exemplum hujusmodi, in quo veluti testamenti particulam leges subiectam, eamque pluribus pariter verbis protractam, quam quibus inscriptio ipsa constat: ex his est, quod in lapide agri Beneventani continetur (2):

M · NASELLIVS · M · F · PAL · SABINVS  
PRAEF · COH · I · DALMATAR · ET · NASELLIVS · VITAL ·  
PATER · AVG · II · QVINQ · (5) PAGANIS · COMMVNIB · PAGI · LVCVL ·  
PORTICVM · CVM · APPARATORIO · ET · COMPITVM · A · SOLO · PECVN ·  
SVA · FECERVNT · ET · IN · PERPETVVM · VI · ID · IVN · DIE · NATALE  
SABINI · EPVLANTIB · HIC · PAGANIS · ANNVS · X · CXXV · DARI  
IVSSERVNT · EA · CONDICIONE · VT · NON · IVN · PAGVM · LVSTRENT  
ET · SEQQ · DIEBVS · EX · CONSVETVDINE · SVA · CAENENT  
ITEM · VI · ID · IVN · DIE · NATALE · SABINI · EPVLENTVR · QVOD · SI  
FACTVM · NON · ERIT · TVM · HIC · LOCVS · VT · SUPRA · SCRIPTVM  
EST · CVM · ANNVS · X · CXXV · IN · PERPETVVM · AD · COLLEGIVM · MEDICOR ·  
ET · AD · LIBERTOS · N · (4) PERTINEAT · VT · II · VI · ID · IVN · DIE · NATALE  
SABINI · HIC · EPVLENTVR

atque id etiam animadvertendum, ab ea formula *Quod si factum* sanctionem incipere Naselliorum, qui poenam irrogant: itaque ex more prima inde persona eos loqui: quod in epitaphiis quoque tritum est.

V. Ne id quidem omittam, titulos operum publicorum exstare quosdam, qui non alia de caussa positi olim fuisse videntur, nisi ut sciret posteritas, quo illa anno condita essent (5):

TI · CLAVDIO · NERONE  
P · QVINTILIO · VARO · COS · (6)  
CONSTITVTVM · EST

simile huic alterum exemplum est apud Fabretum (7):

L · VALERIO · VOLESO  
CN · CINNA · MAGNO  
COS · (8)  
K · MART · APSOLVTVM · EST

non hic auctores, non curatores nominatim prolati; sed opus tamen ipsum intuentibus satis constare poterat, pecunia publica atque ex senatus consulto factum esse, siquidem uterque titulus publico operi inhaerebat.

In aliis contra nihil de anno; sed tamen expositum est, a quibus impensa facta esset: quippe id aliquando magis intererat (9):

BALINEVM · REFECTVM  
DEC · DECR · PECVN · PVBLIC ·  
PARTIS · PELTVINATIVM

(1) Grut. p. 175. n. 5.

(2) Fabr. p. 272. n. 610.

(3) *Augustalis iterum Quinquennalis*.

(4) *N. Nostros*.

(5) Marat. p. 297. n. 1.

(6) An. Varr. 741.

(7) p. 703. n. 240.

(8) An. Varr. 758.

(9) Givien. Aveja p. 139.

utrumque autem scite uno in titulo conjunxit Ferrarius: qui tamen nullis item curatorum aut magistratuum nominibus distinctus est (1):

AQVAE  
VETVSTATE • ET • BELLORVM • RVINA  
INTERRVPTAE  
RESTITVTIS • DVCTIBVS  
REFECTIS • FISTVLIS  
AD • VRBANOS • FONTES • PERDVCTAE  
PEC • PVB • A • MDCCIL •

nec plura de his: exemplis haec, velim, adnumeres, quae dictionis singularis appellavimus. at illud quaeri potest, ea ne consuetudo ab antiquis profecta sit, quam Ferrarius aliique celebrarunt, ut picturis et signis tituli satis longi stilo hoc nostro quasi quaedam argumenti enarrationes subscribantur? ego vero, quamquam nullae exstant inscriptiones ejusmodi, quae non aut tabularum dedicatarum tituli aut clarorum virorum ellogia dici possint; minime tamen hoc statui posse arbitror, numquam veteres, ne domi quidem, vel tabulis vel anaglyptis titulos prosa oratione addidisse, quibus argumenta operum explicarent. imo his fortasse delectatus jam fuerat Q. ille Pinnius, ad quem M. Varro tertium de re rustica librum misit: nam Varronis, initio ejus libri, haec sunt verba: *Quum enim villam haberes opere tectorio et intestino, ac pavimentis nobilibus lithostrotis spectandam, parum putasses esse, ni tuis quoque litteris exornati parietes essent.* Sed tamen quum nullae nobis veterum formulae, quibus utamur, nulla, quae imitemur, exempla ejusmodi relictas sint; versus contra sub imaginibus et tabulis scripti passim memorentur (2), et antiquorum plerisque probati sint: eos ego magis et sequar et laudem, qui descriptiones hujusmodi carminibus subtexant, nec morem inducant, qui certo adhuc veterum exemplo caret. de his autem mihi partitione altera dicendum est.

VI. Denique hoc etiam quaeratur, privatas ne domos ulla olim inscriptio historica in ipsa fronte exornarit, eas praesertim, quae *Domus* potissimum appellabantur, aedesque erant magnificentissimae senatorum clarissimorum. equidem exemplum hujusmodi legi nullum, ea si excipias, quae non operum historiam, sed locorum fines tantum et domini nomen exhibent: de quibus mox agetur. jamque in eam opinionem facile adducor, nullam ut olim privatarum aedium inscriptionem fuisse credam, quae conditoris nomen titulosque et operis causas, impensam, tempus, dedicationem referret. suadent Plinii verba ad Trajanum sic de Nerva pronunciantis (3): *Magno quidem animo parens tuus hanc ante vos Principes arcem publicarum aedium nomine inscripserat.* nimirum Palatinae etiam aedes ante Nervam inscriptione caruisse videntur; neque enim titulum ullum sustulisse ille dicitur, sed primus posuisse, ut eas publicas faceret.

Neque vero ad discrimen titulis opus erat, quum domos plerasque insignia multa distinguerent. vetus enim in urbe mos fuerat, ut qui bella gesserant, domos suas hostium spoliis et nauticis exuviis ornarent. incendio Neroniano scripsit Svetonius (4) domos priscorum ducum arsisse *hostilibus adhuc spoliis adornatas.* easdem domos senior Plinius (5) his verbis describit: *Aliae foris et circa limina animorum ingentium imagines erant, affixis hostium spoliis, quae nec emptori refringere liceret, triumphabantque etiam dominis mutatis ipsae domus: et erat haec stimulatio ingens expro-*

(1) Inscr. p. 14. n. 27.

(2) Corn. Nep. in V. Attic. n. 18. Plin. H. N. l. 35. c. 2. n. 2. Martial. l.

9. epig. 1. Plin. jun. l. 1. ep. 17. etc.

(3) in paneg. c. 37. n. 4.

(4) in Ner. c. 38. n. 4.

(5) H. N. l. 35. c. 2. n. 2.

*brantibus tectis quotidie imbellem dominum intrare in alienum triumphum.* porro qui deinde aedes sibi aedificarunt, alios majorum monumenta restituisse, alios nova et elegantiora statuisse crediderim, unde populus Romanus domorum singularum dominos facile agnosceret. et erant tum quoque sua gentibus plerisque insignia, quae, ut in familiarum nummis cusa sunt, sic in aedium frontibus insculpta olim fuisse, credibile est.

Ceterum pro inscriptionibus historicis praeclarae alicubi sententiae incisae sunt, ut illa,

QVOD · TIBI · FIERI · NON · VIS · ALTERI · NE · FECERIS

quam Severus Alexander, quemadmodum a Lampridio traditum est (1), *usque adeo dilexit, ut et in Palatio et in publicis operibus praescribi juberet*: quod Graeci quoque non multo secus aliquando fecerant; quippe testis Plato est in Protagora, dicta Sapientum in templo Apollinis Delphici insculpta fuisse. itaque Macedo ille philosophus Gellii familiaris (2) et hunc Pacuvii versum scribi debere censebat pro foribus omnium templorum:

EGO · ODI · HOMINES · IGNAVA · OPERA · ET · PHILOSOPHA · SENTENTIA

sed de his nihil me attinet dicere: si quem ista delectant, sexcentae sunt omnis generis sententiae sive Graecorum sive Latinorum, e quibus eas legere possit, quae vel si bi vel aedibus suis vel etiam hospitibus conveniant maxime.

§. III.

### DE INDICIBVS LOCORVM PVBLICORVM · PRIVATORVMQVE

I. Inscriptionum, de quibus hic agimus, gemina, opinor, forma est: aliae longiusculae atque ad normam earum confectae, quae operibus publicis praefigebantur; aliae contra breves nullisque Magistratibus insignes, ut ad finium tantum locorumque discrimina positae videantur.

Ac priorum quidem ea erit structura, quae superiorum: verbis tantum diversis utendum erit, quae locum definitum aut recuperatum adtributumve declarent. initium reipsa in antiquis exemplis videas plerumque ab nomine ejus factum, cujus jussu aut auctoritate res acta est, vel etiam ab ipsis magistratibus, qui egerunt (3). nec vero omissi honores aut tituli, quibus Principes ornari solebant. quin et facti quae causa esset, interdum adscripta, ut in pomerii titulis a Claudio Aug. ampliati; in quibus legimus *Auctis Populi Romani Finibus* (4). et magistratus, qui arbitri ex senatus consulto dati essent, illud etiam aliquando addebant, causam se ex s. c. cognovisse (5): Princeps autem, quorum ipse opera rem confecisset (6);

(1) in vit. Alex. Sev. c. 51.

(2) Gell. N. A. l. 13, c. 8.

(3) v. inser. 260, 261. etc.

(4) v. inser. 259.

(5) inser. 262.

(6) Fabr. p. 684. n. 84.



IMP · CAESAR  
 VESPASIANVS · AVG ·  
 PONTIF · MAX · TRIBVN ·  
 POTEST · VI · IMP · XIII · P · P ·  
 COS · VI · DESIG · VII · CENSOR  
 LOCVM · VINEAE · PVBLICAE  
 OCCVPATVM · A · PRIVATIS  
 PER · COLLEGIVM · PONTIFICVM  
 RESTITVIT

item cujus exemplar sequutus esset (1):

IMP · CAESAR  
 VESPASIANVS  
 AVG · COS · VIII ·  
 FINES · LOCORVM · DICATOR ·  
 DIANA · TIFATINAE · AB  
 CORNELIO · SVLLA · EX  
 FORMA · DIVI · AVGVSTI  
 RESTITVIT

Ceterum inversa quoque oratione usi veteres, et Princeps, arbitri, magistratus obliquo casu scripti, uti hoc aliisque in exemplis (2):

LOCVS · ADSIGNATVS  
 AB · NIGRO · ET · COSCONIANO  
 CVR · OP · PVB ·

tum quae quis facile assequi posset, silentio praetermissa, ut in termino agri colonici prope Tarracinam invento (3):

IVSSV · IMPERATORIS · CAESARIS  
 QVA · ARATRVM · DVCTVM  
 EST

ipse scilicet terminus, quum medius staret, sulcum illum limitarem designabat, qua triumvirale Octaviani aratrum ductum fuerat.

Clausulae titulorum horum nullae sunt: notaeque temporum fere neglectae: quae tamen ipsi Principes aut magistratus honoribus suis satis designabant: ut ii hodie probandi sint, qui ex more annum Dionysianum adscribant.

II. Reliquae hujusmodi inscriptiones vix legem sequuntur ullam, sive illae privatorum, sive publicorum locorum indices sint; nisi quod nullo ornatu illustres rem brevissime enunciant, et verbo etiam saepe carent: talis est, quae milliario xvi ab urbe Pisis in veteri columna legitur (4):

VIA · AEMILIA  
 A · ROMA · M · P · C ·  
 LXXXVIIII · (5)

et quae a Sponio afferuntur e termino descriptae, qui fines Aquenses ab Arclatensibus separabat: lapides enim terminales ut agrorum, sic regionum erant atque ditionum (6): inscriptio suos utraque fines spectabat (7):

FIN · | FIN ·  
 AQ · | AREL ·

(1) Pratill. V. App. l. 3. c. 1. v. inscr. 139.

(2) Fabr. p. 712. n. 331. v. inscr. 257. 269.

(3) Grut. p. 199. n. 5. v. Mazoch. in Tit. Camp. Amph. c. 1. p. 52.

(4) Gor. Inscr. t. 3. p. 368. n. 18.

(5) *Milia Passuum* 188.

(6) *Aemilia* l. 18. c. 2.

(7) Spon. Misc. p. 165. n. 2.

eodem fere modo ager publicus a privato distinctus (1):

FINIS  
INTER · PVBLICVM  
ET · PRIVATVM

et privata loca quem haberent dominum, sic aut simili modo indicabant (2):

C · LARTI · PARIETES · PRIVATI  
PRIVATO · SOLO

cui titulo similes fuisse vidimus, quos ad agrorum suorum fines in cippis incidebant: de quibus ab Herodiano etiam fit mentio, ubi Pertinacis Aug. principatum auspicantis modestiam laudans, vetuisse illum tradit, Imperatoriis possessionibus nomen suum inscribi (3): *τοις τε βασιλικαῖς κτημασιν ἐκώλυσεν αὐτοῦ τὸ ὄνομα ἐπιγραφεσθαι*. enimvero plus aliquid dignitatis index hic alter praefert, quem Maffejus vulgavit (4):

BALINEVM · CLAVDIA NVM

sed hunc in ipsa balinei fronte inscriptum fuisse recte duxeris: itaque pro publici operis inscriptione haberi fortasse potest: cui similis titulus alter apud Gruterum in templi fronte insculptus (5):

TEMPLVM  
ISIS  
EXORATAE

ceteri autem tituli in cippis fere terminisque incidebantur, iique eodem exemplo saepe non pauci (6), quod multis locis termini statuebantur: in quibus et pedes aliquando inscripti, quot quisque eorum a definito loco distaret: titulum hunc Fabrettus e cippo descripsit in urbe prope Doliolum reperto ad vetus monumentum Rusticelliorum (7):

CIPPVS · PRIM  
VS · DEFIXVS  
ERAT · CONTR  
A · ANGVLV  
M · DEXTERI  
OREM · MO  
N V M E N T I  
RVSTICELI · ET  
ABERAT · AB · TR  
VNCO · MON  
VMENTI · P · V ·  
ET · AB · STRVCT  
VRA · AQVAE  
CLVSARIS · P · VS · (8)

unus autem cippus satis, nec pedum dimensione opus erat, si locus finitimorum aedificiis circumscriptus esset (9):

AREA  
L · MVNATI · PLANCI · L ·  
SOSTRATI

haec Latinae breviloquentiae exempla sunt, quam, latine qui sciant, nullo negotio assequenter: nisi forte, quod nolim, vulgarium eos hominum iudicia retardent, a quibus breves titulos parum fere probari videant.

(1) Murat. p. 495. n. 2. Grut. p. 200.  
u. 7.

(2) Grut. p. 201. n. 4. v. inser. 267. etc.  
(3) Hist. l. 2. c. 4.

(4) Mus. Ver. p. 289. n. 6.

(5) Grut. p. 83. n. 9.

(6) v. inser. 259.

(7) Fabr. p. 239. n. 638. v. inser. 260.

(8) *Pedes quinque semis.*

(9) Vignol. Inscr. p. 314. n. 3.

Pene oblitus eram, quod hic multi a me quaerant, aliquid etiam de iis titulis subnotare, qui nostra aetate plurimi ponuntur; ad ea nempe loca designanda, quae Princeps inviserit, aut quibus delectatus sit. cuius quidem rei causa veteres aut nihil, opinor, aut non aliud quam carmen inscribere solebant: nonne hos imitari satius sit, quam eos, qui multis verbis vel nihil dicunt, vel illud, quod non debeant? verum quia non semper repugnare licet, si quando indulgendum amicis crit, hoc maxime conemur, ut inscriptio factum aliquod aut adjuncta, quae commemoratione digna sint, Fastorum more comprehendat. huiusmodi quaedam plane insignia attigisse mihi videor eo titulo, qui nuper prope Circejos in vico Felicitatis positus est:

ANNO • M • DCC • LXXX •  
 XVII • KAL • MAIAS  
 PIVS • VI • PONT • MAX •  
 FINIEVS • RENASCENTIS • SOLI  
 QVA • PALVS • POMPTINA • FVIT • PERAGRATIS  
 ET • MEMORANDI • OPERIS • MOLITIONE • PROBATA  
 HIS • AEDIEVS • HOSPEIS • SVCCESSIT  
 VICANOS • OMNES  
 ADMISSIONE • ADLOQVIO • LIBERALITATE  
 BEAVIT

si nihil huiusmodi inscriptione complecti possis, ut eam ab historicis abludere neesse sit; argumentum jam tibi carmine tractandum, aut certe alio inscriptionum genere utendum erit: qua de re mihi libro tertio dicendum est (1).

## §. V.

*DE INDICIBVS EORVM, QVAE LEGATA, DONATA,  
 VENDITA AVT EMPTA SVNT*

I. **N**ec hic quidem longo mihi sermone utendum est: pauca enim indices huiusmodi habent propria; nec fere a forma abeunt, qua inscriptiones operum publicorum perscriptae sunt.

Primi plerumque inducuntur, a quibus res aut pecunia profecta est (2): nam exemplum est prope singulare, quod subjiciam (3):

IMAGINVM • DOMVS	
AVG • CVLTORIB • SIGNVM	
LIBERTATIS • RESTITVTAE	
SER • GALBAE • IMPERATORIS • AVG •	
CVRATORES • ANNI • SECVNDI	DEDIC • IDIB • OCTOBR •
C • TVRRANIVS • POLYBIVS	C • BELLICO • NATALE
L • CALPVARNIVS • ZENA	P • CORNELIO • SCIPIONE • ASIATICO COS •
C • MVRDIVS • LALVS	
C • TVRRANIVS • FLORVS	
C • MVRDIVS • DEMOSTHENES	
S • P • D • D •	

suos autem magistratus, sua cuique munera adscripta passim reperies, quae tamen ap-

(1) in Πρλ. §. 1. n. 4.  
 (2) v. inscr. 273. 274. etc.

(3) Grut. p. 238. n. 12. Maffei suspecta Art. Cr. Lap. l. 3. c. 4. p. 309.



positis carent iis, quibus virtutes significari solent: quippe in his quoque titulis ii loqui putabantur, qui donum dedisse dicrentur. quod nunc quidem aliter fit: nam titulos huiusmodi ii fere figunt, quibus donum legatumve obvenit; nec jam superstitiis illis, a quibus accipere. quare si quis nunc ad benemeritos cives designandos apposito aliquo atque laude utatur, improbatus non est: apparet enim, minime haec ab eo profecta esse, qui beneficium contulerit. ideo nuper quum mihi prodendi essent, qui ad Museum Kircherianum vel condendum vel ornandum ditandumque plurimum contulissent; haud equidem vitio verti posse putavi, si magno in primis Musei constitutori centum ante annos mortuo, laudem aliquam tribuissem.

Ad veterum exempla ut redeam, quae simplici plerumque dictione perscripta sunt, post honores aut officia cujusque, ea fere recenseri solent, quae legata aut donata sint, tum praesertim, quum non res una, sed plures relictæ, atque ab his procul abest titulus, vel uni tantum affixus est (1), eas enim visi ex inscriptione noscantur, nemo aliunde jam discat. sed si res uno in titulo multae enumerandae fuerint, quid ni etiam, testamento primum universe enunciato, rerum legatarum seriem separatim adungere liceat? quod et Ferrario probatum vidi; ab eo enim est inscriptio, quae sequitur (2):

IOANNES • DEVICO • NEGOTIATOR • VESTIARIUS

SODALITATI • VINCENTIANAE

SVA • OMNIA • TESTAMENTO • LEGAVIT

HAEREDITATIS • HAEC • SUMMA

AVLAEA • AVRO • ET • ARGENTO • TEXTA • III •  
 ACV • PICTA • VIII • PERISTROMATIS • PVRPVRATI  
 CONCLAVIA • II • CITRINI • TOTIDEM • CVM • LECTVLIS  
 ET • OMNI • INSTRVMENTO • ET • SEDIVM • CONCOLORVM  
 PARIBVS • XII • SEDECVLIS • III • SEDILIBVS • GEMINIS  
 SPECVIA • PRAEGRANDIA • CVM • ABACIS • AVRATIS • III •  
 LYCHNI • CVM • LVCIBVS • XVII • RADIATI • EX  
 CRYSTALLO • III • BRACTEATVS • ARGENTO • VNVS  
 MENSAE • BRASILICAE • GEMINAE • EX • MARMORE • III  
 SCRINIA • EX • EBORE • III • PICTAE • TABVLAE • MELIORIS  
 NOTAE • XX • PRAETEREA • INSTRVMENTI • COQVINARI  
 ESCARI • ET • SVPELLECTILIS • ET • VOLVMINVM • MAGNVS  
 NVMERVS • CVM • HAEREDITATE • NOMINVM • ET  
 PECVNIAE • IDEM • VILLAM • SVBVRBANAM • CVM  
 HORTO • INSTRVCTO • ET • SALTVM • AESTIVO • AD  
 DIVERSANDVM • FERIATIS • DIEBVS • POST • SCHOLAS  
 MYSTERIORVM • ET • SACRAS • PRECES • SODALIBVS  
 DEDIT • AN • M • DCC • LXI •

Iam pecuniam qui legabant donabantve, illud quoque addidisse invenies, quem in usum quodve ad opus darent (3). alii beneficia etiam commemoranda putaverunt, quae ipsis aut filiis eorum collata essent, et gratiam se referre, donumque ejus rei causa se dare, donare professi sunt (4):

(1) v. inscr. 274, 278, etc.

(2) Inscr. secund. edit. p. 269.

(3) v. inscr. 273, 280.

(4) Grut. p. 99, n. 9.

P · CORNELIVS  
THALLVS  
P · CORNELI · ARCHITECTI · FIL ·  
MAG · QVINQ · COLL · FABR ·  
TIGNAR · LVSTRI · XXVII ·  
NOMINE  
P · CORNELI  
ARCHITECTIANI · FIL · SVI  
ALLECTI · IN · ORDINEM · DECVRION ·  
FIDEI · SIGNVM · DONVM · DEDIT

quibus autem signum dederit Thallus, ideo adjectum non esse crediderim, quod in ipsa Collegii Fabrûm Schola staret, idque Collegio donatum esse, minime in ambiguo relinqueretur.

Illud demum animadvertes, quum in titulo pecuniae legatae aut donorum fit mentio, quae testamento relicta sint, arbitrorum aliquando aut haeredum subjecta esse verba, quibus ea se praestitisse ostenderent, quaecumque testatores fieri jussissent (1). aliae hisce in exemplis clausulae vix unquam occurrent: ipsi etiam consules annorum indicandorum caussa perraro adscripti (2), quod saepe magistratus in ipsis titulis nominentur. ceterum nomina interdum haud onissa eorum, in quorum honorem aliquid alicui concessum esset, ut quum locus sepulturae dabatur publice (3):

IVLIAE · PLEBEIAE  
IN · HONOREM  
ALEXANDRI · ET · DEME  
TRI · CAESARIS · AVG · L ·  
EX · DECRETO · DECVR ·  
OILLA · PVBLICE · DATA · EST

atque id multo rectius significaveris, quum aliquid datum legatunive sit religionis causa: nam inde fere dignitatis plurimum atque etiam perspicuitatis tituli habere solent: quare inter inscriptiones, quas nuper pro collegio Canoniorum Fabrianensium confeci, ut in pronao aedis S. Nicolai Magni ponerentur, haec quoque nunc legitur, in qua id diserte indicarim:

CAESAR · PICVS  
CANONICVS  
ANNO · M · D · LI ·  
IN · HONOREM  
SANCTI · NICOLAI · MAGNI  
FVNDOS · SVOS · COLLEGIO · CANONICORVM  
TESTAMENTO · LEGAVIT  
ET · EX · EORVM · REDITV · DIVISIONEM · QVOTANNIS  
VIRITIM · DARI · HAC · LEGE  
VOLVIT  
VT · QVARTO · QVOQVE · PER · HEBDOMADEM · DIE  
QVI · PROFESTVS · ESSET  
SACRV · SINGVLI · IN · TEMPLO  
FACERENT

I. Quod reliquum est, indices ii, qui res venditas aut emptas declarant, varie quidem contexti sunt; at saepius tamen ea verborum dispositione, ut emptor primus

(1) v. inscr. 273. 274.

(2) v. inscr. 280.

(3) Grut. p. 424. n. 4.

recenseatur, venditor secundo loco memoretur (1). de ipsa autem stipulatione ac de pecunia soluta vix quidquam adiectum (2). exempla tantum non ita pauca exstant (3) imaginariae ejusdam venditionis, quae tamen, non ut Ulpianus de nuda et imaginaria venditione scripsit (4), pro non facta erat, sed vera rei alienatio intelligebatur. hanc, ut a Fabretto animadversum est, in Vitruvio etiam habemus (5), ubi ille Salapiae veteris incolis ob caeli gravitatem quotannis aegrotantibus a M. Hostilio lucum idoneum ad moenia transferenda conquisitum electumque narrat. is enim possessionem loco salubri secundum mare mercatus, ab senatu populoque Romano petiisse dicitur, ut liceret transferre oppidum: ac moenia idem construxisse, et divisisse areas. easque *Nummo sester-tio singulis municipibus mancipio dedisse*: quem locum Galianus minus commode interpretatus est. verum ea jam consuetudo obsolevit; nec ad donationem nunc aut venditionem libripende utimur, aut aere quidquam aeneaque libra emi solet; quare neque exemplis neque formulis ejusmodi opus est.

Id unum hic adnotabo, antiquae quot exstant privatorum inscriptiones, in quibus de venditione aut emptione agatur, totidem fere circa monumenta et sepulera maceriamque eorum versari, in aedium enim aut praediorum titulis haec enunciare veteres non solebant. ideoque inscriptiones illae saepe epitaphia eadem sunt: quo e numero est, quam subjieam (6):

M · INSTEIVS · M · L · EVTYCHVS  
 MONIMENTVM · SIVE · ID · SEPVLCRVM · EST  
 FECIT · SIBI · ET · INSTEIAE · ARESCVSAE  
 L · ARISTIVS · L · L · LVCRIO  
 EMIT · EX · PARTE · DIMIDIA  
 SIBI · ET · SVIS  
 ARISTIAE · L · L · DAPHNE  
 L · ARISTIVS · L · L · TYRANNVS · V · A · XXIII.

Haec habui, quae de toto historicarum inscriptionum genere exponerem. plura hijs nemo jure requirat, quum praeclaris veterum exemplis abundemus.

(1) v. inscr. 283. 284.

(2) v. inscr. 286.

(3) Grut. p. 956. n. 4. p. 108. n. 1.

Fabr. p. 49. n. 282. etc.

(4) l. 55. D. de contr.

(5) l. 1. c. 4.

(6) Maff. M. V. p. 285. n. 3.



## CAPUT V.

*De Ellogiis*

## §. I.

*DE RATIONE GENERIS VNIVERSA*

I. **E**llogia hactenus qui scripsere, viri eruditi, ea quisque suo arbitratu confecerunt: quippe nulla horum exstare exempla antiqua et germana putabantur. itaque pro ellogiis honorariae passim inscriptiones occurrunt qua Caelitum sanctorum qua priscorum ducum imaginibus subscriptae. huiusmodi fere sunt, quas Ferrarius (1) condidit ad Pinacothecam Antistitum Mediolanensium: huiusmodi, quas Fridericus Vrbinatium Dux in aedibus suis ad imagines praestantium virorum adscribi iussit (2). haec tamen qui probant, veteri, opinor, exemplo carent: nam honorariae inscriptiones vivis omnes vel certe recens mortuis ponebantur, eaeque, ut vidimus, senatus aut decurionum aut collegiorum decreto: neque ullum usquam exemplum est sine nomine aut indicio aliquo eorum, qui honorem habuerint. tum alia etiam dedicationis causa esse solebat: neque enim statuas illustribus viris ponebant ad fori aut basilicarum ornatum, sed ut gratiam bene-meritis referrent, et quam ipsi experti essent, virtutem honore afficerent. quae sane plerisque in ellogiis spectari non possunt; quum fere de iis agatur, qui minime ad nos pertinuerint, vel quod aliis temporibus vel quod aliis in urbibus floruerunt. nec vero, si statuac aliquando sanctis Caelitibus, civitate periculis liberata, ponuntur, honorariae tum inscriptioni locus est, quum sacra omnino sive votiva requiratur.

II. Iam ne ii quidem veteris ellogii vim et naturam adumbrasse mihi videntur, qui vel exiguas res dignas putaverunt, quae in ellogio quolibet recenserentur: perinde quasi epitaphia obscurorum hominum scriberent, non immortalium virorum memoriam celebrarent. nam veteres quidem in ellogiis quum res gestas enunciant, ea tantum proferenda duxerunt, quae quis aut solus fecisset, aut primus aut certe unus e paucis: praesertim si haec vulgo commendarentur, aut inde maxima in rempublicam utilitas derivata esset. quapropter a veterum utique exemplis, nec in melius, aberret, qui de magno viro scribens, pueritiae studia aut adolescentiae communes landes attingat; quumque is multa in magistratu gesserit, ea consecetur, quae privatus fecit: aut hoc statuat, nullum fieri ellogium posse praestantius, quam in quo nihil omissum esse videatur. ista equidem in vitae scriptore probaverim, a quo singula, id enim historici profitentur, investiganda, prodenda, explicanda sunt: ut non modo virtutes et quidquid fortiter aut feliciter gestum est, sed vitia etiam et varios casus acceptasque calamitates eodem in libro non tam ad voluptatem quam ad veritatem descripta reperiamus. at in ellogio, quum inventum id esse constet (3), quo posterius ad virtutem legendo excitarentur, ut vitia, si qua offendas aut quae recte facta non videantur, dissimulanda ac praetermittenda sunt; ita ex ipsis virtutibus praecclarisque factis ea solum deligenda, quae eximia putantur, quaeque habent admirationem: non tam ut breves fuisse, quam ut propositum tenuisse videamur.

(1) Inscr. p. 118. n. 257.

(2) Sweett. in Delic. p. 129.

(3) v. Svet. in Aug. c. 31. n. 7.

Stilo autem utere presso et circumscripto, nec tamen exili atque rudi. exempla id melius te, quam oratio mea doceat. videsne, apposita quam parce veteres adhibuerint, ut nullis orationem flosculis adperserint, ut sententias ipsas et dicta repudiarint? at lectis iidem atque illustribus verbis usi, nec sine dignitate quidquam loquuti; nihil in antiquis ellogiis obscurum, nihil ambiguum est, verbis sane perpaucis in Fabii ellogio Minucii Magistri equitum vices perstringuntur, quas Livius longa historia est persequutus: quis tamen plura requirat, ut sententiam adsequatur? eodem modo perscriptum fuisse L. Papirii Cursoris ellogium, ostendit ejusdem particula, quam Vrsinus servavit, Gruterus edidit (1):

. . . . .  
 BELLO . . . . . SAMNITIVM  
 CVM . AVSPICI . REPE  
 TENDI . CAUSA . ROMAM  
 REDISSET . ATQVE . INTE  
 RIM . Q . FABIUS . AMBVSTVS  
 MAXIMVS . . . . . MAGISTER  
 EQVITVM . . . . . INIVSSV  
 EIVS . PROELIO . CON  
 FLIXISSET . . . . .

hic nempe Dictator ille est, qui Magistrum equitum, quod contra edictum cum hoste pugnaverat, vel victorem, atque exercitu omni pro eo deprecante, spoliari a lictore jussit, ut securi feriret, receptumque a militibus et clam e castris Roman profectum sequutus est cum lictoribus, ut in senatu et ad populum infensus adesset, poenamque sumeret, a qua illum aegre populi consensus et tribunitia potestas liberavit. sed haec omnia, quae a Livio fusa oratione multisque verbis narrantur (2), in ellogio paucis plane versibus scite comprehensa fuisse apparet. atque in his ceterisque exemplis compositionem veteres probant ejusmodi, quae non continua esset, sed veluti membratim concisa; quod ad distinctionem rerum atque ad gradationem etiam plurimum confert. tum illud praeterea veteres cavisse deprehendes, ne finem modumque transirent, pluraque congestisse viderentur, quam quae semel perfecta facile meminisse quis posset.

III. Finis ellogio idem, qui rerum enumerationi constitutus; nec clausula ulla subjicienda est; totum enim ellogium ad personam pertinet unam, ejus simulacro subjectum est: quare nusquam in eo de monumenti auctore, nusquam de imaginis dedicatione mentionem factam esse reperias.

At quid facias, si quis tamen suum adscribi velit? quod nempe simulacrum ipse dono dederit, aut monumentum pecunia sua constituendum curaverit. dandum certe aliquid auctori operis, et aequo animo ferendum est, cujus munere monumentum ipsum exstet, ejus nomen in eodem ad posteritatis memoriam inscriptum esse: nec repugnabo, si quis curatores etiam adjuutoresque adscribi velit. ceterum illud curae esse debet, ne his gratificando a consuetudine veterum recedamus. ellogium in basis fronte legatur: tum aliis si locus deerit, quo illa commodè incidi possint, ad basis latera inscribantur: quemadmodum in honorariis titulis dedicatio interdum dextro latere, curatores operis laevo inscripti sunt: itaque si Arpinates, exempli gratia, statnam M. Tullio municipi in foro statuantes, ellogium ea conditione in basi ejus inscriptum probarent, ut eadem in basi dedicati operis publicorumque sumptuum index emeretur: facile utrumque hac, opinor, ratione praestari posset.

(1) p. 298. n. 4.

(2) l. 8. a c. 25. n. 29. v. et Val. Max. l. 2. c. 7. n. 8,

	M • TVLLIVS • M • F • CICERO	
	COS • PROCOS • PRAET • AED •	
	QVAEST • TRIB • MIL • AVGV	
	IN • CONSVLATV • CONIVRATIONEM	
	L • CATILINAE • DEPREHENDIT	
	ET • RE • PVBLICA • E • PERICVLIS	
	EREPTA • PRIMVS • OMNIVM	
	A • SENATV • PARENS • PATRIAE	
	APPELLATVS • EST	
	IN • PROCONSVLATV • CILICIA	
	PROVINCIA • SANCTE • ADMINISTRATA	DEDIC •
CIVI	IVSTI • ETIAM • TRIVMPHI • RES • GESSIT	KAL • APRIL •
MAXIMO	IMPERATOR • AB • EXERCITV • DICTVS	AN • M • D • C • C •
DECR • DEC •	PRIVATVS • QVOQVE • MAGNO • VSVI	LXXVIII •
PVBLICE	REI • PVBLICAE • SEMPER • FVIT	
	IN • CVRIA • IN • ROSTRIS • IN • FORO	
	DEFENSOR • SENATVS • VINDEXT • LIBERTATIS	
	ARTES • IDEM • ET • STVDIA	
	VNVS • EX • OMNIBVS • MAXIME • COLVIT	
	ORATOR • OPTIMVS • ET • PHILOSOPHVS	
	PRAESTANTISSIMVS • DISCIPLINAS	
	GRAECORVM • LATIO • INTVLIT	

Tanto viro ellogium olim in urbe ipsa non defuisse, pro certo habeo. nam imaginem ei, si minus in foro Augusti, at in Palatio positam haud dubium est, quum Tacitus Hortensii etiam inter oratores sitam ibidem imaginem memoret (1).

§. II.

DE ELLOGIIS CAELITVM SANCTORVM

I. **A**ugustum in foro suo primum ellogia posuisse iis diximus, quibus, ut ait Suetonius (2), proximum a Diis immortalibus honorem praestandum esse putabat: ducibus nempe, qui imperium populi Romani ex minimo maximum reddidissent. factum deinde est, ut aliis quoque nec fama nec virtute paribus honos idem haberetur, ac triplex jam ellogiorum uno in genere species exsisteret, magistratum, virorum privatorum et feminarum, hanc porro distributionem hic quoque instituerem, nisi clarorum ducum loco primas deferri par esset patronis caelestibus, quos secundum Deum colimus: quum tituli saepe sub imaginibus eorum inscribi soleant. idcirco primum de his, tum acervatim, neque enim valde differunt, de ellogiis dicam, quibus virorum feminarumque illustrium recte facta memoriae prodamus.

Enimvero initium ellogiorum unum omnium erit a nomine, quod recto casu est usurpandum: nisi quod appositum *Sanctus* ante ipsum etiam nomen recte scribetur; quippe illud veteres in sacris inscriptionibus ante postque jungabant. sacerdotia deinde sanctis Caelitibus, muneraque adscribenda sunt, quaecumque in vita obiere: et si quis

(1) Ann. l. 2. c. 57. v. etiam ibid. c. 83. (1) in Aug. c. 51. n. 7.



constitutor collegiorum fuerit, aut familiae religiosae parens atque auctor, ne id quidem omittendum est. praecipue autem ea subjienda cognomina, quae quisque a rebus gestis invenerit, efferendique tituli, quos sibi quisque laboribus et virtute pepererit: hos certe antiquitas pluris prope faciebat, quam magistratus quam triumphos. quare Scipio ille Nasica, quem senatus *Virum Optimum* iudicarat, eoque nomine ad accipiendam Matrem Idaeam miserat, id sibi spondebat, ut est apud Livium (1), hoc titulo, etsi nec consulatus nec triumphus adderetur, *satis honestam honoratamque P. Scipionis Nasicae imaginem fore*. atque haec ipsa eo majore apud nos in pretio esse debent, quo insigniorum meritorum indicia sunt praestantiorisque virtutis: cujusmodi illa habentur, *Apostolus, Martyr, Thaumaturgos*: et qui doctrinam atque eloquentiam designant, *Evangelistes, Doctor, Theologus, Chrysologos, Chrysostomos*: esto plerique omnes Latinis veteribus ignoti fuerint: satis est, si apud priscos Christianos in honore fuisse constet, quorum et in Latina lingua, siquidem de appellationibus tantum agatur, utique aliquid valere debet auctoritas: quemadmodum praestantissimi Grammaticorum censuerunt, qui ex Tertulliano, ex Lactantio, ex aliis non paucis multa plane vocabula, quae vetustiorum scriptorum libri non habent, in commentarios suos derivarunt.

Hos tamen titulos apposito ornari, antiqua exempla vetant: in quibus non secus atque in honorariis inscriptionibus, post personarum nomina unus tantum honorum, munus, perpetuarumque appellationum census et descriptio instituitur.

II. Post haec narratio incipiat, quae res gestas dilucide, at breviter tamen, complectatur: delectusque rerum is habeatur, quem adhibendum esse, superius dixi. formulas quidem, quae opus sint, non omnes ex antiquorum exemplis dare possum: quippe novi pleraque ignotique veteribus argumenti tractentur, oportet: sed latine qui sciat, nihil habiturus negotii est, quum ellogii formam et leges noverit. quas enim dictiones Latina huic lingua non suppeditet? aut quid offendi unquam possit, quod latine explicari designarique non queat? res autem sic exponendae, ut aut ordinem sequare, quo gestae sunt, aut a minoribus ad majores progrediare: quod ipsum simplici tamen dictione faciendum est; neque sententiarum sunt adhibendae figurae, quae fusiori tantum orationi aut historiae conveniunt: ita certe veteribus visum, in quorum ellogiis, neque haec pauca sunt, si et fragmenta numeres, nullum plane figuratae orationis vestigium deprehendas. exempla id te doceant, quae libro primo protulimus. quibus adde particulam hanc ex ellogio Furii Camilli, quod ceteris persimile fuisse apparet (2):

VEIOS · POST · VRBEM  
CAPTAM · COMMIGRARI  
PASSVS · NON · EST  
ETRUSCIS · AD · SVTRIVM  
DEVICTIS · AEQVIS · ET  
VOLCIS · SVBACTIS  
TERTIVM · TRIVMPHA  
VIT · QVAR · : : : SE :  
VELITERNIS : : : :

Iamvero ubi facta exposueris, virtutes etiam, si libeat, commemorato, quae praeclarissimae fuerint: Metelli maxime et Fabii ellogia (3) exemplo esse possunt. atque hoc quidem loco apposis uti liceat, quae virtutis praestantiam extollant, animique excellentiam et magnitudinem. sed illud cavendum maxime, ne agnominibus argutisque utamur ejusmodi, in quibus neque veritatis multum inesse solet, neque dignitatis: quam-

(1) l. 36. c. 26. n. 40.

(2) Rein. Cl. 6. n. 43. v. et Grut.

p. 298. n. 4. et Fabr. p. 751. n. 584.

(3) v. inscr. 289. 290.

quam erunt fortasse, qui ellogium hisee spoliatum ornamentis, nullaue specie fucatum valde contemnant, atque insulsum etiam et illitteratum appellent; nondum enim, quae jamdiu plurimos infusearat, omnis est deleta barbaries.

II Extremis potissimum ellogii versibus de extraordinario honore mentionem fieri convenit, si cui quis habitus sit. hujusmodi enim sunt, quae in magistratum ellogiis extremo plerumque loco enarrantur. magnis porro viris, qui ex hominum vita ad Caelitum religionem sanctimoniamque demigrarunt, raro ante ipsum excessum vel studia urbium vel populorum praeconia defuerunt. hi saepe legationum principes fuere, hisque auctoribus foedera aliquando composita et pax constituta: amplissima iisdem sacerdotia ultro delata, aut ornatissima facta decreta, in quibus municipiorum Parentes ac Conservatores appellati, gratiae publice actae, aut publice ad honores invitati. haec autem hisque similia, si qua erunt, sub ellogii finem apposite indicabis: nam sanctitatis, quae in egregio viro eluxisse dicatur, indicium est vel maximum, publico eam esse iudicio comprobata.

Itaque addebant interdum veteres quidquid etiam post mortem in clarorum virorum honorem publice factum esset. ellogii sane particulam edidit Gruterus (1) his verbis: *Mortem Ejus Iustitio Per Consules Indicto Omnes Luxerunt.* ita si quis censorio funere elatus esset, non id in ellogio omissum putarim: pariterque a Severo Alexandro, quem *Divis imperatoribus* in Nervae foro statuas cum ellogiis posuisse diximus (2), adnotatum esse crediderim, a quo quisque in Deorum numerum relatus esset. quare ne nos quidem in Caelitum sanctorum ellogiis ea negligemus, quae ad honores eorum postumos spectent: et benefica etiam voluntas celebrabitur, quod caelo potiti mortalium vota audierint, et calamitates praesenti auxilio propulsarint. haec tamen generatim indicanda, leviterque perstringenda esse puto: studendum est enim brevitati, nisi forte de singulari aliquo beneficio agatur, quo tota civitas in perpetuum devincta sit.

Haecenus de iis, quae Caelitum sanctorum ellogiis conficiendis ornandisque quam aptissima videantur. verum antiqua exempla alias plerumque nobis res exhibent, quam quae in his nostris exponi debeant: bella enim in illis et triumphi et opera publica recensentur, quas res sancti viri fere numquam attigerunt: quid tamen? multa omnino de his ad illorum normam dici possunt, ut si res aliae, non alia esse dictio atque forma videatur. exempli ego gratia Magni Chrysostomi ellogium, qualecumque est, libens subijciam, quod adolescens composui, studio quodam incensus tanti viri celebrandi. inde jam agnosceas, liceat, quantum ipse ad veterum exemplaria possis accedere.

(1) p. 493. n. 2.

(2) v. praef. c. 5. l. 1.

IOANNES • SANCTVS  
 DOCTOR • CHRYSOSTOMOS  
 PATER • ECCLESIAE  
 PONTIFEX • MAIOR • CONSTANTINOP.  
 PRIMVS • SACERDOTVM • MINORVM • CONCIONES  
 ANTIOCHIAE • AD • POPVLVM • HABVIT • CIVESQVE  
 SVOS • AD • RELIGIONEM • ET • VIRTVTEM • INSTITVENS  
 AB • AVREA • ELOQVENTIA • COGNOMEN • INVENIT  
 IDEM • DEDVCTVS • AB • IMP • ARCADIO • AVG.  
 ECCLESIAE • CONSTANTINOP • SANCTISSIME  
 PRAEFVIT • VITIORVM • OMNIVM • INSECTOR  
 ET • HAERETICARVM • FACTIONVM • HOSTIS • PRO  
 MAIESTATE • SACERDOTII • TVENDA • PRO • ECCLESIAE  
 LEGIBVS • CONSERVANDIS • SAEPE • IN • DISCRIMEN  
 CAPITIS • VOCATVS • PERICVLA • IMMOBILI • PIETATE  
 CONTEMPSIT • ODIA • IMPROBORVM • EXPLEVIT  
 BIS • OMNIVM • BONORVM • MOERORE • IN • EXILIVM  
 ACTVS • MORTE • IN • EXILIO • FORTISSIME • OPPETITA  
 QVEM • ORBIS • TERRARVM • VT • PARENTEM • LVXIT  
 NOMEN • EIVS • IVSSV • INNOCENTII • I • PONT • MAX.  
 FASTIS • EST • SACRIS • ADSRIPTVM  
 CORPVS • AB • IMP • CAES • THEODOSIO • AVG • F • AVG.  
 TRIVMPHALI • POMPA • CONSTANTINOPOLIM • AD • TEMPLVM  
 MAXIMVM • EFFVSA • OBVIAM • CIVITATE • RELATVM • EST

Sed haec quidem felicius aliis et melius succedent: praesertim si haec tractantibus contingat, ut non unum aliquod, sed multa simul ad unius loci ornatum ellogia scribenda sint: his enim ab ipsa rerum varietate venustatis accedet non parum, atque alterum alteri decus ac speciem afferet vel afferre videbitur.

## §. III.

*DE ELLOGIIS VIRORVM ET FEMINARVM  
 ILLVSTRIVM*

I. **V**no demum articulo de virorum simul ac feminarum illustrium ellogiis agamus, quorum discrimen in apposis fere titulisque omne consistit: in eum prope modum, quo honorarias inscriptiones haud multum inter se discrepare adnotavimus.

Ac initium quidem ellogii ejusque a nomine hic quoque ducito, et recto id casu efferto; nisi forte patrio aliquando uti praestet, unde Comiense Septiciani ellogium inchoatum est (1): quod ad perspicuam cognominum enunciationem conferre aliquid potest. sequentur autem eodem casu magistratus et propria ejusque munera: tum a relativo pronomine narratio instituitur, ne scilicet nomina prima reliquae orationi male haerere videantur. at ubi ea recto casu efferantur, nullo jam pronomine opus erit; quum reliqua oratio ab ipsis nominibus tota pendere, et prima extremis uno nexu conjungi possint.

(1) v. inscr. 297.



Verum si de ellogio ejus agatur, de quo aut non multa enunciarī debeant, aut una res tantum proferri possit; sic a nomine et adjunctis muneribus orationem sejungere fas sit, ut demonstrativo pronomine aut relativo subinde utaris; quo pacto veteres ellogia scripsere eorum potissimum, quos de collegiis bene meritos honore statuæ in scholis suis dignabantur (1).

C · ATTIVS · D · L ·  
IANVARIVS  
VI · VIR · S · F · VIII · VIR · VAL ·  
IHC · COLLEGIO · SVO · CENTO  
NARIORVM · LEGAVIT · HS · ∞ · EX  
CVIVS · REDITV · QVOTANNIS  
DIE · PARENTALIVM · NE · MINVS  
HOMINES · XII · AD · ROGVM · SVVM  
VESCERENTVR  
CVRA · COLL · CENT ·

Mevaniæ Attius *Sevir* fuerat *Sacris Faciundis*, idemque *Novemvir Valetudinarius*: quam curationem nummus etiam Morellianus fortasse refert, in quo legitur (2) M' · ACILIVS · III · VIR · VALETV. etsi nec Morellio id nec Spanhemio placet (3). porro quum haec tantum fuissent Attii munera, haud tamen alii excogitati sunt tituli, quibus ille ex rhetorum pompa honestaretur. satis esse Centonarii putaverunt, si liberalitatis ejus memoriam posteris traderent, nomenque immortalitati commendarent.

Eadem ratione mihi nuper scribenda existimavi ellogia Pontificum maximorum, qui Bibliothecam Vaticanam ditaverunt, quum nempe simulacra eorum iconica vir eminentissimus Frane. Xaverius Zelada Card. in aedibus suis Vaticanis dedicaret: ecce enim quae singulis imaginibus subscribenda tradidi:

NICOLAVS · V · PONT · MAX ·  
QVI · OPTIMIS · ARTIBVS · REVOCATIS  
PRIMVS · BIBLIOTHECAM · VATICANAM  
VETYSTISSIMIS · CODICIBVS  
GRAECIAE · ET · ORIENTIS · EXSVVHS  
ORNAVIT



XYSTVS · III · PONT · MAX ·  
QVI · BIBLIOTHECAM · VATICANAM  
PRAEFECTO · DATO · CVSTODIEVS · SCRIBISQ ·  
LIBRARIIS · CONSTITVTIS · DEDICAVIT  
ET · INGENIA · SAPIENTIVM  
REM · PVBLICAM · FECIT



XYSTVS · V · PONT · MAX ·  
CVIVS · MYNIFICENTIA  
MAGNVM · BIBLIOTHECAE · VATICANAE  
CHALCIDICVM  
OPERIBVS · A · SOLO · AMPLIATIS  
EXSTRUCTVM · EST



CLEMENS · VIII · PONT · MAX ·  
IHC · FVNDVM · VENTICANVM  
IN · TVITIONEM  
BIBLIOTHECAE · VATICANAE  
MANCIPAVIT



PAVLLVS · V · PONT · MAX ·  
IHC · BIBLIOTHECAE · VATICANAE  
CONCLAVIA · ADSTRVXIT · BINA  
GRAECOS · SYRIACOS · PERSICOS · CODICES  
ET · LITTERATAS · E · TILIA · TABELLAS  
INTVLIT



GREGORIVS · XV · PONT · MAX ·  
IHC · BIBLIOTHECAM · PALATINAM  
QVAM · A · DVCE · BAVARIC · MAXIMILIANO  
DONO · ACCEPERAT  
VATICANAE · AMPLIFICANDAE  
DESTINAVIT



(1) Don. Cl. 5. n. 189. v. inscr. 298. (2) Thes. Num. t. 2. p. 3.

(3) diss. 10. p. 15.

VRBANVS • VIII • PONT • MAX •  
 HIC • PALATINAE • BIBLIOTHECAE • LIBROS  
 IN • VATICANA • ORDINARI • IVSSIT  
 GRAECOS • CODICES  
 LOMELLINI • PONTIF • BELVNIENS •  
 DONVM • DEDIT



ALEXANDER • VII • PONT • MAX •  
 HIC • VETERES • LIBROS  
 QVOS • DVCE • VRBINATIVM  
 LONGO • STUDIO • CONGESSERANT  
 IN • BIBLIOTHECAM • VATICANAM  
 DEPORTANDOS • CVRAVIT



INNOCENTIVS • XI • PONT • MAX •  
 HIC • BIBLIOTHECAM • VATICANAM  
 SINENSIVM • LIBRIS  
 QVALES • EVROPAEI • REDDIDERE  
 AVTOGRAPHISQ • VETERVM • CODICEBVS  
 ATQVE • APOGRAPHIS • ADORNAVIT



ALEXANDER • VIII • PONT • MAX •  
 HIC • VTRIVSQVE • LINGVAE • CODICES  
 QVOS • REGINA • SVEDORVM • CHRISTINA  
 LECTISSIMOS • RELIQUERAT  
 IN • BIBLIOTHECAM • VATICANAM  
 INFERRI • IVSSIT



CLEMENS • XI • PONT • MAX •  
 HIC • EDENDORVM • IN • VRBE • LIBRORVM  
 EXEMPLA • BIBLIOTHECAE • VATICANAE  
 SINGVLA • DECRETO • ADDIXIT  
 VETERES • EX • OMNI • ORIENTE • PLVRIMOS  
 PER • SIM • ASSEMANVM • COMPARAVIT



BENEDICTVS • XIII • PONT • MAX •  
 HIC • BIBLIOTHECAE • VATICANAE  
 LIBROS • VETERES • LATINOS • GRAECOSQ •  
 ET • EX • ATHO • QVOSDAM • AVECTOS • ADTRIBVIT  
 NOVOS • LITTERARVM • FORMIS • EXPRESSOS  
 PLVRES • SVPERADDIDIT



CLEMENS • XII • PONT • MAX •  
 HIC • BIBLIOTHECAM • VATICANAM  
 AD • TERTIVM • CONCLAVE • PRODVXIT  
 PRISCA • FIGLINA • LITTERATAS • PAPYROS  
 MISSILIA • AVGG • NVMMISMATA • DICAVIT  
 SYMPTIBVS • SVBLATIS • CENSVM • AVXIT



BENEDICTVS • XIII • PONT • MAX •  
 HIC • BIBLIOTHECAE • VATICANAE  
 OTTOBONIANAM • ADIVNXIT  
 MVSEVM • CHRISTIANVM • FECIT  
 NVMMIS • PONTT • MAXX • SCILLANAM • SERIEM  
 AVGVSTORVM • CARPEGNANAM • ADIECIT



CLEMENS • XIII • PONT • MAX •  
 HIC • BIBLIOTHECAE • VATICANAE • MVSEIS  
 REGVM • COAEQVALIVM • NOMISMATA  
 GEMMAS • NVMMOSQ • ANTIQVOS  
 FICTILIA • ETRVSCA • SIGNAQ • AFREA • ADDIDIT  
 LITTERATAS • PAPYROS • ORNATV • EXCOLVIT



PIVS • VI • PONT • MAX •  
 CVIVS • LIBERALITATE  
 BIBLIOTHECAE • VATICANAE • MVSEA  
 NVMMIS • AVREIS • LOCVPLETATA  
 SIGNIS • TABVLISQ • AEREIS • INSTRVCTA  
 LAETO • CVLTV • ET • MAGNIFICO • ORNATA • SVNT

II. Ad feminarum ellogia quod attinet, ea veteres multo etiam brevior verborum ambitu comprehendebant. nam post earum nomina, vix aliud plerumque, quam indicia generis legas et munera, quibus finetae sint. neque enim veteres commemoranda putabant, quae illae privatim gessissent; vel etiam privatae vitae laudes in ipso publici muneris titulo atque in sacerdotii dignitate contineri arbitrabantur. hanc porro brevitatem nunc quoque in iis feminarum ellogiis retineamus, quae publico loco prostare debeant; facilius enim et concinnitate praestare, et dignitatem habere videantur,

Sed si qua in domorum atriis privatisque pinacothecis ponenda erunt, non ego hoc statuam, ut exilia semper, et nulla facti narratione nulloque ornatu insignia esse debeant. non, si exemplum huiusmodi nullum ex antiquis praesto est, idcirco nullum etiam usquam fuisse, certo comperi: nec vero, si constaret, satis jam caussae esset, cur generosarum mulierum egregias virtutes et praeclara facta laude sua et memoria fraudaremus. fiant utique ad feminas etiam, quae summo loco natae sint, celebrandas ellogia quamvis longa; sed tamen ad modum omnino atque ex forma ceterorum. initio quidem adscribas, licebit, quo parente genitae sint, cui viro nupserint, quos filios genuerint: munera etiam, si qua obierint, et titulos omnes recte appones, quibus ornatae fuerint. sed hic quoque, ut in illis ellogiis, singula quaeque appellationibus tantum suis indicanda, nec adjunctis distinguenda ullis: ne praepropera festinatione nullum iis, quae infra commendanda sunt, locum relinquamus. post haec nempe si quid splendide, si quid fortiter a claris matronis factum acceperimus, simplici et gravi oratione exponendum est: eae autem e virtutibus omnibus prodendae maxime, quas in femina omnes suspiciunt, neque ceterarum communes putant: et quae civibus utiles et patriae salutares esse solent, liberalitas in primis et munificentia et benignitas, ob quas multi saepe egentes abundare, imbecilli valere coeperunt. extremis denique versibus illa quoque locum habeant, si cui quis a Principe honor habitus, aut laus tributa sit, si qua filiam virtutum suarum et laudis haeredem reliquerit, et quae sunt huiusmodi.

II. Cetera jam ellogia sive Principum sive ducum sive senatorum, de quibus multa fere proferri possunt, eo more singula fient, quo magistratuum ellogia scripta esse vides. in his autem qui ordo rerum, quae forma loquutionis, quam haec emendata, quam Latina esse debeat; ex iis, quae superius dicta sunt, facile quisque comprehenderit. itaque regibus quidem apposita illa perpetua, quibus in vita utebantur, ceteris munera cuique sua gestosque magistratus, et si qua sibi cognomina praeclaris factis pepererint, simpliciter pressequi adscribet: nec aliud quidquam; nisi forte, ut in Octavii ellogio (1), de parente Principis agatur: quo in ellogio post majorum praenomina merito adiectum est *Pater Augusti*. res autem domi militiaeque gestae sic exponentur, ut narratio brevis quidem sit, at dilucida et plena dignitatis: quo nomine vetera exempla maxime commendanda sunt. opera etiam publica indicanda erunt, quae quis sua pecunia fecerit. de ea demum laude mentio fiet, qua quisque potissimum floruerit; et si cui quid obigit vel ad amplitudinem ejus vel ad famam immortalitatemque memorandum, recte ad calcem describetur.

Quibus autem haec formulis designanda sint, diu quaerendum non erit: liber enim tertius harum quoque numerum non exiguum suppeditabit. sit modo qui ea praestet, quae hactenus praemonui, quique simplici veraque oratione contentus, pigmentis fuoque puerili abstineat; germanam ille veterum ellogiorum formam facile exprimet. neque vero non et litteratos viros ellogio, si libet, ornare possis, eos maxime, qui pietatem cum litteris conjunxerunt: de quibus sane multa interdum praedicari possunt, quae illustria et magna habeantur. huiusmodi ellogium scripsi nuper pro Viterbiensibus, qui docti viri deque republica eorum optime meriti imaginem in curia dedicarunt. is est, quo ego in theologieis praeceptore usus sum, Ioannes Baptista Faures vir summus, cuius et epitaphium superius jam protuli.

( ) v. inser. 293.



IOANNES • BAPTISTA • FAVRES  
 ROMANVS • IN • AMPLISS • ORDINEM • VITERB • COOPTATVS  
 IN • SOCIETATE • IESV • QVAMDIV • EA • STETIT  
 SODALIS • PROFESSVS • SACERDOS • ANNOS • LII •  
 PRAEFECTVS • SODALIVM • MARIALIVM • COLLEG<sup>I</sup> • ROMANI  
 DOCTOR • DECVRIALIS • SACRIS • DISCIPLINIS • TRADENDIS  
 AB • IPSA • ADOLESCENTIA • OSOR • DESIDIAE • DOMITOR • CVPIDITATVM  
 SVMMMA • DEVM • RELIGIONE • COLVIT • MAGNAMQVE • DEI • MATREM  
 AVGVSTE • VENERATVS • EST • HVMANOS • CASVS • FORTI • ANIMO  
 SEMPER • TVLIT • CONVICIA • INSECTATIONES • PROPOSITI • TENAX  
 CONTEMPSIT • IN • STVDIOSAE • IVVENTVTIS • MORIBVS • CONFORMANDIS  
 IN • INFIMA • ETIAM • PLEBE • INSTITVENDA • REGENDA • DIVTVRNAM  
 OPERAM • ET • VTILEM • POSVIT • IDEM • EXCELLENTI • INGENIO • FLORENS  
 STVDIIS • LITTERISQ • DEDITVS • ATQVE • OMNI • DOCTRINA • ORNATISSIMVS  
 MVLTA • AD • ERVDITIONEM • LITTERASQ • FOVENDAS • PLVRIMA • PRO  
 ECCLESIA • TVENDA • SCRIPSIT • EGREGIE • DICTAVIT • EDIDIT  
 THEOLOGVS • AETATIS • SVAE • PRAESTANTISSIMVS • HABITVS • EST

## CAPUT VI.

*De constitutionibus publicis*

## §. I.

## DE RATIONE GENERIS VNIVERSA

I. Quod has quoque partes susceperim, ut de constitutionibus publicis ad superiorum capitum exemplar rationemque dissererem; erit fortasse, cui et opera et oleum philologiae nostrae periisse videatur. jamdiu enim apud plerasque gentium, repudiato Latini sermonis usu, quidquid publice edicitur, vernacula explicari lingua institutum est: quin multos jam legum novarum codices habemus, alia omnes, quam Latina lingua, perscriptos: quaecumque tandem ejus consilii capiendi causa fuerit, quae nihil plane ad Grammaticos pertinet (1). decreta etiam, rescripta, acta quaelibet quotidie prodeunt vulgari descripta lingua: ut quae veteres constitutionum publicarum exempla reliquerunt, ad eruditionem quidem permultis, ad usum nemini conferre videantur.

Verum enim verò quod priseus ille tantae auctoritatis sermo atque stilus a senatu et a rostris amotus repudiatusque sit, non adeo deinde neglectum putes, neino ut eum eruditorum e numero adamarit. eo certe usi sunt identidem atque utuntur non pauci: tametsi in argumento fere versantur non ita magno. leges potissimum latine ac veteri prope stilo conscriptae nonnusquam occurrent, in hortis puta ad exedras xystorum, quales olim Nicius Erytraeus in villa sua incidendas curavit. hujusmodi sunt, quas Vincentius Gravina scripsit pro collegio poetarum, qui Arcades appellantur, usquam vero frequentius, quam in bibliothecis leguntur. ejus moris origo ab ipso forsitan Pollione ducitur, qui primus, ut a Plinio accepimus (2), bibliothecam ex manubiis Romae publicavit, et ingenia hominum rem publicam fecit. decreta etiam quandoque invenies, qualia olim de Vicennalibus fecerunt Sodales Cortonenses (3), aut de honoribus regis Philippi V. vulgavit Egizius (4). alias item hujus generis inscriptiones alii confecerunt: quos inter me etiam muneres; nam et mihi non semel contigit, ut opera mea quidam in eam rem uterentur. quae quum ita sint, non inutilis plane labor hic meus futurus est, si quae in his etiam vel cavenda maxime vel servanda esse ducam, ea in partes quaeque suas meo more tributa, diligenter tradiderim.

II. Iamvero quum hoc in genere formularum magna sit copia, nolim, quae tibi opus fuerint, in xli. Tabularum fragmentis atque in veteribus senatus consultis sacratisque legibus quaerendas putes. merito risum debent, qui haec consecretantur, nec serio sed joco loqui videntur ita et Tullium ipsum sensisse constat, quum praeclaras illas leges summam scriberet, quas in republica esse vellet: qui quamquam certa quaedam esse legum verba sciebat, tamen paullo quidem antiquiora, quam tui sermo esset, se usurpasse dicit, quo plus auctoritatis haberent (5); at quae prisca essent, id est, ut Horatii utar verbis, cinctus olim Cethegis vix exaudita, ea omnino se rejecisse testatur. sed legum ipsarum caput unum proferam, ut tute videas, quem verborum delectum,

(1) v. Artur. Duch. de usu et auct. I. C. l. 2. c. 1. n. 13.

(2) H. N. l. 7. c. 30. n. 51. l. 55. c. 2. n. 2.

(3) Ac. Cort. t. 5. in praef. p. 13.

(4) Opusc. p. 596.

(5) de leg. l. 2. c. 7. n. 18.

quum Latinae litterae maxime florerent, Tullius habuerit: sit autem caput de magistratibus majoribus, cujus potissimum formulae nunc quoque usui esse possunt (1):

CENSORES · POPVLI · AEVITATES · SOBOLES · FAMILIAS · PECVNIASQVE  
 CENSENTO · VRBIS · TEMPLA · VIAS · AQVAS · AERARIVM · VECTIGALIA  
 TVENTO · POPVLIQVE · PARTES · IN · TRIBVS · DISTRIBVVNTO · EXIN  
 PECVNIAS · AEVITATES · ORDINES · PARTIVNTO · EQVITVM · PEDITVMQVE  
 PROLEM · DESCRIBVNTO · CAELIBES · ESSE · PROHIBENTO · MORES  
 POPVLI · REGVNTO · PROBRVM · IN · SENATV · NE · RELINQVVNTO  
 BINI · SVNTO · MAGISTRATVM · QVINQVENNIYM · HABENTO · RELIQVI  
 MAGISTRATVS · ANNV · SVNTO · EAQVE · POTESTAS · SEMPER · ESTO  
 IVRIS · DISCEPTATOR · QVI · PRIVATA · IVDICET · IVDICARIVE · IVBEAT  
 PRAETOR · ESTO · IS · IVRIS · CIVILIS · CVSTOS · ESTO · HVIC · POTESTATE  
 PARI · QVOTCVMQVE · SENATVS · CREVERIT · POPVLVSVE · IVSSERIT  
 TOT · SVNTO  
 REGIO · IMPERIO · DVO · SVNTO · HQVE · PRAEEVND · IVDICANDO  
 CONSVLENDO · PRAETORES · IVDICES · CONSVLES · APPELLANTOR  
 MILITIAE · SVMMVM · IVS · HABENTO · NEMINI · PARENTO · OLLIS  
 SALVS · POPVLI · SVPREMA · LEX · ESTO · EVNDEM · MAGISTRATVM  
 NI · INTERFVERINT · DECEM · ANNI · NEQVIS · CAPITO · AEVITATEM  
 ANNALI · LEGE · SERVANTO

delectum autem huiusmodi qui adhibeat, perspicuitatem etiam adsequetur, quae, ut ait Quintilianus (2), in verbis praecipuam habet proprietatem. quapropter mihi etiam curae erit, ut qui opella mea usuri sunt, formulas libro tertio habeant quam electissimas, caveant tamen, qui uti volent, ne nimis multas et varias jungendo colligandoque obscuritatem ipsi rebus afferant, quas illustrare conentur.

II. Stulus quidem avorum nostrorum et argutandi illa libido jamdiu refrixit, sed vestigia in hoc litterarum genere quaedam manere video: sunt adhuc indomito quidam ingenio et inanis illius laudis appetentes. ideirco illud quoque monendum, ne, quae merae ineptiae sunt, ea pro ornamentis luminibusque habeamus. summis olim laudibus in caelum extulit Majansius (3) sanctionem quandam sive legem, quam pro bibliotheca sua Emmanuel Martinus scripsisse ferebatur (4). quid tamen? mitto plagiarium fuisse Martinum, eaque, ut nuper didicimus, sibi adrogasse (5), quae in Aloisii Tribaldi Toletani adversariis scripta repererat: tolerabilia ne illa videantur, quae auctor, ut libris suis caveat, hoc modo edicit (6)?

HVNC · NE · MANCIPIOM · DVCITO · LIBER · EST · NE · IGITVR · NOTIS · COMPVNGITO  
 NE · CAESIM · PVNCTIMVE · FERITO · HOSTIS · NON · EST  
 ATRAMENTVM · VLTRA · PRIMVM · LAPIDEM · EXESTO · MORI · MAVVLT · QVAM · FOEDARI

mihi quidem vel multo suavius in scurrae Sarmenti servitutem jocatus olim videtur Cicirrus ille Messius in Coccei villa, quum ibi Horatius cum amicis cenaret (7).

Enimvero sanctionem Tribaldianam diligenter legerat, qui abhinc annos non ita multos legem pro bibliotheca regia Florentinorum conscripsit, cujus hoc est initium:

IMP · CAES · FRANCISCVS · PIVS · FEL · AVG · BIBLIOTHECAE · SVAE · VSVM · COMMVNEM · FACIT  
 NEMO · LIMEN · CLANCVLYM · TRANSCVRRITO · NIVE · LOCVLIS · MANVM · ADMOVETO

(1) de leg. l. 3. c. 3. n. 7.

(2) Inst. l. 8. c. 2.

(3) in Martin, vit. n. 140. et Mart. l. 12. ep. 35.

(4) Mart. l. 12. ep. 24.

(5) Efem. Rom. 1772. p. 71.

(6) nn. 1. 2. 6.

(7) l. 1. Sat. 5. v. 65.



nihil quidem in his simile: sed tamen mecum qui sentiunt, his decorum ille minus servasse videatur, quod Imperatorem Aug. minuta istaec et levia vetantem induxerit:

NE · IGITUR · CAESIM · PUNCTIMVE · FERITO · NEQUE · NOTIS · COMPVNGITO · . . . .  
IN · EO · NE · INCVMBITO · EXSCRIPTVRVS · NE · PAPHYRVM · IMPOSITO  
ATRAMENTVM · ET · ARENAM · LONGE · DEXTRORSVM · ARCETO · . . .

quae sane cum edictis certare possint, quae Claudius Aug. in censura proposuit, quorum altero admonebat, inquit Svetonius (1), *Vt uberi vinearum proventu bene dolia picarentur*: altero, *nihil aequae facere ad viperae morsum, quam taxi arboris succum*. dicet fortasse aliquis, verba illa seorsum legenda esse: ita plane; at quum tot in illa sanctione iubentis sint formulae, quem quis jubere putet, nisi qui solus initio scriptus est?

Ad summam quum inanum jocorum insulsitas, aut levissimarum rerum minuta consectatio nullam ornare inscriptionem possunt; tum vero eas maxime deformant, in quibus personarum, quae inducuntur, majestas ac dignitas gravitatem orationis verborumque splendorem requirit. quis autem hoc potissimum numero publicas constitutiones non habeat, quae aut senatus aut magistratum aut Principis nomine proponuntur? itaque ista tractanti nihil antiquius esse debet, quam ut decorum et sequatur et servet: quod quidem praestare facile possit, iudicio et exemplis si utatur; neque enim recondita quadam ratione cernitur, sed fere in promptu est, quotiescumque, non quid nos, sed quid alios deceat, quaeratur.

III. Multa denique genus hoc satis varium excolentes haud raro offendunt, quae Latinis ignota quum fuerint, nullis veterum formulis designari posse videantur: ejusmodi sunt non modo quaedam munerum et enutationum appellationes, sed novi etiam ritus, novi mores, novae artes, quae ad inventa pertinent recentiorum aetatum, postquam Latini sermonis usus esse desierat. atqui haec omnia aevo nostro scriptores non pauci latine et eleganter explicare potuerunt; quae quum leguntur, nemo haeret aut interpretem quaerit. ergo de his quum mentio incidet, audendum et nobis aliquid, atque ex Latinae linguae penni ad Grammaticorum praescriptum certis indicibus ea declaranda, quae antiquis nominibus appellari non possint: versatilis enim ad omnia Latinus est sermo, et verborum ubertatem ac divitias lectio dabit.

Quod si veteres multas constitutionum publicarum proprias habuere formulas, plura etiam communi omnino sermone explicarunt; nec quod pressius fere et adstrictius loquuti sunt, ideoque recondita semper verba neque ex medio petita usurparunt. stili autem illius et priscae dictionis quasi colorem nostra quoque oratio facile ducet, si ad veterum exemplar et formam expressa, nihil abjectum, nihil humile offerat: gravibusque distincta verbis, brevis etiam in praecipiendo, in narrando dilucida esse reperiatur.

## §. II.

## DE LEGIBVS ET EDICTIS

I. Legum et edictorum finis unus fere atque idem, jubere aut vetare: ob eam rem de utrisque eodem articulo mihi agendum esse putavi. sed legum hoc proprium, ut

(1) in Claud. c. 16. n. 9.

multas plerumque res comprehendant, et quae fieri vel iubent vel vetant, ea civium communia omnium sint: contra edicta circa rem unam singula fere versantur; eaque non omnibus semper sed huic aut illi ordini et societati proposita sunt: deinde haec brevi fere orationis ambitu descripta, leges vero non unam tabulam implere solent. ideoque utraque mihi seorsum exponenda sunt.

Primum igitur, ut quae legum propria erant, dicamus, initium omnibus idem fuisse videtur, quod in libri primi exemplo legimus (1); nisi quod in plebiscitis Tribuni plebis, qui legem tulerant, plebem, non populum, rogasse dicebantur. hoc nunc uti initio ut possis, perraro accidet: vel quia vix jam ullae eo more leges feruntur; vel quia leges fere scribendae tibi erunt, quas viri privati domi suae sanciant. sed legum quae a Principe prodeunt, quale exordium esse possit, Theodosii tibi et Iustiniani veteres codices declarant: ceterae autem, quae privatae haberi possint, vel nullo etiam ejusmodi initio recte scribentur, si locus, quo prostare debent, de legislatore ipse loquatur. ut si de legibus Coloniceis agatur, quas Varro memorat (2), fundi utique dominum auctorem earum esse, quisque vel sine ullo nomine intelligat. exemplo sit Vilici lex Catoniana, ob antiquam etiam simplicitatem ac venustatem digna plane, quae describatur (3):

HAEC · ERVNT · VILICI · OFFICIA

DISCIPLINA · BONA · VTATVR · FERIAE · SERVENTVR · ALIENO · MANVM  
 ABSTINEAT · SVA · SERVET · DILIGENTER · LITIBVS · FAMILIA · SVPERSEDEAT  
 SI · QVIS · QVID · DELIQUERIT · PRO · NOXA · BONO · MODO · VINDICET  
 FAMILIAE · MALE · NE · SIT · NE · ALGEAT · NE · ESVRIAT · OPERE · BENE  
 EXERCEAT · FACILIVS · MALO · ET · ALIENO · PROHIBEBIT · VILICVS  
 SI · NOLET · MALE · FACERE · NON · FACIET · SI · PASSVS · ERIT  
 DOMINVS · IMPVNE · NE · SINAT · ESSE · PRO · BENEFICIO · GRATIAM  
 REFERAT · VT · ALIIS · RECTE · FACERE · LIBEAT  
 VILICVS · NE · SIT · AMBVLATOR · SOBRIVS · SIET · SEMPER · AD · COENAM  
 NE · QVO · EAT · FAMILIAM · EXERCEAT · CONSIDERET · QVAE · DOMINVS  
 IMPRAVERIT · FIAN · NE · PLVS · CENSEAT · SAPERE · SE · QVAM  
 DOMINVM · AMICOS · DOMINI · EOS · HABEAT · SIBI · AMICOS · CVI  
 IVSSVS · SIET · AVSCVLTET  
 REM · DIVINAM · NISI · COMPITALIBVS · IN · COMPITO · AVT · IN · FOCO  
 NE · FACIAT  
 INVSSV · DOMINI · CREDAT · NEMINI · QVOD · DOMINVS · CREDIDERIT  
 EXIGAT · SATVI · SEMEN · CIBARIA · FAR · VINVM · OLEV · MVTVM  
 DEDERIT · NEMINI · DVAS · AVT · TRES · FAMILIAS · HABEAT · VNDE  
 VTENDA · ROGET · ET · QVIBVS · DET · PRAETEREA · NEMINI · RATIONEM  
 CVM · DOMINO · CREBRO · PVTET · OPERARIVM · MERCENARIVM  
 POLITOREM · DIVTIVS · EVMD · NE · HABEAT · DIE · NE · QVID  
 EMISSE · VELIT · INSCIENTE · DOMINO · NEV · QVID · DOMINVM  
 CELAVISSE · VELIT  
 PARASITVM · NE · QVEM · HABEAT · HARVSPICEM · AVGVREM · HARIOLVM  
 CHALDAEV · NE · QVEM · CONSVLVISSE · VELIT  
 SEGETEM · NE · DEFRVDET · NAM · ID · INFELIX · EST · OPVS · RVSTICVM  
 OMNE · CVRET · VTI · SCIAT · FACERE · ET · ID · FACIAT · SAEPE · DVM  
 NE · LASSVS · FIAT · SI · FECERIT · SCRIBIT · IN · MENTE · FAMILIAE  
 Q · ID · SIET · ET · ILLI · ANIMO · AEQVIORE · FACIENT · SI · HOC  
 FACIET · MINVS · LIBEBIT · AMBVLARE · ET · VALEBIT · RECTIVS · ET  
 DORMIBIT · LIBENTIVS  
 PRIMVS · CVBITV · SVRGAT · POSTREMVS · CVBITVM · EAT · PRIVS · VILLAM  
 VIDEAT · CLAUSA · VTI · SIET · ET · VTI · SVO · QVISQVE · LOCO · CVBET  
 ET · VTI · IVMENTA · PABVLVM · HABEANT

(1) v. inser. 304.

(2) R. R. l. 1, c. 2.

(3) R. R. c. 5.

BOVES · MAXIMA · DILIGENTIA · CVRATOS · HABETO · BVBVLCIS · OBSEQVITOR  
 PARTIM · QVO · LIBENTIVS · BOVES · CVRENT  
 ARATRA · VOMERESQVE · FACITO · VTI · BONOS · HABEAS · TERRAM  
 CARIOSAM · CAVETO · NE · ARES · NEVE · PLOSTRVM · NEVE · PECVS  
 IMPELLAS · SI · ITA · NON · CAVERIS · QVO · IMPVLERIS · TRIENNI  
 FRVCTVM · AMITTES  
 PECORI · ET · BVBVS · DILIGENTER · SVBSTERNATVR · VNGVLAE · CVRENTVR  
 SCABIEM · PECORI · ET · IVMENTIS · CAVETO · ID · EX · FAME · ET · SI  
 IMPLVIT · FIERI · SOLET  
 OPERA · OMNIA · MATVRE · CONFICIAS · FACE · NAM · RES · RVSTICA · SIC  
 EST · SI · VNAM · REM · SERO · FECERIS · OMNIA · OPERA · SERO · FACIES  
 STRAMENTA · SI · DEERVNT · FRONDEM · ILIGNEAM · LEGITO · EAM  
 SVBSTERNITO · OVIBVS · BVBVSQVE  
 STERQVILINIVM · MAGNVM · STVDE · VT · HABEAS · STERCVS · SEDVLO  
 CONSERVA · CVM · EXPORTABIS · PVRGATO · ET · COMMINVITO · PER  
 AVTVMNVN · EVEHITO · CIRCVM · OLEAS · AVTVMNITATE · ABLAQVEATO  
 ET · STERCVS · ADDITO · FRONDEM · POPVLNEAM · VLMEAM · QVERNEAM  
 CAEDITO · PER · TEMPVS · EAM · CONDITO · NON · PERARIDAM · PABVLVM  
 OVIBVS · ITEM · FOENVN · CORDVM · SICILIMENTA · DE · PRATO · EA  
 ARIDA · CONDITO  
 POST · IMBREM · AVTVMNI · RAPINAM · PABVLVM · LVPINVMQVE · SERITO

plures haec in articulos tribui, quo legum latarum formam exprimerem, quarum multa erant capita: itaque Tullius quadragesimum legis agrariae caput (1), Caelius unum et centesimum legis iudiciariae (2) nominant.

Catonianum vero exemplum nuper sequutus, legem scripsi, quam vir summus Alexander Albanus Cardinalis domi fixit in bibliotheca optimis quibusque libris scriptisque instructissima, cui me jamdiu, beneficio plane singulari, praeesse voluit. auctor tamen legis hic eminet magis, quod e regione tabulae historica incisa est inscriptio, quam hic primam leges:

ALEXANDER · HOR · F ·  
 ALBANVS · CARD ·  
 AD · DOMESTICAE · LAVDIS · STVDIVM  
 IN · POSTEROS · PROROGANDVM  
 BIBLIOTHECAM · A · MAIORIBVS  
 INSTITVTAM  
 QVAM · CLEMENS · XI · PONT · MAX ·  
 PATRVVS · MEVS  
 FLORENTISSIMORVM · AVCTORVM  
 LIBRIS · SCRIPTISQVE  
 INSTRVXIT  
 AVCTIS · ORDINATISQVE · PLVTEIS  
 REFECTAM · ET · NOVO · CVLTV  
 EXORNATAM  
 EXQVISITIS · OMNIVM  
 DISCIPLINARVM · VOLVMINIBVS  
 AD · TRIA · MILLIA · ET · QVINGENTA  
 LOCVPLETAVI

(1) de 1. Agr. 3. c. 2. n. 4.

(2) Famil. 1. 3. ep. 8.



PRAEFECTI • BIBLIOTHECAE

HAEC • ERVNT • OFFICIA

LIBRORVM • CODICVM • MEMBRANARVM • CHARTARVMVE • QVAECVMQVE • INLATA • DESCRIPTA  
DEDICATAVE • SIENT • CUSTOS • ESTO • QVAE • NOVA • ADCREVERINT • IN • ELENCHVM  
IN • INDICEM • REFERATQVAE • PECVNIA • EMENDORVM • VOLVMINVM • NOMINE • AVT • IN • TVITIONEM • DATA  
ADTRIBVTA • FVERIT • EAM • PECVNIAM • INFERAT • RATIONIBVS • TABVLASQVE  
ACCEPTTI • ET • EXPENSI • CONFICIATLIBRVM • SCRIPTVMVE • VTI • LIMINE • EFFERAT • DEDERIT • NEMINI  
AMICOS • DOMINO • ET • FAMILIARES • COMIS • RECIPITO • IGNOTVM • NE • QVEM  
ADMITTITOADESTO • A • MERIDIE • ALTERNIS • DIEBVS • QVI • PROFESTI • ERVNT • MANE • KALENDIS  
ET • IDIEBVS • OCTOBRI • MENSE • FERIATORARMARIA • QVVM • ABERIT • CLAVSA • VTI • SIENT • ET • OSTIVM • NE • CVI • PATEAT  
CVRATOQVI • MVNDICIAS • FACIAT • SERVVM • HABETO • CONSIDERET • QVAE • DOMINVS  
IMPERAVERIT • FIANQVID • SIBI • CREDITVM • THESAVRI • SIET • VNVS • NOSCITET • MAXIME • IDEM • LIBRIS  
SAPIENTER • VTATVR • DISCENDI • TERMINOS • ESSE • NVLLOS • MEMINERIT

II. Iamvero non leges modo veterum, sed ipsa earum capita idem fere aut persimile habuerunt initium: quippe a relativis pronominiibus prope omnia inchoantur, quemadmodum fragmenta veterum tabularum ostendunt. plebiscitum exempli causa, quo Thermenses majores Peisidae *liberi, amici sociique populi Romani* declarati sunt, haec capitum initia exhibet: *Qui Thermenses Majores Peisidae Fuerunt . . . Qui Agri Quae Loca Aedificia Publica Privatave . . . Quae Thermensium Majorum . . . Quos Thermenses Majores . . . Nei Quis Magistratus Prove Magistratu Legatus . . . Quae Legis Quodque Ious . . . Quam Legem Portorieis Terrestribus Maritimeisque . . .* ac similia his pleraque exempla sunt. nimirum ii ante indicari saepe solent, qui lege teneantur, deinde res ipsa, quam praestare debeant: ut in tabula Heracleensi apud Maffejum (1):

QVOIVS • ANTE • AEDIFICIVM • SEMITA • IN • LOCO • ERIT • IS • EAM  
SEMITAM • EO • AEDIFICIO • PERPETVO • LAPIDIBVS • PERPETVEIS  
INTEGREIS • CONTINENTEM • CONSTRATAM • RECTE • HABETO  
ARBITRATV • EIVS • AED • QVOIVS • IN • EA • PARTE • II • L. (2) VIARVM  
PROCVRATOR • ERIT

interdum res ipsa primo enunciat, circa quam lex versetur; tum ii, quibus imposita lex sit, et qua etiam conditione sit dicta (3):

QVAE • VIAE • IN • V • R • (4) SVNT • ERVNT • INTRA • EA • LOCA • VBI  
CONTINENTI • HABETABETVR • NE • QVIS • IN • IEIS • VIEIS • POST  
K • IANVAR • PRIMAS • PLOSTRVM • INTER • DIV • POST • SOLEM  
ORTVM • NEVE • ANTE • HORAM • X • DIEI • DVCITO • AGITO • NISI  
QVOD • AEDIVM • SACRARVM • DEORVM • IMMORTALIVM • CAVSSA  
AEDIFICANDARVM • OPERISVE • PVBLICE • FACIVNDEI • CAVSSA • ADVEHI  
PORTARI • OPORTEBIT • AVT • QVOD • EX • VRBE • EXVE • IEIS • LOCEIS  
EARVM • RERV • QVAE • PVBLICE • DEMOLIENDA • LOCA • ERVNT  
PVBLICE • EXPORTAREI • OPORTEBIT • ET • QVARVM • RERV • CAVSSA

(1) M. V. p. 459, n. 53.

(2) *Hac Lege.*(3) *ibid.* n. 56.(4) *Urbe Roma.*

PLOSTRA · H · L · CERTEIS · HOMINIBVS · CERTEIS · DE · CAUSSIS  
AGERE · DVCRE · LICEBIT

nec mirum, Latinos veteres trajecta ejusmodi loquutione admodum esse delectatos: quippe ad perspicuitatem et dignitatem ea plurimum confert. utramque nuper rationem sequutus, viri eminentissimi Xaverii Zeladae Cardinalis rogatu, has Museo Kircheriano leges perscripsi:

QVAE · DONO · DATA · COMPARATA · EMPTAVE · IN · MVSEVM · AD · HANC · DIEM · INLATA  
DEDICATA · SVNT · QVAEQVE · POSTEA · INFERENTVR · DEDICAVNTVR · EA · OMNIA  
COLLEGI · ROMANI · PRIVATA · PROPRIAQVE · IVRE · MANCIPI · SVNT  
SI · QVID · EORVM · QVIS · CLEPSEKIT · AVT · DOLO · MALO · CORRVPERIT · VIOLARIT  
HIC · SIBI · PONTIFICIS · MAXIMI · DECRETO · SACRIS · INTERDICTVM · SCIAT  
CIVES · HOSPITESVE · QVICVMQVE · AMANT · LITTERAS · STATIS · DIEBVS · SPECTATVM  
ADMITTVNTOR · IDEM · CVM · LIBVERIT · REDEVNT  
HIS · DESCRIBERE · QVAE · VELINT · ET · IN · CHARTIS · EFFINGERE · LICETO  
MOVERE · QVID · ALIOVE · TRANSFERRE · NE · LICETO

Verbis autem, quae ad jubendum aut vetandum aut permittendum adhibeantur, extremus utique locus fere tribuitur; eaque imperativo maxime modo usurpari solent: nec, nisi perraro, occurrit, quod in lege de aquarum ductibus animadversum est (1), pro imperativo modo indicativus, praesenti potissimum tempore usurpatus; quamquam personae verborum declinatusque, quemadmodum res quaeque poscit, varie miscentur: itaque et negotium iis, qui lectioni assueti non sunt, aliquando facessunt.

Sed tamen illud quoque, ne nimis antiqua consecretur, rursum hic admonbo, legum nempe, quae sub Augustis scriptae sunt, multo etiam expeditiorem esse rationem planioremque sermonem, quam earum, quae republica incolumi prodierunt: ut appareat, stilum priscarum legum, quum optima quaeque probarentur, multis horridulum visum esse. id, opinor, exemplo quod libro primo attulimus, satis declaratur: sed longe plurimum confirmat legis particula, quam *Regiam* quidam appellant, tu *Imperatoriam* rectius dixeris: qua lege Vespasiano Aug. datum est, ut imperio potius ea optimo jure facere posset, quaecumque ante ipsum probatis imperatoribus facere licuisset (2).

FOEDVSVE · CVM · QVIBVS · VOLET · FACERE · LICEAT · ITA · VTI  
LICVIT · DIVO · AVG · TI · IVLIO · CAESARI · AVG · TIBERIOQVE  
CLAUDIO · CAESARI · AVG · GERMANICO  
VTIQUE · EI · SENATVM · HABERE · RELATIONEM · FACERE · REMITTERE  
SENATVS · CONSVLTA · PER · RELATIONEM · DISCESSIONEMQVE · FACERE  
LICEAT · ITA · VTI · LICVIT · DIVO · AVG · TI · IVLIO · CAESARI · AVG ·  
TI · CLAUDIO · CAESARI · AVG · GERMANICO  
VTIQUE · CVM · EX · VOLVNTATE · AVCTORITATEVE · IVSSV · MANDATVVE  
EIVS · PRAESENTEVE · EO · SENATVS · HABEBITVR · OMNIVM · RERV  
IVS · PERINDE · HABEATVR · SERVETVR · AC · SI · E · LEGE · SENATVS  
EDICTVS · ESSET · HABERETVRQVE  
VTIQUE · QVOS · MAGISTRATVM · POTESTATEM · IMPERIVM · CVRATIONEMVE  
CVIVS · REI · PETENTES · SENATVI · POPVLOQVE · COMMENDAVERIT  
QVIBVSQVE · SVFFRAGATIONEM · SVAM · DEDERIT · PROMISERIT  
EORVM · COMITIIS · QVIBVSQVE · EXTRA · ORDINEM · RATIO · HABEATVR  
VTIQUE · EI · FINES · POMERII · PROFERRE · PROMOVERE · CVM · EX  
REPVBICA · CENSEBIT · ESSE · LICEAT · ITA · VTI · LICVIT · TI ·  
CLAUDIO · CAESARI · AVG · GERMANICO  
VTIQUE · QVAECVMQVE · EX · VSV · REIPVBICAE · MAIESTATE · DIVINARVM  
HVMANARVM · PVBLICARVM · PRIVATARVMQVE · RERV · ESSE · CENSEBIT

(1) inser. 304.

(2) Grut. p. 242.

EI · AGERE · IVS · POTESTASQVE · SIT · ITA · VTI · DIVO · AVG ·  
 TIBERIOQVE · IVLIO · CAESARI · AVG · TIBERIOQVE · CLAVDIO · CAESARI  
 AVG · GERMANICO · FVIT  
 VTIQVE · QVIBVS · LEGIBVS · PLEBEIVE · SCITIS · SCRIPTVM · FVIT · NE  
 DIVVS · AVG · TIBERIVSVE · IVLIVS · CAESAR · AVG · TIBERIVSQVE  
 CLAVDIVS · CAESAR · AVG · GERMANICVS · TENERENTVR · IIS · LEGIBVS  
 PLEBISQVE · SCITIS · IMP · CAESAR · VESPASIANVS · SOLVTVS · SIT  
 QVAEQVE · EX · [QVAQVE · LEGE · ROGATIONE · DIVVM · AVG ·  
 TIBERIVMVE · IVLIVM · CAESAREM · AVG · TIBERIVMVE · CLAVDIVM  
 CAESAREM · AVG · GERMANICVM · FACERE · OPORTVIT · EA · OMNIA  
 IMP · CAESARI · VESPASIANO · AVG · FACERE · LICEAT  
 VTIQVE · QVAECVMQVE · ANTE · HANC · LEGEM · ROGATAM · ACTA · GESTA  
 DECRETA · IMPERATA · AB · IMPERATORE · CAESARE · VESPASIANO  
 AVG · IVSSV · MANDATVVE · EIVS · A · QVOQVE · SVNT · EA · PERINDE  
 IVSTA · RATAQ · SINT · AC · SI · POPVLI · PLEBISVE · IVSSV · ACTA  
 ESSENT

## SANCTIO

SI · QVIS · HVIVSCE · LEGIS · ERGO · ADVERSVS · LEGES · ROGATIONES  
 PLEBISVE · SCITA · SENATVSVE · CONSULTA · FECIT · FECERIT · SIVE  
 QVOD · EVM · EX · LEGE · ROGATIONEVE · PLEBISVE · SCITO · S · VE  
 C · (1) · FACERE · OPORTEBIT · NON · FECERIT · HVIVS · LEGIS · ERGO  
 ID · EI · NE · FRAVDI · ESTO · NEVE · QVIT · OB · EAM · REM · POPVLO  
 DARE · DEBETO · NEVE · CVI · DE · EA · RE · ACTIO · NEVE · IVDICATIO  
 ESTO · NEVE · QVIS · DE · EA · RE · APVD · SE · AGI · SINITO

porro hanc ego scribendi rationem antiquae illi et jam obsoletae praeoptaverim, quae, quum a communi scribendi genere non parum abeat, molesta plerisque atque ingrata esse possit: nam hanc quidem, quae modum servat, et iustis distincta formulis, gravitatem cum elegantia conjungit, his temporibus atque his litterarum studiis, quae nunc florent, apprime convenire putaverim.

Quod reliquum est, Imperatoriae legi *Sanctionem* quasi clausulam subjectam esse vides: quae quidem aliis in legibus vel certam poenam, ut ait Papinianus (2), irrogabat iis, qui praeceptis legis non obtemperassent; vel etiam legem ipsam difficultate abrogationis sepiebat: quamobrem a Festo (3) adnotatum est, in sanctione legum adscribi, *Neve per saturam abrogato aut derogato*. neutrum tamen in Imperatoria tantum est, sed de impunitate solum, si quid contra alias leges ejusdem legis ergo factum esset. contrariam huic sanctionem paraverant octo illi tribuni plebis, qui rogationem de M. Tullio ab exsilio revocando ferre statuerant: quae quidem sanctio minime exsuli Ciceroni placebat; eratque ei suspicio malitiae alicujus, quum caput ejusmodi nulla in lege inveniretur. verba ipsa, ut legenda censeo, hic subijciam, de quibus multa ille ad Atticum scripsit (4):

SI · QVID · IN · HAC · ROGATIONE · SCRIPTVM · EST · QVOD · PER · LEGES  
 PLEBISVE · SCITA · PROMVLGARE · ABROGARE · DEROGARE · OBROGARE  
 NON · LICEAT · NON · LICVERIT · QVODVE · EI · QVI · PROMVLGAVIT  
 ABROGAVIT · DEROGAVIT · OBROGAVIT · OB · EAM · REM · POENAE  
 MVLTAEVE · SIT · E · H · L · N · R · (5)

II. Venio jam ad edicta, quae Dionysius Halicarnassensis (6) τα των δικαιων και αδικων επιταγματα appellat; sed quibus tamen singuli magistratus non modo quae juris erant, sed etiam quae ad ritus et consuetudines pertinerent, ac quaecumque e republica visa essent, vel ex sua vel ex senatus auctoritate edicebant.

Edicto cuilibet a fausto omine initium erat, ejusque rei caussa duae illae litterae B-

(1) *Senatusve Consulto*.  
 (2) l. 41. D. de poen.

(3) v. *Satura*.  
 (4) l. 3. ep. 23.

(5) *Ejus Hac Lege Nihil Rogator*.  
 (6) *Antiq. Rom.* l. 5. p. 336.



F. praeponi solebant, de quibus dixi ad inser. cccv. eo saue spectat Plauti versus (1),

*Bonum factum est, edicta ut servetis mea:*

idemque alludentes designarunt, qui olim, Caesarem ut carperent, quod peregrinos in senatum allegisset, libellum tamquam edictum proposuerunt his verbis (2):

BONVM · FACTVM  
NE · QVIS · SENATORI · NOVO · CVRIAM · MONSTRARE · VELIT

aliud initium fuisse puto, quod veteres, ut ait Tullius (3), omnibus rebus agendis praefabantur, *Quod Bonum, Faustum, Felix Fortunatumque Sit.* hoc certe initio aliquoties utitur Livius, quum magistratus aliquid edicentes inducit; ut quum de rege post Romulum creando haec ab Interrege prolata narrat (4):

QVOD · BONVM · FAUSTVM · FELIXQVE · SIT · QVIRITES · REGEM · CREATE  
ITA · PATRIBVS · VISVM · EST · PATRES · DEINDE · SI · DIGNVM · QVI  
SECYNDVS · AB · ROMVLO · NVMERETVR · CREARITIS · AVCTORES  
FIENT

Praefati autem felicitatem, nomina sua magistratus primo scribebant et muneris officiique sui appellationem: tum narrationem fere ordiebantur, post quam brevissime sententiam suam explicabant. si quid vetarent, formula erat *Non Placere*: quam et Augustus usurpavit: quippe ut Athletarum spectaculo muliebrem sexum submoveret, edixit, inquit Svetonius (5), *Mulieres ante horam quintam venire in theatrum Non Placere.* at si quid fieri juberent, plerumque se *Edicere* pronunciabant, ut apud Livium consul Quintius Cincinnatus (6).

EDICIMVS  
OMNES · QVI · IN · VERBA · IVRASTIS  
CRASTINA · DIE · ARMATI  
AD · LACVM · REGILLVM · ADSITIS

ac primae fere personae figura loquuti videntur: quemadmodum veterum quoque edictorum particulae, quas Gellius in libros suos retulit, satis declarant. haec enim, exempli causa, praetoris verba fuisse scribit ex edicto perpetuo de flamine Diali et de sacerdote Vestae (7): *Sacerdotem Vestalem Et Flaminem Dialem In Omni Mea Iurisdictione Iurare Non Cogam.* erant autem edicta perpetua, quae praetores singuli inito magistratu proponebant, ut sciret populus quo illi jure cum civibus usuri essent: itaque in certam deinde juris reddendi normam transierunt: e quibus demum sub Hadriano Aug. *Edictum Iulianum Perpetuum* exstitit, legis instar, in plura capita tributum, de quo legendi tibi sunt Ranehinus maxime et Gothofredus. porro quum edictorum ingens et varia sit materies; formulae etiam in promptu sunt permultae, sive circa res sacras edicta versentur, sive rem militarem aut administrationem urbanam attingant.

Sed tamen edictorum exempla, quae minus antiqua, ea oratorio prope stilo exarata sunt, nec sine praefatione aliqua esse solent: quo pacto edictum suum Nerva scripsit (8). ea vero edictorum forma si aridet, nihil tibi expeditius esse potest: cui etiam Cassiodorii epistolae magno adjumento erunt: plurimum enim ille copia orationis et ejusmodi praefationibus, quae jamdiu diplomatum propriae sunt, in primis abundat (9).

III. Est aliud edictorum genus, quae Laeonum prope more scripta dixeris: adeo contracta omnia, et nihil in illis redundans: quin ipsa magistratuum nomina desideran-

(1) Poen. prol. v. 16.

(2) Svet. in Iul. c. 80. n. 4.

(3) de Divin. l. 1. c. 43. n. 102.

(4) l. 1. c. 7. n. 17. et c. 11. n. 28. etc.

(5) in Aug. c. 44. n. 8.

(6) l. 3. c. 8. n. 20.

(7) N. A. l. 10. c. 15. v. l. 11. c. 17.

(8) v. inser. 306. et Grut. p. 647. n. 6. 7.

(9) v. Maff. Dipl. p. 92.

tur; quod nempe satis esse videbatur, si locus ipse ea publice proposita indicaret. huiusmodi est, quod olim prope Tiberis ripam sub Aventino, ubi emporium fuit, reperi-  
tum esse, tradit Nardinus (1):

QVIDQVID · VSVARIVM · INVEHITVR  
ANSARIVM · NON · DEBET

vectigal scilicet, qualecumque id fuerit, quod ceteri pendebant, qui promercialia im-  
portarent. simile autem huic, quamquam plenius paullo atque fusius, Ferrarii edictum  
quoddam, pastoribus, opinor, subulcisque litteratis nec plane vulgaribus propositum (2);

GREGI · OVILLO · ET · CAPRINO  
IN · HAC · REGIONE  
PABVLARI · AVT · ESSE  
VLTRA · BIDVVM · NE · LICETO  
SVILLO · SVNTO · PASCVA  
IN · EA · PLAGA · SYLVAE · PVBLICAE  
QVAE · PRATIS · ADIACET

elegans etiam est ejusdem Ferrarii stilo perscriptum de Novariensium nocturna quadam  
supplicatione edictum huiusmodi (3):

EX · PATRICIS · VIRI · MATRONAEQVE  
QVI · QVAEVE · IN · SVPPPLICATIONEM  
VENIENT · CVLTV · ET · HABITV  
CVM PRIMIS · GRAVI · PRO · DIEI  
MYSTERIQVE · SANCTITATE  
SVB · NOCTEM · ADSVNT · MODESTE  
COMPOSITE · PROCEDVNT · PATRIAE  
RELIGIONEM · ET · PIETATEM · PRAESEFERVNT

his tamen adseribi malim, cujus auctoritate proposita sint, quemadmodum apud Gru-  
terum duobus in edictis, nec ita antiquis, diserte initio legimus, *Ex Auctoritate Turci*  
*Aproniani V. C. Praef. Urb.* (4).

Edicta privata dixeris, quae quis privatae rei caussa promulgabat: ut quum funus  
indicebatur: cujus indicendi formulam Terentius expressit (5):

*Exsequias Chremeti quibus est commodum ire, hem tempus est:*

in cum autem modum, quum rhetoris officio Romae fungerer, edictum scripsi ad lit-  
terarium auditorum meorum certamen indicendum:

QVOD · FELIX · FAVSTVMQVE · SIT  
TRIGINTA · PRIM  
E · SCHOLA · RHETORICA · COLL · ROM ·  
SI · CVI · COMMODYM · EST · INTERESSE  
IDIEVS · AVGVSTIS  
DISCIPLINARVM · LIBERALIVM · EXPERIMENTA  
PVBLICAVNT

edictis nimirum haec quoque adnumerari possunt; quum Augusti aliquando suadendi  
etiam et docendi aut consolandi caussa edicta proposuerint (6): neque Augusti solum,

(1) Rom. I. 7. c. 9.

(2) Inscr. p. 197. n. 407.

(3) ibid. p. 191. n. 396.

(4) Grut. p. 647. n. 6. 7.

(5) Phorm. 5. 8. 37.

(6) v. inscr. 305.

sed ante hos aliquando et praetores; ut quum more majorum ferias concipiebant: nam praetorem hac formula *Compitalia* indicare consuevisse, tradit Gellius (1).

DIE · NONI  
POPOLO · ROMANO · QVIRITIBVS  
COMPITALIA · · · · · ERVNT  
QVANDO · CONCEPTA · FVERINT  
NEFAS

*Die autem noni et die pristini, die crastini, die quarti, die quinti, et similia M. Tullii aetate ac supra eam veteres scripsisse et pronunciasse, auctor est Gellius.*

## §. II.

## DE S. C. ET DECRETIS CIVITATVM

I. Quae Romae *senatus consulta*, aut, si Tribuni intercessissent, *senatus consultorum Auctoritates* appellabantur, ea in Municipiis *Decreta* aut *Decretorum Auctoritates* nominabant. sed haec quoque simili adeo ratione formaque scripta sunt, ut de utrisque simul agi posse videatur. neque vero nulli erunt usui quae hic exponuntur, quum nunc quoque contingat interdum, ut decreta publica latine scribenda sint, ac potissimum, in quibus de magnis viris ornandis agatur, atque ut in statuarum etiam basibus honoris causa incidantur: ejusmodi est, quod olim Neapoli seite admodum confecit Egizius (2), quum Regi Philippo V. Borbonio statua equestris ex aere decreta esset.

Senatus consultorum, quae exstant, non idem omnium exordium fuisse videtur, siquidem ea, qualia accepimus, inter se comparentur. sed ea causa est, quod scriptores, quorum saepe hoc unum intererat, ut senatus sententiam proferrent, sic aliquando in libros ea suos retulerunt, ut exordium totum omitterent. nihil scilicet ad ea, quae tractabant, conferre poterat, si et haec traderent, quo potissimum die, quo loco, quoniam quotque numero senatores scribendo adfuissent. haec enim sunt, quae initio passim legebantur, veteri plane more: quum in ipso senatus consulto de Bacchanalibus, quod factum est Q. Marcio Sp. Postumio Cos. (3) haec omnia perscripta sint (4). jam quod in Centumvirorum Municipii Vejentis Auctoritate nomina decurionum infra legamus, ideo factum puto, quod decretum illud extraordinarium esset, neque sollemne ac legitimum haberetur, quum Centumviri nec frequentes convenissent, et a curia atque a municipio suo abessent: itaque, quorum nomina cientur, ii non scribendo adfuisse, sed tantum adfuisse dicuntur, quo nempe statuerent, quae in decreto publico ex omnium sententia scribenda essent. decretum autem, quod a concilio conventus Cluniensis ad Pudentem Cornelianum missum fuisse diximus (5), non ipsum decretum est integrum, quod in concilio scriptum fuerat, sed sententiae tantum exemplar, unde Cornelianus, ad quem legatus tabulam detulit, patronum se cooptatum esse intelligeret.

At decreta ipsa, quae in municipiis coloniisque fierent, ne in hoc quidem a senatus consultis differre solebant (6): inter quae Pisanorum decurionum decreta eminent Augusti aeo scripta: quae Norisius minus commode *Cenotaphia* appellavit. haec at-

(1) N. A. l. 10. c. 24.

(2) Opusc. p. 396.

(3) An. Varr. 568.

(4) Fabr. p. 427. n. 1. et Egiz. in Ex-

plic.

(5) v. inscr. 310.

(6) v. Grut. p. 443. n. 6. 456. n. 1.

475. n. 4. etc.



que alia non pauca a dici nota incipiunt, quo decretum scriptum erat; indicaturque in his locus, quo decuriones convenere, Augustinum, puta, vel Curia Aug. vel templum aliquod, interdum et Bibliotheca (1): tum nomina adscribuntur eorum, quibus praesentibus decretum exaratum sit: aderant autem quasi testes, qui sententiae auctores fautoresque fuissent, tum praesertim, quum de honoribus agebatur, quod Romae etiam in more positum erat, itaque Catoni Tullius Procos. scripserat (2) *Res ipsa declarat, tibi illum honorem nostrum supplicationis jucundum fuisse, quod scribendo adfuisti: haec enim senatus consulta non ignoro ab amicissimis ejus, cujus de honore agitur, scribi solere.*

II. Post nomina eorum, qui scribendo adfuissent, versu a capite inchoato, enim protinus designabant, qui verba fecisset, sententiae scilicet auctorem, cui patres adsensi essent: quem fere magistratum fuisse video. *Quod C. Canius C. F. Saturninus II. Vir. V. F. De Augendis Honoribus L. Caesaris: . . .* (3), enimvero si multi de re eadem loquuti essent, alio veteres initio usi; *Quod Verba Facta Sunt* (4), vel *Quod Universi Verba Fecerunt* (5): tum indicato, quid magistratus proposuissent suasissentque, formula illa sollemnis subjiciebatur, *Quod De Ea Re Fieri Placuit, De Ea Re Ita Censuerunt*, vel etiam brevius, *De Ea Re Ita Censuerunt*: quae quia vota erant, litteris fere singulariis scribebantur. hinc jam quid patres censuissent, exponi solebat, rebus saepe multis et breviter et dilucide explicatis, quas aegre quis vel longa nunc oratione expediret.

Singula jam veteri in exemplo animadvertas, licet, nisi quod consules tantum initio desiderantur: quippe infra ambo in ipsa sententia cientur, item ii, qui in annum proximum designati essent: est autem exemplum ejus senatus consulti, quod M. Caecilius ad M. Tullium misit (6).

PRIDIE · KAL · OCT · IN · AEDE  
 APOLLINIS · SCRIBENDO · ADFVERVNT  
 L · DOMITIUS · CN · F · AHENOBARBUS  
 Q·CAECILIUS·Q·F·METELLUS·PIVS·SCIPIO  
 L · VILLIUS · L · F · POMP · ANNALIS  
 C · SEPTIMIUS · T · F · QVIRINA  
 C · LVCCEIUS · C · F · PVP · HIRRVIO  
 C · SCRIBONIUS · C · F · POP · CVRIO  
 L · ATEIUS · L · F · AN · CAPITO  
 M · OPPIUS · M · F · TERENTINA

QVOD · M · MARCELLVS · COS · (7) V · F · DE · PROVINCIIS · CONSVLARIBVS  
 D · E · R · I · C · VTI · L · PAVLLVS · C · MARCELLVS · COS · CVM  
 MAGISTRATVM · INISSENT · EX · A · D · KAL · MART · QVAE · IN · SVO  
 MAGISTRATV · FVTVRAE · ESSENT · DE · CONSVLARIBVS · PROVINCIIS  
 AD · SENATVM · REFERRENT · NEVE · QVID · PRIVS · EX · KAL ·  
 MART · NEVE · QVID · CONIVNCTIM · DE · EA · RE · REFERRETVR  
 A · CONSVLIBVS · VTIQVE · EIVS · REI · CAVSSA · PER · DIES · COMITIALES  
 SENATVM · HABERENT · S · Q · C · FACERENT · ET · CVM · DE · EA  
 RE · AD · SENATVM · REFERRETVR · A · CONSVLIBVS · QVI EORVM  
 IN · CCC · IVDICIBVS · ESSENT · EOS · ADDVCERE · LICERET · SI  
 QVID · DE · EA · RE · AD · POPVLVM · PLEBEMVE · LATO · OPVS · ESSET  
 VT · SER · SVLPICIUS · M · MARCELLVS · COS · PRAET · TRIB · PL ·  
 QVIBVS · EORVM · VIDERETVR · AD · POPVLVM · PLEBEMVE · FERRENT  
 QVOD · II · NON · TVLISSENT · VTI · QVICVMQVE · DEINCEPS · ESSENT  
 AD · POPVLVM · PLEBEMVE · FERRENT

(1) Grut. p. 475. n. 4.

(2) Fam. l. 15. ep. 6.

(3) Noris, Cen. Pis. n. 2.

(4) v. inser. 307.

(5) v. inser. 311.

(6) Famil. l. 8. ep. 8.

(7) Cos. an. Varr. 703.

At quum de viris fortibus honorandis ageretur, primum res gestas ac meritum cuiusque commemorabant, ut deinde iudicii testimoniique sui laudem tribuerent. multa huiusmodi exempla in M. Tullii Philippicis praesto sunt (1): itaque verba hic tantum proferam, quibus ille senatus consultum de D. Bruto faciendum censuit: cuius quidem cetera illa, quae, quum senatus consulta scriberentur, praeponi solebant, facile quisque supplere possit (2).

CVM · D · BRVTVS · IMP · COS · DESIGNATVS · PROVINCIAM · GALLIAM  
IN · SENATVS · POPVLIQVE · ROMANI · POTESTATE · TENEAT · CVMQVE  
EXERCITVM · TANTVM · TAM · BREVI · TEMPORE · SYMMO · STVDIO  
MVNICIPIORVM · COLONIARVMQVE · PROVINCIAE · GALLIAE · OPTIME  
DE · RE · PVBLICA · MERITAE · MERENTISQVE · CONSCRIPSERIT  
COMPARARIT · ID · EVM · RECTE · ET · ORDINE · EXQVE · RE · PVBLICA  
FECISSE · IDQVE · D · BRVTI · PRAESTANTISSIMVM · MERITVM · IN  
REM · PVBLICAM · SENATVI · POPVLOQVE · ROMANO · GRATVM · ESSE  
ET · FORE · ITAQVE · SENATVM · POPVLVMQVE · ROMANVM  
EXISTIMARE · D · BRVTI · IMP · COS · DESIGNATI · OPERA · CONSILIO  
VIRTUTE · INCREDIBILIQVE · STVDIO · ET · CONSENSV · PROVINCIAE  
GALLIAE · REI · PVBLICAE · DIFFICILLIMO · TEMPORE · ESSE  
SVBVENTVM

codem modo, quum in senatu quidam auctores fuissent, ut qui *Sextilis* mensis dicebatur, ex Octaviani cognomine *Augustus* nuncuparetur, in senatus consulto caussae allatae sunt, ob quas patres in eam sententiam venissent, deque ea re ita censuerunt (3):

CVM · IMP · CAESAR · AVGVSTVS · MENSE · SEXTILI · ET · PRIMVM  
CONSVLATVM · INIERIT · ET · TRIVMPHOS · TRES · IN · VRBEM  
INTVLERIT · ET · EX · IANICVLO · LEGIONES · DEDVCTAE · SEQVVTAEQVE  
SINT · EIVS · AVSPICIA · AC · FIDEM · SED · ET · AEGYPTVS · HOC  
MENSE · IN · POTESTATEM · POPVLI · ROMANI · REDACTA · SIT  
FINISQVE · HOC · MENSE · BELLIS · CIVILIBVS · IMPOSITVS · SIT  
ATQVE · OB · HAS · CAVSSAS · HIC · MENSIS · HVIC · IMPERIO  
FELICISSIMVS · SIT · AC · FVERIT · PLACERE · SENATVI · VT · HIC  
MENSIS · AVGVSTVS · APPELLETVR

II. Haec plerumque senatus consultorum decretorumque veterum forma erat; sed nonnulla tamen in quibusdam occurrunt, quae in ceteris desiderantur. nam initio aliquando magistratus enunciabatur, qui senatum consulisset, tum nempe, quum senatum ille idem vocasset, quo de iis, quae muneris sui essent, ad eum referret (4), ut quum consules de Bacchanalibus tollendis retulerunt. deest interdum vetus formula D · E · R · I · C · pro qua scriptum est *Ita Exdicendum Censuerunt*, vel etiam post nomina testium sententia senatus continuo subjecta (5). huc, si libet, arbitrorum sententiam referas de finium controversiis inter Genuates et Veturios (6): horum legatis praesentibus, arbitri Q. et M. Minutii, postquam de controversiis cognituri, agros populi utriusque lustrassent, *Romae Coram Sententiam Ex Senati Consulto Dixserunt Eidib. Decemb. L. Caecilio Q. F. Q. Minutio Q. F. Cos.* (7) quae mihi sententia pro ipso senatus consulto in aere incisa esse videtur.

Est quoque, vetustissimorum consultorum instar, ejusmodi senatus responsum, ut patres ipsi Tiburtium legatos, quibus senatus datus fuerat, alloquentes inducantur: quod ego hic non invitus afferam; est enim, ut illis temporibus, elegans et plenum dignitatis (8):

(1) orat. 3. 5. 9. 10. 11. 14.

(2) phil. 5. c. 13. n. 36.

(3) Macrob. Sat. 1. 1. c. 12.

(4) v. inser. 307. et Fabr. p. 427. n. 1.

(5) Fabr. ibid. Grut. p. 499. n. 12.

(6) Grut. p. 204.

(7) An. Varr. 637.

(8) Grut. p. 499. n. 12. Viscont. Iconogr. Rom. part. 1. cap. 2. §. 16.



L · CORNELIVS · CN · F · PR · SEN · CONS · A · D · III · NONAS · MAIAS · SVB · AEDE · KASTORVS  
 SCR · ADF · A · MANLIVS · A · F · SEX · IVLIVS · L · POSTVMIVS · S · F ·  
 QVOD · TEIBVRTES · V · F · (1) QVIBVSQVE · DE · REBVS · VOS · PVRGAVISTIS · EA · SENATVS  
 ANIMVM · ADVORTIT · ITA · VTEI · AEQVOM · FVIT · NOSQVE · EA · ITA · AVDIVERAMVS  
 VT · VOS · DEIXISTIS · VOBIS · NONTIATA · ESSE · EA · NOS · ANIMVM · NOSTRVM  
 NON · INDOVCBAMVS · ITA · FACTA · ESSE · PROPTER · EA · QVOD · SCIBAMVS  
 EA · VOS · MERITO · NOSTRO · FACERE · NON · POTVISSE · NEQVE · VOS · DIGNOS · ESSE  
 QVEI · FACERETIS · NEQVE · ID · VOBIS · NEQVE · REI · PÓBLICAE · VOSTRAE  
 OITILE · ESSE · FACERE · ET · POSTQVAM · VOSTRA · VERBA · SENATVS · AVDIVIT  
 TANTO · MAGIS · ANIMVM · NOSTRVM · INDOVCIMVS · ITA · VTEI · ANTE  
 ARBITRABAMVR · DE · EIEIS · REBVS · AF · VOBIS · PECCATVM · NON · ESSE  
 QVONQVE · DE · EIEIS · REBVS · SENATVEI · PVRGATI · ESTIS · CREDIMVS · VOSQVE  
 ANIMVM · VOSTRVM · INDOVCERE · OPORTET · ITEM · VOS · POPVLO  
 ROMANO · PVRGATOS · FORE

quam in suspicionem Tiburtes apud Romanos vocati essent, difficile est definire: nisi haec ad nimis antiqua tempora revocemus, quum agro multati a Livio dicuntur (2), non ob recens tantum rebellionis commune cum aliis Latinis crimen, sed quod, taedio imperii Romani, cum Gallis, gente efferata, arma quondam consociassent (a). utcumque se ea res habuit, descripta haec ex aenea Fulvii Vrsini tabula tradit Gruterus, eamque veterem ac germanam esse Falretius quoque censuit (3). sed elevavit Maffejus, litterati alicujus viri lusum fuisse affirmans (4). scriptura certe, ut ille ait, et lingua mire dissentiunt. litterae ipsae consonantes geminantur, quod priscis temporibus non fiebat: quod tamen ei fortasse vertendum vitio est, qui exscripsit. tum forma etiam, ut vocat, *senatus consulti* valde ille offenditur, de qua minus, opinor, laborandum est: Syracusanos quoque legatos in senatum introductos narrat Livius (5), atque ita responsum esse: *Virum bonum egregiumque socium Hieronem esse, atque uno tenore, ex quo in amicitiam populi Romani venerit, fidem coluisse; ac rem Romanam omni tempore ac loco munifice adjuvisse: id perinde ac deberet, gratum populo Romano esse:* et alia huiusmodi. Tiburtes autem quum senatus culpa liberasset, quidni sententia ejus digna legis videretur, quam in aes inciderent, domumque ad cives suos tamquam senatus testimonium referrent? quidni et testes scribendo adessent, ut responso senatus nihil additum nihil detractum esse Tiburtes certo scirent? ipsa porro sententia belle sibi constat, eademque, unam aut alteram vocolam si addideris, etiam dilucida fiat. *Quod, Tiburtes, Verba Fecistis, Senatus, Ita Vti Aequum Fuit, De Quibusque* (id est, ut saepe et Plautus usurpavit, *De Quibuscumque*) *Rebus Vos Purgavistis, Ad Ea Animum Advertit. Nos Quidem Ita Ea Audiveramus Esse, Vt Vos Dixistis Vobis Nunciata Esse: Sed Ea Nos Animum Nostrum Non Inducebamus, Ita Facta Esse:* et quae sequuntur: *Nunc Vero Postquam Vestra Verba Senatus Audivit:* et reliqua.

inf. Quia demum quaedam senatus consulta in exemplaria plura transcribebantur (6), ut per Italiam dimitterentur; idcirco in singulis tum exemplaribus adscribebant, quo unumquodque loco in aes incidi et proponi deberet. itaque in tabula senatus consulti de Bacchanalibus, quae Tirioli in Brutiis reperta est, leges ad calcem IN · AGRO · TEVRANO: qui tractus ad fretum Siculum est, atque a Strabone Ταυριζων χώρα dicitur (7). exemplar, non Romae, sed in sua quodque regione, quo missum esset, incisum acri, ipsa senatus consulti verba declarant: *Atque Vtei Hoco in Tabulam Ahenam Incideretis,*

(1) V. F. Verba Fecistis.

(2) l. 8. c. 12. n. 14.

(a) Ceterum Enn. Quir. Viscontius in Iconogr. Rom. part. 1. c. 2. §. 16. qui haec eandem inscriptionem ad

fidem autographi exegit, putat hoc senatus responsum factum fuisse ann. V. C. Varr. 664. aut 665. quum nempe sociale bellum exarscet.

(3) Inscr. p. 243. D.

(4) Art. Cr. Lap. p. 160. et p. 344.

(5) l. 22. c. 22. n. 37.

(6) Liv. l. 39. c. 9. n. 14.

(7) l. 3. p. 254. v. Egiz. in Expl. p. 169.



*Ita Senatus Aiquom Censuit, Vteique Eam Figier Ioubeatis, Vbei Facilumed Gnoscier Potisit.*

Municipalium deeretorum illa maxime propria, ut post formulam D · E · R · I · C · addatur aliquando qui primus censuerit: *Primo Censente Calpurnio Certo* (1): quamquam id ipsum in fine etiam legimus, quemadmodum libro primo adnotatum est (2): tum etiam ut extremo loco iterum scribatur *Censuerunt*, quo verbo Decuriones decreti formam approbasse significetur (3). id tamen verbum in quibusdam etiam senatus consultis leges (4), quibus etiam senatorum numerus, qui in curiam venissent, adscriptus est: *In Senatu Fuerunt* ccclxxxiii (5). ut vero quibusdam in municipiis ordo decurionum *Senatus* audiebat, ita horum decreta aliquando *Senatus Consulta* appellata sunt. exemplo sit Aquilejensium decretum (6), quo statuam C. Alvio Pollioni deereverunt, quod repugnantibus, ut reor, ceteris, ne *Praefecti Iuri Dicundo* in annum proximum crearentur, ultro ipse nomen dedisset. inest vero et illud singulare, quod magistratus initio enuncientur recto easu: quamquam id fortasse eo consilio factum, ut constaret, eosdem fuisse, qui in curia de Alvi honoribus verba fecissent:

K · NOVEMB ·

L · NONIVS · RVFINVS · POMPONIANVS  
Q · VESONIVS · FVSCVS · P · I · D ·  
SCRIB · ADF · C · LVCRETIVS · HELVIANVS  
M · TREBIVS · PROCVIVS  
L · CAMMIVS · MAXIMVS

S · C ·

CVM · PRONA · VOLVNTATE · HONESTISSIMO · ANIMO · VLTRO · C ·  
ALVIVS · POLLIO · III · VIR · I · D · IN · PROXIMVM · ANNV ·  
PROFESSVS · SIT · QVO · FACTO · HAESITATIONI · PVBLICAE · IN  
PARTEM · MORAM · ADEMERIT · PLACERE · EI · QVO · MAGIS · ETIAM  
CETERI · AD · BENEFACIENDVM · IN · REPVB · PROVOCENTVR  
STATVAM · EQVESTREM · AVREAM · IN · FORO · N · PONI · CENSVER ·  
PRIM · CENS · C · LVCRETIVS · HELVIANVS

Ceterum Deeretorum exempla, et quae in municipiis perscripta sint, alia saepe aliis vel initiis vel distributionibus vel clausulis distincta inveniuntur, ut genus eorum unum, formulae plures fuisse videantur. quapropter ne nos quidem unum semper circa exemplum haerebimus, ac, si res poseat, aliquid etiam aliquando novabimus, formulis tamen usi et aptis et antiquis. velut si ad eum, qui in amplissimum ordinem cooptatus fuerit, Decreti exemplum publicae mittendum sit, cui subseribi oporteat, unde descriptum id fuerit; et quo illud loco adservetur, non modo formulas recte quis ad decretum condendum e quibuscumque veterum decretis legat, sed commode etiam, opinor, antiquorum Diplomatum clausulam huc transferet: quemadmodum a me etiam nuper Anagnini municipii nomine Decretum perscriptum est, ejus exemplum Decuriones ad praestantissimum virum et de se optime meritum honoris causa miserunt. est autem hujusmodi:

(1) Grut. p. 408. n. 1.

(2) ad inser. 311.

(3) v. inser. eand.

(4) Grut. p. 503. n. 1.

(5) Don. Cl. 2. n. 66.

(6) id. ibid. n. 64.

PIO • VI • PONTIFICE • MAXIMO

ANDREAE • CONTI • DEC :

QVATVORVIRATV •

MARCI • ROMITI

IACOBI • PESOLI

ALEXANDRI • TEDESCHINI

XXXX • VIRI • MVNICIPI • ANAGNI • IN • CVRIAM

QVVM • CONVENISSENT • PLACVIT • VNIVERSIS

ANTON • LAMBERTVM • RVSCONVM • V • C •

DOMO • CENTO • ANTISTITEM • VRBANVM • XII • VIRVM • SVMPTEVS • MINVENDIS  
 QVI • REI • PVBLICAE • CAVSSA • SVSCEPTA • MVNICIPIVM • ANAGNI • CONSIGLIO  
 ET • GRATIA • ADIVVERIT • CIVIVMQVE • CONTROVERSI • EX • OMNIVM  
 SENTENTIA • COMPOSITIS • SECVRITATEM • OTIVM • CONCORDIAMQVE • CONSTITVERIT  
 OB • TANTA • EIVS • IN • SINGVLOS • VNIVERSOSQVE • MERITA • IPSVM  
 FRATRESQVE • EIVS • DIONYSIVM • ET • PETRVM • RVSCONOS • ET • PETRI  
 LIBEROS • POSTEROSQVE • EORVM • IN • AMPLISSIMVM • ORDINEM • COOPTARI  
 EIVSQVE • REI • CAVSSA • DECRETVM • CONSCRIBI • VT • DECVRIONVM • NVMERO  
 HABERENTVR • VTIQVE • HONORES • MVNICIPALES • PETERE • ET • EO • QVISQVE  
 IVRE • GERERE • POSSET • QVO • QVI • OPTIMO • ANTE • GESSISSENT • ITEM • NE  
 QVOD • AB • IS • VECTIGAL • MVNICIPI • ANAGNI • EXIGERETVR • CENSVERVNT  
 ACTVM • NON • IANVAR •

ANNO • M • DCC • LXXVIII •

DESCRIPTVM • ET • RECOGNITVM

EX • CODICE • AVREO

QVI • IN • TABVLARIO • ADSERVATVR

N • VI •

X • KAL • APR • AN • M • DCC • LXXX •

ANDREAS ( ) GISCVS

ADIVTOR • ET • SCRIBA • IIII • VIR • R • P • C •

V. Hactenus quae prolata sunt, eruditioni data dixēris: nam usus quidem et imitationis caussa, diutius hoc in argumento videor mihi esse versatus: quum perraro decreta huiusmodi latine nunc scribantur, nec semper rem seriam agenti ea includer omnia liceat, quae antiquorum magis, quam nostrae consuetudini respondeant. sed tamen fusius haec dicta esse iuverit, vel si quis forte ludibundus antiquitatem exprimere, et quae novae res sunt, eas velit prisco more et ornatu repraesentare: quod olim quidam animi caussa satis lepide fecerunt. atque ejus rei ergo non invitus hoc loco commentitium senatus consultum subjiciam ex Satyra Lipsii Menippaea, ad cujus exemplar, si otium erit et voluntas, alia quis facile possit perscribere, quamquam in ea ego sententia habito, res ut ludicras existimen et Latini sermonis et stili huius dignitati parum semper convenire.

S • C •

M • TVLLIO • M • F • CICERONE • M • ATTIO • PLAVTO • COS • PRID • KAL • OCTOB • IN  
 AEDE • APOLLINIS • PALATINI • SCRIBVND • ADFVERVNT • M • TERENTIUS • VARRO  
 P • NIGIDIUS • FIGVLVS • VERRIVS • FLACCVS • C • CORNELIVS • TACITVS  
 QVOD • M • TVLLIVS • COS • V • F • DE • CORRECTORIBVS • D • E • R • S • ITA • CENSVIT  
 CORRECTORES • HOC • DIFFICILLIMO • REI • LITTERARIAE • TEMPORE • VTILES  
 NECESSARIOSQVE • ESSE • NON • EQS • TAMEN • PROMISCVOS • NON • INDOCTOS

RVPICES • PETRONES • SED • QVI • CONSILIO • REQVE • APSE • IVVARE • SCRIPTORES  
PRISCOS • POSSINT

FA • RE • SENATVI • PLACERE • VTI • LEX • ANNARIA • SERVETVR • NEV • QVIS • MINOR  
XXV • ANNIS • CORRECTVRAM • PETERE • GERERE • POSSIT • QVIQVE • ALITER  
PETIERIT • GESSERIT • VITIO • CREATVM • VIDERI • ET • CORRECTIONES • EIVS  
IN • ACTA • NON • MITTI • IN • SENIBVS • DEPONTANIS • QVIQVE • MAIORES • ANNIS  
LX • SIREMPSE • LEGEM • ESSE

VTIQVE • CENSORES • M • FABIVS • POMPONIVS • ATTICVS • ALTER • AMOVE • DE  
DOCTRINA • DEQVE • MORIBVS • PETITORVM • COGNOSCANT • STATVANT • IVDICENT  
QVOS • HISCE • ADMISERINT • PROBOS • ESSE • QVOS • REIECERINT • REPVLSOS  
ET • REICVLOS

SI • QVIS • E • LIBRIS • BONIS • FIDISQVE • CORREXERIT • LAVDI • SEMPER • ESSE • SI  
QVIS • E • CONIECTVRIS • NOXAE • NISI • EAE • CLARAE • LIQVIDAE • CERTAE • SINT  
QVI • ALITER • CVMQVE • DIVINATIONIBVS • VSVS • IN • EO • LEGES • VETERES  
ET • EDICTA • DE • MATHEMATICIS • VALERE • PORCIAS • FABIAS • SEMPRONIAS  
LEGES • NON • VALERE

ITEMQVE • QVONIAM • DVPLEX • MORBVS • CORRECTORES • PLEROS • TENEAT • LITIGIVM  
ET • PRVRIGO • VTRIQVE • REI • SENATVM • PROSPECTVM • PRAECAVTVMQVE  
VELLE • DE • LITIGATORIBVS • VTI • QVICVMQVE • POST • HVNC • DIEM • CVM • ALTERO  
VELITARI • PRAELIARI • VERBIS • SCRIPTISVE • AVSVS • FVERIT • EVM • EOSVE • IN • LVDI  
GLADIVM • DAMNARI • VTI • PROXIMO • MVNERE • COLLIGATI • INTER • SE • PVGNENT  
SINE • MISSIONE • DE • PRVRIGINOSIS • QVOS • MANVM • STILVMQVE • ABSTINERE  
A • NVLLO • LOCO • AVDIANT • SANO • SIVE • INSANO • VTI • CORNELIVS • CELSVS  
AEDILIS • DISPICIAT • QVI • EX • IIS • SANARI • POSSINT • QVIQVE • NON • POSSINT  
QVI • POSSE • VIDEVNTVR • EOS • DEPONI • IN • TEMPLO • AESCVLAPII • QVOD  
IN • INSVLA • EST • IBIQVE • ELLEBORI • BIBERE • QVANTVM • SATIS • ERIT • QVI  
NON • POSSINT • EOS • IN • EXSILIVM • AD CIMMERIOS • DEPORTARI • VBI • LVCEM  
NON • VIDEANT • ET • LIBROS • NON • LEGANT • SI • QVIS • AMBIGVAE • VALETVDINIS  
ERIT • EVM • AD • TEMPVS • RELEGARI • IN • ATLANTIDEM • INSVLAM • VBI  
MEMORANTVR • SOMNIA • NON • VIDERI

QVONIAMQVE • MVLTII • EX • HOC • ORDINE • PVLSATOS • ACCEPTOSQVE • INDIGNE • SE  
A • CORRECTORIBVS • QVERANTVR • PLACERE • VNIVERSIS • CONSCRIPTIS • EAM  
INIVRIAM • CONTVMELIAMVE • IMPVNEM • NON • ESSE • IN • VIVIS • MORTVISQVE  
IN • VIVIS • PLACERE • VTI • L • CASSIVS • PRAETOR • DE • CAYSSA • EORVM  
COGNOSCAT • QVOSQVE • NOXAE • EIVS • COMPERERIT • EOS • MELLE • ET • SESAMO  
OBLITOS • DIEM • VNVM • DESTITVI • AD • CALDVM • SOLEM • STILIS • VESPARVM  
ET • MVSCARVM • IN • MORTVIS • VTI • MENIPPVS • PHILOSOPHVS • QVI • VIAM  
NOVIT • AD • INFEROS • PROFICISCATVR • ET • CVM • AEACO • DE • POENIS  
EORVM • AGAT

HAEC • ITA • CENSVERVNT • SI • QVIS • HVIC • S • C • INTERCESSISSET • PLACERE  
AVCTORITATEM • PERSCRIBI • DEQVE • EA • RE • AD • SENATVM • POPVLYMQVE  
REFERRI



## §. III.

## DE TABVLIS FOEDERVM ET HOSPITIORVM

**F**oedera latine scribi plurimum refert: quae enim vigent linguae, atque in usu omnium sunt, eae, vocabulis, quae in honore erant, paulatim cadentibus, permutantur, nec iam iisdem verbis in ore posterorum ea semper designant, quae apud maiores indicabant. quamobrem Polybii aetate multum haesisse Romani perhibentur (1), quum foedus legerent, quod primum cum Carthaginiensibus ictum fuerat. Latinus contra sermo, quo maxime viri eruditi in scribendo utuntur, quum e librorum veterum fontibus manet, nec alios nunc fines habeat, quam qui olim florentibus literis descripti sunt; ita communis omnium est, ut nemo quidquam mutare audeat, nemo vel uno vocabulo ad praeposteram significationem iure uti possit. quare, quum maxime intersit foederum leges, ne controversiae nequam existant in posterum, dilucide scripta esse, suamque nominibus, verbis, sententiis vim perpetuo manere; non alius quisquam id melius ac felicins adsequatur, quam qui tabulas ejusmodi latine potissimum scribendas conficiendasque curaverit. viderant hoc maiores, quorum foedera et conditiones pactionesque bellicas Latinis perdu litteris scripta esse videmus: neque in Italia solum, sed apud Gallos etiam et Germanos et Britannos id olim obtinuisse constat. testes tot foederum συλλογαί, quae jamdiu in lucem editae sunt, ac Rimerii potissimum et Sandersonii codices septemdecim: sume quos libet in manus; in actis hujusmodi scribendis primos fere proavos nostros vernacula usos esse lingua reperies: maiores, quibus saepe studii satis ac litterarum non erat, Latina tamen probasse.

Vt ut haec sunt, non cum me tamen esse profiteor, quem ii audire debeant, qui negotium publicum agunt. sed si cui aliquando publica foedera latine describenda erunt, optimum ille habebit exemplum conditiones pacis, quas Asiae regi Antiocho Senatus Populique Romani nomine P. Scipio dixit (2); vel quibus tandem ex decem legatorum sententia foedus conscriptum est (3). addam et quas Aetolis senatus tulit, quum legatos Roman pacis petendae causa misissent (4).

IMPERIVM · MAIESTATEMQVE · POPVLI · ROMANI · GENS · AETOLORVM  
 CONSERVATO · SINE · DOLO · MALO · NE · QVEM · EXERCITVM · QVI  
 ADVERSVS · SOCIOS · AMICOSQVE · EORVM · DVCETVR · PER · FINES  
 SVOS · TRANSIRE · SINITO · NEVE · VLLA · OPE · IVVATO · HOSTES  
 EOSDEM · HABETO · QVOS · POPVLVS · ROMANVS · ARMAQVE · IN  
 EOS · FERTO · BELLVMQVE · PARITER · GERITO  
 PERFVGAS · FVGITIVOS · CAPTIVOSQVE · REDDITO · ROMANIS · SOCIISQVE  
 PRAETERQVAM · SI · QVI · CAPTI · CVM · DOMOS · REDISSENT · ITERVM  
 CAPTI · SVNT · AVT · SI · QVI · EO · TEMPORE · EX · IIS · CAPTI  
 SVNT · QVI · TVM · HOSTES · ERANT · ROMANIS · CVM · INTER  
 PRAESIDIA · ROMANA · AETOLI · ESSENT · ALIORVM · QVI · COMPAREBVT  
 INTRA · DIES · CENTVM · CORCYRAEORVM · MAGISTRATIBVS · SINE  
 DOLO · MALO · TRADANTVR · QVI · NON · COMPAREBVT · QVANDO  
 QVISQVE · EORVM · PRIMVM · INVENTVS · FVERIT · REDDANTVR  
 OBSIDES · XXXX · ARBITRATV · COS · ROMANI · DATO · NE · MINORES  
 XII · ANNORVM · NEV · MAIORES · XXXX · OBSES · NE · ESTO · PRAETOR  
 PRAEFECTVS · EQVITVM · SCRIBA · PVBLICVS · NEV · QVIS · QVI · ANTE  
 OBSES · FVERIT · APVD · ROMANOS

(1) Polyb. 1. 3. p. 177. A.  
 (2) Liv. 1. 37. c. 29. n. 45.

(3) v. inser. 312.

(4) Liv. 1. 38. c. 9. n. 11.

CEPHALENIA · EXTRA · PACIS · LEGES · ESTO · QVAE · VRBES · QVI · AGR  
QVI · HOMINES · AETOLORVM · IVRIS · ALIQUANDO · EVERVNT · QVI  
EORVM · L · QVINTIO · CN · DOMITIO · COS · POSTVE · EOS · COS ·  
AVT · ARMIS · SVBACTI · AVT · VOLANTATE · IN · DITIONEM · POPVLI  
ROMANI · VENERVNT · NE · QVEM · EORVM · AETOLI · RECEPISSE  
VELINT · OENIADAE · CVM · VRBE · AGRISQVE · ACARNANVM · SVNTO

a victore, ut par erat, conditiones latas esse vides. initium autem his quoque idem fuisse arbitror, quod illis est, quas in libri primi exemplo legimus: nempe, *Amicitia Aetolis Cum Populo Romano His Legibus Et Conditionibus Esto*. hanc quippe foederum omnium legibus inchoandis veterem sollemnemque formulam fuisse, haud obscure Polybius nos docuit (1), quo loco foedera retulit, quae Romani atque Carthaginienses ante Punica bella pepigerant: quorum scilicet hoc est exordium: *Ετι ταυτδε φιλια εναι Ρωμαιοις και τοις Ρωμαιοιν συμμαχοις, και Καρχηδονις και τοις Καρχηδονιων συμμαχοις*.

Porro quae conditiones pacis amicitiaeque convenissent, eae legum more atque stilo efferebantur: quae fere ita scriptae sunt, ut cum prudentia dignitas in illis quaedam singularis eluceat. hanc vero ut assequamur, enitendum est maxime: ab ea enim potissime foederum tabulis commendatio erit. neque id magnam habet difficultatem, quum veterum formularum non modo ingens sit copia, sed ea etiam natura atque genus, ut pleraque rebus his, quae nunc tractantur, apte convenient.

II. Foederis conditionibus iusjurandum subscriptum esse, non est ambigendum: quamquam enim his, quae attulimus, exemplis formula a Livio subjecta non est; de foedere tamen, quod cum Antiocho perenssum fuerat, haec discrete tradit (2): *Consul iuravit in hoc foedus: ab rege qui exigerent iusjurandum, profecti Q. Minutius Thermus et L. Manlius*. itaque exemplum iusjurandi, quod foederibus subscribatur, hoc esse possit, ex eodem Livio desumptum (3), ubi foedus ictum inter Albanos et Romanos describit: sic enim ante Horatiorum Curiatorumque certamen, recitatis legibus, Sp. Fusius paterpatratus a feciali M. Valerio factus, pronunciasset dicitur:

AVDI · IVPITER · AVDI · PATER · PATRATE · POPVLI · ALBANI · AVDI  
TV · POPVLVS · ALBANVS · VT · ILLA · PALAM · PRIMA · POSTREMAVE  
EX · ILLIS · TABVLIS · CERAVE · RECITATA · SVNT · SINE · DOLO · MALO  
VTIQVE · EA · HIC · HODIE · RECTISSIME · INTELLECTA · SVNT · ILLIS  
LEGIBVS · POPVLVS · ROMANVS · PRIOR · NON · DEFICIET · SI · PRIOR  
DEFECERIT · PVBLICO · CONSILIO · DOLO · MALO · IN · ILLO · DIE  
IVPITER · POPVLVM · ROMANVM · SIC · FERITO · VT · EGO · HVNC · PORCV  
HODIE · FERIAM · TANTOQVE · MAGIS · FERITO · QVANTO · MAGIS · POTES  
POLLESQVE

haec tum paterpatratus populi Romani pronunciavit: et sua item carmina, inquit Livius, Albani, suumque iusjurandum per suum dictatorem suosque sacerdotes peregerunt. uterque enim dux, uterque populus in foederibus feriendis fidem suam obligare debebat. quare si populi duo, Atellanus exempli caussa et Calatinus amicitiam nunc foedusque jungerent, in hunc aut similem modum concipere iusjurandi verba posses, quae legibus et conditionibus subscriberentur:

(1) lib. 3. p. 177. A et p. 178. E. secundum haec amicitia esto Romanis Romanorumque sociis cum

Carthaginiensibus et Carthaginiensium sociis.

(2) l. 38. c. 24. n. 39.

(3) l. 1. c. 9. n. 24.

## IVSIVRANDVM • ATELLANORVM

AVDI • DEVS • OPTIME • MAXIME • AVDI • VIRGO  
 MATER • ET • PATRONI • OMNES • CAELESTES  
 AVDITE • VT • HAE • LEGES • HAE • CONDITIONES  
 IN • TABVLA • IN • ALBO • SCRIPTAE • SVNT  
 VTIQVE • HODIE • RECTISSIME • INTELLECTAE  
 SVNT • HIS • LEGIBVS • HIS • CONDITIONIBVS  
 POPVLVS • ATELLANVS • CVM • POPVLO • CALATINO  
 PACEM • AMICITIAMQVE • FACIT • SI • PRIOR  
 POPVLVS • ATELLANVS • PVBLICO • CONSILIO • DOLO  
 MALO • PACEM • AMICITIAMQVE • CVM • POPVLO  
 CALATINO • RVPERIT • VIOLAVERIT • IN • ILLO • DIE  
 DEVS • OPTIME • MAXIME • POPVLVM • ATELLANVM  
 ET • DOMOS • FAMILIAS • REMQVE • PVBLICAM  
 POPVLI • ATELLANI • PESSIMO • LETO • AFFICIAS

## IVSIVRANDVM • CALATINORVM

AVDI • DEVS • OPTIME • MAXIME • AVDI • VIRGO  
 MATER • ET • PATRONI • OMNES • CAELESTES • AVDITE  
 VT • HAE • LEGES • HAE • CONDITIONES • IN • TABVLA  
 IN • ALBO • SCRIPTAE • SVNT • VTIQVE • HODIE  
 RECTISSIME • INTELLECTAE • SVNT • HIS  
 LEGIBVS • HIS • CONDITIONIBVS • POPVLVS  
 CALATINVS • CVM • POPVLO • ATELLANO • PACEM  
 AMICITIAMQVE • FACIT • SI • PRIOR • POPVLVS  
 CALATINVS • PVBLICO • CONSILIO • DOLO • MALO  
 PACEM • AMICITIAMQVE • CVM • POPVLO • ATELLANO  
 RVPERIT • VIOLAVERIT • IN • ILLO • DIE • DEVS  
 OPTIME • MAXIME • POPVLVM • CALATINVM • ET  
 DOMOS • FAMILIAS • REMQVE • PVBLICAM • POPVLI  
 CALATINI • PESSIMO • LETO • AFFICIAS

post haec vero dies et annus adnotandus esset, quibus ea convenissent; tum locus etiam, quo res acta, et magistratus, per quos acta esset: quemadmodum in Ariliensium iurejurando vidimus (1), quod pro foederis tabula haberi potest.

II. Ad hospitiorum tabulas quod pertinet, vix eae nunc usui esse possunt; quum hospitia esse paene desierint, nec jam qui hospites sunt, iidem et patroni aut elientes sint. umbra tamen est quaedam veteris hospitalitatis inter Romanas hasce sodalitates, et quae per Italiam aut etiam extra Italiam constitutae sunt. nam hae quidem, quae peregre celebrantur, quum nec antiquitate fere praestent, nec amplissimis sint Pontificum Maximorum honestatae decretis, Romanas ultro, quae primae omnium aut vetustate aut dignitate putantur, eoloniarum veterum more quasi parentes suas verentur, ab eisque contendere solent, ut se in religiosam nominis societatem atque in officiorum et utilitatum communicationem adsumant. quibus autem id datum est, eas tanquam in clientelam commendatas Romanae sodalitates foveant, tuentur: quumque Romani illae religionis causa pro collegio veniunt, quod anno saero potissimum faciunt, hae obviam ad faces et cereos procedere solent, templaque ad supplicandum una adeunt, et magnifico eas hospitio accipiunt. hinc vero si quando Romanae sodalitates vicissim ad earum urbes et templa visenda veniunt, sui illae officii esse putant, ut, iustituta pompa, ad primum aut alterum lapidem salutandi causa obviam occurrant, easque maxima celebritate in urbem ad templumque suum deducant et hospitium item praebcant.

Ergo si qua municipalis sodalitas apud urbanum aliquod sodalium collegium gratia valuerit, et per legatos curatoresve effecerit, ut in ejus societatem reciperetur, haec autem ipsa, ut par est, consignanda litteris monumentisque mandanda sint; nullum equidem veterum exemplar, quod sequaris, exstare aptius ac rei magis aecommodatum puto, quam priscas hospitiorum tabulas, quae libro primo prolatae sunt. initium a temporis nota sumes, inscripto Pontificis Maximi nomine, et anno ac die designato, quibus pactio illa confecta sit: tunc qui honorem eum petierint atque adsequuti fuerint, iis adjectis appositis, quae propria sodalitatis sint, et municipio item ejus appellato, primi inducentur. sic deinde urbanum collegium indicibus prodetur suis, et quae exterae sodalitati spoponderit, breviter exponentur. ad calcem ii demum scribentur, per quos ea res acta sit. sed haec, quae leviter oratione perstrinxi, exemplo plana ut fiant, novam hospitalitatis tabulam subjiciamus:

(1) inser. 313.



## §. V. DE RESCR. ET DIPL. PRINC.

PIO • SEXTO • PONTIFICE • MAXIMO  
ANNO • M • D • C • C • C • LXXXVIII.

KAL • IANVAR •

MAGISTER • ET • SODALES • MARIALES  
ALBATI • PERSIA • AVGUSTA  
RELIGIONIS • PIETATISQVE • ERGO  
HOSPITIVM • FECERVNT • CVM • PRAEFECTO  
COLLEGIOQVE • VREANO • FRATRVM  
MARIALIVM • ALBATORVM • IPSVM  
FRATRES • MARIALES • ALBATOS  
SVCCESORES • POSTEROSQVE • EORVM  
SIBI • SVCCESORIBVS • POSTERISQVE  
SVIS • PATRONOS • COOPTAVERVNT  
PRAEFECTVS • COLLEGIVMQVE • VREANVM  
FRATRVM • MARIALIVM • ALBATORVM  
RELIGIONIS • PIETATISQVE • ERGO  
MAGISTRVM • ET • SODALES • MARIALES  
ALBATOS • PERSIA • AVGUSTA  
SIBI • SVCCESORIBVS • POSTERISQVE  
SVIS • IN • FIDEM • CLIENTELAMQVE  
SVAM • RECEPERVNT  
EGERVNT  
HANNIBAL • M • F • STASIVS • PROMAG •  
PAVLLVS • ANT • F • DALEVS LEG •  
DEMETRIVS • FEL • F • FESTVS

alii ne sint contractus aliaeque pactiones, quibus consignandis veteres hospitiorum tabulae exemplo esse possint, non ego hic disquiram. id, simul atque opus fuerit, tute videris; nec, si res ipsa quadrabit, non tibi etiam stilus succedet.

## §. V.

## DE RESCRIPTIS ET DIPLOMATIBVS PRINCIPVM

I. Alio nunc stilo haec scribi solent, eademque rarius in marmore aut in aere incisa occurrunt, quae passim apud veteres legebantur. praestat tamen de his etiam aliquid tradi, ut qui priscam consuetudinem revocare velint, illis minime defuisse videamur.

Rescriptorum, quibus *Mandata* etiam et *Decreta* et *Epistolas Principum* velim adnumeres, satis expedita ratio est. responsa enim sunt litterarum more scribenda, cuiusmodi e litteris Theodosii et Iustiniani exstitit codex. sed in utriusque codicis exemplis, brevitatis causa, omissi fere, quos Imperatorum nominibus addebant, plerique tituli; qui antiquis contra in tabulis ferme leguntur, eodem ordine, quo in historicis inscriptionibus enunciabantur. itaque ad earum exemplar nunc quoque singuli adscribendi sunt (1). communis deinde salutatio sequatur, et eorum nomina, ad quos Princeps rescribit: qui si in magistratu sint, dignitatis quoque nomine sunt appellandi.

(1) v. inscr. 316.

Iam materies quidem varia esse potest: sed vetera exempla circa jus maxime ac leges constitutionesque versantur: et modo interpretationes aut definitiones, modo jussiones sanctionesque continent, quibus scilicet Princeps praesidibus fere provinciarum de negotiis forensibus respondebat. quo autem veterum stilum orationemque exprimamus, cum sapientibus sententiis gravibusque verbis uti debemus, tum nihil antiquius habere, quam ut presse et dilucide loquamur: in antiquis enim rescriptis vix offendes, quod redundet, aut quod non satis explicatum sit; ut ut multa saepe paucis admodum verbis exponantur. exemplo sit Antonini Pii rescriptum, quod Ulpianus libro octavo *de officio proconsulis* inseruerat (1):

IMP · CAESAR · DIVI · HADRIANI · F · DIVI · TRAIANI · PARTHICI · N ·  
DIVI · NERVAE · PRON · T · AELIVS · HADRIANVS · ANTONINVS  
AVG · PIVS · PONT · MAX · TR · POT · III · COS · III · P · P ·  
SALVTEM · DICIT

AELIO · MARCIANO · PRO · COS · PROV · BAETICAE

DOMINORVM · QVIDEM · POTESTATEM · IN · SVOS · SERVOS · ILLIBATAM  
ESSE · OPORTET · NEC · CVIQUAM · HOMINVM · IVS · SVVM · DETRAHI  
SED · DOMINORVM · INTEREST · NE · AVXILIVM · CONTRA · SAEVITIAM  
VEL · FAMEM · VEL · INTOLERABILEM · INIVRIAM · DENEGETVR · HIS  
QVI · IVSTE · DEPRECANTVR · IDEOQVE · COGNOSCE · DE · QVERELIS  
EORVM · QVI · EX · FAMILIA · IVLI · SABINI · AD · STATVAM  
CONFVGERVNT · ET · SI · VEL · DVRIVS · HABITOS · QVAM · AEQVVM  
EST · VEL · INFAMI · INIVRIA · AFFECTOS · COGNOVERIS · VENIRE · IVBE  
ITA · VT · IN · POTESTATEM · DOMINI · NON · REVERTANTVR · QVI  
SI · MEAE · CONSTITVTIONI · FRAVDEM · FECERIT · SCIAT · ME  
ADMISSVM · SEVERIVS · EXSECVTVRVN

Quia vero controversiae aliquando ad Principem tamquam ad iudicem deferbantur, ut lite in iudicium deducta, caussaque cognita pronunciaret: ideoque Princeps sic interdum rescribebat, ut litteris suis decretum ipsum subjiceret, quemadmodum in Domitiani Aug. rescripto videre licet (2), qui *adhibitis utriusque ordinis splendidis viris cognita causa* pronunciaverat, *subseciva possessorum esse*. ob eam quoque rem subscripti, qui caussae interfuerant, Curator et Legati Faleriensium: quo nempe omnia juste et legitime acta esse constaret.

At brevius alias de jure respondebant, ut quum Severus Alexander ex jurisconsulti sententia rescripsit (3):

IMP · CAESAR · M · AVRELIVS · SEVERVS · ALEXANDER · PIVS · FELIX  
AVG · PONT · MAX · TR · POT · COS · P · P ·

SABINAE

SECVNDVM · RESPONSVN · DOMITH · VLPIANI · PRAEFECTI · ANNONAE  
IVRISCONSULTI · AMICI · MEI · EA · QVAE · STIPVLATA · EST · CVM  
MORERETVR · PARTEM · DIMIDIAM · DOTIS · CVI · VELIT · RELINQVERE  
REDDI · SIBI · CVM · MORERETVR · EAM · PARTEM · DOTIS · STIPVLATA  
VIDETVR · P · P · (4) II · KAL · APRIL · ALEXANDRO · AVG · COS ·

neque enim epistolam, ut Domitianus fecit, rescripto huic praepositam puto; camque a Triboniano, quum Codicem institueret, sublatam esse. exstant Trajani rescripta ad Plinium bene multa: quae tamen, nullo inserto decreto, unis singula litteris constant, ambituque verborum scripta sunt contracto et brevi.

II. In Domitiani rescripto legimus ad calcem *Valete*: in aliis non item: neque Tra-

(1) l. 2. D. de his, qui sui vel alieni  
jur. sunt.

(2) v. inser. 516.

(3) l. 4. C. de contrah. et comm. stipul.

(4) *Propositum*,

jani rescripta, neque ea, quae in legum codicibus sunt, illud habent verbum. quin ipse Plinius, qui aliis scribens *Vale* semper in fine addidit, in iis epistolis, quas ad Trajanum misit, numquam ea formula usus est. itaque verbum illud familiarius denique habitum esse videtur, quam ut Princeps cum privato, aut privatus cum Principe usurparet: nisi illud magis arrideat, in libris salutationem illam, quia communis erat, omisam esse: quippe in Severi et Antonini Augustorum rescripto graece exarato, tot jam post Trajanum annis, haud dubiis litteris adjectum in fine leges, EYTYXEITE (1).

Tempus vero, interdum et locum, quo rescriptum datum sit, in Codice subjectum video; quamquam ipsis Imperatorum titulis annus plerumque satis indicabatur. sed mensem etiam diemque et consules quoque adscribi intererat, ne quis legis initium et juris ignoraret, nec quidquam in ambiguo relinqueretur. eodem nunc pacto annus Dionysianus et mensis et dies, nedum regni aut pontificatus anni subjici solent. porro et tabellionis olim mentio aliquando facta, sed ejus rei causa, quae in rescripto concessa esset. Graecam inscriptionem edidit Sponius (2), quae libellum exhibet Sextilii cujusdam Acutiani ab Antonino Pio petentis, ut sibi exemplar describere liceat sententiae, quam Hadrianus secundum eum dixerat: deinde latine Antonini rescriptum hujusmodi:

IMP · CAESAR · T · AELIVS · HADRIANVS  
ANTONINVS · AVGVSTVS · PIVS  
SEXTILIO · ACVTIANO  
SENTENTIAM · DIVI · PATRIS · MEI  
SI · QVID · PRO · SENTENTIA · DIXIT  
DESCRIBERE · TIBI · PERMITTO · RESCRIPSI  
RECOGN · VNDEVINCESIMVS · ACT ·  
VI · IDVS · APRIL · ROMAE · CAES ·  
ANTONINO · II · ET · PRAESENTE · II · COS ·

Principis subscriptio est RESCRIPSI, altera vero tabellionis, cui nomen erat Vndevicensimo: isque Hadriani sententiam ex autographis litteris descriptam se recognovisse testatur.

Sunt et singulares quaedam litterae, quas saepe in rescriptorum fine leges. his veteres, ut a Guthero expositum est (3), significabant, rescripta eo die *Data* esse vel *Scripta*, *Subscripta*, *Emissa*, *Petita*, *Accepta*, *Antelata*, *Proposita*, *Supposita*, *Recitata*, *Lecta*, *Regesta*, *Gesta*: sub uno etiam rescripto tres litterae interdum occurrent P · D · S · (4) idest *Propositum*, *Datum*, *Scriptum*: sed de his Gutherus tibi ceterique Iuriseonsulti legendi sunt, et ex eorum praescripto haec aut illa formula usurpanda est.

II. Diplomata Latini dixerunt magistratus aut Principis litteras, quibus illi aliquid vel uni vel multis concessissent: eoque vocabulo Tullius quoque non semel usus est. sed veterum diplomatum exempla in aere aut marmore incisa vix exstant alia, quam quae *Honestae Missiones* appellantur: ceterorum, vel in antiquis scriptoribus, indicia magis, quam exempla reperias: cujusmodi sunt, quae Flavius Iosephus una cum Romanis decretis in libros suos graece ac saepe summatim retulit: quippe ea, inquit (5), εν τῷ Καπιτωλίῳ ἀλλὰ καὶ στηλαῖς ἀναγεγραπταὶ χαλκαῖς, quamquam accuratius redditum ab eo est Augusti diploma, quo Iudaeos hic jubebat (6), χρῆσθαι τοῖς ἰδίοις θεσμοῖς κατὰ τὸν πατρῶν, αὐτῶν νόμον, καθὼς ἔχρωντο ἐπὶ Τραυνοῦ ἀρχιερεως Θεοῦ ὑψίστου: tum aliis item beneficiis ornabat.

(1) Marm. Oxon. in app. p. 304.

(2) Misc. p. 352.

(3) de off. Dom. Aug. l. 1. c. 36.

(4) l. 2. C. ne de stat. defunctor.

(5) l. 14. Ant. c. 10. n. 1. in Capitolio atque adeo in aereis columnis inscripta sunt.

(6) l. 16. c. 6. n. 2. uti suis legibus se-

cundum patria ipsorum instituta, quemadmodum usi erant sub Hiericano sacerdote Dei altissimi.



Ceterum ea, opinor, diplomatum forma omnium fuit, quam libri primi exempla significant. primum quidem Imperatoris nomen et titulos referunt, quemadmodum de rescriptis diximus. tum quia plures erant, quibus beneficium dabatur, eorumque nomina infra scribi solebant, generatim tantummodo post Principis titulos indicantur; nec formula tamen onittitur *Liberis Posterisque Eorum*; quod beneficium in familia cujusque perpetuum esse deberet: exponitur demum collati beneficii quae gratia, qui honor, quae jura sint. hoc autem rescripta et diplomata differunt inter se, quod Princeps in illis primae fere personae, in his tertiae semper figura loquatur.

III. Quae infra in Galbae ac Vespasiani diplomatibus legimus, ea proprie ad diplomata non pertinent, sed ad exempla tantum referenda sunt. nam diplomata ipsa aereis incisa tabulis ad aram gentis Iuliae in Capitolio prostabant, in iisque nomina veteranorum omnium inscripta erant, quibus singuli Imperatores honestam missionem, civitatem jusque conubiorum dedissent: quo sane verba illa diplomatum spectant *Quorum Nomina Subscripta Sunt*. militi autem, cui datum esset beneficium, publicarum litterarum testimonium petenti, ceterorum nomina describi minime opus erat: itaque post diplomatis verba, ejus tantum nomen in exemplo scribebatur; utque constaret, ipsum e numero esse eorum, quorum nomina in tabula diplomatis legebantur, aderant testes, qui ex ea descriptum et recognitum diplomatis exemplum esse affirmarent, ipsasque tabellas subinde oclusas anulo quisque suo obsignarent: in quibus testium etiam nomina incidebantur. idcirco etiam dies, mensis, consules additi, quibus haec acta essent. quapropter, nisi forte diplomatis exemplum edendum fuerit, minime his locus erit: excipe temporis notam, quae infra ipsi diploma, ut epistolarum consuetudo postulat, recte adscribetur: litterae certe Principis non egent testibus.

At ubi contigerit, exempli caussa, ut civibus aliquot de patria optime meritis, qui in amplissimum ordinem cooptati sint, publicum singulis testimonium reddi oporteat, veterum jam diplomatum formam imitari ac totam prope exprimere fas erit: quod fere in hunc modum fieri possit, siquidem eorum nomina publicis incisa tabulis in ipsa curia reapse legantur:

## ORDO • DECVRIONVM

CIVIBVS • HONESTISSIMIS • QVI • VRBE • AB • HOSTIBVS  
OBSESSA • LIBERTATIS • RETINENDAE • AVCTORES • FVERVNT  
AERARIOQVE • SYMPTIBVS • EXILIVSTO • PATRIMONIVM  
SVVM • IN • SALVTE • PATRIAE • COLLOCAVERVNT  
QVORVM • NOMINA • SVBSCRIPTA • SYNT • IPSIS  
LIBERIS • POSTERISQVE • EORVM • VIRTVTIS • ERGO  
HONOREM • DECVRIONATVS • GRATVITVM • DEDIT  
ET • CONVEIVM • CVM • PATRICIIS • AVT • SI • QVI  
VXOREM • HABERENT • VT • VXORES • EORVM • INTER

PATRICIAS • CENSERENTVR

NON • AVG • AN • M • D • C • C • LXX •

M • SILVIO • FAVSTINO • V • C •

DESCRIPTVM • ET • RECOGNITVM • EX • TABVLA • AENEA  
QVAE • IN • CVRIA • FIXA • EST • AD • SYBSELLIA • II • VIR •

Q • FABIVS ( ) MERVLA DEC •  
C • ANTONIVS ( ) FABER DEC •  
L • CAECILIVS ( ) NOBILIS DEC •

V. Eadem ratio honestarum missionum esse potest: in quibus ex veteri more (1) stipendia militum commemoranda erunt. at hic fortasse requiras, quum missionis causa triplex esset, *honestae*, *caussaria*, *ignominiosa*, sua ne ut honestae, sic ceterarum formula fuerit: est enim *Caussaria*, inquit Macer (2), *quum quis vitio animi vel corporis minus idoneus militiae renunciatur: Ignominiosa caussa est, quum quis propter delictum sacramento solvitur; et is qui ignominia missus est, neque Romae neque in sacro comitatu agere potest: et si sine ignominiae mentione missi sunt, nihilominus ignominia missi intelliguntur*. porro formulam utique suam his quoque missionibus fuisse, ipsa Macri verba declarant: sed quae tamen non acri non marmori incideretur. quare de his quidem meo quodam jure silere possum. sed quum missionis ignominiosae praeclarum in Hirtio sive Oppio exemplum sit, cujus pleraeque dictiones n- sui aliquando esse possint, illud ego haud gravatim hoc loco subijciam. sunt autem Caesaris verba milites quosdam ab exercitu dimittentis, qui petulantiae suae nimiaeque libertatis nullum facerent finem (3):

G · AVIENE · QVOD · IN · ITALIA · MILITES · POPVLI ROMANI · CONTRA  
REM · PVBLICAM · INSTIGASTI · RAPINASQVE · PER · MVNICIPIA · FECISTI  
QVODQVE · MIHI · REIQVE · PVBLICAE · INVILIS · FVISTI · ET · PRO  
MILITIBVS · TVAM · FAMILIAM · IVMENTAQVE · IN · NAVES · IMPOSVISTI  
TVAQVE · OPERA · MILITIBVS · TEMPORE · NECESSARIO · RES · PVBLICA  
CARET · OB · EAS · RES · IGNOMINIAE · CAVSSA · AB · EXERCITV · MEO  
TE · REMOVEO · HODIE · QVE · EX · AFRICA · ABESSE · ET · QVANTVM  
POTEST · PROFICISCI · IVBEO

ITEMQVE · TE · A · FONTEI · QVOD · TRIBVNVS · MILITVM · SEDITIONVS  
MALVS · QVE · CIVIS · FVISTI · AB · EXERCITV · DIMITTO

T · SALIENE · M · TIRO · C · CLVSINAS · QVVM · ORDINES · IN · MEO  
EXERCITV · BENEFICIO · NON · VIRTVTE · CONSEQVVTI · ITA · VOS  
GESSERITIS · VT · NEQVE · BELLO · FORTES · NEQVE · PACE · BONI · AVT  
VTILES · FVERITIS · ET · MAGIS · IN · SEDITIONE · CONCITANDISQVE  
MILITIBVS · ADVERSVS · VESTRV · IMPERATOREM · QVAM · PVBORIS  
MODESTIAEQVE · FVERITIS · STVDIOSIORES · INDIGNOS · VOS · ESSE  
ARBITROR · QVI · IN · MEO · EXERCITV · ORDINES · DVCATIS · MISSOSQVE  
FACIO · ET · QVANTVM · POTEST · ABESSE · EX · AFRICA · IVBEO

## §. VI.

DE INSCRIPTIONIBVS MENSVRARVM  
ET PONDERVM

I. **P**aucorum hae verborum inscriptiones sunt: neque enim multis locus esse solet. itaque eorum delectu recta inscriptio consistit. neque tamen ego auctor fuerim, ut in mensuris ponderibusque, quibus nunc utimur, inscriptiones veteri more linguaue incidantur. sed si quis hoc malit, is levia quaedam et trita, ipsius gratia, hic subjecta esse sciat.

Primum nomina magistratuum saepe inscripta sunt, vel ut tempus indicaretur, quo mensurae aut pondera ad archetypum exacta essent; vel ut ea tractantibus pateret, quis probasset. idcirco in his modo consules leguntur, modo quaestores, modo praefecti urbis. minores autem magistratus illud quoque addidere, se ex senatus consulto de ea re cognovisse (4). quin praeter magistratus nomen etiam Principis aliquando insertum est: sed exempla minus antiqua sunt (5):

(1) v. inser. 319.

(2) l. 13. D. de re milit.

(3) de B. Afric. c. 22. n. 54.

(4) v. inser. 323.

(5) Spon. Misc. p. 303.

SALVO · D · N ·  
IVLIO · NEPOTE  
P · F · AVG ·

AVDAX · V · C ·  
PRAEFECTVS  
VRBI · FECIT

Quum autem mensurarum et ponderum archetypa in Capitolio essent, atque ibidem ad ea mensurae omnes et pondera exigenter; quo haec deinde auctoritatem et fidem haberent, saepe hoc ipsum inscriptio designabat (1): quod nunc etiam Romae iisdem verbis signari potest, quum adhuc in Capitolio archetypa adserventur.

II. Notam denique quantitatis addebant veteres, quam et initio aliquando inscripserunt, eaque sive in ponderibus sive in mensuris pondo fere indicat, id est libras, item uncias, scrupula et hujusmodi: quorum figurae libro tertio proponuntur. de his lata aliquando lex, ut Sponius adnotavit (2), quae ponderibus notas inde vulgo cognitae perspicuasque juberet.

Haec Romae, haec in municipiis obtinuerunt (3): sed in municipiis oppidano quodam jure ipsi magistratus de ponderibus et mensuris cognoscere solebant, et quae iniqua essent, tollere; tum sumptu etiam suo nova facere: quapropter historicis aliquando inscriptionibus usi esse videntur, quibus quum fidem illis auctoritatemque adderent, tum etiam liberalitatem suam memoriae proderent (4).

#### §. VII.

### DE DECRETIS ACTISQUE COLLEGIORVM

I. Collegia olim alia magistratuum, alia sodalium fuerunt: nec eadem omnium auctoritas aut jus; quamquam utraque legitime ac fere ex senatus consulto coibant. nam magistratuum collegia, quum reipublicae causa constituta essent, iudicium imperiumve in cives omnes exercebant, cujusmodi consulum, praetorum, tribunorum plebis, quaestorum, decemvirorum collegia erant. at collegiis contra pontificum, augurum, septemvirorum, quindecimvirorum magna quidem auctoritas, sed quum ea senatus consuleret. reliquorum autem sodalium jura his circumscripta erant finibus, ut quae statuissent, ipsi praestare deberent, nec ea ad ceteros cives quidquam pertinerent.

Tribunorum plebis decretum habemus a Gellio (5) ex annalium monumentis exscriptum, cujus ille historiam sic exposuit: *L. Scipioni Asiatico P. Scipionis Africani superioris fratri C. Minucius Augurinus tribunus plebei multam irrogavit: eumque ob eam causam praedes poscebat. Scipio Africanus fratris nomine ad collegium tribunorum provocabat: petebatque, ut virum consularem triumphalemque a collegae vi defenderent. octo tribuni, cognita causa, decreverunt: haec autem decreti sunt verba:*

QVOD · P · SCIPIO · AFRICANVS · POSTVLAVIT · PRO · L · SCIPIONE · ASIATICO  
FRATRE · QVVM · CONTRA · LEGES · CONTRAQ · MOREM · MAIORVM  
TRIBVNVS · PLEBEI · HOMINIBVS · ACCITIS · PER · VIM · INAVSPICATO  
SENTENTIAM · DE · EO · TVLERIT · MVLTAMQ · NVLLO · EXEMPLO  
IRROGARIT · PRAEDESQ · OB · EAM · REM · DARE · COGAT · AVT · SI  
NON · DET · IN · VINCVLA · DVCI · IVBEAT · VT · EVM · A · COLLEGAE  
VI · PROHIBEAMVS · ET · QVOD · CONTRA · COLLEGA · POSTVLAVIT  
NE · SIBI · INTERCEDAMVS · QVO · MINVS · SVAPTE · POTESTATE · VTI

(1) v. inscr. 320. 327.

(2) Misc. p. 303.

(3) v. inscr. 320.

(4) v. inscr. 321. 322.

(5) N. A. l. 7. c. 19.



LICEAT · D · E · R · NOSTRVM · SENTENTIA · OMNIVM · DATA · EST  
 SI · L · CORNELIVS · SCIPIO · ASIATICVS · COLLEGAE · ARBITRATV  
 PRAEDES · DABIT · COLLEGAE · NE · EVM · IN · VINCULA · DVCAT  
 INTERCEDEMVS · SI · EIVS · ARBITRATV · PRAEDES · NON · DABIT · QVO  
 MINVS · COLLEGA · SVA · POTESTATE · VTATVR · NON · INTERCEDEMVS

Quum haec tamen legibus edictisque accensere liceat, non ego in his immorabor, ad decreta collegiorum veniam, quae privati homines celebrabant, cujusmodi exempla libro primo attulimus. eorum decreta, quae exstant, persimilia his sunt, quae a municipiorum decurionibus fiebant: ut quae de civitatum decretis diximus, ea his quoque apprime conveniant.

Primum quidem sollemne erat, ut consules et mensem et diem initio scriberent; tum locum etiam adderent, quo convenissent. is deinde ciebatur, qui verba fecerat, et decreti auctor fuerat. ac si plures de eadem re ad collegium retulissent, singuli nominabantur. quia vero de honoribus fere agebatur, viri ejus laudem, quem ornare vellent, in ipso exordio inserebant: eaque a nobilitate, a virtute, a liberalitate duci solebat: simul et honor proponebatur, qui ei deferendus videretur. post haec, quid de ea re fieri placuisset, longo saepe verborum ambitu expositum legas: quippe exempla hujusmodi non ejus aetatis sunt, quum nondum adsentari didicerant. his demum clausula subjecta haec *Censuerunt*, de qua ad civitatum decreta diximus.

Enimvero decreta collegiorum scribi nunc incidique si oporteat, ut quum sodales magistri creandi caussa convenerunt; facile quis veterum decretorum formam possit exprimere, in hunc fere modum:

ANNO · M · D · C · C · LXXVII.

PRID · ID · SEPTEMBR ·

IN · TEMPLO · COLLEGII · FABRVM · CAPITOLINORVM

QVOD · L · LAVRENTIVS · BASSVS · PRO · MAG · VERBA · FECIT · DE · MAGISTRO · IN  
 DEMORTVI · LOCVM · CREANDO · Q · D · E · R · F · P · D · E · R · I · C ·

QVVM · C · MARIVS · AVITVS · IS · VIR · IN · COLLEGIO · NOSTRO · ESSE · VIDEATVR  
 CVI · VIRTUTE · ET · AVCTORITATE · PAUCI · COMPARARI · NEMO · ANTEFERRI  
 POSSIT · QVVMQ · IDEM · DE · COLLEGIO · NOSTRO · OPTIME · MERVERIT  
 MEREAT · AC · POTISSIMVM · AVCTOR · LEGVM · OPTIMARVM · ALIQUANDO  
 FVERIT · PLACERE · VNIVERSIS · C · MARIVM · AVITVM · COLLEGII · NOSTRI · NOMINE  
 MAGISTRVM · DICI · IN · ANNOS · DECEM · EIQVE · POTESTATEM · CVRATIONEMQ ·  
 RERV · OMNIVM · DARI · ITA · VII · DATA · EST · L · FLAVIO · LONGO  
 CETERISQVE · QVI · ANTE · EVM · OPTIMO · IVRE · MAGISTRI · CREATI · SVNT  
 CENSVERVNT

II. At singulari plane forma exaratum est libri primi decretum illud, cuius hoc initium, *Lex Collegi Aesculapi Et Hygiae* (1). nec tamen mirum videri debet. quippe hoc tum ab Aesculapii Hygiaeque sodalibus agebatur, ut quae Marcellina et Zenon collegio donarant, et iis item conditionibus, quibus illi donarant, accipere se fidemque suam obligare, simulque ea, quae de his alias decrevissent, rata se habere, decreto hoc interposito confirmarent. ob eam rem dona enumerata et donorum condiciones perscriptae: ipsaque tot rerum series *Lex* appellata, quod has sibi partes collegium imponeret, ne quid in posterum negligeretur. sanctio demum adjecta, ne quis adversus ea quid faceret, et extremo ea loco subjecta, quae aliis in exemplis initio leguntur, quinquennali etiam et curatoribus praeterea adscriptis: quae eo pertinebant, ut omnia legitime jam constituta et decreta esse declararent.

(1) inscr. 329.

Porro et exemplum proponi ejusmodi, aliquid intererat, ut si lex aliqua hujus generis scribenda sit, haec quoque ex veterum auctoritate scribatur. utram vero decretorum formam praecoptari oporteat, quaeque argumento apta magis futura sit, opportune res ipsa declarabit.

nI. Reliquum est, ut de collegiorum actis dicamus: quae quidem tot res tam varias amplexa sunt, nihil ut eorum, quae a collegiis gererentur, neglectum olim omissumque esse videatur. nam in his actorum reliquiis, quae maxime ad urbis collegia pertinerint, non solum sacra omnis generis et ritus et expiationes reperies, sed sodalium etiam cooptationes, vota pro salute Domus Aug. preces sollemnes, convivia, viscerationes, sportularum diribitiones; tum contractas rationes et sumptus non mediocres, res legatas, donatas, loca data, accepta et hujusmodi. collegii autem Fratrum Arvalium acta multo plura supersunt, quam ceterorum, eaque luculentissima: quae aliquando Cajetanus Marinius apte, ut solet, digesta et erudito commentario illustrata, simul omnia vulgabit (a). at vel in his, quae nuper in Vaticano reperta idem edidit, etsi non pauca invidit vetustas, apparet tamen quam multa in ea relata sint.

Primum hic ut lapidem, qui *οπισθογραφος* est (b), tantum attingam, in eo Imperatoris Elagabali et ceterorum sacerdotum nomina initio scripta fuisse, quae infra sunt verba satis indicant, *Imp. Aug. Et Ceteri Sacerdotes Q. S. S. S.* quo loco annum etiam et diem et templum, quo convenissent, adscriptum esse, ne quis ambigat. deinde non obscure quae eo die quotque numero victimae, ac quibus illae Diis immolatae essent, traditur: simul et legas, quibus ritibus Fratres Arvales epulati sint, et quibus acclamationibus epulo finem fecerint. eodem modo alterius diei sacra et caerimoniae describuntur: quae plane multa ac varia: tum hoc singulare, quod carmen etiam prisca lingua scriptum inseritur, quale sacerdotes e ritualibus libellis pronunciaverant. similia item fuisse videntur, quae sequenti acta die enunciabantur, quorum pars maxima in litura est. quo tamen die Imperator Aug. in collegium illud cooptatus esset, plane et perspicue legitur: quin et formula ipsa, quae *Precatio Cooptationis* appellatur, prope integra exstat, et nomina aliquot apparent Fratrum Arvalium, qui Antonino jam cooptato acclamaverunt. iidem alio demum die in Capitolium convenisse dicuntur *Ante Cellam Iunonis Reginae Ad Vota Annua Suscipienda Pro Salute Et Incolumitate Imp. Caes. M. Aurelii Antonini Pii Fel. Aug. P. M. Tr. Pot. Cos. P. P. Procos. Et Iuliae Maesae Aug. Aviae Aug. N. Totaque Domo Divina Eorum*: atque his tandem voti ipsius formulam subjectam esse, quaedam verborum dictionumque vestigia ostendunt.

nI. Haec jam atque alia hujusmodi exempla quum habeamus, quaecumque in collegiis nostris acta fuerint, siquidem digna, ut olim, videantur, quae litteris consignata, monumentis mandentur; hac fere ratione singula describi atque in tabulas referri poterunt.

Primum quidem annus designabitur et dies, quique collegio praecessent, quum ea gesta sunt, quae infra subjiciuntur. hoc nempe est exordium actorum quorundam fratrum Arvalium apud Fabretum (1) (c):

(a) Et reapse is vulgavit Romae an. 1795. eo opere egregio, cui titulus: *Gli atti e monumenti de' Fratelli Arvali*. Ad hanc porro editionem exe-

gi fragmenta inscriptionum, quae cl. Auctor in hoc et in sequente numero in exemplum adduxit.

(b) Hic in editione Romana Cajet. Ma-

rinii exstat in tabula quadregesima prima.

(1) p. 442. n. 49.

(c) Apud Marin. *Frat. Arv. tab. xxxi.*

L · CEIONIO · COMMODO  
D · NOVIO · PRISCO      COS.  
III · NON · IAN.

MAGISTERIO · C · MATIDI · PATRVINI · PROMAGISTRO · L · VERATIO  
QVADRATO · COLLEGI · FRATRVM · ARVALIVM · NOMINE · VOTA  
NVNCVPAVERVNT · PRO · SALVTE · IMP · VESPASIANI · CAESARIS · AVG ·  
TRIB · POT · COS · VIII · ET · T · CAESARIS · AVG · F · VESPASIANI  
COS · VI ·

jam quae gesta sint, narrare incipies, quemadmodum eodem in exemplo haec legimus:

VICTIMIS · IMMOLATIS · IN · CAPITOLIO · QVAE · SVPERIORIS  
ANNI · MAGISTER · VOVERAT · PERSOLVIT · ET · IN · PROXIMVM · ANNVM · NVNCVPAVIT  
PRAEEVNTE · L · VERATIO · QVADRATO  
IN · EA · VERBA · Q · I · S · S · S ·

formula scilicet infra post sacrorum seriem subscripta erat, quam tempus deleuit: reliqua enim, quae peracta fuerant, protinus enumerantur:

IOVI · OPT · MAX · BOVEM · MAREM · IVNONI · REGINAE  
VACCAM · MINERVAE · VACC · SALVTI · VACCAM  
ITEM · PRO · T · IMP · VESPASIANO · CAESARE · AVG · F · IDEM · VERRIS  
Q · S · S · IOVI · OPT · MAXIM · BOVEM · MAREM · IVNONI · REGINAE  
VACCAM · MINERVAE · VACCAM · SALVTI · VACC ·

ut autem haec legitime ac pro collegio acta esse intelligeremus, adjecti subinde qui adfuissent, sex numero, qui ejus collegii pars erat dimidia: quos inter quum is quoque numeraretur, qui pro magistro praeerat, fortasse conventus ille legitimus habebatur. nunc vero si numerus sodalium ingens fuerit, Magistrum et Decem Primos nominaverim.

IN · COLLEGIO · ADFVERVNT · L · VERATIVS · QVADRATVS · C · TADIVS  
MEFLIANVS · Q · TILLIVS · SASSIVS · L · MAECIVS · POSTVMVS · A  
IVLIVS · QVADRATVS · C · VIPSTANVS · APRONIANVS

his perscriptis, quia subjicienda erant, quae aliis diebus facta essent, annus iterum et dies indicatur: item templum, quod in scholam suam non convenissent.

ISDEM · COS · VI · IDVS · IAN · IN · AEDE · CONCORDIAE · ADSTANTIBVS  
FRATRIBVS · ARVALIBVS · MAG · C · MATIDI · PATRVINI · PROMAG · L ·  
VERATIO · QVADRATO · COLLEGI · FRATRVM · ARVALIVM · SACRVM  
INDICTVM · . . . . .

sic deinceps alia atque alia adnectebantur: quo pacto nos etiam veteribus actis, quae uno in loco multis inscripta tabulis prostent, nova adjungemus, quaecumque ad collegium idem spectent, sive ea res sacras sive cooptationes sive curationes sive contractus sive sumptus comprehendant. sic ea exempla, quae libro primo attulimus, quum nihil in illis mutilum sit, actorum tamen particulae fuerunt, quae forsitan longa serie in collegiorum scholis digesta legebantur: quamquam partem eorum maximam vetustas, ignis, ruinae aboleverunt.

V. Orationem autem id genus scriptionis desiderat accuratam et gravem, sed quae turgida non sit, nec translatis distincta verbis, aut sententiarum luminibus ornata. veteres magis formulae apte collocatae nitorem orationi ac venustatem afferent. laudibus etiam abstinendum; neque enim acta honoris ergo scripta, sed memoriae videri debent: quamquam honori sodalibus saepe erit, quae ipsi fecerint, ea collegio digna esse visa, quae in acta referrentur. narratio perpetua sit, nec tamen longa: itaque in eam si quid



inutile irrepserit, rejiciatur: praesertim quum res eduntur leves, vel quae quotannis fiant. nam quae extraordinaria et nova, ea fere diligentius explicanda sunt.

Atque his demum votorum etiam et precationum carmina, ipsaque collegiorum decreta, quae separatim perscripta non sint, subicere identidem aut interserere fas erit: quibus tamen titulos cuique suos praefiges, quo ea perspicue a narratione sejungas: ejusmodi olim haec erant, *Votum*, *Nuncupatio Votorum*, *Precatio Cooptationis*, *Consecratio*, *Decretum*, *Auctoritas*; et his similia. sed de ipsis decretis sacrisve carminibus hoc loco nihil a me dicetur, qui haec jam qua forma, quibus verbis scribenda sint, superius exposui.

## PARTITIO SECVNDA

## DE QVATVOR CONSECTARIIS INSCRIPTIONVM MIXTI GENERIS

**S**ena illa inscriptionum genera, de quibus hactenus disseruimus, aliae consecantur et numero et varietate insignes: quae quidem singulae quum sint e singulis ortae generibus, in quatuor tamen veluti catervas divisae, servato, ut vidimus, discrimine, aliae ab aliis distinguuntur. de his nunc singillatim agendum est, demonstrandumque quid in quolibet illo ampliori genere proprium insit, quas nobis species usus et imitationis caussa constituendas, quibus legibus exempla veterum reddenda nunc esse existimemus.

## CAPVT I.

*De inscriptionibus temporariis*

## §. I.

## DE RATIONE GENERIS VNIVERSA

**I.** Temporariis inscriptionibus usos veteres, libro primo ostendi, exemplis etiam, quae manserunt, in medium prolatis, earum nunc quid proprium certumque sit, breviter inquiremus. nam quidam adhuc non probant, quas e genere hoc potissimum Matthaeo Egizio Guidonique Ferrario in deliciis fuisse vident: quasi vero genus illi novum induxerint, non antiquum germanumque revocarint. nec tamen hoc etiam isti, opinor, contendunt, ne precationum quidem votorumque carmina, quae uterque edidit, ex veterum praescripto confecta esse: quum ea omnia exemplis antiquorum, quae protulimus, persimilia sint. id, credo, negant, quae historicae vel honorariae aut funebres inscriptiones sunt, atque ab illis poëtarum prope licentia conditae prodierunt, eas praeterquam communi ceterarum stilo, recte atque ex Latinorum usu et auctoritate confici potuisse. ego vero non diffiteor, inscriptiones ab antiquis, quae temporariae essent, communi etiam stilo aliquando exaratas: huiusmodi sane quaedam sunt, quas libro primo (1) descripsimus. sed alia quoque forma probatas esse, quae ab illis non parum numero et compositione discreparent, manifestum est. Saturnio versu scribi consuevisse triumphantium titulos, qui in Capitolio proponebantur, testatur Atilius Fortunatianus (2). haec autem sunt, quae Livius non semel (3) *Carmina incondita* appellavit, sive, ut Fortunatianus ait, quae scripta essent *non observata lege, nec uno genere custodito inter se versus; Rhythmos* aliquando appellatos ostendit Maffejus (4). at-

(1) v. inscr. 337, 338, etc.

(2) Gramm. Vet. Putsch. p. 2680.

(3) l. 4. c. 10. n. 20. etc.

(4) Diplom. p. 177. et Art. Cr. L. l. 2. c. 2. p. 33.

que his quidem in versibus casu quodam senarioli exsistebant interdum vel optimi: quippe, ut ait Quintilianus (1), *metrici pedes adeo reperiuntur in oratione, ut in ea frequenter non sentientibus nobis, omnium generum excidant versus: et contra nihil est prosa scriptum, quod non redigi possit in quaedam versiculorum genera.* sed tamen qui carmen ejusmodi conficerent, hoc magis spectabant, ne quid *αφύθμον*, quam ut *εὐφύθμον* esset atque poëticum. itaque Capitolinae illae inscriptiones Saturnio versu confectae nec ad communem titulorum stilum, nec ad poëticum numerum metrumque referri omnino poterant: non aliter atque, quas ex Egizio et Ferrario proferam, lepore quidem contactas poëtico, sed quae tamen in certas mensuras cogi non possint.

Atque eodem plane modo funebres aliquando inscriptiones confectas esse, satis jam indicat titulus nuper repertus in Scipionum sepulcro, qui primum fortasse rogo, deinde sarcophago P. Scipionis P. Africani majoris filii adscriptus est, ejus, opinor, qui Aemilianum adoptavit: nam hujus certe laudes apud Tullium (2) non dissimili sententia attigit Cato: est autem ejusmodi, ut qui scripsit, metrum numerosque illos Saturnios, nec alios sequutus videatur:

QVEI · APICE · INSIGNE · DIALIS · FLAMINIS · GESISTEI  
MORS · PERFECIT · TVA · VT · ESSENT · OMNIA  
BREVI · HONOS · FAMA · VIRTVSQVE  
GLORIA · ATQVE · INGENIVM · QVIBVS · SEI  
IN · LONGA · LICVISET · TIBE · VTIER · VITA  
FACILE · FACTEIS · SVPERASES · GLORIAM  
MAIORVM · QVA · RE · LVBENS · TE · IN · GREMIV  
SCIPIO · RECIPIT · TERRA · PVBLI  
PROGNATVM · PVBLIO · CORNELI

ad vetustam scribendi rationem quod attinet, Sirmondi, velim, commentarium legas, quem in Scipionis Barbatii filii inscriptionem edidit: ne hic quidem in Grammaticae leges peccatum esse quidquam, facile intelliges.

Iam id carminis genus, quum Romae ante postque Livii Andronici et Q. Ennii aevum in honore fuisset, haud tamen, Graecorum deinde artibus in urbem inlatis, repente jacuit, neglectumque est: ut qui nunc revocare student, ii, aurca aetate posthabita, rudem incomptamque vetustatem perperam fatigare videantur. imo vero quibus temporibus optimi versus fiebant, iis quoque snus erat etiamtum Saturnio carmini honor; exstantque adhuc exempla eruditarum aetatum non ita pauca (3), quibus stilum ejusmodi ac numerum tueri ac susinere facile possis. neque ab inscriptionum hujusmodi forma multum abit C. Caesaris ille Pontico triumpho titulus VENI · VIDI · VICI; cui quidem alijs in triumphis alios forma item minime communi placuisse, verisimile est; quum quinque ille egerit diverso etiam quemque apparatu et instrumento. in triumphis scilicet nova quisque nec antea spectata proferre conabatur, quo major esset visentis ea populi et voluptas et admiratio.

Quid, quod haec ipsa scriptionis ratio temporariis ornatibus magis conveniebat, quum ceterarum inscriptionum gravitatem dignitatemque respueret? neque enim seria laetis, aut quae paullo grandiora atque illustria sunt, tristibus ac moestis aptantur. inscriptiones scilicet temporarias in triumphis fere pompisque sollemnibus propositas esse ostendimus, aut funerum et luctus caussa: id est iis plane temporibus, quibus vel luctus multum vel dolori plurimum dandum est; nec graviter ferendum, si aliquatenus aut incitati aut percussi animi affectus erumpant, significationemque dent vehementis

(1) Inst. l. 9. c. 4. v. Barth. Advers.  
l. 51. c. 17.

(2) de Senect. c. 11. n. 35.

(3) v. Svet. in Iul. c. 80. etc. Vopisc.  
in Aurel. c. 6. etc.



motus: quae quidem veteres quum vidissent atque probassent, paullatim, opinor, factum est, ut haec quasi propria temporariis inscriptionibus forma tribueretur, liberior utique ac solutior, quam ceteris, ne tituli rebus parum convenire viderentur.

II. Quae quum ita sint, nulla jam caussa est, cur inscriptiones hujus generis novas putemus, aut cur omnia poëtarum pigmenta, omnes ab his flosculos abesse velimus. illud potius curae esse debet, quo pacto veterum et modum et venustatem referamus. neque enim in his totum Tibulli aut Horatii *μυροδουκιν*, vel omnes omnium poëtarum arculae consumendae sunt: sed videndum est quatenus; illudque item meminisse oportet, magis offendere nimium, quam parum, et, ut ait Varro (1), *bellaria ea maxime esse mellita, quae mellita non sunt*: deinde esse quaedam, quae venusta habeantur, alia, quae inepta; ut qui sibi elegantes videantur, saepe aliis risum debeant.

Primum igitur non si poëtis hoc datur, ut rem eandem pluribus verbis designent, hoc tu in temporaria etiam inscriptione tibi sumes; quae, quum brevis esse debeat, sententiis magis quam verbis ornanda ac distinguenda est. tum locus hic quoque ceterarum inscriptionum formulis esse debet; sed non illis utendum indiscriminatim et promiscue: quae sacrarum propriae sunt, cave, eas in honorariis inscriptionibus usurpes: non enim id recte quidam aut ullo veterum exemplo fecerunt. eodem modo suae historicis, suae honorariis tribuentur: in funebres autem inscriptiones pleraeque sepulchralium commode transferentur. sed illa omnino repudianda, quam quidam, ut jam monui, aliis quoque titulis quadrare putant, *Monumentum Posuerunt*: nam monumenta quidem temporaria nulla fiunt. Ego, inquit Tullius (2), *quae monumenti ratio sit, nomine ipso admoneor: ad memoriam magis spectare debet posteritatis, quam ad praesentis temporis gratiam*. ob eam causam ne illi quidem modo et ratione faciunt, qui ad aevi notam annos in his inscribunt: quorsum enim ista spectant aut spectare possunt, quum ducta pompa aut exsequiis persolutis, titulos omnes tolli oporteat?

Fabulas porro, et quae perversae religionis vocabula sunt, poëtis veteribus relinquamus. nihil haec ad venustatem leporemque inscriptionis conferre possunt, at contra ad levitatis notam non parum. neque tamen in his ego, ut gravis sis, vel ut subtilis, velim, labores; sed potius medium quiddam ut teneas: quo aliquid ingenio, aliquid dignitati tribuatur: ex utroque enim facile illa existet venustas, quam in temporaria inscriptione requirimus, ut haec suavitate ipsa et lepore delectet. nec oratio illa placeat, quae crebris sententiarum figuris exsultat immodice, et poëtica plane jactatur audacia: haec qui probet, facile in avorum nostrorum vitium morbumque delabatur. nimirum si ve laudanda virtus sit, si ve res gestae celebrandae, si ve gaudentis aut flentis populi affectus exprimendi; paucis omnia versibus comprehendenda sunt: qui spatium velit, eum extra fines excurrere necesse est.

Iam et in ipsa orationis structura studii plurimum ac diligentiae ponendum statuas. ea primum perpetua esse non debet, sed membris carpenda est minutioribus; ita tamen, ut haec etiam vineta numeris sint. tum delectus verborum habendus est, ac singula apte collocanda, ut ne asper eorum concursus aut hiuleus sit, sed quodammodo coagmentatus ac levis: itaque junctura quoque verborum alia in his esse potest, quam quae inscriptionum communium propria est, quo facilius oratio tamquam cera ad arbitrium nostrum formetur atque fingatur. aptissimae autem stilo huic, leviter quidem et parce si asperseris, dictiones erunt e poëtarum penu depromptae: vetusta item verba, quae tamen consuetudo ferre possit, et translata, quae vim habeant illustrandi.

At qui denique inscriptionis erit modus, aut qua lege verba alligabimus? equidem

(1) apud Gell. l. 13, c. 11.

(2) apud Non. c. 1. n. 136.

haec cuique relinquenda arbitror, ut vel suo quisque iudicio, vel ad aliorum exempla moderetur. neque enim melius quisquam audiendo, quam experiundo vim hanc nume-rose scribendi consequatur. illud tantum admonebo, numeros sic esse adhibendos, ut percussiones eorum insignes ne sint, atque ut eos delectationis et aurium, non metri et modorum caussa sequutus esse videare.

## §. II.

*DE INSCRIPTIONIBVS SACRIS PRECATIONVM  
VOTORVMQVE CAVSSA*

**P**ietatis religionisque caussa, atque ut Deo immortalī gratiam justis honoribus ac memori mente persolvamus, sollemnes hujusmodi precationes et carmina proponi so-  
lent, eaque et festis fere diebus et sacris semper in aedibus aut certe in carum fronte  
tabulis inscripta leguntur. in his tamen sancta quoque Dei Mater ac reliqui Caelites  
appellantur, quod aut praesidio eorum tutelaque freti, a Deo veniam poscimus, aut  
ope jam implorata, salutem nobis divinitus datam esse profitemur.

Sic autem sermo instituitur, ut populus ipse aut omnes collegii unius sodales lo-  
quentes inducantur, quin tamen eos nomine ullo appellari necesse sit: quippe eos vel  
locus ipse vel precationis verba designant. igitur ab ipsa fere Dei aut Caelitum san-  
ctorum invocatione exordium sumitur; cui precatio aut voti formula continuo subne-  
ctitur. hoc olim modo Firmi quum sodalium Marialium collegio praessem, hique in  
aedicula sua natalem diem sodalitatis celebrarent, ibidem quum alii circum tituli, tum e  
regione altaris precatio haec in tabula legebatur:

MARIA • MATER

TE • PRECAMVR • QVAESVMVSQVE

VTI • SIES • VOLENS • PROPITIA • NOBIS • COLLEGIO • SODALITATIQVE • NOSTRAE  
QVOIVS • REI • ERGO • SACRA • SOLLEMNIA • OBIMVS • VTI • TV • ERROREM  
SOCORDIAM • MORBOS • VISOS • INVISOSQVE • PROMIBESSIS • DEFENDAS  
AVERRVNCESQVE

VTIQVE • INGENIO • QVEMQVE • MEMORIA • INDYSTRIA • MACTE • ESSE • IVBEAS  
MENTEM • ANIMVM • INTEGRVM • SERVASSIS • DVISQVE • BONAM • SALVTEM  
NOBIS • COLLEGIO • SODALITATIQVE • NOSTRAE

verba hic quaedam vetusta atque ex Catone ipso desumpta (1) placuere, nam veteres  
quoque ea fere sacris in rebus retinuerunt; sive quod, ut ait Quintilianus (2), ob re-  
ligionem mutari non posse, consecratisque omnino utendum esse censerent; sive etiam  
quod ea religiosam antiquorum simplicitatem ac sanctimoniam repraesentare quodanmo-  
do viderentur.

At cui sermo probetur quam usitatissimus, non cum quisquam jure reprehendat:  
exempla sunt quaedam antiqua: sunt recentia plura, quorum verba e medio, ut ajunt,  
atque ex communi Latinorum sermone sublata esse dixeris. ex antiquis feruntur illa,  
quae ab his recitari video, qui de triumphis scripsere: quamquam neque illi, unde  
hauserint, tradunt, neque in antiquis ea scriptoribus reperire datum est. Ravaldinus

(1) v. inscr. 356.

(2) Inst. l. 1. c. 6.

protulisse primus videtur is qui se *Blondum Flavium* appellavit, libro x. *de Roma triumphante* (1), auctor plerumque non indiligens. primum autem est ejus, qui triumphum ducturus esset, sollemnis ante pompam precatio:

DI · NVTV · ET · IMPERIO · QVORVM  
NATA · ET · AVCTA · EST  
RES · ROMANA  
EANDEM · PLACATI  
PROPIIATIQVE · SERVATE

ejusdem, ducto triumpho, quum Capitolium ascenderet, hoc fuisse carmen dicitur (2):

GRATIAS · TIBI · IVPITER · OPTIME · MAXIME  
TIBIQVE · IVNO · REGINA  
ET · CETERIS · HVIVS · CVSTODIBVS  
HABITATORIBVSQ · ARCIS · DIS  
LVBENS · LAETVSQVE · AGO  
RE · ROMANA · IN · HANC · DIEM · ET · HORAM  
PER · MANVS · QVOD · VOLVISTIS · MEAS  
SERVATA · BENE · GESTAQ ·  
EANDEM · ET · SERVATE · VT · FACITIS  
FOVETE · PROTEGITE · PROPITIATI  
SVPPLEX · ORO

porro his fere similia sunt, quae jam e Livio produximus, et quae Macrobius (3) habet evocandorum Deorum atque urbium exercituumque devovendorum carmina, a Romanis olim ducibus ante oppugnationem praeliumve pronuncia: quamquam haec fortasse eorum, qui retulerunt, stilo depasta, aut lima recenti polita sunt.

Vt ut haec fuerint, planam item atque usitatam scribendi rationem quidam hac aetate sequuti, inscriptiones id genus valde probabiles condiderunt. cujusmodi est exempli gratia quae Ferrarii stilo exarata, apud Cerenses in templi fronte prostitit, quum ad eos Pontifex major Mediolanensium lustrationis causa venisset (4):

MARTYRES · FORTISSIMI  
CORNELI · ET · CYPRIANE  
SI · VOBIS · TEMPLVM · NOVVM · A · FVNDAMENTIS · EXSTRVXIMVS · DEDIMVS  
DEDICAVIMVS · VOTA · QVAE · HODIE · NVNCVPAMVS · PRO · IOSEPHO  
PVTEOBONELLO · CARD · ARCHIEP · MEDIOL · IIS · VOLENTES · PROPITIQVE  
ANNVITE · VT · EVM · SIC · AMETIS · VOS · VT · NOS · ILLE

mitto alias hujusmodi, quas ab Ferrario pariter atque ab Egizio etiam aliisque confectas facile invenies: neque enim pluribus opus est, quo stili utriusque usum et gratiam tueamur.

II. Iamvero precationum votorumque ampla fere materies et varia: his enim locus est et in secundis et in adversis rebus, gratiarum agendarum causa, et ad opem auxiliumque implorandum: sed tum maxime, si Princeps convaluerit, si prole auctus sit, si victoriam ex hoste retulerit: item si bella ingruant, si calamitas agris impendeat, si salus civitatis in discrimen vocetur. sive autem gratiae Deo agantur, sive praesens ab eo subsidium petatur, causa utique subneetenda est, quare alterutrum fiat, eaque usurpanda sunt verba, quae religionem et grati animi officium testentur. tum si votum suscipitur, sic obliganda est fides, ut primum quid a Deo efflagitemus, deinde quid voti compotes praestituri simus, diserte efferamus (5). nam illud quidem libri I. exemplum

(1) edit. Basil. 1559. p. 214.  
(2) id. ibid. p. 216.

(3) Sat. l. 3. c. 9.  
(4) Ferr. p. 49. n. 109.

(5) v. inscr. 334.



singulare duxeris, cui initium est *Saeculo Felici* (1), in quo et sacerdos nominatur, qui vota nuncuparit; nec tamen, quae vota fuerint, traditur: nisi quod caussam votorum satis indicat illud ipsum tituli initium, vota scilicet ea pro imperii felicitate esse suscepta: vel potius vota eo loco nil aliud sunt, quam sacerdotis preces, quemadmodum Ovidius quoque accepisse videtur, quum ait (2),

*Dii maris et caeli, quid enim nisi Vota supersunt?*

*Solvere quassatae parcite membra ratis.*

et Trajanus Plinio (3): *Agnosco Vota, mi Secunde carissime, quibus precaris, ut plurimos et felicissimos natales florente statu reipublicae nostrae agam.*

II. Stilo autem ad haec opus et presso et aequabili, ut oratio et simplex et gravis sit, non sententiis arguta, non verbis sonans: esto et turgida quis atque inflata aliquando usus fuerit: cuiusmodi esse videtur precatio illa Senecae (4) pro Claudio Aug. cuius *παλινοδία* est sane turpis carmen id, quod post illius mortem idem edidit et *Ἀποκατακύντασις* inscripsit. ipsa tamen precationis verba non invitus proferam, quum in his etiam sit, quod tiro utiliter tollere, atque in rem propriam transferre possit. *Dii, inquit, illum Deaeque omnes terris diu commodent. acta hic D. Augusti aequet, annos vincat: ac quamdiu inter mortales erit, nihil ex domo sua mortale esse sentiat. Rectorem Romano imperio filium longa fide approbet, et ante illum consortem patris, quam successorem accipiat. sera et nepotibus demum nostris dies nota sit, qua illum gens sua caelo adserat. abstine ab hoc manus tuas, Fortuna, nec in isto potentiam tuam, nisi ea parte, qua prodes, ostenderis. patere illum generi humano jamdiu aegro et affecto mederi: patere, quidquid prioris Principis furor concussit, in locum suum restituere ac reponere. Sidus hoc, quod praecipitatio in profundum ac demerso in tenebras orbi refulsit, semper luceat. Hic Germaniam pacet, Britanniam aperiat, et patrios triumphos ducat et novos.*

Haec, inquam, si severius paullo infringantur, leniorique deducta flexu coagmententur, ejusmodi jam fiant, ut sollemnem ex his precationem pro Principis incolumitate conficere atque ornare facile possis. ceterum quanto gravior Velleii Paterculi illa precatio, qua historiae suae volumen alterum finivit: quamquam et haec nimia plane adsentatione scripta est, quod et scriptoris illius et aetatis vitium fuit: *Iuppiter Capitoline, et auctor ac stator Romani nominis Gradive Mars, perpetuorumque custos Vesta ignium, et quicquid numinum hanc Romani imperii molem in amplissimum terrarum orbis fastigium extulit, vos publica voce obtestor atque precor, custodite, servate, protegite hunc statum, hunc Principem, eique (Tiberio Aug.), functo longissima statione mortali, destinate successores quam serissimos, sed eos, quorum cervices tam fortiter sustinendo terrarum orbis imperio sufficiant, quam hujus suffecisse sensimus: consiliaque omnium civium aut pia . . . reliqua desunt. porro hic etiam non pauca esse vides, quae in rem nostram derivare liceat: atque ex his ea etiam, quae nullo negotio Pontificibus Maximis aptari percommode, multoque verius de iisdem dici praedicarique possunt.*

Quod superest, precationum votorumque nullae sunt clausulae: quin uno et perpetuo tenore carmen ab initio ad finem deducendum est; ac de brevitate etiam laborandum, ut qui propositas tabulas perlecturi sunt, uno prope adspectu, quae vota publica sint, ediscere ac memoria tenere possint. quidquid praeterea addideris, jure quis adscribat, *Non erat hic locus.*

(1) v. inser. 335.

(2) 1. Trist. ep. 2, v. 1.

(3) Plin. ep. 90. lib. 10. v. et Vell. l. 2, c. ult.

(4) de consol. ad Polyb. c. 31.

## §. II.

DE INSCRIPTIONIBVS AD FESTOS APPARATVS  
ATQVE POMPAS

I. **F**estorum apparatusum pomparumque sollemnium non una caussa esse solet. religionis haec pietatisque ergo saepe instruuntur, atque ad publicas supplicationes habendas: interdum laetitiae et gratulationis caussa, quod parta ex hoste victoria fuerit, quod claro civi honores singulares aut summa imperii delata sit, quod adventus Principis, aut regales nuptiae, aut reditus victoris exercitus, triumphi instar, celebretur. inscriptiones autem ad celebritatis causam prodendam in tabulis propositae, templorum viarumque ornameto passim leguntur, atque in janis etiam et fornicibus temporariis, aut in ipsis urbium portis et in praetiorum atriis eminent.

Enimvero inscriptiones id genus, qua historicis qua honorariis similes, communi etiam stilo scribi possunt, temporis notam si exceperis, qua in temporariis opus non esse jam admonuimus. sic Pola in arcu ad pontem sublicium, quo Patres Veneti, quum per eorum fines Ferdinandi II. Aug. nova nupta in Germaniam pergeret, Athesim jungendum curaverunt, haec ut inscriberentur, auctor fuit (1):

QVOD • FELIX • FAVSTVMQVE • SIT  
ELEONORAE • GONZAGAE  
AD • AVGVSTAS • NVPTIAS • PROPERANTI  
RESP • VENETA  
CONSTRVCTO • PONTE • ITER  
APERVIT

satis haec nitide scripta, opinor: et cum dignitate, ut par erat; neque enim de exiguo opere agebatur.

Illud autem, quemadmodum hoc in exemplo factum vides, in aliis fere servari convenit, ut nomen ejus, cujus de honore agitur, sub initium efferatur: quo quisque legendo statim intelligat, quorsum novae moles apparatusque pertineant: praesertim si honor a civitate iis habeatur, qui quum imperio sint, aut quos virtus ac dignitas altius extulerit, quam ut in popularium numero censi possint. ceterum si quando ipsa celebritas ad religionem revocetur, et honoris quidem caussa, sed tamen grato erga Deum animo templa ornentur, atque in his tituli suspendantur, aeque pietatis et laetitiae publicae testes; tum vero sacrarum inscriptionum more a dedicatione ordiendum erit, atque infra apparatus ratio et caussa exponenda: ut Deo quidem beneficium acceptum referamus, viris autem, quos ornare velimus, adventum eorum aut victoriam aut honorem gratulemur. hoc pacto non ita pridem inscriptio a me confecta est, quae Bononiae sacra in aede proponeretur;

(1) apud Boldan. l. 2. p. 301.

## LIB. II. PART. II. CAP. I. DE INSCR. TEMPOR.

OMNIPOTENTI • DEO • CONSERVATORI  
 SACR •  
 SVPPPLICATIONE • DECRETA  
 QVOD • A • PIO • SEXTO • PONT • MAX •  
 OPTIMO • ET • INDVLGENTISSIMO  
 PRINCIPE  
 ANDREAS • GIOANNETTYS  
 EPISC • HIMERAEOVRVM  
 PATRIAE • BONO • ET • CIVIVM • GLORIAE • NATVS  
 SVMMA • IAM • LAETITIA  
 OMNIVM • ORDINVM  
 ARCHIEPISCOPVS • BONONIENSIVM  
 DICTVS  
 ET • IN • PATRVN • CARDINALIVM • COLLEGIVM  
 COOPTATVS • SIT  
 AD • GRATIAS • RITE • AGENDAS  
 GENS • BIANCONIA  
 TEMPLVM • MAIORVM • SVORYM  
 EXORNAVIT

At contra Romae, quum, Pontifice Maximo recens creato, Ignatiani templi cella, honori ejus et disputationum sollemnium caussa, splendide, ut fit, magnificeque con-vestita esset, arcusque in introitum exstructus, quo Patres Cardinales, quo Quirites omnes succedentes in arcem mediam spectandi et audiendi caussa venirent; rogatus, inscriptionem ut conderem, quae ad summum fornitem figeretur, hanc exaravi;

IN • HONOREM  
 PII • SEXTI • PONTIFICIS • MAXIMI  
 CVLTORIS • AVCTORISQ •  
 STVDIORVM • OPTIMORVM  
 DOCTORES • LYCEI • ROMANI  
 CVM • AVDITORIBVS • VNIVERSIS  
 AD • EXPERIMENTA  
 DOCTRINARVM • SVARVM • PVBLICANDA  
 EXORNAVITYNT

frustra tamen, ut saepe alias: quippe repudiata est, titulo quodam supposito, in quem facete quosdam jocatos memini.

Porro honorariae etiam tam arcibus, quam basibus statuarum convenient: quin et ellogia probata sunt, statuis nempe subscripta majorum ejus, cujus adventus celebrabatur, ut in *Pompa Antuerpiensi*, et apud Ferrarium (1): de quibus nihil hic addendum iis est, quae partitione superiore exposuimus.

II. Iamvero qui communi titulorum stilo posthabito; genus amet inscriptionum paullo liberius, quale cum paucorum dierum apparatu pompaque congruere diximus; is tamen hoc primum statuatur, quae inscriptio prima loco atque ordine esse debeat, eam ut communi stilo et historicarum more perscribat. semel enim edocendus est populus, quae festi apparatus laetitiaeque publicae caussa sit: quo etiam fiet, ut ceteris inscriptionibus lux afferatur, quae propriis saepe nominibus ac certis carent indicijs. hanc

(1) Inscr. p. 71. n. 155. etc.



est rationem sequutus Ferrarius, hanc Egizius, quorum exempla propter elegantiam potissimum ac munditiam sermonis ceteris praeferenda esse videntur. sunt autem Ferrarii exempla ex iis, quae temporarii ornatus caussa scripsit, quum multis in oppidis agri Mediolanensis adventus optatissimi Archiepiscopi celebraretur (1):

QVO • FAVSTVS • FELIXQVE • SIT  
COLONIS • INCOLIS • CONIVGIBVS  
LIBERISQVE • NOSTRIS  
ADVENTVS • ANTISTITIS • OPTIMI  
ARCVM • IN • INTROITVM  
CERENSES • EXORNAVIMVS

haec in arcu ad oppidi portam legebantur: at in ipso oppido alia atque alia licentius perscripta: cujusmodi multa idem edidit, quae non uno in loco prostiterunt. haec quidem fornicis inscriptio fuit, quem contexti flores late varieque diffusi obtegebant (2):

PVRPVREAE • FLOS • ROSAE  
ET • OMNIS • COPIA • ODORVM  
SVAVEOLENTIBVS • AGRIS  
SPIRET  
OPTIMO • PATRONO

eodem pertinent quae sequuntur, rerum item verborumque venustate probabiles (3):

NON • SERICVM • NEC • AVRVM	TVTELA • PRAESENS • INSVBRIAE
SED • CANDOR • SIMPLICITAS	VIDEN
ET • HONESTI • BENIGNA • VENA	EFFVSAM • OPPIDO • IVVENTAM
POMPAM • INSTITVUNT	AMOR • ET • PIETAS • AGVNT
ADSIS • O • BONVS • O • PRAESENS	INTONSAE • SIMILEM • SOBOLI • GREGIS
PRAESIDIVM • TVIS	FESTIVAM • HILAREM
	PASTORIS • IN • OCCVRSVM • SVI
VIRGINVM • MATRES	
GRANDAEVIQVE • PATRVN	
OPTATVS • ADVENIT • DIES	
QVI • CORDA • GAVDIIS • EXPLEAT	
OMNEMQVE • CVRAM • ANIMI • EXIMAT	
PARENTEM • LAETI • ADSPICITE	
ET • VOTA • SOLVITE	

Similes his ac prope geminas dixeris inscriptiones ab Egizio conditas Neapoli pro reditu Regis e Sicilia (4):

DVLGIS • CVRA	DILECTE • DEO
PARTHENOPES	TVTELA • PRAESENS • ITALIAE
VIDEN	TVA • REX • AETAS
VT • EFFVSA • CIVITAS	AGRIS • FRVGES
TVVM • PRAESTOLATVR	ET • DECVS • NOSTRIS
ADVENTVM	RESTITVIT • ORIS
ET • VOTIS • SVPEROS	
FATIGAT	

(1) Inscr. p. 48. n. 108.

(2) ibid. p. 50. n. 111.

(3) ibid. n. 112. 113. 116.

(4) p. 313. 1. 2. 3.

AFFVLST • TANDEM  
 GRATVS • ILLE • DIES  
 AVREA • LVCE • NITENS  
 QVO • TE • REDVCEM  
 REGNISQVE • AVCTVM  
 EXCEPIT • VLNIS  
 FIDA • NEAPOLIS

adde his, quae eodem Egizio auctore festis diebus Neapoli propositae sunt, quum invicti Martyris Ianuarii memoria sacris anniversariis coleretur (1). harum vero et ceterarum omnium haec fere summa est: sermo plerumque exprimitur populi cum adloquentis, cujus gratia feriae institutae et urbs ornata est. huc laudes, huc gratulationes, huc vota precesque totius civitatis referuntur, sententiae usurpantur breves, verba electissima; numerosa verò ac propior versui oratio quam prosae: sic tamen, ut numeri, quemadmodum superius adnotavi, lege soluti sint.

Ceterum non defuere, qui numerum hunc poëticum studiosius vitarent; quaerentique exempla, quum alibi, tum in *Pandectis* Modii *triumphalibus* quaedam occurrent, e quibus est, quod subjiciam, Philippo Caroli V. Aug. F. a Mediolanensibus temporario in fornice inscriptum (2):

QVI • NOBIS • AVCTOR • ES • PVBLICAE • LAETITIAE  
 FRVERE • NOBISCVM • COMMVNI • GAVDIO  
 HONORES • AVTEM • QVI • TIBI • DEBENTVR  
 DIVINI • ET • IMMORTALES  
 PATERE • AD • TVVM • REDITVM • RESERVARI  
 CVM • VICTIS • HOSTIBVS • AGES • TRIVMPHYM  
 EX • PACATO • ORBE • TERRARVM

ta vero quae magis arriserint, vel utraque etiam, si libet, exempla sequaris. neutra enim antiquis displicuisse quisquam ostenderit. illud tantum caveas diligenter, ne frigida aut levia aut nimis, ut ajunt, librata conseceris: nihil enim praeter modum fieri debet. quamquam hujus terminos demonstrari vix posse puto; nisi forte exemplo esse potest egregius ille Plinii locus de Tullio (3), quem sane, tituli instar, in ejus reditu fornici temporario inscriptum quis non probasset?

SALVE  
 PRIMVS • OMNIVM • PARENS • PATRIAE  
 APPELLATE  
 PRIMVS • IN • TOGA • TRIVMPHYM  
 LINGVAEQVE • LAVREAM • MERITE  
 ET • FACVNDIAE • LATIARVMQ •  
 LITTERARVM • PARENS  
 ATQVE • OMNIVM • TRIVMPHORVM  
 LAVREAM • ADEPTE • MAIOREM  
 QVANTO • PLVS • EST  
 INGENII • ROMANI • TERMINOS  
 IN • TANTVM • PROMOVISSE  
 QVAM • IMPERII

Clausulae denique, quae communium inscriptionum propriae sunt, eae in temporariis haud temere subscribendae: quibus nimirum vix locus esse tum potest, quum temporariae ad communium rationem exiguntur.

(1) p. 286. n. 3.

(2) lib. 2. n. 34. p. 83.

(3) H. N. l. 7. c. 30. n. 31.

## §. III.

## DE INSCRIPTIONIBVS FUNERVM PVBLICORVM

I. **M**orem, qui Romae potissimum est, quum exsequiae Pontificum Maximorum aut Regum celebrantur, ut templa atque atria inscriptionibus decorentur, a Romanis veteribus fluxisse diximus, pro quorum etiam pyra tribunalia nunc funerum publicorum caussa extruuntur magnifico saepe opere, ac titulis plerumque insignia: quae veteres in foro temporaria item construebant, interdum et mansura, ut Epidaphne Germanico Caesari Antiochenses, quo in loco, ut ait Tacitus (1), vitam ille finierat.

Quae autem inscriptionum funebrium ratio esse debeat, non ita liquet: nemo enim ista antiquitus memoriae tradidit posterorum. tum pleraque etiam exempla, quae attulimus, quamquam funebria magis esse videntur, quam sepuleralia; paucas tamen formulas habent, quae funerum publicorum illustres titulos ornare possint: communi praeterea et forma et stilo fere scripta sunt; ut ab his, quae paullo ante descripsimus, valde differant. quapropter reete, opinor, ac tute faciunt, qui funebres etiam titulos communi stilo perscribunt: idque maxime probandum videtur, quum de Principis funere agitur, in quo nihil proponi par est, nisi quod et graviter et eum dignitate scriptum sit. sed tamen in exsequiis, ut ita dicam, minorum gentium, quae publice fiant, non adeo illud alterum temporariae scriptionis genus repudiem, ut inscriptionibus nullum nisi communibus locum esse putem. videmus enim in ipsis veterum epitaphiis hoc sibi quosdam sumpsisse, ut aliquid a communi forma recederent, ut sententias interdum subscriberent, ut salutationes adderent, ut dolori denique et amoris plurimum indulgerent. itaque verisimile est, in funebribus eos titulis plus aliquid ausos esse: quo scilicet tempore vis acrior doloris urgebat, et totam saepe cognitionem luctu perditam, ac desiderio carorum pignorum confectam ad inmodicas laudes atque ad fletus et lamentationes vehementius incitabat. ob eam rem nostra quoque aetate fuere, qui ad publicas exsequias floridum hoc scribendi genus quam aptissimum esse arbitrati, prima utique inscriptione ex communium forma proposita, ceteras licentius condidere: eaeque multis et probatae sunt et probantur: quarum exempla aliquot in Ferrarii etiam et Egizii voluminibus reperies.

II. Quidni igitur et hanc rationem sequamur, quae quum antiquorum exemplis consentanea est, tum recentiorum iudicio usuque comprobatur? illud quidem hic etiam retineamus, ut qui titulus in templi fronte aut intra porticum supra portam maximam primus eminebit, is communi stilo scriptus sit, sic nempe, ut defuncti nomen exhibeat et merita, tum eorum etiam nomina, qui iusta persolvant, eorundemque officium et ipsum animi moerorem et luctum significet. at subinde ceteris in titulis, qui ad feretrum aut ad parietes figentur, non res solum a defuncto gestas ejusque virtutes, sed varias etiam sententias et laudes et affectus concludamus: cujusmodi quaedam vel in epitaphiis vidimus, plura in librum tertium congerentur.

Ceterum haec apte dividenda sunt, maxime ut virtutibus rebusque a defuncto gestis ordine quodam in plures tributis partes, tota veluti vita ejus et acta ob oculos ponantur. neque enim alio consilio inscriptiones in funeribus publicis proponimus, quam ut ea, quae quis pie, fortiter, liberaliter gesserit, in civium memoriam revocemus, at-

(1) Ann. l. 2. c. 85.



que ut beneficia, virtutes, recte facta justis laudibus et grato animo prosequamur. quidam ideo breves veluti fastos conficere, quorum singulae partes singulis picturis clypeisve plasticis subscriberentur. ejusmodi sunt, quos Ferrarius ob funus Christinae Augustae scripsit (1); quos utique, quia Augustae gratia confecti sunt, non immerito commendaveris: quippe tam illustrium exsequiarum tituli non venustam et floridam, sed grandem ac splendidam orationem requirebant. verum si funus celebretur ejus, qui infra fastigium Principis sit, nec satis magnis in rebus diu versatus fuerit; jam qui fastos condere velit, levia saepe et inania contextat, multaue titulorum ornamenta respuat, necesse est, quae hisce quidem liberioris stili inscriptionibus apprimè conveniunt, at fastis aptari nullo modo possunt.

Itaque res, quae celebrandae erunt, sic exponi praestabit, ut ordinem quidem in distributione servemus, ad singula tamen illustranda qua sententiis philosophorum, qua figuris rhetorum apposite utamur. his vero apta in primis *προσωποποιια* atque *αποστρεψη*, ut aut cives ipsi defunctum adloquentes, aut qui funus faciunt, praeclare ejusdem facta enarrantes inducantur. finge exempli caussa feminam nobilitate ac virtute primariam, eandemque honestissimi municipii patronam ac de eo optime meritam obiisse, cui propterea funus publicum a Decurionibus decretum fuerit: his equidem aut similibus titulis funebrem apparatus instrui ornarique posse crediderim. in ipso primum templi vestibulo titulus hujusmodi proponetur:

A      ✠      Ω

LVCILLAE • CLAVDI • F •

METELLAE • RVFI

PATRONAE • MVNICIPI

PARENTALIA

PVBELICE

DECR • DEC •

templum deinde ingredientibus reliqui occurrent tituli vel ad parietes fixi, vel ad ipsum etiam feretri tribunal; iique liberiore, ut diximus, stilo et poetica prope licentia perscripti, quibus scilicet et patronae merita extollantur, et civitatis moeror ac luctus declaretur. atque haec quidem ex commentariolis meis inchoata atque rudia depromo, ne diu in aliorum exemplis conquirendis adlaborem. tu vero his contentus ne sis, et optima quaeque, si vacat, quaerendo investiges.

HEROVM • GENVS • LVCILLA

ET • VIRTVTIS • AEMVLA • DOMESTICAE

PATRI • AVO • MAIORIBVS

NON • ILLA • MINVS

EX • SVA • REDDIDIT • LAVDE

QVAM • DECORIS • SIBI

TAM • CLARA • E • GENTE • OBVENERAT

PVDOR • FIDES • IVSTITIA

QVIBVS • LVCILLAE • IN • PECTORE

TEMPLVM • FVIT

QVANDO • ALIAM • INVENIENT

PAREM



(1) p. 55. n. 118.

HEV • QVAE • DONAS • FOVIT • ARTES  
QVAE • TARDA • SOLERS • ACVIT • INGENIA  
QVA • NEMO • SOSPITE • MISER  
NEMO • DVRAM • SENSIT • INOPIAM  
MORS • VNO • ACERBA • FVNERE  
PATRIAE • MOERENTI  
ERIPVIT



EN • TRISTIVS • EXSEQVILS  
SACRA • NVNC • SQVALET • AEDES  
ARAEQVE • ATRATAE • LVGENT  
CVIVS • DE • MVNERE • NVPER  
MARMOREAE • NITEBANT  
ARGENTO • AVROQVE • DIVITES



SALVE • ANIMA • INNOCENS  
IAM • RECEPTA • SIDERIBVS  
AGE • O • BEATO • QVAE • FRVERIS • AEVO  
VOLENS • PROPITIA  
INDIDEM • PRAESENTI  
SOSPITES • OPE  
PATRIAM



NON • SI • ANNOS • INTEGRA • INTEGROS  
IMPLEVIT • OCTOGENOS  
VEL • PATRIAE • TAMEN  
VEL • SVIS • VISA • CLIENTIBVS  
VIXISSE • SATIS  
MATRONA • FRVGI  
MVNIFICA • RELIGIOSA  
IVSTA • BENE • MERENTI  
INFELIX • LVCTV • PERDITA  
PERSOLVIT  
PATRIA  
CVM • LACRIMIS  
LVCILLA • PARENS • AVE • ET • VALE  
IN • PACE

Tenue id argumentum, ut vides, nec majora capiebat: cui majus atque uberius detur, ut si magistratus aut ducis exsequiae celebrentur, is plura sanc ac splendidiora efferre possit, de justitia nempe, de prudentia, de fortitudine, de scientia rei militaris, de bellis, de victoriis, et quae sunt hujusmodi.

III. Sententiae etiam e morali philosophia et Christiana desumptae non exiguam afferent venustatem: quibus admodum scite usus aliquando est Egizius, ut in Eleonorae Aug. et in Ioannae Pignatelliae exsequiis (1): ejus item sunt tituli hi duo in Cajetani Argentii funere honorario propositi (2):

AN • NIMIVM • FLVXAE  
SVNT • SPES • MORTALIVM  
BONA • VOLVCRI • FVGIVNT • PEDE  
ECCE • MAGNO  
CAIETANO • ARGENTIO  
IVSTA • SOLVVENTVR

FVIT  
CAIETANVS • ARGENTIVS  
THEMIDIS • PERENNE • DECVS  
CAESARIS • AMOR • PATRIAE • OCELLVS  
NVNC • PARVVS • TEGIT • OSSA • LAPIS  
INGENTEM • ANIMVM  
DOCTVM • PIVM  
HABENT • SIDERA

verum prope displicet illa e Graecia *Themis*: quamquam alibi multo magis *Fatorum* mentio (3), et formula illa veterum *Sit Tibi Terra Levis* (4), quae jam apud nos nihil sapit. porro scriptoris erit prudentis delectum habere, et eas optare sententias, iis uti formulis, quae religioni nostrae et pietati respondeant: cetera, quae adversentur, exquirit sint, licet, atque elegantia, respuere ac detestari.

Haec habui, quae de temporariis inscriptionibus dicerem: de quibus aliquid, quam nihil scriptum esse praestat.

(1) a pag. 309. et a pag. 294.  
(2) a p. 311.

(3) p. 297. n. 3.

(4) p. 295. n. 2.

## CAPVT II.

*De inscriptionibus nummariis*

## §. I.

*DE RATIONE GENERIS VNIVERSA*

I. **Q**uod diu apud Romanos in usu fuit, ut non solum nummos signarent ementium commodo, sed missilia etiam nomismata munusculorum causa euderent; utrumque nostra quoque aetate in more positum esse videmus: itaque alii quidem nummi ad res promercales comparandas usui sunt, alios in Principis memoriam tamquam historiae monumenta conservamus. sed tamen magnum fere invenias in nummorum nostratium forma et inscriptione discrimen. nam quum veterum more et res gestae et praeclarae Principum virtutes omni nummorum genere posteritati commendari possint; qui tamen novi identidem commercii causa euduntur, uno plerumque titulo eodemque argumento omnes signantur: ut praeter Principis nomen nihil jam referant, quod historiae unquam prodesse possit. satis vero habent praefecti hi nostri monetales, quae singulis annis praecipua a Principe gesta sint, ea uno aut altero missili nomismate testata immortalitati mandare: atque id ipsum ita saepe negligenter faciunt, ut ea nomismata nihil prope Romanum aut Latinum referant, nisi verba: adeo et figurae a veteri artificio aberrant, et sententiae ipsae peregrinitatem redolent.

Scio equidem hac etiam et superiore aetate percussa alicubi nomismata optimae notae, qualia sunt exempli causa, quae Regis Ludovici Magni res gestas continent (1), et quaedam foederatarum Belgii civitatum historiam exhibentia (2), et quibus pleraque Pontificum Maximorum acta signantur (3). sed hoc facit, ut iis magis succenseam, qui de eleganti argumento ac de recta nummorum inscriptione nihil laborant; quum videam nunquam deesse eruditos homines, a quibus haec peti possint. verum enim vero in his etiam exemplis, quae fere commendantur, quaedam interdum occurrunt, quae probari non possunt. id tute agnoscas, velim, in iis inscriptionibus, quas olim Algarottus Moschorum gratia fecit (4), ut clarissimorum ex ea gente Principum eximia facta in nummis consignarentur. sunt autem hujusmodi:

*TITVLI PRO AVERSA FRONTE NUMMORVM PETRI MAGNI*

I.	DISCIPLINA • MILITARIS • FVNDATA
II.	PEREGRINATIONE • PRO • IMPERII • FELICITATE • SVSCEPTA
III.	SARDANIANI • CELATA • MAIESTAS • PRAEVLGET • ET • VIRTVS
IIII.	VIRE • EVNDO • ACQVISITAE
V.	COLONIA • AD • NEVAM • DEDVCTA • IMPERII • PRINCEPS
VI.	LEGVM • MILITIAE • IMPERII • CONDITOR
VII.	PER • OMNES • MILITIAE • GRADVS • AD • SVMMVM • IMPERIVM • NONNISI REEVS • BENE • GESTIS • EVECTVS

(1) Mémoires de Louis le Grand à Paris 1702.

(2) Van Loon Hist. Metall.  
(3) Boissieu, Numism. Pontif. etc.

(4) Oper. t. 5. p. 21.



viiI.	OSTIA • NEVAE • INCOLIS • TANTVM • COGNITA • NVNC • OMNIYM • EVROPAE GENTIVM • EMPORIVM
viiiI.	SALTVS • DEIECTI • VIAE • MVNITAE • ARATAE • PALVDES
x.	TEMPLVM • MINERVAE • ARTIBVSQVE • OMNIBVS • DICATVM
xiI.	NEPTVNO • IN • SOCIETATEM • IMPERI • VOCATO
xiiI.	ARBORES • OLIM • IN • CASANI • MONTIBVS • NVNC • IN • BALTICO • CARINAE
xiiiI.	PATER • PATRIAE • CONSALVTATVS
xiiiI.	FINLANDICVM • MARE • TRIVMPHATVM • ANTEA • RVSSIS • CLAVSVM
xv.	CONIVNCTA • MARIA
xviI.	CASPIVM • MARE • CLASSE • RVSSA • SVBACTVM
xviiI.	EVXINVS • RVSSIS • PATEFACTVS
xviiiI.	CASPII • MARIS • FACIES • DETECTA
xviiiI.	CASPIA • REGNA • IN • POTESTATEM • REDACTA
xx.	ORIENS • OCCIDENSQVE • DEVICTI
xxI.	SVECIS • AD • PVLTAVAM • DELETIS
xxiI.	LIVONIA • ESTONIA • INGRIA • CARELIA • IMPERIO • ADIECTIS
xxiiI.	AVGVSTO • POLONORVM • REGE • RESTITVTO
xxiiiI.	PACATVS • SEPTEMTRIO
xxv.	MAGNI • COGNOMINE • TOTO • TERRARVM • ORBE • APPELLATVS

## TITVLI PRO AVERSA FRONTE NVMMORVM ANNAE IANOVNAE

xxvI.	ANNOA • VRBIS • FOSSA • MVNICHIANA • FIRMATA
xxviI.	REX • POLONIS • DATVS
xxviiiI.	GALLIS • AD • GEDANVM • CAPTIS
xxviiiI.	GYMNASIVM • MARTIS • IMPERII • SPES
xxx.	VCRANIA • ADVERSVS • SCYTHAS • MVNITA
xxxI.	DESERTORYM • LOCORYM • SCYTHARVMQVE • VBIQVE • VICTOR • EXERCITVS
xxxiiI.	MVNITISSIMO • ET • ANTEA • INSUPERABILI • AD • PRECOPIAM • MVRO SVPERATO
xxxiiI.	OCZCACHOVIO • CAPTA • INGENTIQVE • TVRCARVM • VI • IN • SERVITVTEM ADDVCTA
xxxiiiI.	TVRCIS • AD • COCZINVM • FVSIS
xxxv.	SCYTHIS • INTRA • CHERSONESI • TERMINOS • COERCITIS
xxxvI.	MERCATORIBVS • RVSSIS • TERRESTRI • ITINERE • PERVI • SERES
xxxviI.	ORA • MARIS • GLACIALIS • PERLVSTRATA
xxxviiiI.	ASIA • ATQVE • AMERICA • PARVO • FRETO • DISIVNCTAE
xxxviiiI.	ASIAE • ATQVE • AMERICA • TERMINIS • CONSTITVTIS

## TITVLI PRO AVERSA FRONTE NVMMORVM ELISABETHAE

xxxx.	REGNVM • PATERNO • IVRE • SIBI • VINDICATVM
xxxxI.	CLEMENTIA • AVGVSTA
xxxxiiI.	MATRE • PVLCHRA • FILIA • PVLCHRIOR
xxxxiiI.	IMPERIVM • ARMIS • ACQVISITVM • ARMIS • RETINVIT
xxxxiiiI.	SANNIONVM • ALIORVMQVE • ID • GENVS • HOMINVM • AVLA • PVRGATA
xxxxv.	SVECORVM • EXERCITV • PROPE • AEOAM • CIRCVM DATO • TOTAQVE • IEICTO FINLANDIA

XXXXV <sup>I</sup> .	SVECORVM • RESPVBLICA • CONSTITVTA
XXXXVI <sup>I</sup> .	INCVRIA • PAENE • COLLAPSVM • RESTITVIT
XXXXVII <sup>I</sup> .	IVSSO • IN • BELGIVM • EXERCITV • IANVM • CLVSIT
XXXXVIII <sup>I</sup> .	AVCTIS • SINE • QVERELA • VECTIGALIBVS
L.	PASSIBVS • AEQVIS • PATREM • SEQVVTA
LI.	LIGNEAM • MAGNA • EX • PARTE • ACCEPIT • LATERITIAM • RELIQVIT
LII.	AB • EVXINO • CASPIO • BALTICO • GLACIALI • MARI BVVS • AD • OCEANVM • VSQVE • IMPERIO • PROPAGATO

TITVLI PRO AVERSA FRONTE NUMMORVM CATHARINAE I<sup>I</sup>.

LII <sup>I</sup> .	MINERVA • IN • SOLIO • SEDENS
LIII <sup>I</sup> .	VOLENTES • PER • POPVLOS • DAT • IVRA
LV.	IVRE • EMENDATO • CERTISQVE • LEGIBVS • DEFINITO
LV <sup>I</sup> .	OMNES • IN • RVSSIAM • INVITATAE • GENTES
LVI <sup>I</sup> .	MVNIFICENTIA • AVGVSTA • LIBERORVM • SINE • PARENTIBVS • PARENS
LVII <sup>I</sup> .	MINERVA • ATQVE • APOLLO • FOEDERE • IVNCTI
LVIII <sup>I</sup> .	MINERVA • VENVSQVE • IN • VNA

Habes hic titulos, quos Algarottus vulgavit, omnes: at non et omnes aequè probabiles. multi utique egregii atque optimi, at et quidam nimis longi, alii nimis exquisiti: nec titulos, quod ille fecit, a poetis petere Romani solebant, ut nummis inde-  
rent: quare eos fortasse offenderent quartus hic titulus et quadragesimus secundus et quinquagesimus et quinquagesimus quartus. verborum item collocatio interdum minus recta: casus enim patrius, ut alio loco dicemus, rectum sequi debet, aut cum qui primarius est: eodemque pacto adjectiva veteres nominibus subiciebant, quod ille non semper servavit. in quadragesimo quarto cur patrio potius, quam sexto casu usus initio est? deinde nummariae inscriptioni quam parum illa conveniunt *Aliorumque Id Genus Hominum*, quae prosae orationis propria sunt. nec mihi quinquagesimus primus valde placet; Augusti scilicet dictum *Marmoream relinquo, quam lateritiam accepi*, non de urbis aedificiis, sed de republica prolatum Dio est interpretatus (1): atque huic sententiae verbum *Accepi* magis congruit. illud *Maribus* in quinquagesimo secundo duriusculum est, nec probat Charisius (2); quamquam usus semel est Caesar (3). decimum autem, undecimum, vicesimum nonum, quadragesimum octavum, quinquagesimum tertium, quinquagesimum octavum et ipsum ultimum, me auctore, repudiabis: quid enim Christianis hominibus cum Minerva, Neptuno, Iano ceterisque antiquae superstitionis Diis Deabusque? serio haec dici non possunt, et seria tamen res hic agitur. illud denique animadvertendum est, titulos, qui ab Algarotto pro Catharina I<sup>I</sup>. scripti sunt, in nummis signandos fuisse, quos ipsa Augusta nomine suo cudendos curaret: itaque primum et tres postremos hac etiam de causa improbandos videri, quod insignes illas appellationes ipsa sibi adrogans inducatur: cuius contra hoc proprium Orbis fateatur, ut magna quaecque atque ardua perficiat potius, quam loquatur, et laudum suarum praeconia mereri malit, quam audire.

I<sup>I</sup>. Quae quum ita sint, vides, opinor, a veteri adhuc elegantia nos abesse non parum, nec adeo diligentia profecisse, ut Latinorum vim, simplicitatem, modum adsequuti videamur. nam quae in Algarotti titulis notavimus, haud raro in aliis etiam culpanda reperiuntur. jamvero ut ea perstringam, quae generatim de nummorum inscri-

(1) l. 56. p. 829. E.

(2) l. 1. p. 21. Putsch.

(3) B. G. l. 5. c. 1. n. 1.

ptionibus dicenda esse arbitror, illud primum diligenter curandum est, non modo ut nummi titulus cum ejusdem argumento consentiat, sed etiam ut frontis utriusque inscriptiones inter se satis cohaereant, nec altera alteri repugnet. has in antiquis nummis quum legimus, saepe conjungi debere, indicavit non semel Havercampus (1). una exempli caussa inscriptio est, quae in nummo Calpurniae ac Serviliae gentis occurrit, in cujus parte antica scriptum PISO · CAEPIO · Q · in postica vero AD · FRV · EMV · EX · S · C · significatur nempe *Pisoni et Caepioni Quaestoribus* extraordinariis curam a senatu frumenti emendi demandatam esse (2). ex nummis quoque Imperatoriis non pauci unam tantum referre inscriptionem videntur, quum in adversa fronte nomen Principis, in aversa nihil aliud, quam ejusdem titulos legamus. celebrantur et nummi duo maximae formae, Claudii nempe et Titi Augustorum, in quibus singulae, quantae sunt, utriusque inscriptiones, Romae adhuc ad portam, quae *Major* nunc dicitur, exstantes, partim in adversis partim in aversis frontibus leguntur. sed Claudii quidem nummum Gessnerus suspectum, Vaillantius fictum esse confirmant (3): alterum, qui Titi est, quamquam probus habetur (4), quum utrinque referat litteras illas S · P · Q · R · plane sine causa, vel hoc ipso parvi jure feceris.

Ceterum binae etiam et diversae singulis in nummis inscriptiones ex antiqua consuetudine sunt, ut quum in aversa fronte effigiem Dei alicujus expressam habent, et ejus nomen dativo aut recto inscriptum casu: qui tamen tituli ab eo non diserepant, qui in adversa apparet: quippe illis templi fere aut arae vel signi dedicatio a Principe peracta, fortasse et sacrum ei Deo factum votumve susceptum significatur (5). sic alios, quicumque Latinis in nummis inscripti sunt, facile ad Principis virtutes resque gestas referre possumus, quemadmodum libro superiore saepe vidimus. itaque hoc omnino praestandum est, ut aversae frontis inscriptionem sic fingamus, ut cum prima aliquatenus congruere videatur.

Breves autem ut simus, valde laborandum esse nemo non tenet: non modo quia in exiguum nummi orbem multa compingi non possunt; sed etiam quia nummaria inscriptio eo fere illustrior est, quo brevior. sed non ideo nominum apposita omittes, quae veteres etiam vel multa Principi adscribere solebant: dum et eam veterum consuetudinem sequare, ut quibus in antica nummi parte locus non sit, ea in postica effigenda cures. nam quod quidam nunc faciunt, ut litteris singulariis pleraque indiscriminatim significant, id vero barbarum omnino et perversum est. quid enim quaeso sibi volunt aenigmata illa et scirpi in nummo exempli caussa Imp. Caroli VI. Aug. hoc pacto D · G · R · I · S · A · G · H · H · ET · B · R · fateor equidem vel a Romanis titulos aliquos singularibus litteris scriptos esse, ejusmodi erant *Pius Felix, Pontifex Maximus, Pater Patriae*: addo etiam, plus aliquid aliquando ausos esse: nam et cognomina sua quidam non litteris, sed rerum earum, unde illa duxerant, imaginibus significarunt (6). at nunquam ea quoque licentia usi sunt, ut exterarum etiam nationum aut provinciarum nomina prima tantum littera designarent. tribus quatuorve ea litteris aut plane omnibus scripta esse invenies: ut qui legunt, nullo modo haerere possint. sic et cognomina a devictis gentibus efferebant: DAC · GERM · PARTH · passim occurrent, et alia ejusmodi: *Imperator* tribus litteris IMP · *Augustus* AVG · *Rex* omnibus litteris REX scripta reperiuntur. quare si tituli omnes, spatii angustiis exclusi, justis indicari litteris nequeunt, in alteram utique nummi frontem transferantur: aut si alia ibidem inscriptio esse debet, quod veteres item fecerunt, praeterrmittantur: nummi potissimum Hadriani Aug. exemplo esse

(1) in Gente Corn. p. 123. etc.

(2) Spanh. diss. 10. p. 154. v. Vaill. t. 3. p. 104.

(3) Burmann. ad Svet. tab. 20.

(4) Nov. Fior. an. 1751. p. 243. Zaccar. Stor. Lett. t. 3. p. 665.

(5) v. inser. 381.

(6) Spanh. diss. 6. p. 524. Fabr. in Gron. p. 88.



possunt, in quorum antica fronte inscriptio saepe non alia, quam haec legitur, HADRIANVS. AVGVSTVS.

II. Iam et nummorum communium plerique, et quidam etiam e missilibus sententias fere nunc exhibent sacris e litteris aut ex veteri philosophia petitas: quas saepe populus alium in sensum detorquet, quam quo prolatae sint; quippe non ut rectae semper et graves sunt, ita etiam loco passim et apposite usurpantur. quam vero haec a Latinorum consuetudine abhorreant, veteres nummi declarant, e quibus nullum reperiās, in quo moralis ulla sententia aut philosophi alicujus dictum expressum sit, ne tum quidem, quum philosophum populus Romanus Principem haberet.

At quid de verborum aut sententiarum figuris statuendum est, quae item nonnullis placuerunt? haec quidem Romanis in nummis apparent, sed tamen perraro. nummos Spanhemius protulit binos (1) e thesauris Regis Galliarum, quorum alter habet IO · IO · TRIVMP · alter, quem ad Saturnalia refert; IO · SAT · IO · jam in Commodi nummo, qui Iovis Fulguratoris effigiem habet, inscriptum legimus (2) OPTIME · MAXIME · COS · V · P · P · tamquam si Commodus senatus aclamaret iisdem verbis, quibus Iovem salutabat. tum in alio ejusdem nummi hanc alteram aclamationem inesse jam monuimus (3), PIO · IMP · OMNIA · FELICIA: cetera vero exempla eruditae aetatis non sunt; Carausii enim nummus est, in quo legimus EXPECTATE · VENI, quae provinciae Britanniae verba sunt Carausium invitantis (4). item Maximianum Aug. refert ille alter, in cujus aversa fronte ad oram quidem inscriptum videas GAUDETE · ROMANI, in medio autem tamquam in tabula, quam duae Victoriae sustinent, SIC · XX · SIC · XXX · infra demum AQ · quod Aquilejae nummus ille signatus esset (5). ac cetera hujusmodi, si qua sunt, exempla ejusdem aut sequioris etiam aetatis esse reperiēs. nimirum antiqui dignitati et gravitati studebant impensius, neque titulos nummorum, qui ex senatus consulto signabantur, ex rhetorum, opinor, aut poetarum penu sine levitatis nota peti posse arbitrabantur.

Haetenus de nummorum titulis generatim: de quibus plura tradere supervacaneum est. exempla enim libri primi, et quae ubique praesto esse possunt, quid deceat, quid non, multo jam melius, quam ulla commentatio et doctrina declarabunt,

## §. II.

### DE INSCRIPTIONIBVS NUMMORVM ADVERSIS

I. **F**rontem nummi adversam vultu Principis insignire, aut eorum, qui e domo Principis essent, non Romanorum solum, sed omnium fere nationum mos fuit. at nunc clypei magis delectant, qui gentis insignia referant: ea videlicet, quae propria, iis, quae multorum communia sunt, postponuntur; et quae barbaries celebravit, Latino jam sermoni recte aptari putantur. quin ne hoc quidem viderunt: qui ista curant, nomen Principis in nummo, sine vultu ejus, temere inscribi: quum nihil sit, quo nomen recto casu scriptum referri possit, nisi id verbo subjecto designetur. itaque in antiquis nummis vultum quidem Principis sine inscriptione aliquando, inscriptionem nominis sine ipso vultu vix unquam reperiēs: nisi forte annorum designandorum causa nomen ablativo casu inscriptum sit, aut, si recto, aliquid ipse Princeps fecisse aut restituisse dicatur: quae minutis in nummis non raro animadvertere licet.

(1) les Césars de Iul. p. 2. edit. Paris. 1683.

(2) Vaill. t. 2. p. 187.

(3) v. inscr. 441.

(4) Yaill. t. 3. p. 65.

(5) Morell. Spec. Rei Numm. vet. tab. 6. p. 79.

Enimvero qui Romanam consuetudinem reddere voluerint, quam sane Latina, qua utimur, lingua requirit, ii quidem in adversa nummi fronte Principis vultum effingendum curabunt, iidemque ad oram nomen ejus et titulos quosque perpetuos inscribent. horum autem is ordo esse debet, quem ceteris in inscriptionibus conservandum esse tradidimus (1). sed tituli tamen, qui laudis et honoris causa Principi adtribuuntur, ex veterum praescripto in aversam nummi frontem rejiciendi sunt: quamquam qui aliquando in adversa inscripserit, exemplum ei etiam praesto erit, quo se defendat, nummus scilicet C. Caesaris Octaviani, quem senatus ex argento atque ex auro post Actiacam victoriam cudi jussit hoc titulo (2).

IMP · CAESAR · DIVI · F · COS · VI · LIBERTATIS · P · R · VINDEX

nam in aversa hoc tantum, PAX. ceterum appellationes hujusmodi, quae rebus gestis summisque virtutibus celebrandis inventae sunt, iis conveniunt nummis, qui in honorem Principis signantur, non iis, quos ipse nomine suo percuti jubet. in Romanis autem nummis ideo frequentes sunt, quod non Imperatoris sed senatus nomine pecunia omnis signabatur (3). atque in his etiam eadem de causa nomen Principis efferebatur non raro dativo casu, ut nummus ipse et effigies Principi dicata intelligeretur (4): quo pacto civitates quaedam missilia nomismata in Regis sui honorem signarunt: ut Lugdunenses hoc titulo (5):

LVDOVICO · XIII · RESTITVTORI · QVIETIS  
LVGDVNVM

expressum autem in nummo Regis caput, cui Pax coronam imponit: et infra effigiem urbis nomen legitur: quemadmodum in Tiberii nummo Germanici liberos videas eorumque nomina, et municipalem simul magistratum adjectum (6),

NERO · ET · DRVSVS · CAESARES  
QVINQ · C · VINC ·

quamquam haec veteres aversae plerumque fronti reservabant (7); in adversa vero atque in orbem ea tantum addebant, quae essent ejus propria, cujus vultum nummus referret: praenomen scilicet atque nomen; tum patris, et avi interdum, praenomina aut cognomina, subinde cognomen ipsius et dignitatis, magistratuum, rerum gestarum perpetuas appellationes, et si qua alia, quae passim in nummis Augustorum reperies.

II. Iam antiquis item in nummis binos interdum vultus aut ternos expressos videas, quod nunc quoque fit: nomina autem apposita cuique sua, et quos nummus caperet titulos. sunt autem fere Augustorum vultus cum uxore Augusta, aut cum liberis, vel etiam simul omnium (8): interdum Augusti et matris ejus Augustae (9). sed nominum inscriptio non semper adjecta; noti enim populo vultus eorum erant, et nummis ab ipsa Principum effigie satis auctoritatis accedebat (10). itaque interdum aut nihil inscriptum est, aut id, quod vel animorum conjunctionem in Augustis significaret (11), vel populo Romano de Principum virtute spem faceret: ejusmodi est egregius Severi Aug. nummus aureus in adversa fronte capita exhibens ipsius et Iuliae cum inscriptione FELICITAS · PVBLICA, in aversa vero Caracallae et Getae, cum inscriptione CONCORDIA · PERPETVA (12). alias contra viri quidem nomen legeris, uxoris non item, ut in

(1) Part. 1. c. 2. §. 2. hujus lib.

(2) Vaill. t. 2. p. 33.

(3) v. inser. 377.

(4) v. inser. 361. 411.

(5) Menestr. Hist. du Roy le Grand

p. 36.

(6) Spanh. diss. 11. p. 322.

(7) v. Thes. Morell. t. 2. p. 54.

(8) v. inser. 365.

(9) v. inser. 363.

(10) v. inser. 365.

(11) v. inser. eand.

(12) Vaill. t. 2. p. 215.

Antonii nomismate, in quo ipsius, et Cleopatrae effigies sunt, et haec tantum inscriptio (1):

M · ANT · IMP · TER · COS ·

simile illud Commodi, in quo ipse lauro redimitus, Marcia galeata expressi sunt; una tamen legitur inscriptio (2):

L · AELIVS · AVRELIVS · COMMODVS · AVG · PIVS · FELIX

singularem vero titulum in Liviae nomismate offendes, in quo ipsam Liviam Iunonis comptu effictam, et haec circum inscripta animadvertes (3):

INDVLGENTIAE · AVG · MONETA · IMPETRATA

unde intelligimus, nummum honoris causa esse percussum, ab Colonia scilicet Augusta Aroe Patrensi, quippe in fronte aversa Augustum in curru triumphali refert et titulum hujusmodi:

CAESARI  
AVG ·  
COL · A · A · P ·

Sunt et nummi aliquot, qui effigiem in fronte adversa nullam habent, sed in medio quidem litteras s · c · ad oram vero inscriptionem ejus, qui nummum restituit, sive qui ad veterem formam cudendum curavit. hujusmodi est Tiberianus a Tito Aug. restitutus, cujus aversam inscriptionem habes libro I. (4), in adversa autem inscriptum est (5),

IMP · T · CAES · DIVI · VESP · F · AVG · P · M · TR · P · P · P · COS · VIII · REST ·

hae quidem inscriptiones in aversis fere frontibus leguntur: nam in adversis et caput et inscriptionem veteris Principis exprimere solebant. at hic contra factum est, quod in aversa Tiberii statuæ effigies satis jam admoneret, cujus olim Principis nummus ille fuisset. vix tamen haec usui nobis esse possunt, qui nummos veterum Principum restituere non solemus.

Alii demum nummi non restituti, sed primum cusi in Principis honorem aut Caesarum aut Augustorum, postquam diem suum obiissent: ut qui Romae signati sunt sub Cajo Claudioque Augustis in honorem Claudii Drusi, Germanici Caesaris, Antoniae Augustae, Agrippinae majoris: sed horum inscriptiones adversae a ceteris non discrepant; nam seri illius honoris et funebris indicia in aversis frontibus apparent, ut in Agrippinae nummo, in quo carpentum et inscriptio hujusmodi (6):

S · P · Q · R ·  
MEMORIAE  
AGRIPPINAE

eodem pertinent Antonini Pii nummus post ejus funus et ΑΠΟΣΤΙΩΣΙΝ signatus cum inscriptione adversa DIVVS · ANTONINVS, aversa CONSECRATIO (7) et Caracallae eadem de causa percussus hoc titulo DIVO · ANTONINO · MAGNO (8): atque his similes alii, praesertim Augustarum, ut Iuliae Titi filiae, Marcianae Trajani sororis, Sabinæ Hadriani et aliarum. nos vero appositum *Divi et Divae* repudiabimus, cetera retinebimus: nomen defunctorum vel recto vel dativo casu efferemus; utrumque enim veteres

(1) Vaill. t. 3. p. 100.

(2) idem ibid. p. 147.

(3) ibid. p. 103.

(4) v. inser. 428.

(5) Vaill. t. 1. p. 10.

(6) idem t. 3. p. 107.

(7) idem ibid. p. 127.

(8) idem t. 1. p. 121.



probaverunt: huic apposita eo ordine addentur, quem ellogiis convenire ostendimus, aut qui in honorariis inscriptionibus servandus est. virtutum laudes aut clara facta, si qua indicanda erunt, in aversis frontibus locum habeant: sic tamen, ut ii etiam aliquatenus designentur, quorum auctoritate nummus percussus sit.

## §. II.

## DE INSCRIPTIONIBVS NUMMORVM AVERVIS

I. **M**ulta omnino, eaque plane varia Romani veteres in aversis nummorum frontibus expressere: adeo ut praeclara eruditorum cohors, cui pecuniaria obigit *σπαρτη*, in his maxime illustrandis enodandisque tota versetur. ob eam rem factum est, ut in antiquis nummis tituli quoque omnis plane generis reperiantur: quibus veteres ad posterorum utilitatem praecipuarum rerum quosdam veluti annales condiderunt. sunt autem exempla ejusmodi, ut singula prope imitari acmularique facile possis.

Primum quidem nihil negotii est in iis inscriptionibus, quae circa capita inscribendae sint uxoris, puta, aut filiorum Principis, quales saepe effigies in aversa priscorum nummorum fronte visuntur. tituli nimirum hi similes fere eorum sunt, qui in adversa fronte leguntur: nisi quod breviores esse solent; quum illis non omnes appellationes tribuantur, quae olim Principis propriae erant. in Augusti nummo caput **L. CAESARIS** est et hic titulus **L. CAESAR. AVG. F. PRINC. IVVENT.** in Commodi nummo nondum Augusti caput Annii Veri fratris videas et titulum **ANNIVS. VERVS. CAESAR. ANTONINI. AVG. FIL.** quin et mera interdum nomina inscripta, ut in nummo Caii Aug. in quo dearum habitu mulieres tres effictae his tantum adjectis nominibus, **AGRIP. PINA. DRVSI. IVLIA**, quae Caii sorores fuerunt.

Iam Principum virtutes, nam eae nunc etiam muliebri specie et figura ipsis in templis, atque adeo in nummis impune effinguntur, non aliam inscriptionem requirunt, quam nomen quaeque suum et ejus, in quo esse dicuntur: cujusmodi illae sunt **AEQVITAS. AVG.**, **CONCORDIA. AVGVSTORVM**, **FIDES. AVGVST.**, **HILARITAS. P. R.**, **PIETAS. AVGVSTA**, et similia. eodem pacto Provinciae populi Romani expressae, signis tamen indiciisque adjectis, quae fere fluviorum aut animantium aut arborum figurae esse solent: nec omittitur nomen, quamquam nullo id apposito ornatum reperio: sic nempe inscriptum est, **IVDAEA**, **AEgyptos**, **AFRICA** et hujusmodi.

Vt autem veteres Deorum suorum effigies atque symbola exprimenda curabant, sic jam a Constantini Aug. temporibus in usu est apud Christianos, ut tesseras quasdam religionis nostrae, aut Dei Servatoris Matrisque ejus ac Caelitum sanctorum imagines nummi referant. ac labarum quidem primis Christi nominis litteris insigne in ipsius Constantini nummo eminet (1), cum inscriptione **GLORIA. EXERCITVS**: at aliis in nummis post eam aetatem vel imagines utique occurrunt, quales nunc quoque effingi solent: quae consuetudo plane retinenda est, adscriptis praeterea nominibus, quorum vultus expressi sint: quemadmodum in priscorum moneta legitur **DIVOS. IVLIVS**, **DIANA. LVCIFERA**, **FORTVNA. REDVX** et hujusmodi. quamquam a nobis etiam id ita praestandum est, ut non temere, sed ratione aliqua atque causa illae potissimum imagines atque illi tituli placuisse videantur: quod fere a veteribus servatum esse, jam ostendi (2).

(1) Vaill. t. 1. p. 293.

(2) v. inscr. 377. 381.

Quid ni vero et eas inscriptiones imitemur, quibus illi Deos suos non a nomine, sed a virtute ac tutela designabant (1)? ut si quando imago certis indiciis se prodat, ejus jam, quem refert, omisso nomine, titulum inscribamus 'honorarium. Romae quidem, qui nummi cognitissimam cuique Petri Apostoli imaginem habent, eorum titulus esse potest hujusmodi DEFENSORI · PONTIFICIS · MAXIMI, CONSERVATORI · PRINCIPIS, PROPVGNATORI VRBIS; alibi ad notas item effigies hos alios, si libet, inscribito: CAELESTI · PATRONO, CVSTODI · SALVTIS · AVG ·, COMITI · AVG ·, SANCTIS · CVSTODIBVS · LIBERORVM · DOMVS · AVGVSTAE, et similia. Mariae autem Dei Matris multo etiam plures esse possunt: hi certe omnes recte adscribantur, VIRGINI · OPTIMAE · MAXIMAE, VIRGINI · DEI · PARENTI, MATRI · CHRISTIANORVM, GENETRICI · ORBIS · TERRARVM, CVSTODI · VRBIS, SOSPITAE · TVTELARI, PACIFERAE · ADIVTRICI, et qui sunt hujusmodi.

II. Tum sicubi moneta in honorem Principis cuditur, locus et titulis est, quibus illustria facta et bellicae res celebrentur: quo e genere illi sunt, AVCTORI · PIETATIS, CONDITORI, PACATORI · ORBIS, RESTITVTORI · AFRICAE, LOCVPLETATORI ORBIS · TERRARVM, RECTORI · ORBIS, ADSERTORI · LIBERTATIS · PVBLICAE, INVICTO · IMPERATORI, OPTIMO · PRINCIPI. sed si Princeps suo ipse nomine moneta signari jubeat, alia titulorum ratio esse debet, ut nempe res ipsas, quae ab eo gestae sint, non ipsius a rebus gestis praconium inscribamus. huc pertinent illi veterum nummorum tituli, ARMENIA · ET · MESOPOTAMIA · IN · POTESTATEM P · R · REDACTAE, IVDAEA · CAPTA, PACE · P · R · TERRA · MARIQVE · PARTA IANVM · CLVSIT, REX · PARTHIS · DATVS, REGNA · ADSIGNATA, et cetera hujusmodi exempla, quae nummi non raro exhibent.

Eodem pacto opera publica, liberalitates, beneficia Principum, item profectiones eorundem et adventus et triumphus et ludi designantur: quippe nomina fere sola, quae nummi argumento convenient, in hunc modum occurrent, MACellum · AVG ·, FORVM TRAIANI, CONGIAR · DAT · POP ·, CONGIAR · TERTIVM, LIBERALITAS · AVG · IIII ·, PLEBI · VRBANA · FRVMENTO · CONSTITVTO, REMISSAE · XXXX ·, PROPECTIO · AVG ·, ADVENTVS · AVG · AFRICAE, TRIVMP · AVG ·, LVDOS SAECVL · FEC ·, SAECVLARES · AVGG ·, DECVRGIO, PRIMI · DECENNALES. porro hanc saepe rationem sequuti sunt, qui nummos Ludovici Magni in Gallia signarunt: quorum pleraeque inscriptiones in rebus ipsis indicandis totae versantur, atque eo e numero hae sunt (2):

PECVLATORES · BONIS · MVLTATI  
M · DC · LXVI.

(3)

LITIVM · SERIES · RESCISAE  
NOVO · CODICE · LATO  
M · DC · LXVII ·

(4)

IVNCTA · MARIA  
FOSSA · A · GARVMNA · AD · PORTVM  
SETIVM  
M · DC · LXVII ·

(1) v. inscr. 333.

(2) Medaill. de Louis le Grand p. 92.

(3) ibid. p. 91.

(4) ibid. p. 101.

## (1)

AEDES · SACRAE · CCC · A · FVNDAMENTIS · ERECTAE

M · DC · LXXVI ·

Non aliter vero in nummis Romae prodenda sunt, quae identidem a Pontificibus Maximis memoria digna geruntur: item quae stata sunt et sollemnia; ut quum nummi nova forma primum cuduntur, Pontifice Maximo recens creato: in his enim si Pontifex expressus fuerit rite sacris ab Ostiensium Antistite initiatus, inscriptio nummi erit CONSECratio; nam et hoc sensu ea vox recte adhibetur. in aliis, qui signari solent, quum Pontifex Maximus ad possessionem sanctae Ecclesiae usurpandam magno et spectando agmine Templum Lateranum adit; siquidem aversa frons Pontificem referat equo insidentem et stipatoribus cinctum, recte adscribes PROCESSVS · LATERANVS: *procedere* enim dicebantur Imperatores et Consules, quum primum in Capitolium ad nuncupanda vota magno comitatu pergebant, ipsa vero pompa *Processus*: de quibus praecleara habet Spanhemius (2). alia praeterea singulis fere Pontificatibus evenire videmus, quae hisce aut similibus titulis designari possint: ARGENTI · STIPES · PLEBI · DIVISAE, SCRIPTA · IMPIORVM · IGNI · DEVOTA, ARCHIEPISCOPVS · BONONIENSIVS · DATVS, COLLEGIO · PATRV · CARDINALIV · SUPPLETO, CAELESTES · HONORES · HIERONYMO · AEMULIANO · DECRETI, et plura huiusmodi, quae tamen omnia sic enunciaunda sunt, ut nihil in titulo redundet, et aliquid etiam ipsae rerum figurae atque effigies loquantur.

II. Quamobrem nummos interdum offendes, quorum aversa frons nullam habet inscriptionem, cujusmodi sunt Hadriani quidam et Antonini Pii vultibus insignes, qui in aversis frontibus qua pontes, qua templa, qua effigies deorum referunt, nota nempe argumenta, neque tum indice ullo explicanda. in aliis nomina omissa carum rerum, quae satis expressae essent; hisque inscriptum, quod aliter intelligi non poterat, quorum scilicet essent, ut in Antonii nummis, qui signa militaria exhibent et inscriptiones huiusmodi (3), LEG · XVII · CLASSICAE, CHORTIVM · PRAETORiarVM, CHORTIS · SPECVLATORVM. verba etiam aliquando omissa, quae figurae ipsae fari viderentur. ut in nummo Vitellii (4), in cuius quidem adversa fronte caput Imperatoris est cum inscriptione A · VITELLIVS · GERM · IMP · AVG · P · M · TR · P · at in aversa nil aliud, quam VRBEM · RESTITVTAM legas; sed intuenti figuras facile occurret, addendum esse SVBLEVAT: eminet enim paludatus ipse Vitellius stans, militibus duobus adsistentibus, et mulierem ad genua procumbentem dextra sublevans. sic in Gordiani nummo (5) legimus FELICITATEM · PO · R · at quum eodem in nummo Pax efficta sit caduceni dextra gerens, laeva cornu copiae, jam liquet supplendum esse AFFERT aut SPONDET.

Quin etiam hoc e genere sunt tituli omnes, qui dativo casu offeruntur: qui sive ad effigiem sive ad nummum ipsum referendi sint, dedicationem omnino aliquam indicant, cuius vel Princeps vel senatus auctor fuerit: quam tamen verbo designare qui velit, non is lucem inscriptioni afferat, sed vocem plane inducat inutilem.

III. Spatium illud angustum infra figuras, quod quidam Εξέρχων, quasi ἐξω του εργου, appellant, litteras saepe habet singulares, quae ad argumenti inscriptionem non pertinent. eae in aereis sunt S. C. quibus indicabatur, pretium aeri senatus auctoritate esse factum (6). qui autem antiquiores sunt, ii assis aut partis ejus notas referunt, ut argentei notam denarii. in aliis, qui minus antiqui, officina occurret atque urbs, in qua num-

(1) Medaill. de Louis le Grand p. 213.  
(2) diss. 12. p. 457.

(3) Spanh. diss. 10. p. 237.  
(4) Vaill. t. 1. p. 29.

(5) idem ibid. p. 160.  
(6) v. inscr. 377.



ni signati fuerint. sed quosdam etiam offendes, qui titulum ibidem inscriptum exhibeant: ut Nervae nummus, in quo Imperator expressus est milites e suggestu addressans, et infra inscriptio legitur, ADLOCVT · AVG · (1); at in nummo Philippi senioris, ejus titulus est PROVINCIA · DACIA, infra leges AN · II · quibus litteris Imperii ejus annus secundus indicatur (2); ibidemque in aliis nonnullis consulatus Imperatorum signati sunt, aut tribunicia potestas. in ceteris fere nihil apparet, vel tituli particula tantum uno ductu inscripti.

Quaeres vero, quid eo demum loco signandum putem: neque enim quae olim solebant, singula nunc eodem modo subscribi possunt. ita sane: verum et pretii notam, ut fit, licet indere, et annum Dionysianae supputationis signare, quemadmodum in Ludovici Magni nummis factum est. Pontificatus item anni aut Regni recte inscribentur: tum si argumentum ob figurarum numerum ad oram excurrat, ipse nummi titulus infra scribi poterit. quin etiam si titulus dividi possit, pars ad oram superius, pars inferius recta linea scribetur: ut in Trajani nummo supra quidem legitur S · P · Q · R · OPTIMO · PRINCIPI, infra vero DAC · CAP · (3) id est *Dacia Capta*.

Ne illud quidem hic praetermittam, ex veterum praescripto et more facere, qui aliquando praeter titulum nummi proprium, alium quoque addunt tamquam rei haerentem, quae in nummo expressa est: sic olim intra coronarum ambitum inscripsere S · P · Q · R · OB · C · S · in clypeis VIC · PARTH · aut VOT · X · in columna QVOD · VIAE MVNITAE · SINT, in fronte templi S · P · Q · R · et similia: quae nummorum inscriptiones non sunt, sed ipsorum operum, quae in nummis repraesentantur.

V. Quod reliquum est, si quis forte queratur, nulla a me exempla libro primo proposita esse, quae ex nummis ante Augustos percussis petita forent; ideoque factum hoc sciat, quod minus apta viderentur temporibus hisce nostris, quum populorum, qui in Europa sunt, plerique uni pareant, nec in nummis, nisi unius facta et laudes consignare soleant. sed quum animadverterim, nomismata quaedam et privata et publica auctoritate interdum cudi, quo clarorum nostrae aetatis virorum memoria celebretur; horumque inscriptiones ad vetustiorum titulos conformari facile posse: ob eam rem exempla hic desiderari omnia non patiar, et aliquid etiam ex eleganti illa gaza depromam.

Triumviri monetales, nisi quum majores magistratus res a se gestas in nummis signari jubebant, originis fere suae atque illustrium majorum memoriam renovabant, ut avitae nobilitatis monumenta posteris relinquerent. exempla vero id multa declarant, quae hic mihi delibanda sunt, ut elegantiam modumque ob oculos ponam, quibus antiqui vel obscuras res atque disjunctas apposite omnino et graphice exprimebant.

Q. Cassius triumvir monetalis, ut se ex eadem gente prognatum ostenderet, ex qua L. ille Cassius fuerat auctor legis tabellariae, quam Cicero *principium justissimae libertatis* appellat (4): in fronte quidem nummi adversa nomen suum inscripsit, et eum effigie nomen LIBERT · at in aversa templum Vestae effigendum curavit, et sellam curulem, quod nempe L. Cassius Vestalibus iudex datus esset; simul tabellam litteris A · C · notatam, quibus absolutio et condemnatio significatur, sitellamque sive urnam, in quam iudices post Cassiam legem tabellas jaciebant (5). quid quaeso effingi prodique vel luculentius potuit vel simplicius? praesertim quum in urbe majorum monumenta etiamnum exstarent, et historia ipsa nota esset. sic in nummo gentis Papiae, quae Lanuvio oriunda esset, caput expressum est Iunonis Sisipitae Lanuvinae, ac ta-

(1) Vaill. t. 1. p. 45.

(2) idem t. 2. p. 315.

(3) idem t. 1. p. 51.

(4) pro Corn. ex Aeson. sub fin.

(5) Spanh. diss. 10. p. 198.

bella insuper in qua legitur  $\begin{smallmatrix} PA \\ PI \end{smallmatrix}$ , ut Papia lex designaretur a C. Papio tribuno plebis lata, *Ne quis peregrinus in urbe esset* (1): eodemque modo, quod P. Porcius Licca trib. pl. legem de provocatione tulisset, in nummo gentis Porciae iudicium ejus rogationis manifesto ostenditur; stat enim magistratus civi item stanti ac provocanti manum imponens, et a tergo licitor cum virga, subscriptumque PROVOCO (2). contra vero in Antistiorum Veterum nummo, originis tantum indicandae caussa, quippe Gabiis oriundi erant, antiquum foedus expressum videas inter Romanos et Gabinos, viris duobus ritu Gabino incinctis ad aram manus jungentibus, inscriptumque (3),

C · ANTIST · VETVS  
FOEDVS · P · R · QVM · GABINIS

Iam bellicas res majorum suorum multo etiam diligentius persequuti sunt. nummus Aemiliae gentis Aretam Arabiae regi refert, genu flexo oleae rami dextera porrigentem, laeva cameli habenis implexa: infraque scriptum REX · ARETAS, qui nempe ab Aemilio Scauro pacis condiciones acceperat (4). in eadem gente nummum reperies, in quo statua efficta est equestris M. Lepidi tropaeum dextra ferentis cum inscriptione

M · LEPIDVS · AN · XV · PR · II · O · C · S ·

quas litteras ex Valerio Maximo (5) explicavit Vrsinus hoc modo, *Annorum quindécim praetextatus hostem occidit, civem servavit*. Paulli item Aemilii triumphus tres designantur in alio ejusdem gentis nummo, in quo tropaeum est, atque a laeva dux Aemilius, a dextra Perseus vinctis post tergum manibus, juxtaque filii duo: inscriptio autem TER · PAVLLVS, nempe, ut Spanhemius explicavit (6), *Ter Triumphavit*, quod in vetusto ejus ellogio legitur.

In nummo Claudiorum templum Iovis Feretrii cernas, et Marcellum spolia opima de caeso Viridomaro dedicantem, addita inscriptione MARCELLVS · COS · QVINQ · VIC · S · id est *Consul quinques, victor sacrat*. sic majorum res gestas designare voluerunt Plantii, in quorum nummis inscriptum est C · HYPSTAE · COS · PREIVER · CAPTV · sic Aquilii, qui Siciliae symbolum effigendum curarunt, aut M. Aquilii pugnam cum Athenione: sic alii atque alii, quorum nummos post multorum labores postremis curis exposuit illustravitque Havercampius.

Haec porro et similia exempla, quamquam e nummis petita sunt, qui perraro ad eorum aetatem pertinebant, quorum facta referrent; satis tamen ostendunt, quantum a Latina consuetudine saepe abeant, qui numismata ad clarorum virorum memoriam retinendam aetate hac nostra signari curant. neque enim quidquam nunc refert, utrum is, cujus memoriam posteris commendare velis, paullo ante mortuus fuerit, an etiamnum inter vivos versetur. at illud maxime interest, quale nummi argumentum, quae inscriptio eligatur: ne scilicet fabulis temere delectemur, neve res in medio positas negligamus: utque inscriptionem non a poetis aut a philosophis, sed a re ipsa desumptam germana formula et propria efferamus. vides enim, opinor, nihil in antiquis exemplis occurrere, quod nimis exquisitum aut minus perspicuum ac simplex dici possit: sic autem titulum fere cum argumento conjunctum esse, ut ex utroque sententia constet ac perficiatur: tum ea nobilitatis et laudis indicia, ea rerum gestarum monumenta, quasi delectu habito, esse prolata, quae magis illustria essent; quae contra levia et vul-

(1) Spanh. diss. 10. p. 200.

(2) id. ibid.

(3) Vaill. t. 2. p. 16.

(4) Spanh. diss. 10. p. 226.

(5) l. 3. c. 1. n. 1.

(6) diss. 10. p. 222.

garia forent, ea neglecta atque omissa: aliter profecto, atque nunc facimus, qui nummos saepe et inanibus signamus symbolis, et alienis plane aut ineptis titulis oneramus. enimvero in novorum nomismatum designatione, quae clarorum virorum honori destinamus, nisi ejusmodi exemplis certisque veterum vestigiis institerimus; Latinae si stent litterae, vix aliquid probabile posteris relinquemus.



## CAPVT III.

*De titulis rerum privarum*

## §. I.

## DE RATIONE GENERIS VNIVERSA

I. **S**it tenue mihi, sit leve hoc capite propositum argumentum: non ideo aut mihi praetermittendum aut aliis contemnendum est. gustum certe Latinae venustatis Romanique leporis habuisse dicemur, si et in his sapere videamur: quae tenuis laboris non tenuis gloria erit. quippe nec parva laus haberi solet, quae paucorum est. nimirum etsi multi sibi ipsi valde lepidi et concinni videntur; pauci tamen sunt, qui haec quum attigerint, aliorum etiam iudicio comprobentur: adeo plerique parum vel modum vel elegantiam veterum assequuntur.

Breves ut simus, admonent nos ipsa opuscula minuta, quibus titulos paramus, quae saepe terna aut quaterna vocabula vix continent. quare ex his ea semper eligenda, quae ad sententiam enunciamdam necessaria sint; de reliquis non laborandum, quorum etiam vices aliquando figurae ipsae faciunt. neque vero singulariis litteris temere utaris, velim; nisi forte jocandi caussa, atque ut interpretem torqueas: eeterum cae tantum usurpandae, quae obviam vulgataeque habent explicationem. stultitia enim sit, si serio contendas, ut quae tibi in animo fuerint, ea alii ab una aut altera, quam adscripseris, littera intelligant.

In titulis autem deligendis earum rerum habenda est ratio, quibus quemque aptare velimus. nam hi vel argumento convenire debent, quod in opere eminet, vel usum rei attingere in quem ipsa servatur, vel certe aliquid indicare, quod vel ad eum pertineat, a quo res profecta, vel illam designet, ad quem ventura sit. titulum olim ipsi interdum artifices nomine suo inscribebant, sed ambiguum fere, atque iis conceptum verbis, ut sententia subiinde eorum etiam propria videri posset, qui opus emissent (1). plerumque tamen tituli data opera et certum in usum adjecti, domini vel emptoris arbitrio: itaque certa etiam nomina referunt, nec vagi sunt aut communes: qui nunc maxime probandi, quum opus a domini manu primum prodire declarent, haud levi scilicet munificentiae argumento, sive id amicorum hospitumque munus, sive mensae et domus ornamentum futurum sit.

II. Non aliae porro titulorum sententiae esse debent, quam quae vel amicitiam et humanitatem, vel religionem ac pietatem praeseferant: aut quae ad virtutem et decus excitent, vel ad concordiam, laetitiam, hilaritatem: aut denum quae tempus et locum notent, vel certorum hominum munia declarent, vel illustre factum et claros viros designent: quae tibi singula propositis in exemplis quaerenti occurrent.

Nec vero, quamquam tituli huiusmodi licentius paullo scribi possint, locum esse statuas veteribus fabulis, aut superstitionis antiquae vocabulis: quae non minus indecora sint, quam praetextata verba jocique obseeni. ut ut illa nonnulli adhuc ingerant perlibenter, ipsi, opinor, Latini, quos imitamur, si nobiscum versarentur, et nostris imbuti moribus, nostris viverent legibus, profecto respuerent, repudiarent; quemadmo-

(1) v. inscr. 454.

dum olim, sibi constantes, Indaeorum religionem et ritus aspernebantur. quoniam igitur est ista antiquitatis tam perversa imitatio, ut iudicium in his rectamque rationem exsuisse videamur? pudet ne nos e tantis errorum tenebris eversisse, atque in hac veritatis luce versari? an puleri nihil habet Christiana religio, ut omnino sermo sit noster ex veterum superstitione colorandus? Latinam utique linguam, Latinas formulas retineamus: leporem etiam, venustatem, dignitatem aculemur: haec consecrari et juvat et decet: cetera ejus aetatis et morum fuerunt, quae nemo sanus invidere vel debeat vel possit.

## §. II.

## DE INSCRIPTIONIBVS ANVLORVM

I. Litteratae olim gemmae apud Graecos maxime atque Aegyptios multis saepe reconditisque verbis notatae erant: quae fere tamen ad Alexandrini Basilidae somnia revocantur (1). at ea Romae commenta sero placuerunt, veterumque diu mos viguit, ut qui titulos in gemma probabant, vix alios incidi curarent, quam quibus aut humanitas aut amor aut fides aut religio declararetur. itaque habes paucis, quae potissimum in anulis nostris inscribenda esse videantur.

Hospitum humanitatem produunt omnia illa bonam valetudinem diuturnamque felicitatem precantium, quae ex antiquis descripta gemmis libro primo protulimus (2). neque ea nostris non conveniunt moribus: quamquam enim hujusmodi omnibus eam inesse vini antiqui aliquando putarunt, quam nos utique non agnoscimus; minime tamen hanc verba significant, aut ullam superstitionis ansam habent: quin benevolum animum et benignum demonstrant, quo nos animo vel erga inimicum esse debemus. itaque si quas nunc gemmas Dioscorides iste noster e Germania, Pichlerus, inquam, perit, quae, ut fit, nuptiarum causa vel officii ergo muneri mittendae sint, nae auctor illi ego fuerim, titulos ut inscribat hujusmodi: NYEE · FELIX, LAVDERIS · PROLE · SIMILI, PARENTIS · FACTA PROLES · AVGEAT, AMICO · OPTIMO · AN · F · F ·, VOTIS · MEIS · VIVAS · V · C ·, DIV · TE · PATRIA FRVATVR, et hujus generis alia. ejusdem autem erit ea in gemmis symbola exprimere, quae titulis respondeant: quamquam pleraeque ex antiquis litteratae nullo argumento insignes sunt.

Geminarum aliae titulos habent, qui amorem obsequiumque declarent; e quibus nonnullos libro item primo descripsi. ad eorum porro exemplum hi novis in gemmis incidi possint: AVE · SABINA · LVX · NOSTRA, SALVE · MEVM · DESIDERIVM, AVE · MI · FAVSTVLE MEVS · OCELLVS · IVCVNDISSIMVS, TE · REDVCE · REVIXIMVS, VIVE · MEMOR · NOSTRI, tum alii atque alii, quos veterum maxime epistolae ad amicos et consanguineos facile suppeditabunt.

Iam fides etiam, quae, quum omnibus, tum Principi maxime servanda est, non obscure iis in titulis significatur, qui privatam publicamque felicitatem in ejus salute collocatam enunciant (3): aut in quibus annos ei multos et victorias et triumphos optamus. quin ipsum quoque Principis nomen et vultus in anulo effectus, studii nostri et addictae voluntatis indicium est. titulos igitur nunc etiam in gemmis, sive eae solam Principis effigiem, sive alias simul expressas habeant, apposite inscribemus, qui hujus aut similis generis esse possunt: SALVO · PRINCIPE · FELIX · PATRIA, INCOLVMI · AVGVSTO · SALVA

(1) v. Reasch. Gem. n. c. 8. p. 217.

(2) part. 2. c. 3. inser. 444.

(3) v. inser. 447.

DOMVS, VALEAT · VINCAT, ANNIS · VIVAT · DE · NOSTRIS, AVGVSTO · NOSTRO · OMNIA · FELICIA,  
HIC · DECVS · HIC · SALVS · PATRIAE.

Quae demum gemmae Deorum vultus referrent, vel etiam quae alio argumento insignes, statuis eorum et templis destinatae essent, in his veteres religionem suam, inserta interdum dedicationis formula, indicabant (1). quem nunc in morem anuli ii, quos religionis caussa ad sanctae Virginis simulacra atque ad Martyrum sepulcra dedicamus, hisce ornari titulis possint: VIRGINI · DEI · PARENTI · SACR ·, MARIAE · EXORATAE · SACER · ESTO, TIBI · MARTYR · LAVRENTI · SOSPITATOR, CAECILIAE · VIRG · MART · SYM, et huiusmodi: neque enim plura semper inscribi possunt, aut pluribus saepe opus est: nisi quis forte nomen quoque suum exstare velit. verbum certe si desideretur, non ideo sententia obscura erit aut manca; quippe id facile cuique occurrat, et sententiam effigies etiam ipsa aliquando illustret. quemadmodum de nummorum antiquis argumentis superius diximus.

II. Haecenus de inscriptionibus anulorum, qui ornamenti gratia inventi, nulli ad obsignandum usui esse possunt: quandoquidem ut effigies, ita litteras exhibent rectas et dextrorsum exaratas. ceterae, quae in signatoriis veterum anulis sinistrorsum incisae leguntur, mera plerumque nomina sunt, eorum nempe, qui anulis uterentur: quae hic exempla nemo, opinor, requirat. sed tamen commemorandi hoc loco mihi videntur medicorum quidam sive pharinacopolarum lapilli, qui et gemmas anularias ejusmodi imitantur, et inscriptiones praeterea habent non vulgares.

In agro Icnensi haud ita pridem lapillus inventus est quadratus viridi colore, crassitie modica, idemque singulis lateribus singulas exhibens inscriptiones. porro foramen habet medium et litteras ductu inverso, quae sigillum fuisse ostendunt laxo insertum orbiculo: et quidem medici ocularii quemadmodum tituli declarant, quos egregie Ernestus Walchius explicavit (2). horum hic primus est,

PHRONIM · DIAPSOR ·  
OPOBALS · AD · CLAR ·

lege *Phronimi* medici *Diapsoricum Opobalsamum Ad Claritatem* oculorum. ita Scribonius Largus memorat (3) *Collyrium psoricum ad caliginem et ad aspritudinem oculorum, quam ξηροφθαλμiam appellant*. nam *ψωρα* scabies est aut asperitas cutis a *ψαιρω* frico. huiusmodi autem medicamentorum nominibus praepositio *Δια* adjungi solebat, scribebantque *Διαπροδον*, *Διασμυρνιον*, *Diaeodion*, *Diaglaueium* et similia. alter titulus est,

PHRONIMI · DIASMYRN ·  
POST · IMP · ET · LIP · EX · O · V ·

sive *Phronimi Diasmyrnion Post Impetum Et Lippitudinem Ex Oculo Vulnerato*. impetum dici Walchius putat non tam morbum, quam violentam oculi ac improvisam percussione. tertius est,

PHRONIMI · EVODES ·  
AD · ASPRIT · ET · CIK ·

id est *Ad Aspritudinem Et Cicatrices* oculorum. quartus demum,

PHRONIMI · PENICIL ·  
AD · OMNEM · LIPPIT ·

*Ad Omnem* scilicet *Lippitudinem Penicilli* ex linteolis conserptis, ex medulla sambuci aut spongia facti, quales et Terentius (4) et Celsus (5) et Scribonius (6) descri-

(1) v. inscr. 450.

(2) Observ. in sig. med. Ienae 1763.

(3) Compos. med. 32. p. 32.

(4) Eun. 4. 7. 7.

(5) l. 7. c. 7. n. 6.

(6) Comp. med. 142. p. 81.



psere. enimvero idem Walchius e Sponio, Muratorio, Maffejo alios hujusmodi titulos quaerenti sufficiet, quos ille omnes erudite interpretatus est. hinc ego ad alia progrediar.

§. III.

DE INSCRIPTIONIBVS POCVLORVM

**P**ocula litterata si placeant, his non unius generis titulos convenire reperies. nam antiqua quidem pocula pateraque et acclamationes habent et exhortationes et salutationes, tum nomina etiam tam hospitem amicorumque, quam eorum, qui dona his aut epulum darent, interdum et Principis, ad cuius item nomen in conviviiis Græco more bibebatur (1). neque haec profana catenis habita sunt, ut Christiani veteres singula repudiarent. quae Buonarrotus, quaeque Boldettus edidere Christianorum poculorum fragmenta satis declarant, majoribus illis nostris religioni non fuisse, si quos in his titulos offenderent, quibus convivae ad hilaritatem laetitiamque excitarentur. quamquam Christiani artifices, ut sacras singulis in poculis effigies, ita etiam religiosos et graves in plerisque titulos expresserunt.

Iamvero quidni eas acclamationes recte nunc inscribi arbitremur, quibus veteres et vitam diuturnam, et securitatem felicitatemque precari solebant? ejusmodi haec sunt, **MVLTIS . ANNIS, VIVE . BEATVS, VITA . TIBI, FELICITER . QVOD . AGIS, FAVSTE . FELICITER . PROSPERE**, et similia: atque haec quidem urbane et humaniter, si repotia, si natales celebrentur. sed si *Ἀγαν* instruenda sit, conviviumque sacrorum sollemnium causa apparandum; tituli, opinor, illi magis probentur, si qui eos inflectat, et quodam religionis nostrae veluti colore distinguat, hoc modo, **VITA . TIBI . AETERNA . CAELESTIS, VIVE . PIVS, DEO . DVCE . FELICITER, FAVSTA . OMNIA . A . DEO** et alia id genus.

Qui autem tituli exhortationem continent, eos quidem varios antiqui usurparunt, sed quibus fere ad bibendum invitarent: e quorum genere est Plautina vini invitatio (2) **BIBE . SI . BIBIS**, et quae e Græco ducta, **AVT . BIBAS . AVT . ABEAS** (3) sive *ἢ πιῖ, ἢ ἀπιῖ* raro e morali philosophia sumpti placuerunt; qui nobis maxime probandi sunt, quos frugi magis et sobrios esse decet: quin tituli hujusmodi sacris quoque e litteris atque e Patrum sanctorum voluminibus jure aliquando petantur. ceterum latine eos et dilucide et breviter efferendos memineris, in hunc fere aut similem modum: **PROPOSITI . TENAX . IN . ASTRA . VENIES, MALVM . CVPIDINEM . FVGIENIO . VICTRIS, OPTIMI . PROPITIVS . ADEST . DEVS, PATIENTIA . TIBI . NECESSARIA . EST**, et alia hujus generis, quae tum maxime idonea et scite dicta putentur, si qua ratione ad effigiem argumentumque referri possint: quapropter artificum nostrorum acenda ingenia erunt, ut quam Germani artem jamdiu revocarunt, ipsi elegantius tractent, titulis picturisque aureis vitro inclusis, quae cum antiquis certare videantur.

De salutationibus, quas veteres in poculis paterisque convivarum nominibus jungebant, nihil est, quod tradi debeat. notae illae sunt formulae *Ave, Salve, Vale*, et quae a Græcis sumpta est, *Gaulere et Bene Rem Gerere*. porro elegantiae erit, quot ad mensam convivae, totidem illis scyphi nominibus eorum et salutatione notati apponantur. at si qui etiam pocula dono dabantur, ea hospitis quoque nomen habeant, quod veteres primo loco scribebant, ut initio item epistolarum, qui litteras mitteret, primus olim legebatur.

(1) Horat. l. 4. od. 5. v. 33.

(2) Stich. 5. 4. 27.

(3) Cic. Q. Tusc. l. 5. c. 41. n. 118.

Quod si convivium die natali Principis celebretur, recte pocula exponentur iis insignia titulis, quibus Principi acclametur: quam in rem formulas aliquot historia Augusta suppeditabit (1); unde hi sunt tituli in usum hunc nostrum parce detorti, PIETATI OPTIMI · PRINCIPIS · FELICITER, PIE · PONT · MAX · TV · PATER · ORBIS, AVGVSTE · FELIX · IMPERES, IOSEPHE · AVGVSTE · DEVS · TE · SERVET; alia hujusmodi facile quis invenerit.

II. Quod reliquum est, vasa id genus veteres in templis quoque, pateras potissimum, sive e gemma sive ex argento aurove, dedicare solebant, quibus sacerdotes sacris operantes uterentur. itaque in his Deorum aliquando nomina occurrunt: quin et cochlear argenteum in Museo Kircheriano saepe tractavi, in cuius manubrio haec est inscriptio (2):

IVNONI · LANVMVINAE · S · P · S · SVLP · QVIRIN ·

hoc cum acerra dedicatum verisimile est, ut usui esset, quum thure sacrificarent: thus enim ad libationes, non in acerra incensum, sed ex acerra, ut nunc fit, depromptum, illi Ovidii versus declarant (3),

*Nec quae de parva Dis pauper libat acerra*

*Thura minus, grandi quam data lance valent.*

Ceterum inscriptionum hujus generis plana ratio est, quae ad sacras nempe revocantur, neque ab illis, nisi brevitate, differre solent.

## §. mI.

### DE INSCRIPTIONIBVS TESSERARVM

I. Tesserarum olim ingens numerus et magna varietas fuit: nam nec paucae hodie exstant cujusque generis: ex his primae hoc nomine veniunt, quibus veteres ludebant, solis fere punctis distinctae: quibus et talos adnumerare licet, quorum alii acrei sunt ac plerumque sine ulla nota, alii eburnei et inscriptione aliquando notati, qualem Musei Kircheriani talus habet his verbis (4):

PETRONILLA  
LVDE · FELIX  
SALVO · CYRIACO  
CVM · TVIS · OMNIBVS

tum aliae gladiatoriae fuerunt, aliae militares, atque aliae item hospitales, aliae frumentariae, et qua symbolis qua litteris singulae, ut libuit, insignitae, quae tamen nunc aut nusquam usurpantur, aut titulos vernacula lingua inscriptos habent et habere debent.

Fuere etiam theatrales atque Circenses, de quibus libro primo fusius actum est (5): et quae tabellariorum propriae, de quibus pariter aliquid ibidem commentatus sum (6). atque hae quidem et usu nunc quoque celebrantur, et Latino caedem titulo haud indignae videri possunt: nam cur in iis, quas viri principes ludorum caussa clientibus interdum amicisque dare solent, quo spectatum admittantur, cur, inquam, tituli inscribi non possint hujusmodi? MAENIANO · I · CENACVLO · X · aut OSTIO · II · GRADV · III · vel si ludi ex aedium fenestris spectandi sint, DIAETA · I · CVBICVLO · III · tum in ea bulla, quam tabellarii nostri ante pectus gestare solent, quidni inscribatur exempli caussa, VSENCVS

(1) v. Gallie. in Av. Cass. c. 13. et Casaub. ibid.

(2) Maff. M. V. p. 262. n. 3.

(5) de Pont. l. 4. cl. 8. v. 39.

(4) Maff. M. V. p. 256. n. 9.

(5) v. inser. 459. 460.

(6) v. inser. 461.

ROMA • TABELLARIVS • DE • STATIONE • PRINCIPIS, infraque ipsum decretum, quo viam inire sit iussus, id est DISCEDE?

II. Iam et tesseras velim adnumerare titulos eos, qui discriminis cuiuscumque causa, et quo quisque nosci certo posset, ita olim in usu aliquando fuerunt, ut nunc quoque esse possint. Spartanis militibus, scripsit e Trogo Iustinus, quum contra Messenios iterum pugnaturi essent, tantum ardorem a Tyrtaeo duce, carminibus suis in concione recitatis, injectum esse (1), *ut non de salute sed de sepultura solliciti, Tesseras insculptis suis et patrum nominibus dextro brachio deligarent; ut si omnes adversum praelium consumpsisset, et temporis spatio confusa corporum lineamenta essent, ex indicio titulorum tradi sepulturae possent.* alia de causa, sed tamen ut bene nosci possent, venales Romae servi tesseram quisque suam habebant. nam in edicto aedilium curulium, qua parte, inquit Gellius (2), *de mancipiis vendundis cautum est, scriptum sic fuit:* TITVLVS • SERVORVM • SINGVLORVM • VTEI • SCRIPTVS SIET • COERATO • ITA • VTI • INTELLIGI • RECTE • POSSIT • QVID • MORBI VITIIVE • QVOIQ • SIT • QVIS • FVGITIVVS • ERROVE • SIT • NOXAVE • SOLVTVS • NON • SIT

Enimvero postquam Constantinus damnatos in ludum aut in metallum deformari stigmatum notis vetuit (3), ex eo tempore servis, opinor, qui semel cessassent, non iam inusta fronti nota, sed collaria imponi coepta, lamina his adnexa litterata, quae fugacem servum notaret: cuiusmodi in Museis nunc quaedam exstant. exemplum titulorum huius generis ex Fabretto subijciam (4):

IANVARIVS • DIC  
OR • SERVVS • SVM • DEX  
TRI • EXCEPTORIS • SENA  
TVS • QVI • MANET • IN • RE  
GIONE • QVINTA • IN • A  
REA • MACARI

porro titulos nunc similes in canum collaribus quidam inscribunt, qualem legi apud Ferrarium (5):

MILLVM • ARGENTEVN  
LISAE • CATELLAE  
CLVSI • MEIS • MANEVS  
LVCILLA

atque id ipsum antiquis placuisse constat: nam cervae meminit Pausanias (6), quam Arcesilaus viderat Lycosurae Deae Dominae sacram cum torque, in quo versus hic erat incisus:

Νεβρος εων εαλων, οτ' ες Ιλιον ην Αγαπηνωρ  
et Latinae etiam quaedam exstant lamellae, quas collo applicitas armillati canes hortorum custodes gestarunt, quarum titulos duos affert Maffejus (7), his verbis, menda quaedam exiipe, quae tollenda putavi.

(1) lib. 3. c. 5.

(2) N. A. l. 4. c. 2.

(3) Cod. Theod. lib. 9. tit. 40. leg. 2.

(4) p. 522. n. 564.

(5) Inser. p. 202. n. 419.

(6) lib. 8. c. 10. *hinnulus quum essem, captus sum quando ad I-*

*lium erat Agapenor.*

(7) M. V. p. 311. n. 1. v. Reines. cl. 1. n. 59.



CLODI  
HERMOGE  
NIANI·V·C·  
EX·PRAE  
FECTO·VR  
BI·DE·HOR  
TO·IPSIVS  
SVM

DE·HORTO  
OLIBRI·V·C·  
SVM·PRAE  
FECTI·PRAE  
TORI·NOLI  
ME·TENERE  
NON·TIBI  
EXPEDIT

ceterum et in cursorum bullis, quas in pileis nunc habere solent, tesserae instar, inscriptio incidi possit. Ferrarii est, quam subdam, in qua tamen heri nomen desideres (1).

NVMIDAM·CAPTVM  
EMI·AVREIS·QVINQVAGINTA  
PROBVM·MANVMISI  
CVRRACEM  
FECI·ANTECVRSOREM·MEVM

alias item tesseras, quae gladiatorias imitentur, recte induxeris, ut si servum domo sponte et famulatu abire sinas, de quo nihil sis questus, tessera huic dari potest anulo obsignata herili cum titulo hujusmodi,

FVSCO·SINE·NOXA  
COMMEATVS  
PETENTI·DATVS·EST  
KAL·OCT·  
AN·MDCCLXXVIII·

Sed jam de his satis: nemo enim non videt, quid potissimum in hoc titulorum genere spectandum sit: qui si breves atque perspicui sint, tum Latino quodam lepore et concinnitate delectare possint; nihil jam illis desit, quominus sciti et probabiles habeantur.

## §. V.

### DE INSCRIPTIONIBVS LUCERNARVM VASORVMQVE FICTILIVM

I. Suas olim inscriptiones lucernis etiam, quaecumque e materia essent, suas vasis quoque fictilibus omnis generis saepe fuisse, ne mirere. non Latini quidem veteres natura loquaciores, quam nos, erant; sed elegantiae ac munditiarum multo studiosiores; ut quae cuique rei ornamento esse, speciemque afferre aliquam possent, ea temere non negligerent. itaque quum et in opuseulis hujusmodi, quod affabre plerumque facta essent, non sine tractantium voluptate tituli legi possent, qui vel usum eorum ostenderent, vel artificis nomen et officinam indicarent; idcirco ne haec quidem sine litteris esse passi sunt, et alterutrum aut etiam utrumque signari curaverunt.

Porro fictilium lucernarum usum tituli declarant illi, qui Principis imagini aut clypeis coronisve adjecti, honores ejus vel facta referunt: accensas enim illas facile intelligimus, quum ejusdem natalis dies aut victoria aut adventus celebraretur (2). atque

(1) Inscr. p. 202. n. 418.

(2) v. inscr. 462. 463.

his quidem titulis non absimiles inscriptiones condi nunc possunt, quas figuli nostri iis addant lucernis, quae Romae passim statis temporibus sub noctem accenduntur, quum scilicet patronorum caelestium natales sunt, aut in Principis honorem anniversarius suscepti pontificatus dies celebratur: cae nimirum vel hoc vel simili modo confici possint, NATALI · CVSTODVM · VRBIS · LAETITIA · P · R ·, SOLLEMNIA · DEFENSORIBVS · QVIRITIVM; ipsae enim Petri et Paulli effigies nominum loco erunt: tum aliae hoc pacto, ANNO · V · PRINCIPATVS · PII · SEXTI · P · M · HILARITAS · P · R ·, SACRIS · QVINTO · INSTAVRATIS · PRO · INCOLVMITATE PII · SEXTI · PONT · MAX · et si quando aliis de caussis feriata urbs nocturnis lucebit ignibus, commode figulus eas etiam aptis titulis designaverit, quos posterius quum legent, fictilibus quoque nostris pretium aliquando facient.

II. Iam nec argenteos auratosque lychnos, qui maxime in templis ardere solent, sine inscriptione suspendi acquum est: praesertim si donaria sint, aut voti causa dicata esse constet: ceterum vix aliae his inscriptiones, quam sacrae conveniunt; quibus tantum recte addas, quot argenti pondo singulis operibus impensa sit facta. si autem lychnus, ut fit, ex veteri votivo argento conflatus fuerit, formulas huic rei designandae in libri primi inscriptione tricesima sexta reperies. sed tamen hosce lychnorum titulos paucis admodum verbis a veteribus confectos esse videmus (1), eorum etiam, qui dedicassent, nominibus fere neglectis: quae nunc quoque omitti possint, siquidem aut domi lychnus suspendi debeat, aut in aedicula monumentoque gentili, in reliquis non item; multi certe ea desiderari aegre ferent.

III. Ceterae figlinorum operum inscriptiones sive lucernis additae sive urceis amphorisque omnis generis, vix aliud sunt, quam ipsum figuli nomen patrio casu, aut si recto, cum littera F. nempe *Fecit*, sive etiam officinae et fundi appellatio, unde doliare opus prodierit. verum in vinariis maxime amphoris titulos praeterca suos Domini inscribebant (2): de quibus lepide apud Plautum Synceratus servus (3):

*Ibi tu videas litteratas fictiles epistolas,*

*Pice signatas, nomina insunt cubitum longis litteris:*

*Ita vinariorum habemus nostrae delectum domus.*

atque alii quidem tituli tum addebantur, quam primo vinum in amphoras infunderetur: quo pertinent illa Horatii verba, *O nata mecum consule Manlio*, et *Tu vina Torquato move Consule pressa meo* (4), atque alia huiusmodi: quippe consulibus notatis tempus indicabant, quo vinum conditum esset. alios contra in pittaciis Dominus inscribebat, quum vinum e cella in mensam inferebatur, de quibus meminit Petronius (5): inde ut discerent convivae, quantis lautitiis excepti essent.

Nunc vino quod sit nomen, atque unde lagenae ad nos quaelibet perlatae fuerint, haustu ipso sentire conviva debet, ac nihil haesitans pronunciare, quod nobilis videlicet potoris laus est non exigua. ita fit, ut pittacia haec nostra nobis relinquuntur, quae iis denum cenis proferamus, quas cruditis viris ad Apicianae praescripta quis praebeat.

## §. VI.

### DE INSCRIPTIONIBVS ARMORVM ET INSTRVMENTI BELLICI

I. Quia hostium spolia, ut nunc fit, veteres etiam in templis aliquando dedicare solebant; ideo in armis quoque et instrumento bellico inscriptiones sacras incisae es-

(1) v. inscr. 464. 465.

(2) v. inscr. 467.

(3) Poen. 4. 2. 14.

(4) l. 3. od. 21. et Epod. 13.

(5) v. inscr. 465.

se videmus. de his tamen nihil aliud hoc loco tradendum est, quam ut eas simplici plane dictione perscribamus. ejusmodi enim exempla esse reperias, quotquot antiquitus scripta sint: ceterum ab iis non discrepant, quas prioris libri capite primo jam protulimus. porro et causa plerumque est, cur tituli hi breves fiant; non modo quod longae inscriptioni in ipso aere aut ferro locus esse non solet, sed etiam quod fere spoliorum hujusmodi dedicatio separatim historica eaque insigni inscriptione demonstretur: quo sane pertinet ille Laterani templi nobilis titulus:

PIVS • V • PONT • MAX •  
 SIGNA • DE • CAROLI • IX • CHRISTIANISS • GALLIAE • REGIS  
 PERDVELLIBVS • HISDEMQUE • ECCLESIAE • HOSTIBVS  
 A • SFORTIA • COMITE • SANCTAE • FLORAE  
 PONTIFICI • AVXILIARI  
 EXERCITVS • DVCE • CAPTA • RELATAQUE  
 IN • PRINCIPE • ECCLESIAE • BASILICA • SVSPENDIT  
 ET • OMNIPOTENTI • DEO  
 TANTAE • VICTORIAE • AVCTORI • DICAVIT  
 ANNO • MDLXX •

II. Reliquae inscriptiones, quae rectius privarum rerum vocari possint, vel in armis insculptae erant, quae milites in acie tractabant, vel in signis, quae iidem in pugna sequebantur. ac quae in armis legerentur, maxime in clypeis, eae militis nomen singulae referebant et cohortis et centuriae, in qua quisque stipendia mereret: qua de re libro primo ad Pontii Silvani titulum actum est (1). neque vero plura a me dici opus est, si quis antiquum morem revocare nunc velit. quod si domi arma, quae majorum fuerint, tamquam bellicae virtutis monumenta servas, in his eorum nomina patrio casu gradibus quoque militaribus adjectis, apposite ad memoriam posterorum incidenda curaveris: plura si addideris, minus id opportune fecisse videaris.

At in signis militaribus quum signiferi cujusque nomen insculpi potest, tum et sententia aliqua ex militaris disciplinae scitis praeceptisque desumpta: quales nimirum e Livio maxime petere liceat, qui plures in concionibus militaribus usurpavit. ejusmodi, opinor, has esse duxeris MILES • PRO • VIRTUTE • SPES • GERITO (2), QVO • TIMORIS • MINVS • EO • PERICVLI • MINVS • EST (3), AVDENDO • AGENDOQUE RES • ROMANA • CREVIT (4), FERRO • VIA • FIT • PER • QVAMVIS • CONFERTOS HOSTES (5) et sexcentas hujusmodi: quas quidam in aereis quoque tormentis inscribi voluerunt; esto, ornamento haec magis, quam incitamento esse possent. huc pertinent ii quoque tituli, quos in funditorum glandibus veteres inscripsere: quarum quaedam in Piceno ad Truentum olim inventae hisce insignes litteris, FVGITIVI • PERISTIS (6), ITAL • (7), GAL (8) • primae autem titulus hostium, ut vides, ignaviam notabat, ceteri indicabant, cujus brachio ictus illatus esset.

Enimvero nec vexilla nec enses, quum viris fortibus praemii causa a Principe dantur, titulo carere debent: quibus, ut reor, inscriptiones id genus convenient maxime: LVCI • ASPRO • CENTVRIONI • OB • MERITA, FLAVIO • MARCELLO • STIP • X • VIRTUTIS • ET • HONORIS • ERGO, AVRELIO • LOLLIANO • OB • CIVEM • SERVATVM, similesque his aliae, quibus praeclarum militis factum significetur, si quis, exempli causa, primus praesidio dejecto tumultum ceperit, aut in vallum hostium irruerit, aut in oppugnatione oppidi murum

(1) insc. 474.

(2) Liv. l. 10. c. 11. n. 17.

(3) id. l. 22. c. 4. n. 5.

(4) id. l. eod. c. 10. n. 14.

(5) id. l. eod. c. 27. n. 50.

(6) Grat. p. 1158. n. 4.

(7) id. ibid. n. 5.

(8) id. ibid. n. 6 v. Lips. Polior. l. 4. Dial. 3. in fin.



ascenderit. nam quod exempla veterum praesto non sunt, non ideo hae a veterum stilo aut consuetudine alienae videri debent; nec militaria olim dona, hastas, phaleras, vexilla sine inscriptione fuisse verisimile est: quorum etiam anuli quidam alicubi et fibulae et bullae nominibus notatae militum reperiuntur. ceterum tota res in integro est: ea quisque sequatur, quae probat, iis abstineat, quae improbat. serinia enim nostra haud magni sane usus, iis tantum in promptu esse volumus, qui uti velint.

## §. VII.

## DE INSCRIPTIONIBVS LATERVM ET TEGVLARVM

I. Nihil in urbe, quum antiqua rudera egeruntur, apparere saepius solet, quam lateres tegulaeque litteratae. in his scilicet officinae et praedia leguntur, unde figlina opera prodierint, in his figulorum dominorumque nomina; tum quaedam interdum salutationes atque acclamations, saepissime vero consules. atque hanc laterum tegularumque signandarum consuetudinem perdiu servatam esse reperies: quippe inscriptiones huiusmodi haud levi utilitati fastorum consularium restitutoribus saepe fuerunt. sed lapsis demum imperii rebus, quum litterae etiam coli desiissent, notae quoque illae omnes negligi coeptae: ereptumque nobis, unde officinarum veterum dominos et priscorum aedificiorum aetatem agnosceremus. sic plura abiire saecula, donec (1) Martini quinti atque etiam Alexandri sexti Pontificum Maximorum aeyo exsistere, qui aliqua vetustatis imitatione figlinarum signa iterum inducerent: nam, ut Fabrettus animadvertit (2), tegulae omnes, quibus Romae templum Balbinae Martyris integriur, et Borgiae gentis insigne et Alexandri ipsius nomen impressum habent. quid tamen? magni, opinor, laboris id visum figulis est, brevique factum; ut plus operarum inertia, quam dominorum diligentia valeret. ita certe jamdudum aedificamus, ut in lateritiis operibus nullum nominis vestigium, nulla temporis nota posteritati relinquantur.

Id vero est, quod jam ferri nullo modo debet: stultum enim jure videtur, quod et decorum et utile sit, id sine causa negligi, quum nullo negotio fieri possit. quantus enim quaeso in uno alterove sigillo dominis sumptus, quanta figulo temporis jactura in obsignando esse potest? at non exiguus contra hisce ex titulis vel honor nobis vel usus posteris erit, quum hi aevi nostri opera agnoscent, et majorum suorum monumenta vel in figlinis invenient. quapropter neque hanc profecto memoriae nostrae curam abjicere, neque hoc posteris subsidium invidere debemus, quo illi temporum nostrorum historiam quam multis singularum aetatum monumentis ornare possint.

II. Quae quum ita sint, age nunc, videamus, quinam laterum tegularumque tituli aetate nostra probandi sint. primum quidem maxime refert, ut tempus in his designemus, quo ex officina prodierunt: nec tamen opus est, ut annus Dionysianae supputationis expresse inscribatur: satis erit aetatem Principis nomine indicasse, hoc pacto: PIO · VI · PONT · MAX · vel IMP · CAES · IOSEPHO · II · AVG · aut si tempus accuratius significare volueris, inscribes: AN · V · D · N · PH · VI · P · M ·, vel IMP · CAE · IOS · II · AVG · N · AN · XI · hisce indiciis non minus dilucide, quam olim consulibus notatis annum quemlibet designaveris. quamquam veteres etiam non raro unius Principis nomine contenti fuerunt: quod jam libro superiore adnotavi (3):

(1) later. in Mus. Zelad.

(2) p. 499. n. 3.

(3) Fabr. p. 502. n. 78. 79. 80.

IMP · CAE · TR · O · AVG ·  
EX · FIGLI · MARC · DOLI ·  
C · CAL · FAVORIS

id est *Imperatore Caesare Trajano Optimo Augusto ex Figlinis Marcianis Doliare C. Calpetani Favoris*. quin et Augusta uxore notata, ut consules, sic Imperatorem omiserunt (1):

M · VALERI · PRISC · EX · PRAEDI ·  
PLOTINAE · AVG ·

illud tamen vix imitandum, quum nec Principem nec ullum e domo Augusta nomine appellant (2):

OP · DOLI · EX · PR · DOMINI · N · AVG ·  
EX · FIGLINIS · FAVRIANIS

quid enim inde posteri discant, quum eos nomen celaveris?

Figuli autem aut officinae fundive domini saepe in titulo primum sibi vindicant locum, rarius extremum: qui et initio utuntur illo OPVS · DOLIARE, vel EX · PRAED · vel EX · FIGL · vel EX · OFFIC · interdum vero non aliud quam nomen inscribere, et si quid genus suum posset ostendere (3):

PRISCI · GAVIAE · AEMYLIAE  
ABNEP ·

qui forsitan Priscus in saecula se iturum putabat, nec ignoraturos posteros esse, quantus ipse fuisset.

At nos, si libet, et figulum et officinae aut praedii dominum et tempus ipsum diserte efferemus, hoc aut simili modo:

OP · D · CVRTI · MARCIANI  
EX · PRAED · LATERAN ·  
PIO · VI · P · M ·

EX · OFFIC · VATICAN · D · N · PII · VI · P · M ·  
OP · FIGL · A · PRISCO · VITALI

PIO · VI · P · M ·  
EX · FIGL · TRANSTIBER ·  
DOL · PVTEANI

si vero lateres figulus maxima finxerit forma, tum eos peculiari nomine appellare poterit, inscribetque veteri more

BIPEDA · FAVSTI · EX · OFFIC · PLAVTIAN ·  
AN · V · PII · VI · P · M ·

nec omina semper aut acclamationes repudiaverit, dum ne longa aut obscura sint. haec et antiquis placuere, nec fortasse posteris ingrata erunt. hisce autem aut similibus formulis uti poteris:

OP · FIGL · MARCI · TORELLI  
PIO · VI · PONT · MAX ·  
MYLTOS · ANNOS

EX · FIGL · AVRELIANIS  
AN · V · PII · VI · D · N ·  
VALEAT · QVI · FECIT

IMP · CAES · IOS · II · AVG ·  
DOL · FAVNI  
SERIS · NEPOTIBVS

(1) Fabr. p. 519. n. 286.

(2) id. p. 515. n. 214.

(3) id. p. 519. n. 303.

nec jam plura de his: operam enim cum figulis perdimus, qui lucelli spe, non elegantiae fama ducuntur. utinam non hanc et domini ipsi susque deque ferant!

II. Atque haec sunt, quae hactenus de titulis rerum privarum mihi perstringenda esse putavi. singula enim opuscula attingere litterata, deque singulis aliquid meo more effari, non modo longum nimis atque molestum, sed etiam inutile prorsus ac leve esse videbatur. quid enim fere habent aliud quam auctorum dominorumve nomina? nisi forte excipiendi sunt plumbei quidam aquarum ductus, in quibus et curatores leguntur et mensura item fistularum hoc modo (1):

IMP · CAES · TRAIAN · HADRIANI · AVG ·  
SVB · CVRA · RESTITVTI · AVG · LIB · PROC · VX

id est *Quinundenum* sive quadrantium digiti quindecim, qui sunt digiti tres et dodrans, uti legendum plane esse, jam ex Frontino (2) egregie ostendit Marinus. adde, si libet, quosdam etiam ipsorum ductuum lapides, qui identidem aquarum nomina referebant, et ejus, qui aquas deduxerat, tum aliquando numeros quosdam, quibus Fabrettus (3) jugera et pedes significari censet, quot ipsi ductus aquarum in longitudinem protenderentur.

(4)

IVL · TEP · MAR ·  
IMP · CAESAR  
DIVI · F ·  
AVGVSTVS  
EX · S · C ·  
XXX ·  
P · CCXL ·

(5)

AQVAE · MARCIAE · CERVLEAE  
CVRTIAE · ALBVDINEAE  
IMP · CAES · TI · CLAVDIVS · AVG ·  
PONT · MAX ·

Sed hujusmodi inscriptiones publicis prope rectius adnumeres. alii porro privatorum tituli etiam inepti videri possint, ut qui a Petronio (6) affertur CAVE · CAVE CANEM, quem ille ad Trimalcionis januam legit quadrata littera in pariete scriptum, in quo canis ingens catena vinctus pictus erat. alios etiam, etsi rerum privarum esse videntur, minime tamen ad nos pertinere dixeris, qui de insculptis fere litteris ac de minutis tantum opusculis agamus. isto nempe in numero esse censeo librorum titulos; quorum quidem varietatem prope incredibilem, miramque apud Graecos maxime felicitatem si quis nosse voluerit, multa ei apud Plinium (7) atque Gellium (8) in promptu erunt, quapropter hoc nobis facile, opinor, tribuetur, ut ad extremum jam partitionis secundae caput, nomine hoc et cura exsoluti, veniamus.

(1) Marin. lett. al Garaton. Giorn. di  
Pisa t. 6. p. 54.

(2) de Ag. art. 45. v. inscr. 107.

(3) de Aquis diss. 2. n. 216.

(4) Don. Cl. 2. n. 91.

(5) id. ib. n. 110.

(6) in Satyr. c. 29.

(7) H. N. praefat.

(8) N. A. in praefat.



## CAPUT III.

*De inscriptionibus poëticis*

## §. I.

## DE RATIONE GENERIS VNIVERSA

I. Quoniam veteres in conficiendis inscriptionibus ita proprium earum stilum, communemque singulis dictionem sequuti sunt, ut versus tamen aliquando inducerent probarentque; idcirco non adeo nos bellum poësi indicemus, ut nusquam carmini locum esse patiamur. sed illud potius curae erit, ut quae res, qui locus versibus ornari velit, his tantum poëticam inscriptionem aptenius. id certe non sine compendio futurum est. multum enim huic litterarum generi et commodi accedet et varietatis. nimirum quae exilia sunt et minuta, versibus ea melius ornari, quam ulla alia ratione possunt. tum etiam difficile est, ubi unius argumenti non unus est titulus pangendus, res prope easdem iterum ac tertio, non mutata stili dictione, apte distinguere: quae si versibus exponendae sint, non modo laborem minui sentias, sed etiam augeri venustatem. unde etiam fiet, ut novorum monumentorum tituli qua splendore ac dignitate percellant, qua lepore ac suavitate delectent.

Atque eo etiam magis poëticarum nobis inscriptionum genus excolendum est, quod veterum exemplorum cultum saepe vix mediocrem numero fere et scriptionis elegantia superaturi esse videamur. mihi enim argumento sunt proavorum nostrorum parentes, quorum studiis ac litteris Augusti aetas reddita putabatur: quaedam eorum epigrammata, marmoreis olim in tabulis incisa, tanto affluere lepore visa sunt, ut ea deinde docti viri pro vetustissimis studiose descripserint (1). verum quis ex iis, qui nunc florent, poëmatum Latinorum scriptoribus, non multos numeret, qui certare cum illis possint? aut non hos putet rectissimis studiis contendere, ut veterum poëtarum principes aemulentur? a quibus nimirum longe aberant plerumque poëtae illi, qui sua nobis carmina lapidibus olim inscripta reliquerunt (2). accedit nunc Graecorum poëtarum non modo lectio, quae majoribus etiam familiaris fuit, sed Latina etiam translatio, eaque accurata atque elegans: qua in re non unus apud nos excelluit, multoque plura perfecit, quam alii quondam attingere ausi sint. itaque quod abhinc annis ducentis maiores nostri assequuti hoc sint, ut quos ipsi versus scripsissent, non modo boni, sed etiam antiqui aliquando haberentur; primum ne hoc quidem poëtae nostri adeo mirum magnumque putabunt, ut non idem ipsi, si velint efficere, et posteritati facile imponere possint: tum quod longe praestat, eam nobis inscriptionum condendarum rationem ostendent, quam qui sequuti fuerint, haud parum ad summorum poëtarum elegantiam accessisse videantur.

II. Enimvero inscriptiones, quae communi stilo confectae sint, si elegantia careant, facilius quis ferat, quam poëticas: eredo, quod versibus usi, hoc jam profiteri videamur, lucem nos argumento afferre, et poëtarum luminibus distinguere voluisse, ne quid indictum aut inornatum relinqueretur. quare summo studio enitendum est, ut hu-

(1) v. Maff. Ver. Illustr. p. 2. l. 4. p. 207. et Art. Cr. Lap. p. 187.

(2) v. l. 1. part. 2. c. 4. in praef.

jusmodi inscriptiones non poëticis solum numeris, sed verbis etiam et sententiis et ornatu omni insignes fiant. quod quidem non magno negotio assequeris, si te ad Graecos saepe contuleris, quorum illa est *αρθολογία* egregiorum epigrammatum quasi florum omnium infinita varietas. quamquam hinc te, quo major utilitatis sit fructus, electissimis quibusque exemplis, quae jam latine reddita sunt, libro tertio large satis liberaliterque donabo.

At nolim, ex animo excidant, quae superius de poëtarum quorundam licentia questus sum (1): ne, quum vetera ejusmodi exempla ob oculos habueris, nihil jam ex iis, quae olim usurpata sint, ad poëticas nunc inscriptiones minus aptum parumve appositum esse putes. equidem non omnia rejicienda nunc vocabula dixerim, quibus veteres aliquando non sine superstitionis significatione usos intelligas: nae ego nimium multa scriptori eriperem Christiano, eaque sine caussa: nam si alio etiam sensu ea ipsa usurpata interdum videmus, et quo nos quoque uti deceat, non est sane metuendum, ne perverse potius, quam recte uti videamur. ejusmodi illa sunt, *Musae* pro humanitate et doctrina (2), *Veneres*, *Charites*, *Gratiae* pro venustate, elegantia, lepore (3), *Augurari* pro Existimare aut Praedicere (4), *Auspicari* pro Incipere, Aggredi (5), et quae his similia. multo etiam minus repudianda ea putem, quae media appellari possint, quibus vel antiquitus eodem tempore aliud Paganus, aliud Christianus designabat, suam quisque religionem sequutus, ut *Sacrificare*, *Facere*, *Sacris operari*, *Litare*, *Perlitare*, *Expiare*, *Lustrare*, *Consecrare*, *Dedicare*. nullum enim in ipsis vocabulis vitium, nulla pravitas est. at non ita in iis, quae ad veterum fabulas et sententias pertinent, quibus alio sensu nemo uti possit: quare non multum sapere eos semper arbitratus sum, qui nullum in poëticis religionis doctrinaeque discrimen requirendum esse censuerunt: perinde quasi poëtae omnes nulla unquam religione obstricti, veterem superstitionem jure quodam suo retinere tuerique possint: qui sane externa et profana componere Christianis alia etiam de caussa non debent, ne scilicet parum sibi constantes pugnantia loqui, et disjuncta tamen conjungere videantur. nam si vitium esse ait Quintilianus (6), si quis sublimia humilibus, vetera novis, poëtica vulgaribus misceat; quanto illud magis, quum illi ea, quae religio nostra detestatur, cum iis sociaverint, quae sanctissima habeantur?

III. Metro autem veteres inscriptionum caussa usi sunt vario: nam et hexametri occurrunt versus et elegiaci et hendecasyllabi et senarii. e quibus tamen hexametros elogiis atque etiam historicis inscriptionibus aptissimos duxerim: Plato in epitaphiis quoque probabat, sed quatuor tantum esse volebat: *Nec imponi*, ut est apud Tullium, *quam quod capiat laudem mortui, incisam ne plus quatuor herois versibus, quos longos appellat Ennius* (7). ceterum Latinis inscriptiones modo longae, modo breves placuerunt: itaque quum argumentum, tum locus ipse, quo inscriptio poni debeat, carminis mensuram dabit, Graecos uno etiam aut altero versu contentos fuisse reperiās, eos praesertim, qui Athenis florentibus exstiterunt: qui etiam, si verbum aliquod redundaret, quod versus alterius initium esset, nihil aliud aliquando addiderunt. id certe adnotavit Pausanias (8), in area Cypseli sub Tyndaridis inscriptionem fuisse hexametro versu et principio secundi:

Τυνδαριδα Ελεναν φερετον, Αιθραν δ' Αθηναιθεν,  
Ελκετον.

initia versuum hujusmodi habet Virgilius, sed quos absoluturus erat, si vita suppedit-

(1) part. 1. c. 4. n. 1.

(2) Cic. Tusc. l. 5. c. 23. n. 66. etc.

(3) Senec. l. 2. de benef. c. 28. etc.

(4) Cic. Tusc. l. 1. c. 49. n. 96. etc.

(5) Plin. H. N. l. 7. in prooem. etc.

(6) Inst. l. 8. c. 5.

(7) l. 2. de leg. c. 17. n. 68.

(8) lib. 5. c. 19. Tyndaridae Helenam asportant atque Aethram Athenis abripiunt.

tasset. primus vero hoc ausus videatur, qui Latinos versus lapidi inscribat non integros.

Quod reliquum est, multa poëticarum inscriptionum exempla videris, quarum versus pluribus inscripti lineis legantur, quam numerus ipsorum sit: sive id auctorum praescripto, sive lapididarum arbitrio factum arbitreris. at non quae antiqua, eadem et optima omnia: id quidem tibi tum denique imitandum est, quum spatii angustiis exclusus, integros oblonga in tabula inscribere versus non possis: cetera lineam singulis suam tribuere poëtarum legibus jubemur. sunt etiam, quod mirere, epigrammata quaedam satis antiqua, quae quum alternis pentametris, ut fit, constant, ultimo tamen loco hexametrum (1) aut etiam geminum pentametrum habent, aliquando et plures (2). sed haec quoque iis veterum exemplis adnumeres, quae ab indoctis profecta, non eandem, quam cetera, auctoritatem obtinent.

## §. II.

## DE EPITAPHIIS

I. Quamquam epitaphiorum, quae versibus constant, ratio fere et structura paullo liberior fuit; vix ea tamen in his omissa reperias, quae in ceteris legi solent. nam et defuncti nomen praestit, muneribus, quae obierit, indicio aliquo prolatis, et vita recte sancteque acta exponitur: saepe etiam causa mortis significatur, et auctores monumenti indicantur, et consanguinitatis ac necessitudinis appellationes subjiuntur. reliqua vero ex poësi desumpta sunt, quibus plerumque virtus aut forma celebratur, vel domesticus luctus aut amicorum dolor describitur: ipse etiam defunctus interdum de virtute disputans, et moralia praecepta posteris tradens inducitur, aut quies illi aeterna et terra levis optatur.

Quidam porro omnia haec versibus concluderunt: contra plerique formulas epitaphiorum communes et initio et ad calcem nullis adstrictas numeris usurparunt; cuiusmodi est exemplum, quod subscribam (3):

D · M · S ·  
 SVM · CASTAE · CINERYM · LAPIS · PVELLAE  
 CVSTOS · ME · RELEGENS · PIVS · VIATOR  
 HVIVS · COGNITA · SI · TIBI · FVISSET  
 VIRTVS · LACRYMVLIS · TVIS · RIGARES  
 EVODIAE · CYPARAE · ANN · VI ·

infra titulum scriptos fuisse, qui sepulcrum fecissent, non est, cur ambigas; praesertim quum cippus propter viam, non in hypogaeo familiari stetisse videatur: at illi fortasse non eodem, sed supposito in lapide legebantur: ob eamque rem factum est, ut everso monumento distractisque lapidibus, epitaphii particula perierit.

Iam et initia huiusmodi et similes epitaphiorum conclusiones ad latera etiam legas, in ipsa fronte versus (4). alias, quod frequens est, tota inscriptio communi stilo confecta: tum subjectum epigramma, post hoc clausula aliqua e communibus (5):

(1) Murat. p. 621. n. 1. Fabr. p. 80.  
 n. 96.

(2) Grut. p. 959. n. 1.  
 (3) Fabr. p. 64. n. 2.

(4) v. inser. 488.

(5) Grut. p. 535. n. 2.



D. M.  
Q. CAETRONIVS  
Q. F. PVB.  
PASSER  
MIL. COH. III. PR. ANNIS. XVIII.  
MISSVS. DVOBVS. GEMINIS  
COS. (1)  
SIBI. ET  
MASVRIAE. M. F. MARCELLAE  
VIXI. QVOD. VOLVI. SEMPER. BENE  
PAUPER. HONESTE. FRAVDAVI  
NVLLVM. QVOD. IVVAT. OSSA. MEA  
IN. F. P. XIS. IN. AGR. P. XIIS.

In ipsis autem versibus *διαλογισμὸν* aliquando invenies, ut in Atimeti liberti sarcophago, qui nunc in Capitolio est (2): in quo Homonocam uxorem vir primum adloquitur, tum ipsa virum: rursum eadem cum viatore garrit; eique demum viator terram levem precatur. nec similia alibi exempla desideres quae multis saepe contexta versibus, tres quatuorve tabulas implent. ceterum sine mendis perpauca reperias; esto, multa in his scite dicta, multa numerose ornatque prolata laudentur. quare si qui in his se exercere velint, epitaphiorum cognita forma, et lapidariis aliquot exemplis delibatis, ad veteres poetas ut hi se conferant, auctor sim.

II. Quaeres fortasse, quibus maxime in monumentis poetica epitaphia inscribenda sint? neque enim omnibus indiscriminatum convenire videntur. in sepulcris equidem, quae publice constituta essent, non legi: perraro in communibus apparent: neque his virorum fortium, aut qui senes obierint, ornata saepius monumenta videas. qui haec igitur feminis maxime puerisque tamquam propria adsignet, non ille contra veterum consuetudinem sensisse videatur: quamquam illis poetas etiam adjungi par est, ut inde laudem ipsi habeant, unde alios antea celebrarint.

Porro in feminarum puerorumque epitaphiis, quae fere paullo longiora expetuntur, multa percommode ad virorum aut parentum voluntatem includes versibus, quae communi stilo efferri non possint. id ego, haec ipsa quum scriberem, expertus sum: quippe extincta nuper puella, cui epitaphium is petebat, qui virgunculam officiose instituerat, elegantis ingenii vir Ioannes Senettus, egregiam plane indolem virtutemque ejus senariis versibus extollere expeditissimum mihi fuit: quod alia contra ratione succedere ex sententia vix posse intelligebam: res plane varias ac nimis multas parentum gratia jussus attingere, quo Viri clarissimi et Matronae lectissimae moeror, si fieri posset, aliqua ex parte minueretur,

(1) Cæs. an. Varr. 782

(2) Grut. p. 607. n. 4. Fabr. p. 235. n. 623.

MARTHA · HENR · F · SVVINBVRNE  
 NAT · BRITANN · D · CAPHEATON · NORTHVMBR ·  
 AVITIS · NOMINIBVS · GENEROSA  
 HIC · SITA · SVM  
 PEREGRE · RAPTA · PARENTIBVS · INFELICISS ·  
 ANNOR · X ·

EXTREMVM · HINC · GNATA · S · I · FAS · PARENTES · ADLOQVAE  
 LABORVM · SCILICET · ET · VITAE · METAM · INTEGRAE  
 EMENSO · DECIES · QVAE · STADIO · VICTRIX · TETIGIT  
 HANC · AEQVVS · DEDERAT · CUNCTA · QVI · REGIT · DEVS  
 ET · INVAT · TETIGISSE · DEMPTE · QVAE · MODO · EST · MIHI  
 PARS · VITAE · HANC · ANNIS · ILLE · VESTRIS · ADDIDIT  
 PER · INNOCENTIS · ACTA · AETATIS · TEMPORA  
 ET · NVLLO · LAESAM · VERBO · PIETATEM · PRECOR  
 SIT · CARAE · PYDOR · DESIDERIO · PVELLVLAE  
 MODVMQVE · MOLLIBVS · QVERELIS · PONITE  
 NEFAS · MISELLAM · ME · VOCARI · LUCIDAS  
 QVAE · SEDES · HABITO · POLIQVE · SVpra · SIDERA  
 CHORIS · BEATA · MISCEOR · CAELSTIVM  
 NEC · ME · SI · TERRIS · ACTA · VIX · PVERTIA  
 MUTARE · CAELVM · CVPIDI · IVSSERVNT · SVPERI  
 VITAE · MI · CVRSVM · DIXERIT · DATVM · BREVEM  
 QVI · NOSTRAE · CVRAS · NOVERIT · SOLLERTIAE  
 VT · VNA · LONGVM · TENERIS · AEVVM · AB · VNGVICVLIS  
 ET · MVLTA · INGENIO · MVLTARVM · AEQVARIM · STVDIA  
 SERMONES · EGO · DOCTA · ITALICVMQVE · ET · GALLICVM  
 ET · MAGNVS · VNA · QVO · BRITANNVS · VTITVR  
 LATINIS · EGO · EADEM · ERVDITA · LITTERIS  
 ROMANAMQVE · SIMVL · DICOR · ATQVE · PATRIAM  
 AEQVE · HISTORIAM · HABVISSE · COGNITISSIMAM

QVIN · LITTERATIS · REGNA · DEPICTA · IN · TABVLIS  
 ET · VRBES · NOVI · CERTO · DEMONSTRANS · DIGITO  
 ET · FVIT · IN · PROMPTV · NVMERVM · EXSEQVI · SVBTILITER  
 INIRE · ET · NOTIS · RATIONES · ET · SVBVCERE  
 GRAVESQVE · POTVI · DVLCIBVS · CANTVNCVLIS  
 LEVARE · CVRAS · TRISTIVM · PARENTIVM  
 SIVE · FIDIBVS · SONARE · CONCINENTIBVS  
 DECENSVE · AD · LYRAM · MOVERI · MEMBRA · MOLLITER  
 QVELS · NVPER · ARTIBVS · PVELLA · FLORVI  
 PROBATA · REGIBVS · REGVMQVE · FILIIS  
 INVIDA · NVNC · NOSTROS · HABEAT · MORS · LICET · CINERES  
 EST · ALIVD · FORMAE · DECVS · EST · INGENIVM · MIHI  
 NOVVM · CAELESTE · ET · VIRGINI · HAERET · AVREA  
 COROLLA · FLAVO · AETERNVM · SPLENDENS · VERTICE  
 QVERARNE · TERRA · ABESSE · CORPVS · PATRIA  
 EXTERNA · NOBIS · TELLVS · ROMA · NON · FVIT  
 SED · HEV · PARENTVM · NON · HIS · LENITVR · DOLOR  
 CRVDELIOR · QVOS · NOSTRIS · VRIT · AB · ADLOQVILS  
 AGE · O · VIARVM · IVCVNDE · COMES · OMNIVM  
 GASCOINGE · THOMA · GRANDE · PATRIAE · DECVS  
 ET · COLVMEN · MEORVM · O · QVI · MORIENTIS · SPIRITVM  
 HAVSISTI · AMORE · FRATER · TV · MOERENTIVM  
 SOLARE · CVRAS · AMORIS · HOC · PIGNVS · TVI  
 EXTREMVM · CAELO · MAXIMVMQVE · DVXERO

HENRICVS · SVVINBVARNES · MARTHA · BAKER  
 FILIAE · RARISSIMAE · ATQVE · OPTIMAE  
 CVM · LACRIMIS · POSVERVNT

QVAE · DECESSIT · V · IDVS · SEPTEMBR · AN · MDCCLXXVIII ·  
 AVE · DELICIVM · ET · VALE  
 IN · PACE · R

Hujusmodi autem tituli in antiquis maxime cenotaphiis leguntur; quae monumenta memoriae tantum caussa excitabantur: itaque longiusculos saepe poetarum habent lusus; quod nempe non tam exstructae molis ergo inscriptio fieret, quam hujus gratia moles ipsa constitueretur. hujus est generis exemplum, quod subijciam (1):

DIS · MANIBVS  
 DOMESTICO · QVI · VIXIT · ANN · XVI ·  
 HOC · MIHI · NOSTER · HERVS · SACRAVIT · INANE · SEPVLCRVM  
 VILLAE · TECTA · SVAE · PROPTER · VT · ASPICEREM  
 VTQVE · SVIS · MANIBVS · FLORES · MIHI · VINAQVE · SAEPE  
 FVNDERET · ET · LACRIMAM · QVOD · MIHI · PLVRIS · ERIT  
 NOSTROS · NAM · CINERES · POLLENTIA · SAEVA · SVBEGIT  
 EST · ET · IBI · TVMVLVS · NOMEN · ET · ARA · MIHI  
 NEC · TAMEN · AVT · ILLIC · SVBTER · CRVDELIA · BVSTA  
 AVT · ISTAS · SEDES · NOSTRA · SVBIT · ANIMA  
 SED · PETAT · ASSYRIOS · PETAT · ILLE · LICEBIT · HIBEROS  
 PER · MARE · PER · TERRAS · SVBSEQVITVR · DOMINVM  
 M · CAERELLIVS  
 SMARAGDIANVS · FECIT

addo et hoc alterum, quod nuperrime in agro Vrbisalviensi inventum est: senariolos etenim habet concinnos, ut vides, et antiqui leporis:

(1) Bonad. Cl. g. n. 5.

C · TVRPIDI · P · F · HOR · (1)

C · TVRPIDIUS · C · F · SEVERVS · F · V · A · (2) XVI ·

PARENTIBVS · PRAESIDIUM · AMICEIS · GAUDIUM

POLLICITA · PVERI · VIRTVS · INDIGNE · OCCIDIT

QVOIVS · FATVM · ACERBVM · POPVLVS · INDIGNE · TVLIT

MAGNOQVE · FLETV · FVNVS · PROSECVTVS · EST

Nec jam alia opus sunt, quo tirones poëtae sciant, quae potissimum in epitaphiis perstringenda sint, qua singula ratione distribuenda, quibus aptanda videantur. nam cetera quidem e poësi ipsa petenda sunt: id est ingenio ipsi suo et commentatione exundare debent. sic poëtam Enmolpum, quum Licaë naufragi epitaphium scriberet, rem acriter meditantem fecit Petronius (3): *Enmolpus autem, dum Epigramma mortuo facit, oculos ad arcessendos sensus longius mittit* . . . . cetera desiderantur.

## §. II.

## DE INSCRIPTIONIBVS SACRIS

I. **S**acris inscriptionibus, quas versibus confecissent, titulum aliquando veteres praeposuerunt, quo dedicationem significarent (4), vel quo saltem numen invocaretur (5). alias vero ejus tantum nomen, qui votum solveret (6): quippe nec semper ea versibus includi poterant. plerumque una forma est, et singulae singulis carminibus absolvuntur. quamquam neque permultae sunt neque valde elegantes: ut poëticos titulos antiqui et germani Latini parum probasse videantur, praesertim si de arae aut templi dedicatione ageretur. gravem nimirum orationem et dignitatis plenam religiosa illa dedicatio requirebat, quae in poëtico compytoque sermone vix esse potest.

Enimvero quum hoc in veteri superstitione fere valuisset; quanto id magis apud nos obtinere debebat, qui jamdiu res sacras ex veritate aestimemus, et nihil altaribus templisque nostris in orbe sanctius esse sciamus? atqui ab ipsis veterum Christianorum temporibus poëtici passim tituli in altaribus templisque inscripti sunt: ut quos profani aspernarentur, majores nostri in deliciis habuisse videantur. quo fit, ut illos nunc improbare vix audeam, qui templi etiam aut altaris dedicationem carmine aliquando expresserint: siquidem non latine id solum eleganterque factum reperiatur, sed judicio etiam, nec sine verborum delectu; ut nulla ex veteri superstitione vocabula, nullae sententiarum offendant ineptiae. in quo difficultatem esse non levem didici nuper, quum in tot Arae Corycianae (7) carminibus unum aut alterum epigramma quaererem, quod huc insereretur: exemplum nimirum reperire nullum potui, in quo non aliquid displiceret.

II. Sed tamen poëticas ego inscriptiones donariis maxime tabulisque votivis, quae in templis figi solent, apprime convenire putem; easque et elegantes et aptas facile a poëta confici posse censeam. quum enim argumenta in his fere tractantur, quae poëticum ornatum non respuant; tum video poëtas fuisse non paucos, qui epigrammata hujus generis reliquerint, numeris plane omnibus absoluta. mitto quidem Naugerii et Flaminii lusus: quippe antiqua illi argumenta praeoptarunt, et in Deorum Dearumque fabulis paene desipuerunt: his nempe sacra se ajunt facere, horum postibus dona figere, hos

(1) *E. tribu Horatia.*(2) *Fecit, Vixit, Auit.*(3) in *Satyr.* c. 115.(4) v. *inscr.* 496.(5) *Bonad. Cl.* 1. n. 44.(6) *ibid.* n. 31.(7) *Edit. Romae* 1524.



votis muneribusque placare: qui tamen Christianis quoque argumentis pares, multa de his etiam nobis elegantiae suae poterant et poëticae felicitatis monumenta relinquere. id qui fecerint, alii sane per ea ipsa tempora exstiterere poëtae elegantissimi, quorum epigrammata cedro digna videantur. hujusmodi sunt Hippolyti et Iulii Capiluporum quaedam (1), Christiana tota, et nullo plane veteris superstitionis infecta vocabulo: ut illud Hippolyti votum ad Virginem sanctam (2) pro Cardinali Mantuano aegrotante:

VRBS • TIBI • QVAM • VITREIS • CIRCUMDAT • MINCVS • VNDIS  
 PRO • IVVENE • O • VIRGO • PLVRIMA • VOTA • FACIT  
 PRO • IVVENE • AD • SVMMOS • QVI • DVM • CONTENDIT • HONORES  
 VIRTVTIS • SEMPER • TRAMITE • CVRRIT • ITER  
 CVI • NON • AMBITIO • NON • SPLENDOR • DIVITIS • AVRI  
 CVI • NON • PERSTRINXIT • LVMINA • MENTIS • AMOR  
 QVO • MAGIS • EX • ANIMO • NVLLVS • TVA • NVMINA • ADORAT  
 CVM • SPARGIT • SANCTOS • THVRIS • ODORE • FOCOS  
 SANCTA • VENI • TRIPLICI • STELLARVM • INCINCTA • CORONA  
 SANCTA • VENI • SACRIS • HVC • COMITATA • CHORIS  
 ET • REVOCA • DIRO • FEDERICVM • A • LIMINE • MORTIS  
 CVI • IAM • IAM • SAEVAS • INHICIT • ILLA • MANVS  
 IPSA • POTES • QVODCVMQVE • ROGAS • TIBI • RECTOR • OLYMPI  
 ANNVIT • ILLE • TIBI • FILIVS • ILLE • PATER  
 MVLTA • TVO • IN • TEMPLO • SVSPENDET • MANTVA • DONA  
 ET • REFERET • LAVDES • MVLTA • TABELLA • TVAS

Huc pertinent hendecasyllabi Francisci Bernii (3) votum ab eo solutum indicantes: cujus quidem nomen quum ipsis in versibus non appareat, praescriptum esse oportuit, aut subjectum carmini, quemadmodum antiquis in exemplis factum videmus.

HANC • QVAM • CERNITIS • HOSPITES • TABELLAM  
 SCRIPTAM • CARMINE • NON • SAT • ERVDITO  
 OLIM • CVM • MIHI • FORTE • FEBRIS • ESSET  
 ET • LECTO • MISER • VSQVE • DECVBAREM  
 CONFECTVS • MACIE • PERICVLOSA  
 VOVI • SCILICET • INTEGRÆ • SALVTI  
 OLIM • SI • MODO • RESTITVTVS • ESSEM  
 VOTVM • SOLVERE • VIRGINI • PARENTI  
 SPECTANDVM • OMNIBVS • OMNIBVS • LEGENDVM  
 HANC • TV • NVNC • SVPERI • POTENS • OLYMPI  
 REGNATRIX • HOMINIS • PARENS • DEIQVE  
 VIRGO • QVAM • CELEBRI • VOCATIONE  
 PRAEDICANT • MODO • FEBRIVM • POTENTEM  
 HANC • INQVAM • TIBI • QVIDQVID • EST • TABELLAE  
 SCRIPTAM • CARMINE • NON • SAT • ERVDITO  
 PRO • VOTO • FACE • REDDITAM • PRECAMVR

Sunt et donariorum dedicationes, quae paucis fere versibus absolutae: ut haec nostra ad oram coronae Divino Infanti impositae:

(1) Ed. Romae 1590.  
 (2) ibid. p. 4.

(3) p. 124. ed. Florent. Iuntar. an.  
 1562.

ARGENTO · E · PVRO · LETI · DE · LIMINE · SOSPES

HANC · SERVATORI · DAT · MERITO · AEMILIUS

quamquam et longiuseculae quaedam aliis probatae: ut Lipsiana illa pennae argentea Virgini sanctae Hallensi suspensae (1), et aliae aliorum poetarum ornamentis insignes.

Atque his tu similibusque argumentis contentus esto, in quibus lepor magis, quam dignitas requiratur. quippe his potissimum minutam hanc poësim aptam esse, fatendum est.

## §. III.

## DE INSCRIPTIONIBVS HISTORICIS

I. **R**aro historicam inscriptionem invenias, quae communi stilo maximam partem confecta, brevi aliquo carmine claudatur. insignis tamen illa est, quam paucis ante annis via Labicana ad miliarium tertium repertam Piranesii fratres in museum suum intulerunt.

T · T · COCCEI · GAA · ET

PATIENS · QVAEST · III.

MENSAM · QVADRATAM · IN · TRICHIL ·

ABACVM · CVM · BASI · HOROLOGIVM

LABRVN · CVM · FVLMENTIS · MARMOR ·

PVTEALE · CRVSTAS · SVpra · PARIETEM

ITINERIS · MEDI · CVM · TEGVLIS · COLVMEL

LAM · SVB · HOROLOGIO · TIBVRTINA

PROTECTVM · ANTE · PORTICVM · TRVTI

NAM · ET · PONDERA · D · D · S · POSVERVNT

ET · LOCVM · POST · MACERIAM · VLTIOREM

EMENDVM · VSTRINASQVE · DE · CONSAEPTO

VLTIMO · IN · EVM · LOCVM · TRAICIENDAS · ET

ITER · AD · EVM · LOCVM · IANVAMQVE · BENEFICIO

ET · LIBERALITATE · T · PATRONI · FACI

ENDAM · CVRAVERVNT

IDEMQVE · VITIVM · POMORVMQ · ET · FLORVM

VIRIDIVMQVE · OMNIVM · GENERVN

SEMINIBVS · EA · LOCA · QVAE · T · P · DECVRI

ONIBVS · SVIS · ADTRIBVERAT · EX · PECV

NIA · PVBLICA · ADORNAVERVNT

SISENNA · TAVRO · L · SCRIBONIO · LIBONE · COS ·

IMPENSAE · CAVSAM · TITVLVM · QVI · PERLEGIS · AVDI

ET · IVSTAM · QVAESO · PIETATIS · PERCIPE · CVRAM

QVIS · VERA · VT · CVPIANT · CONCORDE · VIVERE · MENS · EST

HOS · ANIMOS · SPECTENT · ATQ · HAEC · EXEMPLA · SEQVANTVR

HAEC · LOCA · DVM · VIVENT · LIBEAT · BENE · CVLTA · TVERI

POST · OBIVM · SVVM · TRADANT · TVM · DEINDE · FVTVRIS

NE · DESERTA · VACENT · IGNOTIS · DEVIA · BVSTA

SED · TVTA · AETerno · MANEANT · SI · DICERE · FAS · EST

(1) Lips. Virg. Hall. c. 36.

aevo Augusti haec scripta, anno Varron. DCCLXVIII. ubi lapis cum inscriptione inventus, ibidem in parietinis horologium repertum est et columella et puteus et mensa marino-rea: nec procul sepulcri vestigia manent. hoc ego a T. Coecio cum ustrinis et horto libertis suis omnibus datum assignatumque puto, ut commune eorum et familiae sepulcrum esset: Libertorum autem in Coecii domo, ut alia in aliis, Collegium fuisse, cujus Quaestores tertium fuerint Gaa et Patiens. hos *de Decurionum* id est de collegarum *sententia* Cepotaphii sui instruendi, ornandi, ampliandi cura suscepta, mensam primum intulisse, atque in *Trichila* eam, sive sub pergula compluviata collocasse: tum cetera adiecit, perfecisse, ut scripta sunt: quae inter illi *Tiburtina* recensent et *Protectum*, pilas nempe e lapide Tiburtino, quibus tigna imposuerant ad projecturam tecti, quo Collegium porticu latiore uteretur (a). plura jam ne quaeas: in viam mihi redeundum est.

Ceteras id genus inscriptiones a veteribus exaratas plerumque e meris constare versibus deprehendes, nullo alio initio aut clausula insignes. atque ex his privatae quidem ad erudita fere pertinent tempora, at publicae non item. publicis nempe operibus earmina diu veteres minus apta putaverunt. neque immerito; raro enim in versibus, ut superius attingi, ea inesse dignitas potest, quae publicae dedicationi exponendae par sit. binas, si libet, inscriptiones comparemus, quae ad eandem spectant urbem, alteram versibus, alteram communi stilo confectam. M. Flaminii est, quam primam subjiciam (1).

VIATOR • HANC • EQVIS • VIAM • PAENE • INVIAM  
IVBENTE • PAVLLO • TERTIO • RESPUBLICA  
VITERBIENSIS • REDDIDIT • FACILLIMAM

alterius auctor ignotus, sed tamen bonus: ea est hujusmodi (2):

EX • AVCTORITATE  
ALEXANDRI • FARNESII • CARD • LEG • PERPET •  
POPVLVS • VITERB •  
PORTAM • FARNESIAM • APERVIT  
VALLIAM • MINVS • COMMODO • LOCO • POSITAM  
CLVSIT  
ANNO • M • D • LXIX •

quis porro inficiari possit, multo hanc grandiore scriptam oratione esse, quam illa sit; atque hunc magis, quam illum sermonem magistratibus, qui titulos inscripserint, convenire?

II. At contra in privatis poeticeas inscriptiones quis ceteris non praeferat, quae saepe minus pudicae et aequo grandiores turgere quodammodo videntur. in iis enim, quas privati viri nomine suo posuerint, non aliud fere, quam iocos, venustatem, verborum ac sententiarum lepores quaerimus, ea scilicet, quae maxime a poetis petenda sunt. itaque illum ejusdem Flaminii lusum de fonte Nicolai Rodulphi Cardinalis, quod ad aedes pertineat privatae, apte quadrare dixeris. fontem autem ipsum de se loquentem induxit (3):

(a) In diversa abiit Viscontius Mns. Pio-Clem. t. 1. p. 21., dum hanc ipsam inscriptionem retulit et interpretatus est: nam T. T. Coecios Gaa et Patientem quaestores fuisse putat non collegii liber-

torum, sed coloniae cujusdam, Gabiorum nempe, vel Labici; *Tiburtina* vero insculptum fuisse pro *Tiburtinam*, columellam scilicet. Marinius vero Fr. Arv. p.

616. *Trichil.* pro *Trichilinio* h. c. *Triclinio* positum existimat.

(1) post lib. 8. n. 2.

(2) Sweet. in *Delic.* p. 217.

(3) Carm. l. 2. n. 18.



QVOD • SOLITVS • SILVIS • LIQVIDO • PEDE • CVRRERE • IN • ALTIS  
 NVNC • CELEBRO • AVGVSTAE • REGIA • TECTA • DOMVS  
 CRATIA • MAGNA • TIBI • RODVLPHI • MACNE • MEAM • TV  
 PER • DVRI • MONTIS • VISCERA • DVCIS • AQVAM  
 VT • QVI • VIX • FVERAM • PECORI • BENE • COGNITVS • ANTE  
 NVNC • REGVM • LYMPIVS • ORA • MANVSQVE • LAVEM

nec minus elegans atque aptus Naugerii titulus ille de horto explicato atque ad solem aperto: quamquam a Musis idem suis et Apolline abstinere non potuit (1):

OPPOSITAE • OBSTABANT • NOSTRIS • PRIVS • AVCTIBVS • AEDES  
 NEC • NOS • CAELVM • VLLA • SOLVE • IVVABAT • OPE  
 DISIECTIS • HERVS • HIS • SOLEMVE • ADMISIT • ET • AVRA  
 CONCESSIT • NOBIS • LIBERIORE • FRVI  
 HINC • NOS • IN • TENVES • CERTATIM • TOLLIMVR • AVRAS  
 ORNAMVRQVE • NOVAE • FRONDIS • NONORE • CAPVT  
 AT • TIBI • CVI • SACRIS • MVSARVM • ET • APOLLINIS • VMERIS  
 EXSTRVCTAS • LIBVIT • POSTHABVISSE • DOMOS  
 PERPETVO • SIMILES • NOSTRIS • SINT • FRONDIEVS • ANNI  
 NOBISCVM • AVGESCANT • ET • TIBI • CVNCTA • BONA

III. Enimvero et argumenti ipsius, quod in opere dedicato expressum sit, historiam versibus persequi liceat: quam alii, nullo fortasse veterum exemplo usi, communi etiam stilo exposuerunt. nam quod meminit Tullius (2), Syracusis in aede Minervae, antequam illam Verres spoliaret, tabulas fuisse permultas pulcherrime pictas, *in quibus erant imagines Siciliae regum ac tyrannorum, quae non solum pictorum artificio delectabant, sed etiam commemoratione hominum et cognitione formarum*; non aliam equidem sub quaque tabula inscriptionem fuisse, quam carmen puto, quo picturae argumentum contineretur. hic certe Graecorum mos fuit, quem et multa Anthologiae epigrammata indicant, et Pausanias in primis testatur: qui etiam quaedam ejusmodi descripsit carmina; ac de Hippias quodam tradidit (3), Olympiae sub statu puerorum Manertinorum, qui in Siculo freto perierant, manente veteri inscriptione, titulos ab eo elegis esse factos. itaque ne Latinis quidem rerum hujusmodi describendarum causa, aliud omnino, quam carmina placuisse crediderim: praesertim quum et iis usos esse constet non paucos (4), et sine poetarum pigmentis tituli omnes ejus generis vix sapere aliquid posse videantur. si qua igitur picturis et anaglyphis operibus inscriptio subjicienda erit, quae ad ipsum argumentum referatur, in eoque tota versetur; hexametris omnino aut etiam elegis hendecasyllabisve tituli conficiantur, nihil ex lapidaria veterum oratione delibetur. sic tabulae olim pulcherrime pictae Vandycki manu, quae Machabaeorum fratrum coram matre caedem referret, epigramma hujusmodi aptabam:

CRVDELI • EXSTINGVI • SEPTENOS • FYNERE • FRATRES  
 ISACIDAS • DIRVS • DVM • IVBET • ANTIOCHVS  
 ECCE • ALACRIS • FORTES • PRAECLARA • OCCVMBERE • MORTE  
 MATER • PRO • PATRIS • LEGIEVS • ADSPICIENS  
 MACTI • INQVIT • PVERI • LACRIMAS • NE • POSCITE • CAELO  
 VOS • PEPERI • ET • MERITOS • INFERO • SIDERIBVS

alia id genus exstant non pauca in recentiorum poetarum libris, quae parare tibi facile

(1) Carm. 23.

(2) Verr. 1. 4. c. 55. n. 123.

(3) l. 5. c. 25.

(4) v. part. 1. c. 4. §. 3. n. 5.

possis. quamquam Graecos adire fontes praestat, unde fere boni poëtae omnes sententiarum lepores hauriendos sibi esse putaverunt.

Cavendum tamen est, ne veteri poëtarum licentia quidlibet audendi potestatem nobis esse existimemus. in huiusmodi enim inscriptionibus ut nihil ex iis negligendum est, quae pictor sculptorve expresserit; sic ea omnia praetermittenda, quorum nullum in opere vestigium reperiatur: ut nempe rebus verba respondeant, nec aliud poëta, aliud auctor cogitasse videatur. illud enim unum poëtae tribuitur, ut ea ipse addat, quae ars efficere nulla possit.

## §. V.

## DE ELLOGIIS

I. *E*x auro argentove, inquit Plinius (1), aut certe ex aere in bibliothecis dicantur illi, quorum immortales animae in iisdem locis ibi loquuntur: apud Graecos etiam in Prytaneis: ut Syracusis Sappho, quam sustulit Verres (2). atque haec Sappho, inquit Tullius, sublata quantum desiderium sui reliquerit, dici vix potest. nam cum ipsa fuit egregie facta, tum epigramma Graecum pernobile incisum habuit in basi. at in urbe qui honore potissimum rerumque gestarum amplitudine ceteros Romani populi praestitissent, eorum plerisque in aedibus imagines visebantur. porro in harum basibus poëtica ellogia antiquitus scribi coepta: neque ea initio valde longa; nam Titus quidem Atticus (3) domi suae quaternis quinisve descripserat versibus. nec longior est titulus, quem Martialis ad Avitum misit, quum in bibliotheca ejus inter clarorum virorum imagines suam quoque dedicatam esse accepisset: nempe hoc ille epigrammate contentus erat (4):

ILLE · ECO · SVM · NVLLI · NVGARVM · LAVDE · SECVNDVS  
QVEM · NON · MIRARIS · SED · PVTO · LECTOR · AMAS  
MAIORES · MAIORA · SONENT · MIHI · PARVA · LOQVVTQ  
SVFFICIT · IN · VESTRAS · SAEPE · REDIRE · MANVS

At multo etiam longiores titulos probatos esse, argumento maxime est Vrsi Togati ellogium satis longum, quamquam de viro utique non magno agebatur. quare nec Sadoleti *Laocoon*, nec Castilionis *Cleopatra* improbari debet, praesertim quae seite admodum scripta sint; esto aliis, ut Fumano et Casanovae, breviores tituli placuerint, tum quoque, quum magnorum regum et ducum praestantissimorum facta describerent. sed tum potissimum illa Attici brevitatis imitanda videtur, quum multa ellogia uno in loco proponenda sint, atque ita imitanda, ut novum in his aliquid et admirabile efficeretur. nam ubi magna spectandarum rerum copia est, et quae longiora sunt, fere praeterimus, et quae vulgaria, contemnimus.

II. Iamvero quum aedium nostrarum ornameto non eorum tantum imagines collocemus, qui patrum aut majorum memoria floruerunt; sed Romanorum etiam atque Graecorum ducum, item nobilium scriptorum, magnorumque philosophorum simulacra disponamus, quae affabre et antiquo artificio facta sint: non ita ellogia prioribus illis et nostratibus convenire dixeris, ut non et ceteris, externis quamquam et alienissimis sua interdum subscribi possint. sic veteres etiam non modo praeas aequae et recentes majorum imagines ellogio aliquo ornabant; sed barbarorum etiam monumenta vel hostium

(1) II. N. I. 35. c. 2. n. 2.

(2) Cic. Verr. I. 4. c. 57. n. 127.

(3) v. I. 1. partit. 2. praef. c. 4.

(4) Mart. I. 9. epig. 1.

in urbe esse patiebantur: *et adeo*, inquit Plinius (1), *discrimen omne sublatum, ut Hannibalis etiam statuæ tribus locis visantur in urbe, cujus intra muros solus hostium emisit hastam.*

Etsi autem ceterorum ellogiorum simplicitati et gravitati neque exquisitæ dictionis ornatus, neque res ingeniosius tractatæ satis congruunt; in poëticis tamen nulla lege vetamur, quin venusta quæque sectemur, omnesque his artis colores inducamus. nec solum fas erit, ejus, cui posita imago sit, virtutes et facta licentius persequi; sed artificis etiam celebrare manum, et utriusque miscere laudes. hujusmodi est Pythagoræ concinnum illud ellogium Naugerii stilo perscriptum (2):

QVEM • TOTIES • VIXISSE • ANIMA • REDEVNTE • RENATVM  
MVTATO • FAMA • EST • CORPORE • PYTHAGORAM  
CERNE • ITERVM • VT • DOCTI • CAELO • GENERATVS • ASYLAE  
VIVAT • VT • ANTIQVVM • SERVET • IN • ORE • DECVS  
DIGNVM • ALIQVID • CERTE • VOLVIT • SIC • FRONTE • SEVERA • EST  
SIC • IN • SE • MAGNO • PECTORE • TOTVS • ABIT  
POSSET • ET • ILLE • ALTOS • ANIMI • DEFROMERE • SENSVS  
SÈD • VETERI • OBSTRACTVS • RELIGIONE • SILET

nec aliter scripta esse reperies Graecorum quaedam ellogia omnino pulcra, quæ libro tertio proferentur.

Quia vero statuæ sunt quaedam sic expressæ, ut non viri vultum tantummodo referant, sed virtutem etiam aut factum indicent aliquod: idcirco totum aliquando ellogium in ipsa virtutis laude aut in facti expositione versari potest. ut si quis Siccium illum Dentatum in armorum strue fecerit, donis militaribus onustum iis, quæ Plinius enumerat (3), sub eo ellogium inscribi possit hujusmodi:

ARMA • VIDEN • CONGESTA • HASTAS • GENVS • OMNE • CORONAS  
ARMILLAS • TORQVES • TOT • SIMVL • ET • PHALERAS  
VIRTVTIS • DECVS • HAEC • BELLO • TVLIT • OMNIA • VICTOR  
SICCVS • ARGOLICO • NON • MINOR • AEACIDE

at si titulus sub Cleopatrac morientis signo inscribendus sit, hoc, opinor, ellogium apte quadrabit:

DVLCIA • QVAM • VITAE • LINQVENTEM • LVMINE • CERNIS  
REGINA • HAEC • REGVM • ET • MAXIMA • PROGENIES  
ILLA • EST • ACTIACO • MAGNI • SERVATA • TRIVMPHO  
CAESARIS • ET • SACRA • CONSPICIENDA • VIA  
QVAE • GENVS • HAVD • OBLITA • SVVM • CAPTIVA • NE • DIXIT  
ROMVLIDVM • MATRES • PROH • PVDOR • ADSPICIAM  
NON • OMNIS • VICTA • EST • CLEOPATRA • FEROXQ • COLVBROS  
IAM • PREMIT • ATQVE • VLNIS • ATRA • VENENA • LIBIT

Poëticum porro est et maxime usitatum ipsos in ellogiis loquentes induci, quorum ea statuis subscribuntur: quemadmodum Martialis, ut vidimus, titulum confecit suum. hujus generis permulta sunt duobus tribusve abhinc saeculis confecta, quum litteratorum nemo a poëtica alienus esset, cujusmodi illud est Iulij Scaligeri de Scipione Aemiliano (4):

(1) H. N. l. 34. c. 6. n. 15.  
(2) Carm. 24.

(3) H. N. l. 7. c. 28. u. 29.

(4) Heroum epigr. 24.



HESPERIOS • ANIMOS • INVICTAQVE • ROBORA • GENTIS  
 QVOSQVE • DAT • INDOMITOS • AFRICA • TERRA • VIROS  
 PERDOMVISSE • ALIQVID • MIHI • SIT • VICTORIA • DVRAE  
 VICTOREM • ITALIAE • VINCERE • SOLA • FVIT

alterum tibi e copiolis meis depromam, Hannibalis imagini subscribendum:

VIVO • EQVIDEM • ANGVSTI • NEC • ME • SVB • MOLE • SEPVLCRI  
 VIRTVTIS • COGES • IMMEMOREM • AVT • GENERIS  
 VICTORI • MONVMENTA • DVCI • QVAS • RVPIT • APERTAS  
 PONE • ALPES • DOMITAM • ET • PRO • TVMVLO • AVSONIAM  
 ET • TREBIAM • SVPER • ET • TRASYMENVN • INFANDAQ • CANNAS  
 BVSTA • ADDE • AGGESTIS • ROMVLIDVM • EXVVIIS  
 STET • QVAE • FACTA • FERAT • LATHIS • IMPOSTA • RVINIS  
 CARTHAGO • CONDI • SIC • DECET • HANNIBALEM

addita interdum statuis carmina, quibus ipsi tantum artifices celebrarentur: ut illud, quod in Delo statuis a se factis subiecere sculptores clarissimi Bupalus et Anthermus Anthermi Chii filii, nempe *Non vitibus tantum censerì Chium, sed operibus Anthermi filiorum* (1): at haec quis carmina in ellogiis non recte ponat; historicis contra inscriptionibus verissime adnumeret.

(1) Plin. H. N. l. 36. c. 5. v. 4. §. 2.

## PARTITIO TERTIA

### DE REGVLIS INSCRIPTIONVM COMMVNIBVS

Singulas haecenus inscriptionum formas et proprietates persequuti, eorum nihil attigimus, quae ad genus uniuersum pertinere viderentur. ea nempe huc rejiciebamus, ut omnia simul tertia hac partitione tractaremus: quae nunc decem comprehensa capitibus, si qui sua interesse duxerint, et expedite legere et facile retinere memoria poterunt.

## CAPVT I.

### *De nomenclatura inscriptionum*

I. **P**rima fere in plerisque inscriptionibus nomina personarum esse solent: de nominibus igitur totaque sive consanguinitatis sive originis nomenclatura primum a nobis disseri consentaneum est.

Hunc veterum fuisse morem nemo nescit, praenomen primo loco ut efferrent, deinde nomen: tum praenomen adderent patris, saepe et avi ac proavi; interdum vero abavi quoque atque atavi: quod in privatis etiam titulis, nedum in imperatoriis aliquando occurrit (1): post haec, in sepulchralibus maxime, tribuni sexto casu, ac protinus cognomen, atque etiam patriam, quae aliquando ante cognomen legitur (2), ipsamque non raro provinciam, unde quisque esset. Janivero ut haec singulatim attingam, non utique in usu nunc omnia, quae olim fuerunt; sed tamen multa in speciem usurpari ex iis possunt, quae apud Romanos obtinebant. primum quidem etsi praenomine non utimur, quum tamen huius plerique nominibus appellantur, primum ex his praenomine loco esse potest, alterum nominis. post nomen autem quidni patrem nos quoque cieamus? adeo id olim sollemne fuit, ut ne tum quidem omitterent, quum patrem ipsum infra nominabant (3). et bis etiam aliquis patris ejusdem filius dicitur, ut apud Fabretum (4):

M · LAEVIUS · D · L · DIONYSIUS  
HOC · MONVM · FECIT  
M · LAEVIO · M · F · PAL · NIGRO  
F · S · ET · SIBI · ET · SVEIS

*Niger* enim, qui *Marci Filius*, iterum *Filius* a Dionysio patre appellatur, qui monumentum se fecisse dicit *Filio Suo et Sibi*. verum id eo forsitan consilio factum putabat Odericius (5), ne Laevius hic Marci filius, Dionysii patronus esse, non filius crederetur. alias autem, quae Giovenazzi opinio est, patris praenomen veteres primo loco scribebant ad ciendum patrem, id est ad significationem hominis ingenui; secundo loco ad indicium consanguinitatis et procreationis: vel demum ad discrimen, ut, quum patrem ejusdem praenomine habuissent pater et filius, de filio sermonem esse constaret, qua de re infra mihi agendum est.

(1) v. part. 1. c. 2. n. 5.

(2) Don. Cl. 6. n. 52. 53. etc.

(3) v. inser. 181. 182. etc.

(4) p. 715. n. 366.

(5) apud Catal. Orig. e Ant. Ferm.  
p. 2. §. 3.

Enimvero patris, avi, proavi mentionem facere non prisca solum consuetudine, sed ipsa etiam monumentorum ratione atque utilitate iubemur. nam quum in eadem saepe familia, nedum gente, nomina avorum nepotibus, aliquando et parentum filiis imponantur; haud facile posterius alterum ab altero distinguant, nisi nos patris et avi appellatione accuratius nunc quemque designemus. atque id etiam ad dignitatem interdum facit, siquidem clari viri ciendi sint. idcirco Imperatores longam fere decessorum seriem interponebant: quam tibi multa libri primi exempla exhibent. sed hi tamen, quorum non unum erat praenomen, majores suos post ea praenomina inserebant, quae dignitatis essent; praenomen autem nativum veluti ac proprium nomini subinde iungebant (1):

IMP · CAESARI  
DIVI · ANTONINI · PII  
FILIO · DIVI · HADRIANI  
NEPOTI · DIVI · TRAIANI  
PARTHICI · PRONEPOTI  
DIVI · NERVAE · ABNEPOTI  
M · AVRELIO · ANTONINO · AVG · P · M.  
TR · POT · XVI · COS · III · OPTIMO · ET  
INDVLGENTISSIMO · PRINCIPI  
PVERI · ET · PVBLIAE · ALIMENTARI  
FICOLENSIVM (2) (a)

privatos contra nomen fere praenomini subiecisse videas, et post id majores appellasse; quo item loco a nobis scribendos existimo. quamquam nonnulli post cognomen ponunt, ut olim Fabrettus, qui libro domesticarum inscriptionum, quo saepe utimur, hunc praefixit titulum, *Raphaëlis Fabretti Gasparis F. Vrbinate Inscriptionum Antiquarum, Quae In Aedibus Paternis Asservantur, Explicatio*. habent hi quidem exemplum optimae notae, quod adhuc in Panthei fronte legimus (3):

M · AGRIPPA · L · F · COS · TERTIVM · FECIT

sed hic e Vipsania gente quum esset, quae Romae obscura habebatur, idcirco nomen omisit suum, cognomenque praenomini parentis praeposuit. alterum item exemplum e libri primi inscriptione quadragesima peti potest; sed ibidem etiam nomen gentile desideratur. nec alia fortasse exempla suffragantur: quin etiam in Musei Veronensis epitaphio Regus quidam miles, qui nondum impetrato civitatis diplomate, Romanum, opinor, praenomen ac nomen usurpare non poterat, patrem initio sic ciuit (4):

CVSESSVG  
ENI · F · REGVS · EX  
CHO · RAET · ET · VIN ·  
ANNOR · XL · STIP ·  
XX · H · S · E ·

quapropter cognomina nostra patris et avi appellationibus omnino subjienda esse dixerim: praesertim quum ea ipsa verborum collocatio venustatis aliquid habere videatur. atque hic tamen adnotandum, veteres aliquando, quum jam praenomen patris, et filii cognomen scripsissent, rursum patris appellationes et matris etiam addidisse, quo nempe consanguinitatis gradus accuratius declararent: ut quum nepoti ex filia tumulum quis faceret (5):

(1) Giorn. Pis. t. 6. p. 255. ex Vill. Alban.

(2) Ficula in agro Sabino V. Cellar. l. 2. c. 9. sect. 2. n. 313.

(a) Ceterum Marinus Inscr. Alb. p. 42. et 251. addidit, num reapse Ficula vel Ficula in agro Sabino, an alibi fuerit.

(3) Grut. p. 1. n. 1.

(4) p. 451. n. 3.

(5) Fabr. p. 135. n. 88.



L · MANTENNIO  
 L · F · SEVERO  
 L · MANTENNI  
 SABINI · TRIB.  
 COH · III · PR · ET  
 FLAVIAE · T · F.  
 PROCILLAE  
 FILIO  
 T · FLAVIVS  
 GERMANVS  
 NEPOTI · SVO

Eodem modo, si quidam e majoribus honoris causa appellandi fuerint, quod laudi vertatur ex eorum genere hunc aut illum esse prognatum; utique nomina eorum cognominibus recte subjicies, et quidem alia etiam ratione: nam ea veteres mutato interdum ordine efferebant, et genitivum casum secunda sede collocabant. sic in Galbae titulis legebatur (1), PRONEPOTI · Q · CATVLI · CAPITOLINI, in T. Flavii Postumii inscriptione apud Fabretum (2) leges, PRONEPOTI · ET · SECTATORI · M · POSTVMI · FESTI · ORATORIS: imo non aliter viros potissimum et filios clarissimarum feminarum aliquando adscriptos videmus (3):

MINICIAE  
 L · F · PAETINAE  
 VXORI  
 RVTILI · GALLICI  
 LEPTITANI  
 PVBLICE

(4)

OSSA  
 AGRIPPINAE · F · M · AGRIPPAE  
 DIVI · AVG · NEPTIS · VXORIS  
 GERMANICI · CAESARIS  
 MATRIS · C · CAESARIS · AVG ·  
 GERMANICI · PRINCIPIS

quamquam epitaphium id suspectis adnumerat Maffejus (5), levi plane de causa, quod nempe nova illi formula videtur OSSA · AGRIPPINAE: qua profecto longe magis nova est, quam anno superiore legimus in liberorum Germanici cippis HIC · CREMATVS EST: praeterquamquod Dio Caii Aug. trajectum in Pandatariam et Pontias describens, unde matris fratrisque cineres Romam transtulit, diserte eum *matris ossa*, τα οστα τα της μητρος, manu sua legisse dicit (6).

Illud in Antonini Caracallae inscriptionibus prope singulare est, nomen cognomenque ejus plerumque ante perscripta legi, quam Septimii patris, hoc modo (7):

IMP · CAESARI · M · AVRELIO  
 ANTONINO · AVG ·  
 IMP · CAES · L · SEPTIMI · SEVERI · PII  
 PERTINACIS · AVG · ARABICI · ADIABEN ·  
 PARTHICI · MAXIMI · P · P · FILIO  
 COLL · FABR · TIGNARIOR ·

(1) Svet. in Gal. c. 2. n. 1.

(2) p. 203. n. 516.

(3) Maff. M. V. p. 222. n. 9. v. iuscr.  
 112. 113. 117. 118. etc.

(4) Grut. p. 237. n. 4.

(5) Art. Cr. Lap. p. 308. v. Fabr. p.  
 629. n. 247. etc. Maff. M. V. p.  
 150. n. 4.

(6) l. 59. p. 904. A.

(7) Grut. p. 263. n. 1. 3. 4. et p. 269.  
 n. 1. 3. etc.

in ceteris enim Imperatorum titulis patris, avi, majorum nomina ante nomen Principis legimus, ut paullo superius adnotavi.

II. Iam nomina ipsa virorum feminarumque, quae nunc saepe barbara et Latinis ignota imponuntur, sic efferenda sunt, ut a Latina consuetudine quamminimum recedamus. mendose a quibusdam *Ioseph* scribitur, praesertim quum *Iosephus* in Svetonio (1) legatur. quo sane pacto alia quaedam, quae ab Hebraeis fluxerunt, nomina perscribi convenit: haec enim Latinorum ratio fuit, ut externis nominibus, quae in litteram desinerent, quam ipsi extremam in suis aut alienis non usurpabant, syllaba fere una declinationis causa adderetur. ob eam rem *Abrahamus*, *Iacobus*, *Elisabetha* scribendum: sed recte *Samuel* et *Ioel* integra maneant, ut olim *Hannibal* et *Tanaquil*: recte etiam *Andreas*, *Simon*, quae Graeco more, sed Latinis usitato scribuntur.

Nec tamen bene *Agnes*, *Irenes*, *Fabianes*, unde quarto casu *Aagnetem*, *Irenetem*, *Fabianetem* quidam scripserunt. multa huiusmodi exempla ex antiquis descripta lapidibus conguessit Lupius (2), quae tamen ad eruditam aetatem non pertinere, et contra omnes Grammaticos usurpata esse fatetur. quippe tamquam lege lata, inter omnes constabat, nomina in es productam desinentia, quae sunt propria, masculina inveniri, ut *Hercules*, *Vlysses*, *Perses*, *Achilles*, *Verres*, *Chremes*, *Laches*, excepto uno feminino, *Ceres Cereris* (3). quare non *Agnes* recto casu, sed *Hagne* scribi debet et *Irene* et *Fabiane* aut *Fabiana*, patrio autem *Hagnes*, *Irenes*, *Fabianes*, Graeco more, vel, si mavis Latino, *Hagnae*, *Irenae*, *Fabianae* et sic deinceps: atque *Hagnae* omnino cum adspiratione: non modo quod est ab ἀγνης, sed etiam quod ita Latini vulgo scripsere: uti iam Bentlejus multis veterum exemplis comprobavit (4).

Ne ii quidem tibi probentur, velim, qui nominibus quibusdam, ut latine illa et puriter efferant, non modo extremam inflectunt aptantque syllabam, sed alias etiam deturbant: quo fit, ut qui modo *Ruggierus* erat, repente *Rogierius* existat, et qui *Gulielmus*, nova etiam littera invecta, *Willelmus*. sic alia atque alia pervertunt nomina. his vero cur Latina ea magis et antiqua videantur, plane ignoro: equidem Italicas nominum flexiones semper putavi ad Latinas accedere quammaxime, neque iis praefereudas, quae ab exterorum linguis ortae sint.

III. Post virorum nomina suam cuique tribum, in epitaphiis maxime, veteres adscribebant: qui mos tertio fere post Augustum saeculo obsolevit; et ipsae etiam tribus paullatim extinctae sublataeque sunt: nisi quod apud Britannos quasdam nunc quoque Scotorum esse tribus audio plane antiquas et ejus gentis proprias, quas illi Romano ritu post nomen, sexto, ut olim fiebat, casu efferre possint. at nos cognomen protinus majorum praenominibus et consanguinitatis appellationibus subjiciemus.

Sed hic saepe haerent titulorum scriptores, quos nempe Latinae litterae nihil juvare possunt. nam et ipsa non raro cognomina pingue quiddam et rusticum aut plane barbarum sonant; et ii saepe, quorum causa tituli scribendi sunt, ne unum quidem vel deni, vel addi litteram, aequo animo ferunt, vix tamen causa est, cur angantur, quum in veterum exemplis habeant, qua se auctoritate sustentent, si ea totidem aliquando litteris scripserint. barbara plane cognomina antiquae etiam inscriptiones habent, cujusmodi haec est (5):

SATELLIA · C · F ·  
VELIZZA

*Velitia* nunc quidam scribi maluissent, expuncto *Z* utroque: alii quaerendum fortasse

(1) in Vesp. c. 5. n. 10.  
(2) Epit. Sev. M. p. 157.

(3) Priscian. Gramm. l. 5. p. 651.  
Putsch. v. Fabr. p. 313. n. 380.

(4) ad Horat. Satyr. l. 1. serm. 3. v. 40.  
(5) Fabr. p. 645. n. 381.

censuissent, quae hujus vocabuli apud Celtas aut Illyricos significatio esset, quo id latine redderetur. sic aliquando qui *Cenfuegus* erat, appellatus est *Centumigneus*, *Rossii* vero *Rubei*, *Verdii* quoque *Virides*, et, quod prodigium est, *Torriglionii Tauroleones* facti sunt. id est nimirum, quod in malo historiae scriptore ridebat olim Lucianus (1) qui Atticae elegantiae esse putabat, Romana quoque cognomina graece reddere, ὡς Κρονιον μὲν Σατουρνιον λεγειν, Φροντιν δὲ τὸν Φροντωνα, Τιτανιον δὲ τὸν Τιτιανον, καὶ τ' ἀλλὰ πολλὰ γελοιότερα: atqui non hoc Graecis Romanae historiae scriptoribus arrisit, qui Latina cognomina iisdem semper litteris designant: *Ιουλιος Σακερδως*, non *Ιερευς* a Dione (2), *Νιγρος*, et *Σεβηρος* ab Herodiano (3) scribitur, non *Μελας* et *Σεμνος*: sic et ceterorum cognomina, ut latine appellabantur. itaque Tullius etiam, quum e Siculis, id est Graecis, Heracliensem quemdam Furium nominasset (4), adjecit, *nam habent illi nonnulla hujuscemodi Latina nomina*: adeo scilicet receptus mos erat, ne quid de cujusque appellatione immutarent.

Sed tamen hoc sibi Latini sumpserunt, ut cognomina aeque externa et propria declinarent, eaque de causa, quod nunc quidam aegre ferunt, litterulam illis in fine aut syllabam adderent, unde cognominis casus nosci possent. quod a Graecis etiam factum adnotans Varro (5), *nostra*, inquit, *nomina ut Persarum et ceterorum, quos vocant barbaros, cum casibus dicunt*: tum a Latinis haud aliter reddita tradit, quae Gallorum essent et ceterorum: *Nam dicunt*, inquit, *ab Alaco Alacus et sic alias*. enimvero si hominum auribus aut potius inscitiae aliquando indulgendum erit, quo cognomina integra maneat, hanc te rationem inire oportebit, ut Italicis, quae fere genitivum Latinorum casum imitantur, vocabulum praeponas aliquod, ut illa *Memoriae*, *Ciueribus*, *Honori*, *Magisterio*, *Duumviratu*, *Cura*, *Testamento* et hujusmodi, quae genitivum post se easum postulant. contra vero quum littera A cognomina terminantur, primo ea vel sexto casu efferenda erunt: quod quidem ei facile succedet, qui titulum scripturus, relictis communibus inscriptionibus, singularis sibi dictionis exempla proponat. sunt et cognomina, quae praepositione DE aucta ab antiquis cognominibus valde abeunt. quamquam affine eorum cognomen satis vetere in exemplo legitur apud Donium et Fabretum (6)(a):

OCTAVIO  
V · P · EX · MERCV  
RIALIBVS · IVLI  
A · FLORA · CON  
IVGI · INCOMPA  
RABILI

quam tu rationem imitabere, siquidem tibi, praepositione illa rejecta, eum diffiili homine ac moroso altereandum sit: cetera omnino rejicies, et cognomen veterum nominum more efferes: quippe idem plane est, exempli causa, si quis *Ex Ercolanis*, atque si *Ercolanus* esse dicatur.

Aequos porro viros et latine scientes naetus, unam illam cognominum efferendorum rationem sequere, ut quae Latina videri possint, iis nihil addas: quibus aliquid ad casus indicandos deest, ea tantum littera una, vel una, si opus est, syllaba augeas, quo nempe Latino aut Graeco etiam ritu declinentur: nam Graeca quoque cognomina in Latinis inscriptionibus passim reperiuntur, nec libertorum tantum propria, sed etiam ingenuorum.

(1) t. 4. edit. Bipont. p. 183. πὼς δὲ Ἰστοριῶν συγγραφεὺς: ut *Saturninum* quidem *Cronium* appellerent, *Frontonem* vero *Frontim*, *Titianumque* *Titanium*, et alia

magis multo ridicula.

(2) l. 59. p. 926. B.

(3) l. 2. c. 7. et 14.

(4) in Verr. l. 5. c. 43. n. 112.

(5) L. L. l. 7. c. 36.

(6) Don. Cl. S. n. 64. Fabr. p. 280. n. 177.

(a) Marinius Frat. Arv. p. 297. hanc inscriptionem aliter legit ac interpretatur,



Verum enimvero negant quidam e doctis, cognomina nostra, quum pro veterum nominibus usurpentur, aliter terminari nunc posse, quam ipsa olim familiarum nomina terminabantur: itaque extremas litteras tres omnino omnibus communes esse jubent: ut *Aelius*, *Caesius*, *Scribonius*: nam et antiquissimis temporibus, quum ejusdem gentis una etiamtum esset familia, nec gens a gente, nisi nomine, distingueretur, sic tum quoque appellabantur. at hi minime animadvertisse videntur, cognomina nostra, quaecumque tandem sint, Latinis externa esse atque barbara: quamobrem quum Latinorum lingua scribimus, ita haec nobis latine reddenda esse, quemadmodum externa illi et barbara latine olim reddiderint, qui si hoc dant, cur autem non dent? satis jam constare dico, Romana nos gentilium nomen lege non teneri. quid enim apud Latinos scriptores frequentius, quam cognomina peregrinorum diversa plane ratione scripta, quam tum Romae gentilia nomina scriberentur? Hamilcar a Cornelio Nepote cognomento *Barcas* dicitur, non *Barcius* (1), Asdrubal a Livio *Calvus*, non *Culvius* (2). sic apud Caesarem occurret (3) Italus homo appellatus *Vlcilles Hirus*, apud Tullium Siculi quidam his cognominibus, *Posides Matro* (4), *Artemo Climachias* (5), *Diocles Phimes* (6), *Eubulides Grosphus* (7), *Apollonius Geminus* (8), alique hujusmodi.

Quid si luculentis quoque inscriptionibus ostendo, externas familias, ne tum quidem, quum Latio aut civitate donatae essent, nomina sua omnes Romanorum more inflexisse? pergunt ne isti nihilo secius pro sententia pugnare sua? atqui exempla praesto sunt bene multa: ut apud Maffejum *M. Abenna M. F. Euphemus* (9), *T. Calvenus Peculiaris* (10); apud Fabretum *L. Nenolaus L. F. Crispus* (11), *C. Carrinas C. L. Philo* (12), alique non pauci: quod ab Hagembuchio etiam animadversum est (13): sed unum alterumve exemplum proferre integrum juvat (14):

DIS · MANIBVS  
C · CAEFRO · HERMETI  
PATRONO · BENEMERENT · ET  
CAEFRAE · MACEDONIAE  
LIBERTAE · EIVS  
C · CAEFER  
FECIT · ET · SIBI · ET · LIBERTIS · LIBERTA  
BVSQVE · POSTERISQVE · SVIS  
IN · FRONT · P · X · IN · AGR · P · X ·

addam epitaphio historicam inscriptionem, quae posita est anno Varr. DCCCCXXV. (15)

<p>Q · TERSINA · Q · F · SCAP · LVPVS FLOREN · MILES COH · XII · VRB · 7 · DEX TRI · GENIVM CENTVRIAE · CVM BASE · MARMOREA TESTAMENTO PONI · IVSSIT</p>	<p>POSITA · IDIB · APRIL · MAMERTINO · ET · RVFO COS ·</p>
--	--

nonne ambo hi cives Romani habendi sunt? quorum alter Patronus dicitur et libertos habuit, alter et tribum ciuitatis Scaptiam, et in Cohorte urbana miles fuit? neuter tamen Romano more nomen auxit, ille *Caefer*, hic *Tersina* nominatus.

(1) in Hamilc. c. 1.  
(2) l. 23. c. 27. n. 34.  
(3) B. C. l. 1. c. 8. n. 16.  
(4) l. 2. in Verr. c. 42. n. 102.  
(5) ibid. c. 52. n. 128.

(6) l. 3. in Verr. c. 40. n. 93.  
(7) ibid. c. 23. n. 56.  
(8) l. 5. in Verr. c. 7. n. 16.  
(9) M. V. p. 447. n. 6.  
(10) ibid. p. 290. n. 8.

(11) p. 633. n. 286.  
(12) p. 613. n. 108.  
(13) Ep. Ep. p. 227. etc.  
(14) Fabr. p. 611. n. 88.  
(15) Murat. p. 340. n. 1.

Quidni igitur fas idem est nobis, qui ne Latini quidem sumus, aut cur deformare cognomina cogimur, quo Romana videantur, quum ne Romani quidem eadem semper lege sua ipsi nomina extulerint? nec tamen repugnabo, si quis ea maxime cognomina, quae a nominibus orta videntur, in IVS desinere velit, scribendumque censeat *Faustinus, Marinius, Martinus* et hujusmodi: id nempe indicio erit, cognomina haec esse gentilia, quae nominibus propriis subjecta sint.

Illud contra vix a risu defendi potest, quum quidam priores cognominum litteras immutant, et Latinum se cognomen fecisse arbitrantur, quum *Blancum* appellantur, qui *Biancus* est, *Florumque*, qui *Fiorus*, et *Plattum*, qui *Piattus*: cur enim quae Latina illa magis sunt, quam haec; aut quid habet elegantiae insertum L, quod in I desideretur? sed eos tamen probabo, qui magnarum gentium cognomina sic cfferent, quemadmodum jamdiu clari scriptores latine usurparunt, esto longe aliter ab his prolata sint, quam vernacula nunc sonent lingua: cujusmodi sunt quaedam patrum Vene- torum cognomina, quae Romanum habent numerum, et genus eorum produnt. nempe auctoritatem consuetudo superavit, cui serviendum est: ipsa autem eorum cognominum celebritas facit, ne cui obscura nunc aut incerta esse possint.

Quia demum nonnullos aliquando invenies, qui gemino utantur cognomine, si utrumque fuerit adscribendum, has fuisse veterum formulas memineris: P · IVVENTIO HERODI · QVI · ET · MVNNAS (1), M · AVR · PRIMIGENIVS · QVI · ET · DRACONIVS (2), PARDO · QVAE · ET · HIARINE (3), VLPIAE · SIVE · AELIAE · AVG · L · (4) atque hunc morem ne Christiani quidem veteres aspernati sunt, postquam patrum superstitione deserta, ad sacra nostra accessissent, ut altero cognomine genus, altero professionem testarentur suam. itaque Simplicia illa, quae sub Diocletiano martyrium fecit, appellatur in epitaphio Σιμπλικια ἡ καὶ Καλονυμος (5), eodemque modo alii, ut jam Buonarrotus animadvertit. ceterum in honorariis aliquot inscriptionibus nec antiquissimis alterum e cognominibus initio vel potius extra inscriptionem ipsam incisum leges: ut in Fabretti exemplis quibusdam apparet (6): in aliis vero, quae item minus antiqua sunt, multa uni et nomina et cognomina alterum post alterum adscribuntur (7):

P · CAECILIO · ALLIENIO  
FAVSTO · MAXIMO  
SEVERIANO · C · V ·  
COS ·  
CAECILIUS · GAIUS  
IVN · ALVMNVS  
PATRONO  
INCONPARABILI

Si quando autem publicis, ut fit, operibus designandis nomen aliquod a cognominibus deducere opus erit, haec tibi regula esto, ut quae cognomina in VS desinant antecedente consonante, ab his derivata in INVS plerumque abcant: quae vero ante VS vocalem sumunt, ab iis semper in ANVS terminentur. nam id fere servat Tullius, cujus illa sunt, *Brutina consilia* (8), *partes Antiochinae* (9), *oratio Metellina* (10), *genus Theopompinum* (11): contra vero *Mariana quercus* (12), *Antonianaes leges* (13), *judex Cassianus* (14), *fortunaes Pompejanorum* (15). atque hac item ratione, si qua

(1) Fabr. p. 145. n. 169.

(2) id. p. 147. n. 179.

(3) id. p. 146. n. 178.

(4) id. p. 146. n. 176.

(5) Vetri p. 43.

(6) a p. 99. ad p. 102.

(7) Fabr. p. 205. n. 509.

(8) epist. 15. ad M. Brutum.

(9) l. 9. ep. 8. famil.

(10) l. 1. ep. 13. ad Attic.

(11) l. 2. ep. 6. ad Attic.

(12) l. 1. de leg. c. 1. n. 2.

(13) l. 12. ep. 14. famil.

(14) l. 3. in Verr. c. 60. n. 137.

(15) pro Sull. c. 21. n. 62.



forte cognomina ad tertiam declinationem pertinere volueris, ab his derivata efferri debent: nam et apud Tullium legitur *Caesariana celeritas* (1), *Catoniana familia* (2). eodemque modo quae ab illis orta cognominibus, quae exitus in A habent: ut a *Cinna Cinnanus* (3), a *Catilina Catilinanus* (4), quamquam Tullius *Catilinarius* habet (5). rarius illud, ut eodem modo possessiva nomina efferantur, tum etiam, quum a patris casibus originem ducunt, quorum I nulla vocalis praecedat littera: exempla tamen et hoc quaedam sustentant: namque a *Tertulli* est SC. *Tertullianum*, a *Philippi* Cohortes Praetoriae *Philippianae* (6), a *Germanici* Minister *Germanicianus* (7), jam et cognomen operibus idem aliquando impositum, quod eorum auctoribus esset, nulla accessione litterarum: sic *Via Trajana*, *Aqua Trajana* in Trajani nummis legitur, quemadmodum a gentili nomine dicta *Via Pompeja*, *Basilica Vlpia*, *Forum Aurelium*, *Porta Naevia* et hujusmodi.

Quod si a cognomine aliquo appellandi fuerint collegiorum sodales, eos quidem non male appposito denominaveris, quod in ANI desinat; sed fortasse rectius, si desinat in ALES. fuere utique antiquitus sodales quoque *Aureliani*, *Antoniniani*, *Severiani*, *Helviani*: sed ceteri a cognominibus aut praenominibus dicti *Augustales*, *Titiales*, *Trajanales*, *Hadrianales*, et hujusmodi: quin etiam a gentili nomine *Claudiales*, *Flaviales*. porro et spectacula eodem pacto appellare poteris, quemadmodum Iudi quidam dicti olim *Augustules*, *Florales*, *Consuales*, *Martiales*: sed alias quoque diversa plane ratione denominatos reperies, uti *Marcellae*, *Verrea*, *Neronia*.

Contra vero ipsi occurrent Augusti, qui cognomina a devictis gentibus sumpserint, quae sic derivata sunt: *Germanicus*, *Britannicus*, *Parthicus*, *Armeniacus* et hujusmodi, ut ea etiam, quae sibi veteres duces pepererant, *Creticus*, *Achaicus*, *Isauricus*, excipe Scipiones, qui *Africani* dicti sunt. enimvero controversia olim orta Mediolani (8) fertur, quum ad eam urbem Ferdinandus regis Hispaniarum Philippi frater venisset, utrum is *Austrius*, an *Austriacus* appellandus esset: nam in arcuum, quos excitant, titulis alii *Ferdinando Austrio*, alii vero *Austriaco* inscripserant. primum illud plerisque probatum est: quippe et ab *Italia Italos* homines nominari aiebant: sermonem autem *Italicum*, regnum *Italicum* dici, eodemque modo Imperium *Austriacum*. mihi tamen hoc alterum arridet magis: quod hoc jam quasi cognomine eorum Principum proprio uti solemus, non ut natale solum, sed ut principalem dignitatem designemus.

III. Nunc à diverticulo repetatur fabula. post cognomina veteres patriam enuntiabant, non omnibus quidem in titulis, sed in iis fere semper, qui domi propositi ad externos pertinerent (9); nisi forte de senatore Romano aut de femina clarissima ageretur, quorum scilicet patria aliis indiciis prodebatur. patriae porro indicandae non una ratio. saepe urbis nomen sexto casu adscribebant (10):

Q · MODIO · Q · F ·  
 POLLIA · AMO  
 MO · PARMA  
 MIL · COH · VIII · PR · 7 ·  
 NEPOTIS · MIL · AN ·  
 XVI · VIX · ANN ·  
 XXXIII · GAVIVS  
 SEVERVS · AMICVS  
 FECIT

(1) l. 16. ep. 10. ad Attic.

(2) l. 2. ep. 6. ad Q. Fr.

(3) Cor. Nep. in Att. n. 2.

(4) Plin. H. N. l. 2. c. 51. n. 52.

(5) Or. 2. in Cat. c. 10. n. 23.

(6) Maff. M. V. p. 325. n. 1.

(7) Grut. p. 602. n. 9.

(8) Boldon, Epigr. l. 2. p. 106.

(9) Maff. Art. Cr. Lap. p. 210.

(10) Maff. M. V. p. 123. n. 6.



nec alio modo loquutus aliquando C. Caesar (1), cujus haec sunt verba: *C. Felginatem Placentia, A. Gravium Puteolis, M. Sacrativirum Capua tribunos militum*. sed in lapidibus non raro urbis nomini praepositum videas *Domo*, ut Virgilius dixit *Qui Caerete Domo* (2): ita nempe municipium quisque suum appellabat, quod Roma, ut ait Modestinus (3), *communis patria* erat (4).

C · TVTILIO · HOSTILIANO  
PHILOSOPHO · STOICO  
DOMO · CORTONA  
PATRI · OPTIMO  
C · TVTILIVS · IVSTVS  
FILIVS  
TVTILIA · QVINTA  
TVTILIA · QVARTA  
FILIAE

Romae inventus hic titulus est via Labicana: nec ad militem pertinet, ut neque hic alter (5):

C · TILLIO · C · L · CELERI  
DOMO · CORTONA  
VI · VIR · AVGVSTALI  
LIBERTI · EIVS

hanc tamen formulam in militaribus tumulis saepius occurrere, non inficior: in quibus etiam, quia milites ab agris potissimum arcescebantur, ommissa municipii appellatione, regio aliquando aut provincia nominatur (6):

L · SYPERINIO  
SEVERO · NAT·  
PANN · (7) VIX · AN·  
XLV · MIL · A · XXV·  
III · NEPTVNO  
IVLIVS · VRSIO  
HER · BENEMER·  
P · C·

ceterum fallitur, qui *Natione adscriptum* putat pro *Gente* aut *Populo*: est enim pro *genere* aut *ortu*, perinde ac si scriberes, *Genere Pannonio*, vel *Nato in Pannonia*: itaque leges quoque *Natione Arretio* (8), et de tribu simul atque urbe, *Natione Ofentina Mediolanensi* (9): quumque tribui patria jungebatur, haec quoque cognomen praecedebat (10): sed nihil istud ad nos, qui tribum non habemus.

Hoc item pacto indicata patria est, *Natus Mevaniae* (11), *Oriundus Ggza* (12); rarius vero gentili nomine, *Saetabianus* (13), *Syracusanus* (14). deinde, quia alia quidam in urbe orti, in alia vivebant, ut apud Livium Tarquinius ille Priscus *Demarati Corinthii filius, incola ab Tarquiniis* (15), et apud Tullium Cato *ortu Tusculanus, civitate Romanus* (16); idcirco utrumque inscriptio interdum nos docet, quae loci patria, quae juris esset: exemplo sit, quam in Galliis Maffejus vidit (17):

C · TVLL · FLAMINIVS  
DECVRIONIS · FILIVS  
DOMO · CATINA · EX · PROVIN  
CIA · SICILIA · INCOLA · ANTI  
POLITANVS · SIBI · ET · S·

(1) B. C. l. 3. c. 21. n. 71.

(2) Aen. l. 10. v. 185.

(3) l. 53. D. ad Municip.

(4) Gor. Symb. Flor. t. 8. p. 14.

(5) Maff. M. V. p. 366. n. 1. v. Fabr.  
p. 406. n. 315. etc.

(6) Fabr. p. 365. n. 117.

(7) *Pannonio*.

(8) Dou. Cl. 6. n. 181.

(9) Vignol. in Select. p. 212.

(10) Fabr. p. 541. n. 518. etc.

(11) Dou. Cl. 6. n. 15.

(12) ibid. n. 168.

(13) Fabr. p. 178. n. 368.

(14) Inscr. Sicil. Cl. 12. n. 55.

(15) l. 4. c. 2. n. 3.

(16) de leg. l. 2. c. 2. n. 5.

(17) Ant. Gall. epist. 12.

et quia honori vertebatur, si quis non uno in municipio civitate donatus esset, multarum aliquando urbium cives esse quidam dicuntur: quod etsi Tullii aetate civi Romano fas non erat: quippe, ut ille ait, ex jure civili duarum civitatum nemo esse poterat (1); sub Augustis tamen ex ipsorum indulgentia licuisse, diserte ostendit Spanhemius (2), et Hispana item declarat inscriptio: quam Maffejus ideo fortasse e Gruteri volumine (3) expungendam duxerat (4), ut in Museum suum recepta (5), duarum jam civitatum esse desineret:

L · AELIVS · M · F · M · NEP · QVIR ·  
RECTVS · DOMO · ROMA  
QVI · ET · CARTHAGINENSIS ·  
ET · SICELITANVS · ET · ASSOTAN ·  
ET · LACEDAEMON · ET · ARGIVVS  
ET · BATESTANVS · SCRIBA  
QVAESTORIVS · SCRIBA · AEDI  
LICIVS · CIVIS · ADLECTVS  
OB · HONOREM · AEDILITATIS  
HOC · OPVS · TESTAMENTO · SVO  
FIERI · IVSSIT

Hic autem animadvertendum est, urbes nobis ex veterum praescripto sic esse designandas, ut quae ambiguae sunt, certis semper indiciis distinguantur. Tifernum exempli gratia, quia geminum erat, *Metaurense* et *Tiberinum*, nunquam sine apposito enunciatur (6):

D · M ·  
C · IVLIO · C · F · CLV · PROCVLO  
TIFERNIS · TIBERINIS  
MIL · COH · VII · PR · 7 · NEPO  
TIS · V · A · XXXVI · MIL ·  
A · XVI · TESTAMENTO  
FIERI · IVSSIT · CVRAVIT · FIERI  
C · IVLIVS · BARBARVS  
LIB · PATRONO · BENEMERENTI

sic quia multis olim urbibus *Antiochia* nomen fuit, idcirco leges in Grutero (7), C · VETTIO · C · F · COL · NIGRO · DOMO · ANTIOCHIA · SYRIA: quamquam provincia interdum adjecta est vel sine causa: nam quis olim ignorabat, Nemausum, exempli gratia, in Gallia Narbonensi sitam esse? utrumque tamen hoc in titulo legimus, et, quod rarum est, post gradus militares (8):

IOVI AVG ·  
M · CENSORIVS  
M · F · VOLTINIA  
CORNELIANVS · 7 · LEG ·  
X · FRETENSIS · PRAE  
FECTVS · COH · I ·  
HISP · EX · PROVINCIA  
NARBONE · DOMO  
NEMA · V · SOL · L · M ·

Pagos vero cognomines, nedum urbes (9), sic aliquando designarunt, ut alterum majorem, alterum minorem appellarent (10):

(1) pro Caec. c. 34. n. 100.

(2) ad Const. Anton. exerc. 1. c. 4.  
in fine.

(3) p. 174. n. 3.

(4) Art. Cr. L. 1. 3. c. 4. p. 300.

(5) p. 466. n. 15.

(6) Gor. Inscr. t. 2. p. 358.

(7) p. 567. n. 10.

(8) Maff. M. V. p. 446. n. 6.

(9) Murat. p. 582. n. 1.

(10) Oderic. Syll. p. 186.

GENIO  
 TI · CAESARIS  
 DIVI · AVGVSTI  
 FILII  
 AVGVSTI  
 C · FVLVIVS · CHRYSSES · MAG ·  
 PAGI · AMENTINI · MINOR ·  
 DONVM · DEDIT  
 V · K · IVN ·  
 L · CALPVRNIO · PISONE  
 M · CRASSO · FRVGI · COS ·

his fere modis patriam veteres adscribebant sive mortuis sive vivis; quam tamen, ut saepe in virorum, sic perraro in feminarum monumentis leges. quippe quae rarius apud externos honore affici, et rarius loco peregrino diem suum obire solent.

V. his, qui sacerdotio, aut magistratu extra patriam functi essent, aut honorem decurionatus adepti, municipium appositum esse, in quo haec gesta fuissent, jam adnotavimus. tum militibus praeter patriam, quae plerisque adscripta est, legionem etiam singulis aut cohortem centuriamque vel alam vel turmam vel trierem adjectam, in qua quisque meruisset, exempla passim declarant. quamquam non hoc omittendum, quia legiones et cohortes pleraeque stativa praesidia erant, quae imperii Romani fines tuebantur, idcirco id etiam adjectum esse, quia quaeque in provincia stativa castra haberet: quod his exhibet marmor nuper in agro Tibertino effossum:

M ·  
 CLAVDIO · TI · F ·  
 PAL · PAVLO  
 PRAEF · COH · I · THIRAC ·  
 IN · BRITANN ·  
 TRIB · LEG · XIII · GEM ·  
 IN · DACIA  
 SCRIB · AEDIL · CVR ·  
 CVRAT · CIRCEIENSIVM  
 P · FLAVIANVS · ET · PAVLIA  
 PAVLINA · PATRI  
 OPTIMO

Addo nunc ad operarios homines artificesque quod pertinet, patriae loco regionem urbis aut viam interdum indicari, ubi domus illis aut taberna erat (1):

C · VENNIVS · C · L ·  
 XANTHVS  
 CARPENTARIVS  
 A · VIC · III · ARAR ·

a *Vico* scilicet *trium ararum*, quem Rufus et Victor in prima urbis regione memorant. sic praeco quidam *Vibioninus* DE · REGIONE · PORT · CAPEN · fuisse dicitur (2), et *Livius* quidam *Auctus* PRAECO · DE · SVBVRA (3), et *C. Fufius Zmaraglus* MARGARITARIVS · DE · SACRA · VIA (4), et *Cn. Pompejus Phrixus* DOCTOR · LIBRARIVS · DE · SACRA · VIA (5): atque his quidem honoris causa adjectum id videtur, quo nempe constaret, artifices eos fuisse minime vulgares, quum in celeberrima via atque inter summos et elegantissimos totius urbis opifices tabernam haberent.

(1) Fabr. p. 718. n. 397.

(2) Grut. p. 626. n. 2.

(3) id. p. 625. n. 10.

(4) Reines. Cl. 11. n. 110.

(5) id. ibid. n. 123.



Porro locum aliquando vel sine praepositione indicarunt, ut hoc in exemplo (1):

T · FLAVIVS · T · LIBERTVS  
 PHILIP · VNGVENTARIVS  
 VIC · LOR · MIN ·  
 FECIT · ET · SIBI · ET · FLA  
 VIAE · SPERAT · FIL · SVAE

*Vico Loreti Minoris*, nam et alter fuit, cui nomen *Loretum Majus* (2), uterque in regione decima tertia. at binae contra praepositiones alias adhibitae, ut apud Reinesium (3), *C. Iulius Epaphra* POMAR · DE · CIRCO · MAXIMO · ANTE · PVLVINAR (4).

VI. Restat, ut de consanguinitatis atque aevitatis appellationibus aliquid dicamus. saepe enim nominibus apposita jungi ea debent, quibus propinquitas designetur, aut duorum aetas inter se conferatur. mitto hic matronas, de quibus jam monui libro primo (5), vix eas cieri unquam, quin post nomen earum vir etiam patrio casu appelletur. mitto et *Nepotes*, quo nomine qui olim significati sint, ibidem dixi (6). *Illud notandum est*, inquit Paullus jurisconsultus (7), *non, quemadmodum patris matrisque fratres et sorores patrui, amitae, avunculi, materterae dicuntur, ita fratris sororisque filios filias nomen speciale cognationis habere: sed ita demonstrari, fratris sororisque filios filias. vides igitur, quam temere quidam hos compellent Nepotes: quibus sane antiqui etiam tituli adversantur* (8):

IMBRASVS  
 V · A · XX ·  
 TI · CLAVDIVS · IASVS  
 ERATI · L ·  
 FRATRIS · F · DONAVIT

(9)

ACVIA · POLLA · SO  
 RORIS · FILIAE  
 BENEMERENTI  
 FECIT · MARCIAE  
 BASSILLAE · VIXIT  
 ANNIS · XII ·

eodemque modo apud Reinesium (10) legimus, *Sororis Filiis*, non *Nepotibus*. jam quae viri sui soror esset, eam *Glorem* uxor appellabat, fratremque viri *Levirum* (11). at viri frater uxorem ejus non *Cognatam*, sed *Fratris Vxorem* dicebat (12): ut soror uxoris virum hujus *Sororis Virum*: quamquam hic aliquando et *Sororius* dictus est, etiam ab uxoris fratre (13).

At quo, inquires, nomine patrui aut avunculi mei uxorem appellem? nullum huic fuisse Latinum nomen satis indicat Tullius, qui ne materterae quidem virum, nisi proprio nomine designavit, quum alios simul consanguinitatis appellationibus nominaret: ait enim: *Quod de Crasso pater, et Aculeo, quocum erat nostra matertera, quem Crassus dilexit ex omnibus plurimum, et patruus, qui cum Antonio in Ciliciam profectus* . . . . . (14) atque hunc ipsum C. Aculeonem materterae suae virum paullo

(1) Don. Cl. 7. n. 29.

(2) Grut. p. 134. n. 1. et 250. scr. 3.

(3) Cl. 11. n. 79.

(4) v. inser. 123.

(5) ad inser. 52.

(6) ad inser. 177.

(7) l. 10. D. de grad. et adfin.

(8) Bianchini. Inscr. sep. c. 5. p. 69. n. 11.

(9) Fabr. p. 597. n. 5. v. et Grut. p. 845. n. 1.

(10) Cl. 6. n. 103.

(11) Modest. l. 4. D. de grad. et adfin.

(12) Fabr. p. 755. n. 610.

(13) Reines. Cl. 16. n. 6.

(14) de orat. l. 2. c. 1. n. 2.

ante *propinquum* tantum suum appellaverat. porro ut *Matertera* matris meae soror est, sic *Amita* patris. *Patruales* et *Consobrini* notae appellationes sunt: *Sobrinus* autem dicitur, qui ex patris mei consobrino natus est. quid si epitaphium ei posuerim, qui ex sorore patris mei natus sit, quo eum nomine propinquum meum esse declarem? *Amitinos Amitinas* dici, ait Cajus (1), *qui quaeve ex fratre et sorore propagantur*: itaque inseribam *Amitino*. qui autem patre meo et noverca natus est, is a me *Frater Consanguineus* appellabitur: quique matre mea et vitrico natus sit, *Frater Vterinus* (2). at vitricus in antiquis epitaphiis non raro *Patraster* dictus est (3), et privignus *Filiaster* (4): non haec tamen prisca nominibus praeferenda videntur. ceteras huiusmodi appellationes, si quando tibi opus erit, Digestorum titulus suppeditabit (5), qui est *De gradibus et adfinibus et nominibus eorum*.

Denique ad discrimen personarum haec faciunt: primum si patrem a filio nomina non distinguerent, expeditissimum olim visum est sic efferre (6):

M · NONIO · M · F · BALBO

PATRI

D ·

D ·

(7)

L · HOSTILIO · L · F · AEM · TVLLO

FIL ·

DECVR · VRBE

SALVIA

vel etiam filius *Iunior* dicebatur (8), et pater *Senior* (9):

LVCCEIO · ALEXAN

DRO · PATRI · LVCCEII

ALEXANDER · IVN ·

ET · AGAPE · ET · FELIX

FILI · B · M ·

FECERVNT

APP · MADIO · EV

DAEMONI · SENIO

RI · APP · MADIVS

EVDAEMON · FIL ·

ET · MADIA · ZOE

COIVGI · B · M ·

FECERVNT

interdum vero alter *Major* appellatus, et alter *Minor* (10): quamquam fratres saepius et libertos appellatione huiusmodi distinctos esse reperias (11): tum eos quoque nonnumquam, qui ob nominis similitudinem decipere possent, nulla licet necessitudine conjuncti essent: ecce enim duo Iulii alter e tribu Quirina, alter e Voltinia, e quibus secundus *Minor* dicitur (12):

(1) L. 1. D. de grad. et adfin.

(2) Cajus l. 2. instit. tit. 8. l. 21. C. de excus. tutor.

(3) Maff. M. V. p. 360. n. 7. etc.

(4) ibid. p. 319. n. 2. etc.

(5) lib. 38. tit. 10.

(6) Gor. Symb. Fl. t. 1. p. 104.

(7) Don. Cl. 5. n. 116.

(8) Fabr. p. 370. n. 138.

(9) id. p. 30. n. 139. Reines. Cl. 5. n. 23.

(10) Vit. Inscr. Ben. Cl. 4. n. 31. Fabr. p. 370. n. 143.

(11) Don. Cl. 9. n. 3. Fabr. p. 371. n. 147. Reines. Cl. 15. n. 25.

(12) Don. Cl. 6. n. 179.

DIS · MANIBVS  
 C · IVLIO · C · F · QVIR ·  
 IANVARIO  
 7 · COH · IX · VRBAN ·  
 C · IVLIVS · C · F · VOL ·  
 IANVARIVS  
 MINOR  
 7 · COH · VII · PRAET ·  
 FECIT · ET · SIBI  
 ET · SVIS · LIBER ·  
 IN · FR · P · XIS · IN · AG · P · XIIXS ·

quod si viros duos cognomines eodem casu efferrent, tum vero hanc aetatis notam utri-  
 que veteres adscribebant (1):

L · ANNIO · L · L · DIPHILO · MAIORI  
 L · ANNIO · L · L · DIPHILO · MINORI  
 L · ANNIVS · DIOMEDES · LIBERTEIS

Contra si plures diversis cognominibus, quae jam a Flaviorum temporibus fratres  
 distinguere solebant (2), uno in titulo enunciandi essent, usu olim receptum erat, ut  
 omissis praenominibus, commune nomen plurali numero scriberetur (3):

CONCORDIAE  
 AVG · SACR ·  
 RAEDONII · VIC  
 TORINVS · TERTIVS  
 ET · INGENVVS  
 FRATRES · ARAM  
 CVM · SIGNO · EX  
 VOTO · POSVERVNT  
 L · L · M ·

sic apud Donium leges (4), LACERIS · FAVSTINAE · PAVLINAE · SATVRNINAE · SORORIBVS · SAN-  
 CTIS: at ubi duo tantum ciendi essent, numerum non semel additum vidi (5):

VOLVMNI · DVO  
 VERVS · ET · SEVERVS  
 DIANAE · INVICTAE  
 D · D ·

Haec sunt, quae de tota inscriptionum nomenclatura mihi perstringenda esse visa  
 sunt, quo ea etiam plana fierent, in quibus multi saepe nonnihil offenderunt.

(1) Fabr. p. 371. n. 147.

(2) Bimard. Remarq. sur la sc. des  
 Medaill. t. 2. p. 318.

(3) Maff. M. V. p. 380. n. 6.

(4) Cl. 7. n. 38.

(5) Spon. sect. 3. p. 73. Fabr. p. 615.  
 n. 128. etc. Don. Cl. 2. n. 26.



## CAPVT II.

*De rerum delectu et dignitate inscriptionum*

I. **Q**uamquam argumentum inscriptioni ab iis fere praescribatur, quorum res agitur; non ea tamen definire etiam solent, quae omnino comprehendere velint. vel si qui multa proponunt aut petunt, non adeo difficiles sunt, ut scriptoris auctoritati nunquam adquiescant. quare non inutile erit, si quid etiam de rerum delectu dicetur, unde maxime inscriptiones dignitate afficiuntur.

Perraro sane continget, ut inscriptionem exordienti non multa occurrant, quae iis si conferas, quae praeis in exemplis legimus, partim humilia, partim levia atque exigua videantur. neque enim semper rerum magnitudine et dignitate certare possumus. sed tamen Romanos illos veteres multo quisque facilius verbis, quam rebus acquaverit. neque id tibi difficile erit, siquidem, quae dignitatem inscriptioni eripere possint, prudens relinquant. templum, puta, a solo excitatum exaedificatumque sit: ridicule quis Vitruvium compilet, ut singulas templi enumeret partes. M. Agrippa, tanta illa Panthei mole exstructa, non ejus nomen inscripsit, non tholi, non porticus, non columnarum mentionem fecit, id unum professus, *Se Fecisse*: quippe cetera quisque videndo nosse poterat. nec vero multo plura inscribenda erunt, si templum alter inchoaverit, alter perfecit: nam opera et sumptus utriusque satis est, si in rationum tabulas referantur. ecce tibi ex hoc genere vetus inscriptio, eaque dictionis prope singularis, sed quae tamen leve nihil aut inutile refert (1):

FORTVNAE : FANVM

AB · C · VIBIO · VÁRO · PATRE · INCHOATVM

Q · CAESIVS · MACRINVS · PERFECIT · ET · DEDICAVIT

atque huic persimilis altera, *Histriae Fanum* iisdem auctoribus constitutum (2) declarans. si quid tamen memoria dignum ad ipsam templi exstructionem pertineat, ut si ob Principis salutem aedificatum fuerit, aut ab eo solum operi adtributum sit, non erunt haec tibi praetermittenda: quum non modo a Principis nomine decus aliquod inscriptioni accedat, sed etiam ipsa narratio, insigni operis causa prolata, quasi complementum habere videatur (3).

Statuas autem in templis positas, bases, columnas, gradus et huiusmodi recte in titulo quis enumeret, quum haec veteri operi adjecta fuerint, nec in templi fronte inscriptio legi debeat: quamquam ne haec quidem ab artificio commendanda aut poetarum more appositis illustribus distinguenda sunt. id scilicet unum docendi sunt posteri, quae res et ejus sumptu aut opera restituta aut dedicata sit; de pulchritudine, de symmetria, de pretio per se ipsi judicabunt.

Iam eundem in operum publicorum inscriptionibus servari modum videas: in quibus quid factum sit, nullo adjunctorum inutilium apparatu ornatuque enunciat. ceteris id genus exemplis adde hoc e lapide descriptum, qui olim in agro Reatino prope Cutillas repertus est (4):

(1) Maff. M. V. p. 85. n. 4.

(3) v. inser. 15. et 250.

(4) Fabr. p. 400. n. 292.

(2) id. p. 83. n. 2.

IMP · CAES · DIVI  
 NERVAE · F · NER  
 VA · TRAIANVS  
 AVG · GERMAN ·  
 DACIVS · FONTIF ·  
 MAXIMVS · TRIB ·  
 POTESTATE · XV · IMP ·  
 VI · COS · V · P · P · SVB  
 STRVCTIONEM · CON  
 TRA · LABEM · MONTIS  
 FECIT

nec ita paucae numero sunt, quae ne nomen quidem operis referant, ne dum partium singularum: in oculis enim erat ipsa moles, de qua inscriptio loquebatur. atque ea fere, quae omnium aedificiorum propria sunt, sine quibus attolli moles non solent, omit-tenda item veteres putaverunt: satis nimirum haec quoque in ipso opere eminebant. eodemque modo quae restituta essent, generatim ac sine fuce explicare soliti: ut mi-nime ad veterum normam directae eae sint inscriptiones, in quibus de singulis restituti operis molitionibus mentio sit: ut si in aquaeductu refecto inscribas, *Piscinas linu-arias purgatas esse, aquae libramentum restitutum*, et alia huiusmodi, quae in du-ctuum restitutione fieri necesse est: esto, nihil titulus referat non ex Frontini penu de-promptum; ea tamen referat, quae antiqui minuta nimis atque inutilia ducebant.

II. Quid de ipsa operis causa sive ratione dicam, in qua explicanda plerique di-ligentiores, quam opus sit, reperiuntur? quippe inscriptio jam nulla sit, in qua quid conditores spectarint aut spectasse videantur, multis verbis enunciarı non soleat, quod apud veteres contra fuit: id enim primum in privatorum potius, quam in Principum titulis proferendum putaverunt; tum eam fere causam tantummodo indicarunt, cujus nullum in ipsis operibus indicium esset: ut quum adscribebant, opus *In Honorem Imp. Caesaris* exstructum esse, aut signum *Ob Honorem Quinquennalıtatis* dictum, quod si et statuas ad aedificii publici *ornatum* et *celebritatem* positas aliquando addiderunt, eo id consilio factum apparet, ut significarent, eas publicum in locum non ex testa-mento, aut gratiae referendae causa, sed sponte a se, et quodam publicae dignıtatis studio inlatas esse: quorum sane consilium sola inscriptione indicari poterat. causam autem rationemque operis publici, quam quisque, rem oculis usurpando, assequi pos-set, nemo tum attingebat: itaque neque aquam humanos in usus adductam, neque pontes ad flumina transmittenda factos, neque portus navibus recipiendis apertos quis-quam adnotavit. Princeps vero, quod magna cum semper ac publica spectare par erat, nec eorum, quae gereret faceretque, rationem populo reddere, satis decorum videba-tur, ne penitiores quidem causas declarabat; ac nisi novam insignemque plabe ratio-nem sequutus esset, nihil omnino de consilio suo unquam addebat. multo illud minus cuiquam curae fuit, ut indicaret, quod nunc fit, iis se operibus *Rei Publicae Consu-luisse*, aut *Utilitati Publicae Prospexisse*: quae nunc quum leguntur, rogare, opinor, quis possit, inventi ne unquam Principes sint, qui in perniciem exitiumque civium a-quas adduxerint, aut vias munierint, aut flumina pontibus iunxerint? nihil profecto si-mile antiquis in exemplis legi, quum in his passim muri, turres, portae factae aut re-stitutae occurrant, et emporia, porticus, atria exstructa, et aquae adductae aut redu-ctae, et viae silicibus stratae, et elivi in planitiem redacti, et pontes fluviis impositi, aliaque huiusmodi, unde magnus fere utilıtatis fructus in cives omnes redundabat.

Sed tamen haec ipsa honorariis inserta inscriptionibus nemo iure reprehendet: quae sane veteres etiam addiderunt. ad Anconis portum in arcu, quem senatus Trajano di-

cavit, diserte scriptum est (1), *Quod Accessum Italiae Hoc Etiam Addito Ex Pecunia Sua Portu Tutiozem Navigantibus Reddiderit*: et in basi statuæ, quæ Trajano item posita est ob Circum Maximum restitutum ampliatumque, hæc leges (2), *Quod Liberalitate Optimi Principis Commoda Earum* (Tribuum xxxv.) *Etiam Locorum Adiectione Ampliata Sint*. nimirum in hujus generis inscriptionibus, quæ senatus et civium nomine ponebantur, non levis erat causa, cur beneficia Principis magnifica potius, quam simplici oratione explicarent: sic enim non modo beneficii magnitudo, sed etiam grata voluntas civium magis elucebat.

Quamquam ea quoque ratio interdum probata, ut beneficium Principis appposito potius, quam narratione celebrarent: in quo dignitatis aliquando plurimum esse potest. inest enim Latinis quibusdam in verbis vis plane singularis ad significationem rerum maximarum: cujusmodi illa sunt RESTITVTORI • AEDIVM • SACRARVM, LOCVPLETATORI • CIVIVM, PROPAGATORI • ORBIS • TERRARVM, PATRI • EXERCITIVVM, ADSECTORI • LIBERTATIS et id genus alia. itaque melius aliquando beneficii magnitudinem titulo hujusmodi brevissimo, quam vel longa oratione assequare: praesertim si locus ipse atque opus, in quo inscriptio legenda sit, aliquid praeterea exhibeant, unde hospites quoque cetera intelligere ac cognoscere facile possint. quamobrem, quum audio, consilium esse earum civitatum, quæ agrum Pomptinum attingunt, ut, quoniam *PI • VI • PONT • MAX* providentia exsiccatis paludibus, multa in singulas commoda derivata sunt, fornitem in ipsa via Appia Trajana aere communi constituent ad ejus beneficii memoriam sempiternam; soleo mecum de inscriptione cogitare, quæ tanto monumento convenire maxime videatur. ac primum hoc mihi fingo, in summo illo fornice statuam Optimi Principis stare, atque hinc Amasenum inde Vfontem ad pedes jacere, urnis invicem conversis: tum ad arcus latera urbium earum simulacra addita, quemadmodum in statuæ basi fuisse diximus (3), quæ Romæ Tiberio a Civitatibus Asiae dedicata est. jam inscriptio, quæ praeclaro illi arcui congruat, hisce aut similibus concludi verbis posse mihi videtur:

PIO • VI • OPTIMO • FELICI • AVGVSTO  
PONTIFICI • MAXIMO • PATRI • PATRIAE  
VELITERNI • SVLMONENSES • SETINI  
PRIVERNATES • TARRACINENSES  
PROPAGATORI • AGRORVM

nam aquarum quidem in eo olim tractu stagnantium memoriam quæ unquam vetustas delebit? cetera vero viatores, quicumque per Appiam conmeabunt, oculis ipsi suis dispicient, mirabuntur, ii etiam, qui nihil ex iis viderint, quæ poëtae, oratores, historici de tanto opere vel scripserint vel scripturi sint.

Verum apposis hujusmodi non ubique nobis utendum est: quemadmodum et veteres, quæ magnis rebus convenirent, non eadem et parvis recte aptari putaverunt. hæc certe formulae in honorariis Decurionum municipalium titulis vix apparent. beneficia quidem ipsa commemorarunt (4), ob quæ honos habitus esset; at simplici plerumque enunciatione exposuerunt, siquidem nec multa numero, et magna pretio viderentur. minuta vero et levia, ea sic fere designata: *Ob Munificentiam Ejus, Ob Merita, Patrono Municipii, Praesidi Optimo* et similia, quæ plus aliquid tamen significabant, quam quod ipsorum, ut opinor, beneficiorum enumeratione indicari aliquando potuisset.

Eodem saepe modo auctores sepulcrorum defuncti virtutes et accepta ab eo bene-

(1) v. inser. 92.  
(2) v. inser. 90.

(3) v. inser. 428.

(4) v. inser. 106. 107. 108. etc.



ficia enunciarunt: leges enim *Optimae Et Sanctae Patronae De Se Benemeritae, Patrono Indulgentissimo, Patrono Benemerenti Pientissimo, Parentibus In Exemplum Piissimis, Patri Incomparabili, Matri Piissimae Et Indulgentissimae* et quae sunt hujusmodi. si quando exigua quaedam et levia nominatim expressa offendes, ea ad feminas fere atque pueros pertinere videbis (1)? nam in virorum illustrium monumentis si qua narratio instituitur, nihil ea nisi praeclarum continere solet. atque id multo magis in ellogiis servatum est: qua de re satis partitione superiore jam egimus.

In constitutionibus autem publicis nullus rejectioni locus esse videtur: quae enim constituta aut praescripta fuerint, ea antiquis, quantum fas est, formulis singula effe-  
renda sunt. ceterum ex eo ornatu, qui nunc quibusdam probatur, nisi multa praeci-  
deris, elegantiam facilius privati scriptoris, quam priscam magistratuum referas dignita-  
tem. excipe enim edicta quaedam et decreta nonnulla municipalia, in quibus uberem  
dicendi rationem veteres sequuti sunt: in reliquis ambitu verborum usu contraeto et  
breui, et rerum delectu satis exquisito atque parco. leges ipsae, etsi multa fieri iubent  
aut vetant; tamen quum brevi plane exordio et brevi ornantur sanctione, tum nihil ha-  
bent alienum, nihil inutile, nihil inflatum ac tumens. ad summam nihil antiquis in e-  
xemplis eninet magis, quam parsimonia quaedam et modus.

III. Ne illud quidem in qualibet inscriptione postremum haberi debet, ut veritate  
nitamur. actum erit apud aequales nostros de dignitate inscriptionis, si asseutari cui-  
quam aut posteros fallere videamur. quis enim non stomachetur, et cum irrisione titu-  
lum non legat illum, in quo multa falso memoriae prodi et impudenti mendacio prae-  
dicari videat? ac turpissimum sane est, quae laus recte factis debetur, eam inertiae  
tribuere: ingenioque et litteris ad ambitiosorum arbitrium abuti, quibus una nobis com-  
mendanda virtus est. nec vero eorum tantum auctoritas imminuitur, qui laudis prae-  
conium indignis hominibus impertiuntur; sed horum etiam existimationi multum de-  
trahitur, ac plus saepe, quam meruerint: facit enim indignatio, ut quum aliquid certo  
falsum deprehendimus, cetera etiam ficta credamus. vides ne, ut Tullius Stalemm il-  
lum irriserit, qui in statu auro, quas ad Iuturnae posuisset, subscripserat (2), *Re-  
ges Ab Se In Gratiam Esse Reductos*? ut Verrem idem exagitarit, quod et in Si-  
cilia et Romae in basi statuarum ejus maximis litteris incisum esset, *A Communi Si-  
ciliae Datas* (3)? multo vero graviora sunt Plinii minoris verba (4), ubi monumentum  
Pallantis liberti via Tiburtina intra primum lapidem se adnotasse refert, sic inscriptum:

HVIC · SENATVS · OB · FIDEM · PIETATEMQ ·  
ERGA · PATRONOS  
ORNAMENTA · PRAETORIA · DECREVIT  
ET · II · S · CENTIES · QVINQVAGIES  
CVIVS · HONORE · CONTENTVS · FVIT

in quae subinde vehementer invectus, demum *ridere*, inquit, *satius* est, *ne se ma-  
gnum aliquod adeptos putent, qui huc felicitate perveniunt, ut rideantur*: qui etiam  
non minus graviter de senatus consultis questus est, quae de his rebus facta, in aere  
incisa, et ad statuam loricatam *Divi Iulii* fixa fuerant. haec enim scripsit ad Monta-  
num (5): *Parum visum tantorum dedecorum esse curiam testem: delectus est cele-  
berrimus locus, in quo legenda praesentibus, legenda futuris proderentur: placuit  
aere signari omnes honores fastidiosissimi mancipii: quosque repudiasset, quosque,  
quantum ad decernentes pertinet, gessisset: incisa et insculpta sunt publicis aeter-*

(1) v. inscr. 166. 17c. 193. etc.  
(2) pro Cluent, c. 36. n. 101.

(3) l. 2. in Verr. c. 63. n. 154.  
(4) l. 7. ep. 29.

(5) l. 8. ep. 6.

*nisque monumentis praetoria ornamenta Pallantis sic, quasi foedera antiqua, sic, quasi sacratae leges. tanta Principis, tanta senatus, tanta Pallantis ipsius, quid dicam, nescio, ut vellent in oculis omnium figi Pallas insolentiam suam, patientiam Caesar, humilitatem senatus.*

Liquet igitur non Pallanti, non senatui, non ipsi Imp. Claudio honori fuisse, quod aut ille ambitiose concupierat, aut hi cum adsentatione tribuerant; de quibus quum tam severe a posteris iudicatum sit, quid putemus sensisse aequales eorum temporum, qui liberti illius animos etiam et supercilium ferre deberent? at quidam fortasse ex iis, qui ad adsentationem eruditi sunt, illud opponunt, titulis nempe omnibus, sive adulator eos sive laudator confecerit, suam semper manere dignitatem: quum haec non a rerum potius veritate, quam a splendore verborum ac stilo pendeat. id vero si ita esse velint, jam et si quis templum aliquod aut fornicem e tabulis telisque bene pictis constructum, in titulo marmoreum vocet, columnasque solidas et simulacra ipsa Pario e lapide esse dicat; is etiam tituli dignitati consuluisse videbitur: nisi forte obesse hoc magis putes, si quis falsa per jocum scripsisse, quam si ficta serio et graviter pronunciasse videatur.

Hic certe de iis titulis agimus, qui non in libris, sed in basibus statuarum, in operum publicorum frontibus, in columnis, in sepulcris legendi sunt; qui de iis rebus loqui debent, quibus inhaerent, et circa eos versari, quorum causa inscripti sint. itaque fac esse Latinos totos et elegantes, ac nihil, si vis, ab iis dissimiles, qui Augusti aetate conditi fuerunt; nisi vera referant, et viris rebusque, de quibus agitur, convenientia, adeo dignitate careant, ut ludibrio habeantur.

Porro illud quoque ad inscriptionum dignitatem pertinet, ut cum orationis veritate certa etiam honestatis modestiaeque significatio conjungatur. cave, quidquam tibi excidat, unde quisquam possit offendi. non is, quem laudas, ex invidia alterius crescere debet, sed ex propria virtute. hoc vero num te recipere par est, qui titulos scribis, ut ceteros cives tuos aliqua suspicione perstringas, quo unius praeclarum facinus immortalitati commendes? quantum huic ipsi detraheres, quem ornas? difficile quidem est neminem laedere, si quem, ut fit, laudare debeas, qui sibi ab inimicorum victoria laudem peperit: sed major quoque gloria, si effeceris: efficies autem, si neque tuis unquam, neque alienis cupiditatibus servire, ut virum decet, in animum induxeris.

Religio in primis ac morum disciplina sancta ubique atque inviolata esse debet: qua in re peccatum aliquando ab antiquis est. Sardanapalum illum Assyriorum ultimum regem auctor est Tullius (1), sibi in busto sententiam incidi jussisse hujusmodi:

*Haec habeo, quae edi, quaeque exsaturata libido*

*Hausit: at illa jacent multa et praeclara relictæ.*

cui similis sententia in sepulchrali cippo legitur, qui Romae Gorii aetate inventus est (2),

D · M ·  
T · FLAVIVS ·  
MARTIALIS · HIC  
SITVS · EST · QVOD · EDI  
BIBI · MECVM · HABEO  
QVOD · RELIQVI  
PERDIDI  
IN · FR · P · VIII ·  
.....

o praeclarum epitaphium, quod in Iutulentæ suis tumulo inscribi possit?

(1) Tusculan. I, 5, c. 35, n. 101.

(2) in praef. ad Don. p. 78, n. 2.

mI. Quod reliquum est, veteres in titulis fere omnibus serio loquuti. Ius quosdam apud Petronium invenies, quos Reinesius inscriptionibus suis adnumeravit (1). sed titulos illos nusquam lapidibus aut aereis incisos tabulis esse, manifestum est. epitaphia tamen occurrent aliqua antiquis in cippis inscripta, quae jocularia quidem sunt, sed fere inepta, nec sine mendis: ut C. illius Massellii apud Donium (2) titulus familiaris, cujus haec sunt extrema verba: *C. Massellius Venustus Merentibus Suis Fecit, Vivet Annis LXXX. Et Posterisq. Meoru.* at haec nunquam exemplis accensenda putavi.

Quasdam vero propositas aliquando inscriptiones accepimus, quibus potentiores carperentur: ut quum L. Bruti statuac quidam Caesari infensus subscripsit, *Vitium Viveres* (3): et statuac ipsius Caesaris,

BRUTVS • QVIA • REGES • EIECIT  
CONSVL • PRIMVS • FACTVS • EST  
HIC • QVIA • CONSVLES • EIECIT  
REX • POSTREMO • FACTVS • EST

sed neque haec neque alia hujusmodi ad nos pertinent: neque enim aut incisa, ut cetera, aut justa aliqua de caussa proposita sunt. quod autem quidam nummi effigiem habcant Gallieni cum inscriptione GALLIENAE • AVGUSTAE, et in aversa fronte VBIQVE • PAX, quidam etiam Saloninae sint hoc titulo, AVG • IN • PACE (4): eos nummos Vaillantius a tyranno aliquo et hoste in eorum Indibrium cusos esse arbitrabatur. senatus nempe, si quem hostem judicasset, hoc decernere solebat, ut nomen ejus ex omnibus monumentis deleteretur, quod multis adhuc in marmoribus factum apparet: tradiditque de Domitiani monumentis Svetonius (5), de Commodi Lampridius (6), de Maximini Capitolinus (7). quamquam et luto tantum inquinatos interdum titulos, auctor est Lampridius, qui de Antonino Heliogabalo in Alexandrum Caesarem furente haec habet (8): *Misit, qui in castris statuarum ejus titulos luto teherent, ut fieri solet de tyrannis.* verum inscriptiones decreto aut consensu senatus ad ullius infamiam propositas incisasque aut numquam exstitisse, aut certe nusquam exstare puto: nisi forte hujus habenda generis est, quae in arcu Gallieni legitur, in qua hujus virtus invicta dicitur, quum eodem Imperatore triginta tyranni exstiterint (9); ipsa autem virtus pietate superata esse perhibetur, quum idem ille de patre Valeriano a Persis redimendo, ne admonitus quidem, numquam cogitarit (10). ut ut res se habet, ecce ipsum titulum (11):

GALLIENO • CLEMENTISSIMO  
PRINCIPI • CIVIS • INVICTA • VIRTVS  
SOLA • PIETATE • SVPERATA • EST  
ET • SALONINAE • SANCTISSIMAE • AVG •  
M • AVRELIYS • VICTOR  
DEDICATISSIMVS  
NVMINI • MAIESTATIQUE • EORVM

hunc quidam titulum, quod miror, tamquam pulcherrimum exemplum imitati hac actate sunt: imitatus etiam e majoribus est, qui Clementis VII • PONT • MAX • epitaphium scripsit (12). sed mihi tamen haud liquet, quae nam laus sit, *invictam virtutem sola*

(1) Cl. 4. n. 14. Cl. 7. n. 34. 35. etc.

(2) Cl. 11. n. 30.

(3) Svet. in Iul. c. 80. n. 6. et in Aug. c. 70. in Ner. c. 45. etc.

(4) Vaill. t. 2. p. 369. et 375.

(5) in Dom. c. 23. n. 2.

(6) in Comm. c. 20.

(7) in Gord. c. 9. v. Livium l. 31. c. 30. n. 44.

(8) in Hel. c. 13.

(9) Trebell. in Gallien. c. 16.

(10) id. ib. c. 9.

(11) Donat. de V. R. l. 3. c. 10.

(12) Sweert. in Delic. p. 21.



*pietate superatam esse*: neque enim id melius atque praestantius erat, quam si ejus, qui virtute (1) in bellis excelleret, non pietas solum, sed justitia etiam et fortitudo et prudentia et temperantia major exstitisset. nam quod Virgilius de Hectore et Aenea scripserit (2),

*Ambo animis, ambo insignes praestantibus armis,*

*Hic pietate prior:*

virum ille cum viro contulit, Aeneamque Hectori pietate anteposuit, non reliquas ejus virtutes pietate minores fecit.

(1) v. inscr. 402.

(2) Aen. l. II. v. 292.

## CAPVT III.

*De mensura inscriptionum*

I. **R**idicule quidam Aristoteli praecipere visi sunt, narrationem brevem esse oportere (1): *Νυν δε γελοιως την διηγησιν φασι δειν ειναι ταχειαν*: in quos belle quadrare aiebat, quod olim pistori dictum est, cui quidam roganti, duriusne an mollius subigi sibi panem mallet, num vero, inquit, bene haud licet? itaque narrationem Aristoteles neque brevem neque longam, sed justam esse volebat: *Ουδε γαρ ενταυθα εστι το ευ, η τω ταχυ η τω συντομως, αλλα τω μετριοις*. huiusmodi autem esse tradit, quae primum omnia profert, quibus illustrari res possit: *τουτο δ' εστι το λεγειν, οσα δηλωσει το πραγμα*: deinde *οσα ηδεα*, quae iucunda sint: mitto cetera: vides, opinor, quam ista inscriptionibus conveniant: quae quamquam ad suum quaeque genus revocantur, vix tamen aliud quam narrationes dici possunt. hunc ego modum in inscriptione requiro, ut iusta sit; eamque iustam futuram esse arbitror, quam nimirum perlegens et rem plane intelligam, et verba iucunde hauriam: si quid praeterea insit, quod neque perspicuitati quidquam neque oblectationi conducatur, id extra modum esse, et justo longiorem facere; si quid contra deest, quod is, qui legit, merito requirat; id quoque praeter modum esse, et justo breviorum reddere.

Neque vero haec quisquam improbare possit, qui titulorum originem caussamque secum ipse consideret. hos enim ideo inventos adscitosque viderit, non modo ut hominum sensus ac voluntates conservarent, sed etiam ut palam ante oculos omnium propositi, cupide ab omnibus legerentur. quare utrumque opus est inscriptionem commendat, et argumenti evidens quaedam expositio, quae rem faciat illustrem, et is verborum delectus, qui splendore quodam et venustate tenere legentem possit. id nempe erat, quod veteres apprimè praestabant, non rebus non verbis inscriptionem spoliare soliti, quae opus esset; non iis onerare, quae sine fraude abesse poterant: ut neque inutile quidquam aut nimium, neque incomptum aut obscurum offenderet.

II. Sed tamen fore aliquem intelligo, qui veterum opponat exempla, quorum elegantiam quidem miratus, at brevitate offensus, evidentiam se quandoque desiderare dicat. qui tamen hoc primum noverit, velim, caussa ne fuerit omnino nulla, cur ornatus omnis atque omnia adjuncta rejicerentur. nam inscriptionem veteres consulto inornatam et tenuem esse aliquando voluerunt: ut, si quid desit, non sine consilio omissum esse videatur. ejusmodi sane fuit, quam in tumulo Othonis Aug. se Brixelli legisse Plutarchus testatur (2): nihil enim aliud inscriptum erat, quam hoc, *M · OTHONIS*: quam brevitem Othoniani milites Imperatori suo ad monumenti perpetuitatem profuturam putaverunt; quum ejus cineribus a Vitellio metuerent, qui longum et nobilem titulum in adversarii sui sepulcro laturus non videbatur: simul illud intelligerent, scriptores non defuturos, qui Othonis honores resque gestas memoriae mandarent. jam et illud animadvertendum est, de antiquis interdum inscriptionibus recte ab eo judicari non posse, cui marmora nunc sese offerunt a monumentis avulsa, nec quo steterint loco, aut quem in usum quave de caussa, manifestant. de Domitiano, exempli gratia, scripsit Tacitus (3): *Potiente rerum patre, disjecto aeditui contubernio mo-*

(1) Rhet. I. 3. c. 16. n. 127. *Nunc vero ridicule narrationem ajunt oportere esse brevem . . . neque*

*enim hic Bene est vel Breviter vel Concise, sed ad mensuram.*  
(2) in Othon. sub fin.

(3) Hist. I. 3. c. 74.

*dicum sacellum IOVI·CONSERVATORI aramque posuit, casusque suos in marmore expressit: mox imperium adeptus IOVI·CVSTODI templum ingens seque in sinu Dei sacravit.* enimvero titulis hisce nomen suum Domitianus si addiderat, nil aliud opus erat adscribi; quum ipsum quodammodo monumentum ejus dedicationis caussam aperiret ostenderetque, cum nempe bello Vitelliano confugisse in Capitolium, ac Iove sibi propitio in ea arce tuto latuisse. ea tamen inscriptio si nunc exstaret, et sola exeso in lapide legeretur, obscura utique et justo brevior, etsi immerito, videri posset.

Quid Liviae titulus ille brevissimus, si locum ignoret, ubi legeretur, cui non obscurus videatur (1)?

LIVIAE · CAESARIS · AVGVSTI  
PVBLICE

hunc Tiburtes Liviae Augusti uxoris simulacro subscripserant; quique Tibure legebant, his jam constabat, quid, a quibus, cur positum esset. sic Romae quum Antonini et Faustinae templum oculis lustramus, non jam displicet inscriptio illa in epistylis incisa (2):

DIVO · ANTONINO · ET  
DIVAE · FAVSTINAE · EX · S · C ·

eminet adhuc ad viam Appiam Caeciliae Metellae pulcherrimum Mausoleum, in quo hic titulus (3),

CAECILIAE  
Q · CRETICI · F ·  
METELLAE · CRASSI

quo quidem contentus esse debet, qui novit, sepulcra ibidem fuisse Metellorum (4). nam qui monumenti ipsius auctorem requirit, in ejus viro agnoscat, licet, id est in Crasso illo Divite, quem Parthico bello interiisse scimus. nec vero alia temporis nota opus erat, ut Metellae aetas proderetur, quum et patris ejus et viri nomina jam in fastis legerentur. quo pacto servorum et libertorum tempora satis dominorum aliquando et patronorum nominibus indicantur (5):

CHRESTE · CONSERVAE  
ET · CONIVGI · CELADVS · ANTON · (6)  
DRVSI · MEDICVS · CHIRVRG ·  
MERENTI · FECIT  
EA · VIXIT · ANNOS · XVII ·

(7)

FELIX · TI · CLAVDI  
GERMANICI · EQVES  
CHARITO · FRATRI  
PRO · MERITIS · FECIT

(8)

DIS · MANIBVS  
TVRIAE · SATVRNIAE  
SORANAE  
LIBERTAE · FECIT  
PLACIDVS  
IMP · DOMITIANI · AVG ·  
TABELLARIVS  
CONIVGI · OPTIMAE  
ET · PIENTISSIMAE

(1) Fabr. p. 60. n. 347.

(2) Grut. p. 257. n. 5.

(3) Maff. M. V. p. 289. n. 7.

(4) Cic. Tusc. Q. l. 1. c. 7. n. 13.

(5) Fabr. p. 300. n. 273.

(6) Antoniae.

(7) Don. Cl. 7. n. 131.

(8) Fabr. p. 309. n. 330.



nec aliter cetera exempla, quae fortasse contracta nimis ac breviter videntur, si recte singula perpendas, suis plane distincta notis fuisse, ac justa habenda esse reperias. laudanda vero nobis est, atque etiam imitanda verborum ista, quasi sumptuum, moderatio quaedam et parsimonia, quae nec iis, quae dare lucem possint, titulos privat, et legentem qua levat molestia, qua concinnitate delectat.

nI. Atque hoc eo fidentius dico, quod aequo plus copiam plerumque amamus et ubertatem: nihil autem veremur magis, quam ne quid nimis obscure narrare videamur. mihi sane recentiorum scriptorum titulos curiosius consideranti nemo fere demendo potius, quam addendo extra mensuram illam modumque prodire visus est. hanc quaeso inscriptionem expende, quae Genuae prostat (1):

ANDREAE • DORIAE  
QVOD • REMPUBLICAM • DIVITIJS  
OPPRESSAM • PRISTINAM • IN  
LIBERTATEM • VINDICAVIT  
PATRI • PROINDE • PATRIAE  
APPELLATO  
SEN • IANVENSIS  
IMMORTALIS • MEMOR • BENEFICII  
VIVENTI • POSUIT

nonne, si adverbium illa *Diutius*, *Proinde* expunxeris, nihil huic necessarium, nihil speciosum ademeris? quin justa iam inscriptio atque optima esse coeperit.

Demendo item, non addendo, melior fieri posse videtur hic, qui Neapoli legitur, Egizii titulus (2):

VETUSTISSIMAM • NILI • STATUAM  
AB • ALEXANDRINIS • OLIM • UT • FAMA • EST  
IN • PROXIMO • HABITANTIBUS  
VELUT • PATRIO • NUMINI • POSITAM  
DEINDE • TEMPORUM • INIURIA  
CORRUPTAM • CAPITAEQUE • TRUNCATAM  
AEDILES • QUIDEM • AN • M • DC • LVII •  
NE • QVAE • TOTI • HUIUS • REGIONI  
CELEBRE • NOMEN • FECIT  
SINE • HONORE • IACERET  
RESTITVENDAM • CONLOCANDAMQUE •  
AEDILES • VERO • ANN • M • DCC • XXXIII •  
FVLCIENDAM • NOVOQUE • EPIGRAMMATE  
ORNANDAM • CVRAVERE

dele *Vetustissimam*; neque enim non antiquissima esse ea statua poterat, quae *ab Alexandrinis olim* posita esset. ne illa quidem necessaria *Velut Patrio Numini*, quippe id cuique facile, commemoratis Alexandrinis, occurrit. tum illa *Deinde*, *Quidem*, *Vero* plane inutilia, neque ex veterum more aut elegantia esse videntur. similia his puto reliqua illa *Toti Huic* et *Celebre*: his omnibus extrusis, quae supersunt, mensuram implent. initium etiam a re inutili factum arbitror in altero illo Egizii titulo (3):

(1) Zaccar. Sag. Crit. t. 2. p. 2. art. 19.

(2) Opusc. p. 279. n. 1.

(3) Opusc. p. 280. n. 3.

IN • PVLCHERRIMA • VIA  
 FONTEM • SALVBERRIMVM  
 VETVSTATE • CORRVP TVM  
 ORD • POP • Q • SALERNIT •  
 REFICIVNDVM • CVRAVERE  
 ANN • M • DCC • XXXIII •

si enim haec in ipsa via legebantur, quid opus erat, ut de via mentio fieret, cuius pulcritudinem usurpare quisque oculis posset? sed multa de genere hoc passim offendes, quae tute agnosces, si paullo diligentius animum adverteris: neque idem difficile vitabis, siquidem illud statueris, plerasque inscriptiones verborum saepe copia deformari: ut de iis dici possint, quae Scapham illam ancillam Philematio dominae suae dicentem inducit Plautus (1): nam quum domina, quae esset forma egregia, Scaphae ornatrici suae dixisset, *Tum tu igitur cedo purpurissum*: respondet illa:

. . . . . *Non do: scita es tu quidem,*

*Non isthanc aetatem oportet pigmentum ullum attingere,*

*Neque cerussam, neque melinum, neque ullam aliam offuciam.*

Sed fuere etiam nonnulli, qui veterum breviloquentiam admirati, dum breves esse laborabant, orationem, sententia justo parcius explicata, minus commode contraxerunt. qua in re peccasse aliquid Ferrarius quibusdam videbatur, cuius tituli saepe monumentorum auctores non praeferant (2): ut geminum contra verbum hoc in exemplo desiderabant (3):

M • PLAVTIVS  
 AEDICVLAM • CVM • ARA  
 ET • DIEBVS • DOMINICIS • SACRV M  
 EX • PATRIS • TESTAM •

neque enim, si addamus *Fecit*, utrique id rei aequè convenient: nec si Plautius *aediculam dedisse* recte dicetur, idem simul *dedisse sacrum* dicendus erit, quod sacrum statis diebus ut fieret, impensa sua caverit. ne illa quidem omnibus satisfacit funebri ejusdem inscriptio (4):

CIVIBVS  
 QVI  
 PRO • PATRIA • OCCVBERVNT  
 PACEM • ET • REQVIETEM  
 SVPERVM

se enim scire ajunt pervelle, quibus pacem et requietem precatur, ii ne pugnantes, an in legatione aliqua, laboribus confecti, an insidiis appetiti, pro patria occubuerint? tum etiam quinam funeri justa solvant, decuriones ne, an collegium sodalium, an consanguinei? raro enim haec hospiti ac peregrino locus ipse ornatuque indicaverit.

Rursus in hac etiam inscriptione deesse aliquid clamant (5):

(1) Mostell. 1. 3. 105.

(2) p. 100. n. 332. etc. p. 175. n. 363.

p. 196. n. 405. etc.  
 (3) p. 174. n. 361.

(4) p. 189. n. 390.

(5) p. 11. n. 21.

S • AGABIO  
 NOVARIAE • EPISCOPO • ET • PATRONO  
 VETERI • DIRUTO  
 MUNIENDAE • VRBIS • CAUSSA  
 NOVVM • TEMPLVM  
 EX • PECVNIA  
 PVBLICA • ET • PRIVATA

nam illa *Veteri Diruto Muniendae Urbis Causa* quia sine substantivo nomine legunt, suspensi haerent, nec illico subit, quo pertineant. at plana fortasse omnia, si hoc pacto scribas:

SANCTO • AGABIO  
 EPISCOPO • PATRONO • CAELESTI  
 SACRVM  
 EX • PECVNIA • PVBLICA • ET • PRIVATA  
 TEMPLO • VETERI  
 MUNIENDAE • VRBIS • CAUSSA  
 DIRUTO

sic aliae hujusmodi ambages in aliorum titulis uno saepe aut altero verbo resolvi possint.

III. Enimvero ne in ea ipsi vitia incidamus, quae in aliis reprehendimus, atque ut inscriptiones omnes ad eos metiamur modulos, qui nobis a veteribus relictis sunt; illud, opinor, conducet vel maxime, si titulos, qui incidendi erant, nihil de argumento praefati, amicis exhibeamus, rogemusque, ut his perlectis, quam tituli cujusque sententiam esse putant, nobis edisserant. facile nimirum apparebit, adsequuti, nec ne, id simus, quod propositum fuerat: facile etiam quid tollendum, quid addendum sit, haud dubiis indiciis demonstrabitur. nemo hoc sibi tribuat, velim, ut solus, quid opus sit, quid non, ceteris acrius ac melius videre possit. nam quod una in re diutius animo versati simus, fit aliquando, ut quaedam ipsi verba nec opinantes negligamus, quibus omissis alios peregrinari aut non parum haesitare necesse sit: interdum etiam, ut nimio imitandi studio plus aliquid inseramus, quam aut ipsa res patiatur, aut teretes eruditorum aures ferre possint. et est horum maxime mensuram inscriptionis cujusque intelligere: qui quamquam non semper praestare tantundem scribendo possunt; cognitissimum tamen antiquorum exemplis, optime norunt, qui nobis scribendi fines constituti sint.

Hic autem animadvertendum est, quum veteres quoque in quolibet fere inscriptionum genere, qua simplici, qua ornata dictione usi sint, non ea nunc, quae ab inscriptione, salva sententia, tolli possint, omnia semper extra modum habenda esse. nam praeterquam quod ornamentis hujusmodi fere subest res, nec inanis verborum sonus dici possunt; saepe etiam sollemnes formulae et ipsa dictio paullo copiosior vim auget sententiae, unde ipsa quodammodo crescit ac nobilitatur inscriptio. id erat, quod initio aiebam; ad justam inscriptionem omnino pertinere, ut ea nos non modo rem, de qua agitur, doceat, sed etiam verbis ipsis, quantum fieri potest, delectet ac teneat. quis non, exempli gratia, verba aliquot hoc e titulo denique posse fateatur, quin tamen sententia pereat? Fabretti inscriptio est, in lapide quidem ob fracturam haud integra, sed quam ille certissimis verbis supplevit egregie (1):

(1) p. 450. n. XIII.



IMP · CAESARI · DIVI · TRAIANI  
 PARTHICI · F · DIVI · NERVAE · NEPOTI  
 TRAIANO · HADRIANO · AVG · PONTIFICI  
 MAXIMO · TRIB · POTEST · XIII · COS · III · P · P ·  
 COLLEG · VICTIMARIOR · QVI · IPSI · ET · SACERDOTIBVS · ET  
 MAGIST · ET · SENATVI · APPARENT · QVOD · CVM · COMMODIS · EORVM  
 IMPVGNARETVR · LIBERALITATE · EIVS · RESTITVTA · SINT · DEDIC · VI · K · MAIAS  
 Q · FABIO · CATVLLINO  
 M · FLAVIO · APRO COS.

nempe quum Vietimariorum munus, tum Hadriani beneficium exponi brevius et paucioribus indicari verbis plane poterat: quid tamen? nihil ex iis, quae usurpata sunt, redundare aut supervacaneum esse videtur: quin sententiam simul omnia et diserte explicant et apte complent. aliud enim est dictione uti ornata, aliud verbis inutilibus: haec in simplicis etiam dictionis titulo brevissimo esse possunt; quum ornatae contra plures et satis longae inscriptiones sint, in quibus nihil inutile reperiatur: quippe in ipso ornatu modum veteres servaverunt, nec quid dici posset, sed quid oporteret, considerarunt. ornatam autem dictionem, quae ad aliena non excurrat, facile inscriptionis mensura capit, quod haec non certo verborum aut versuum numero, sed ipso argumenti genere ac dignitate definitur.

Ad summam non hic agitur, ut quam paucissimis verbis inscriptio constet: id illi curae sit, cui spatium longiori titulo inscribendo desit. nihil nos de brevitate inscriptionis aut longitudine laboramus: vel potius hoc unum cordi est, ne longa neve brevis dici possit: justam enim probamus, in qua non verborum numerus ineundus est, sed facultas ejusque et usus considerandus. quapropter etsi veterum formulae saepe nullo negotio contrahi possunt; quia tamen sua verbis quibusque inest vis, sua dignitas, nihil temere amputandum esse censemus: ut quod rebus designandis minus aliquando necessarium est, id illustrandis comendisque tribuatur.

V. Ceterum judicii erit nostri, ut exiguis in monumentis grandiore dicendi genere non utamur, nec in magnis humiliori. nihil citius legenti incurrit in oculos, quam quod rebus non congruit; nec abest fere a reprehensione temeritatis, qui ne id quidem animadverterit, quod primum esse debebat, quid maxime conveniret. tum eorum etiam habenda ratio est, qui loquentes inducuntur: ne plura effari aut majora videantur, quam vel actas eorum vel dignitas ferat. locum vero potissimum atque opus, in quo inscriptio legenda sit, vidisse, saepe interest, ne aliis scilicet utamur verbis, quam oporteat. pronomina ipsa, ut jam monui, quae nunc passim adscribi solent, antiquis in exemplis vix reperiatis ad opera ea designanda, quibus titulus inhaereret; ut ne adverbium quidem, orationis connectendae causa, crebro occurrent: raro praeterea geminum uni rei enunciandae adhibitum verbum: nihil autem verbis unquam sententiisque variatis bis expressum: plura demum, ut jam adnotavimus, ex iis ommissa, quae in ipsis efficta operibus quisque intuebatur. haec maxime erant, quibus veteres inscriptionem immodice crescere arbitrabantur: quae nunc quoque, qui titulorum genera et causas perpenderint, locum, tempus, adjuncta omnia considerarint, negligenda fere ac repudianda esse facilius intelligent.

## CAPVT III.

*De perspicuitate inscriptionum*

I. **D**iximus capite superiore, quo iusta inscriptio sit, nihil ex iis esse omittendum, quae ad rem declarandam necessaria videantur: neque id novum aut cuiquam ignotum vel parum probatum. sed tamen inscriptiones aliquando sic ab adjunctis ornari usuvenit, ut obscuritatem et tenebras afferant, quae lumen maxime adhibere debebant: quod mihi fieri videtur, vel quod vetusta nimis et ignota consecamur; vel quod incerta quaedam et ancipiti significatione nutantia usurpamus; vel etiam quod regulas quasdam minutas negligimus, quibus maxime inscriptio perficiatur. de his singulis hoc capite agitur; ut iis, quae obesse possunt, amotis, tituli omnes ab ipsa etiam perspicuitate commendentur.

Primum igitur sapiens titulorum scriptor id, quod a C. Caesare excellentis ingenii ac prudentiae viro in primo de Analogia libro (1) scriptum est, habebit semper in memoria atque in pectore, ut tamquam scopulum sic fugiat inauditum atque insolens verbum. non illud hic admonebo, quod Gellius scribit (2), vitium id esse plerumque serae eruditionis, quam Graeci *Οφθαλμίζω* appellant, ut quod nunquam didiceris, diu ignoraveris, quum id scire aliquando coeperis, magni facias quo in loco cumque et quacumque in re dicere. hoc dicam, quod magis huc pertinet: si vocabula huiusmodi, tum quoque, quum Latinae litterae florerent, eruditorum aures respuebant (3), quique his uterentur, ii nolle intelligi putabantur (4); quid nunc fieri necesse est, quum Latinam vix linguam perpauci nec optime teneamus? quos vero inscriptio potissimum non obturbet ac moretur, in qua quisque plana omnia et concinna sibi sponderit? haereant sane plerique, neque sententiam semper adsequantur: et hoc etiam fiet, ut cetera simul, quae proba sint, contemnant, ac tota scriptoris laus uno saepe verbo obteratur. nimirum quos nunc titulos scribimus, eos non mater Evandri legere debet, sed ii, qui sermonem Latinum in Tullii potissimum libris didicerunt, qui hanc esse Latinam linguam putant; nec quae vocabula ceteri scriptores semel aut iterum usurparunt, ea semper vel nosse vel meminisse potuerunt. non debes autem id existimare perspicuum, quod plerique sine interprete non intelligant, neque omnium communes habere eas voces, quae antiquariis jamdiu relictas sunt. nam quod in hisce vocabulis cruditio scriptoris enitere tibi videtur, hanc, qui aequissimi sunt, intempestivam appellant.

Quod vero ea quidam utuntur excusatione, quod proprias cujusque artis formulas, propria nomina usurpaverint, ii quamquam aliquid probabile afferunt; exquisitius tamen loquuti videntur, quam communis inscriptionum lingua pateretur: quos inter Ferrarium aliquando numerandum esse, quaedam ejus exempla declarant (5):

IVLIVS • MACER  
OSTIVM • ANTEPAGMENTVM • VALVAS  
ET • AB • EPISTYLIO  
ACROTERIA • CORONAM • FASTIGIVM  
D • S • P • F • C •

(1) Gell. N. A. l. 1. c. 10.

(2) ibid. l. 11. c. 7.

(3) v. Svet. in Aug. c. 86.

(4) v. Senec. epist. 114.

(5) p. 17. n. 35.

nonne ad Vitruvium tandem atque ad interpretem ejus veniendum est, si omnia adsequi velis? quid illa Luciliana (1)?

PAVIMENTVM • DE • TESSERVIS  
ET • EMBLEMATE • VERMICVLATO  
STRATVM • A • M • DCCXLIX •

istud ipsum *Emblema* quum in quodam decreto patrum recitaretur, commutandam Tiberius censuit vocem, inquit Suetonius (2), *et pro peregrina nostratem requirendam*. Tullius quidem usus fuerat, sed ita aliquando molliverat, *et tanquam in vermiculato emblemate, ut ait Lucilius* (3). nam ille etiam Graeca verba fere rejiciebat, cujus haec regula est (4), *Sermone eo debemus uti, qui natus est nobis, ne, ut quidam, Graeca verba inculcantes jure optimo irrideamur*. quamquam Graeca hic verba appellare Cicero videtur, quae Latini non receperant, itaque plerisque ignota erant. nam quae Graeca quidem, sed jam in usu, ipse etiam saepe usurpavit.

Haec autem sunt, quae in inscriptionibus etiam si quando legantur, offendere neminem possint: cujusmodi habentur quaedam aedium publicarum Graeca nomina, sed Latinitate donata, *Xenodochium, Nosocomium, Gerontocomium*: num vero et *Odi-nosocomium*, quod nuper invectum est? non utique; quis enim usquam vidit, aut quotusquisque est, qui intelligat? quin etiam perspicuitatis causa quidquid Latinis verbis offerri commode possit, Graecis ego nominibus vel notissimis vix designem: quare libentius *Hospitalia* cum Vitruvio (5), quam *Xenodochium* eam appellarim domum, quae peregrinis excipiendis parata sit; item *Valetudinaria* cum Columella (6) eam, qua aegri recipiuntur, et *Nosocomium* fere nominatur.

II. Non modo autem, quo inscriptio perspicua sit, Graeca nomina vitanda, quae simul Latina non sint, sed interdum vel quaedam Latina et probata rejicienda puto, si minus convenient. haec primum esse statuo honorum, munerum, curationum antiquas appellationes, de quibus jam superius actum est (7). tum geographiae vocabula quaedam, quae olim obtinuerunt, at nunc prope oblitterata sunt. equidem in urbibus designandis antiqua omnino nomina praeoptaverim, si propria, si certa fuerint, quae sane et nota esse solent. at si adhuc sub iudice lis est, cur ludibrium posteris debere velim, ut ii, qui olim Falerios in historica inscriptione *Vejos* appellarunt? nonne satius erit veteri more barbarum adsciscere nomen, at certum; quam hoc abstinere, ut Latinum, at incertum usurpem? eodem modo si urbs nominanda sit, quae post Latinos scriptores condita fuerit, ut ut in antiqui oppidi ruinis constitutam multi contendant, malim recenti appellatione, quam veteri nomine utaris: id enim multi repudiabunt, et incertum esse contendent. quamquam improbandum haud censeo, si quis oppida huiusmodi, quae apud Italos Gallosque, quia in collibus sita sunt, *Montes* non raro appellantur, Latinorum more nominet, *Alcinodinum, Falcodunum, Feltrodunum* et similia: quippe *Dunum* veteres ea sententia usurpaverunt. *Δρυς* scilicet Dorice idem, quod *Βρυς*, id est collis, tumulus, clivus, uti jam Menagius animadvertit (8), vocem eam esse Gallicam pernegans. atque etiam, si de veteri appellatione tu quidem nihil, ceteri parum ambigant, nomen tamen utrumque elegantius adhibeas, quam vetus tantum: sic olim in titulis appellatae urbes, quae Coloniae esse coepissent (9): sic apud Plinium occurrent *Puteoli Colonia Dicaearchia, Paestum Posidonia, Segede Restituta Iulia, Olyssipo Felicitas Iulia, Eborae Liberalitas Iulia*, et similia.

(1) p. 19. n. 40.

(2) in Tib. c. 71. n. 2.

(3) de cl. orat. c. 79. n. 274.

(4) de off. l. 1. c. 31. n. 111.

(5) l. 6. c. 10.

(6) l. 12. c. 3.

(7) part. 1. c. 2. §. 1. n. 4.

(8) Amoen. l. C. c. 3.

(9) v. inser. 37. et 251. et part. 1. l. 2. c. 1. §. 3. n. 2.



Recentiora autem provinciarum regionumque nomina prae antiquis optima habenda: neque enim earum iidem nunc fines sunt, qui olim fuerunt: ut qui veterum populorum appellationes usurpet, perraro certum aliquid ac definitum designet. veteres Tragicos reprehendit Paterculus (1), qui Myrmidonum civitatem *Thessaliam* vocarint, de iis temporibus scribentes, quibus *Thessalus* ne natus quidem esset: *Quibus, inquit, minime id concedendum est: nihil enim ex persona poëtae, sed omnia sub eorum, qui illo tempore vixerunt, dixerunt.* porro minus id quidem absurdum erit, si quis novas nunc provincias, novisque saepe finibus descriptas Romanis appellet nominibus; sed ad inscriptionis perspicuitatem quod attinet, parum idonea atque etiam incommoda futura sunt.

II. His jam adnumeres priscas monetae appellationes, quibus nunc si utaris, nemo fortasse summam pecuniae nostrae adsequetur. vix enim est, cui, quum ad sestertios venerit nummos, non jam Grammatici consulendi sint. nonne satius erit, quod Ferrario placuit, *Aureos Venetos* supponere, quos nemo non agnosceret (2)?

L • CORNELIVS

PVTEVM • SVA • IMPENSA • DEFOSSVM

ET • MACERIA • CLVSVM • POPVLO • DEDIT

LEGATIS • INSVPER • QVOTANNIS

AVREIS • VENETIS • IV •

IN • TYMPANVM • ET • CATENAM • ET • FVNEM

ET • AD • REPVRGANDVM

AC • REFICIENDVM

Eos vero probabo vel maxime, qui Romanos nummos nostrates, qui olim plures ex argento eudebantur, iterum inducat, atque ab ipsa effigie *Scutatos nummos* appellent: ut veteres a bigis, rate, victoria denarios et quinaros suos *Bigatos, Ratitos, Victoriatos* nominarunt. nihil scilicet ad summam quamlibet subducendam magis accommodatum esse solet. nec vero mihi pro ipsis nomina regum displiceant, quorum illi auctoritate primum percussi sint: quemadmodum eos quoque nominatos scimus, quos Choerilus ille ab Alexandro, incultis versibus et male natis (3)

*Rettulit acceptos regale nomisma Philippos:*

vel etiam ut dari Claudio jubet Valerianus in epistola ad Zosimionem procuratorem Syriae (4), *Philippos nostri vultus annuos centum quinquaginta*; cuiusmodi item sunt nummi, quos idem Valerianus Probo tribuno a Melvio Gallicano praefecto praetorii numerari voluit (5), *Aureos Antoninianos centum, argenteos Aurelianos mille, aereos Philippeos decem millia.* atque huc referas *Darios* sive *Daricos*, quos Ausonius usurpavit (6) a Dario rege Persarum denominatos: quibus plane similes *Paulli* hi nostri et *Iulii*, quos nemo jure rejiciat. sic equidem recte usurpari posse olim putavi;

MARIAE • ADIVTRICI

SACRVM

VOTO • SVSCEPTO

VICANI • CARSEOLANI

LIBENTES • MERITO

CIVIS • DELIC • SACERDOTIBVS • QVI

SACRVM • FECERVNT

IVLI • VII • N • SINGVLIS • DATI • SVNT

(1) Hist. l. 1. c. 5.

(2) p. 14. n. 28.

(3) Hor. l. 2. ep. 1. v. 233.

(4) Trebell. in Claud. c. 14.

(5) Vopisc. in Prob. c. 4.

(6) Epist. 5. v. 21.

III. Venio ad litteras singulares, quarum nunc usus in titulis aliquando multus et ineptus ad impudentiam. ludere enim quidam videntur, et hominum litteratorum ingenio pro peccatum stupore abuti: quasi vero summorum sit ingeniorum, non germanas veterum formulas nosse, sed quid stultissimus quisque somniarit, Chaldaeorum id more interpretari.

Litteras singulares primum in senatu maxime a veteribus usurpatas arbitror, quum ea scribenda essent, quae quis interrogatus responderet. nam et Tullius consul, quum de Catilinae conjuratione ageretur, *introducitis in senatum indicibus, constituit senatores, qui omnia indicum dicta, interrogata, responsa perscriberent*: eos autem constituit, quos sciebat, *memoria, scientia, consuetudine et celeritate scribendi facillime, quae dicerentur, persequi posse* (1). nec tamen Carpentiero assentior existimanti, omnia plane verba a senatoribus illis prima tantum cujusque littera esse designata (2). quis enim ea deinde, nisi Themistocles esset aut Oedipus, legere potuisset? ea ego solum singulariis conscripta litteris puto, quae sollemnia essent, aut ex ipso ceterorum nexu et societate lucem acciperent: quales deinde formulas in jure civili usurpatas Magno quidem collegit, et regi Carolo dicavit (3): et quales potissimum illae sunt, quas in antiquis senatus consultis nunc quoque legimus: haec autem quum in aes inciderentur, quod eum laborem concisa illa brevisitas minuebat, nihil esse mutatum, atque idem in legibus quoque placuisse: denique quum titulos satis longos parvis saepe tabellis concludere opus esset, quidquid jam omnes iisdem semper verbis explicare consueverant, primis tantum eorum verborum litteris indicare coeperunt: eaque contractione delectati, quae nullam orationi obscuritatem afferret, novum morem retinendum censuerunt, etiamsi necessitate non cogerentur. nemo tamen sibi interdictum putavit, ne formulas, quascumque vellet, omnibus plane litteris perscriberet: quod a plerisque saepe factum ostendunt veteres passim tituli, ut eum temere novitatis accusaturus sis, qui vel notissimas formulas omnibus litteris reddiderit.

Nunquam autem vocabulis quibusque, quot cuique liberet, litteras subdixerunt: quod ii novere, qui diu sunt in antiquis inscriptionibus examinandis exercitati. ac Maffejus quidem (4) tanta veteres religione fuisse arbitratur, ut praeter sollemnes formulas vix aliud quidquam non omnibus litteris indicare auderent: nec dubitat idem plerasque inscriptionum, quae litteras singulares praeferunt novas, aut vocabulorum ignota initia, fictas et commentitias habere (5). itaque tenes, opinor, quam non necessariae ad inscriptionem ornandam singulae istae sint litterae, quantus praeterea delectus esse debeat, quantusque in usu modus, ut veterum consuetudinem revocemus. verum quanto etiam parcius nos uti necesse est, ne inscriptionibus tenebras offundamus? quum Romana republica amissa, et prisca superstitione repudiata, novis jam legibus institutisque vivamus. tu ne mihi, quo veterum exemplis licentius abutare, Sertorii Orsati librum objicies et collectionem siglorum infinitam? quem ille laborem quum eorum tantum causa suscepit, qui antiquitatis monumenta scrutantur, vel sibi tamen, vel iis, quorum opera usus est, nimio plus fuisse, non immerito arguitur.

Si quid ex eo libro in rem nostram hauriendum est, iis contenti formulis esse debemus, quibus eae designentur res, quae adhuc in usu sunt; en tibi exemplum (6):

(1) pro Sull. c. 14. n. 41.

(2) in praef. ad not. Tiron. p. 5.

(3) Nicol. de sigl. vet. c. 12. §. 6. p. 65.

(4) Art. Cr. L. 1. 3. c. 2. p. 180.

(5) ibid. l. 3. c. 4.

(6) Don. Cl. 5. n. 1.

M · OPPIO · M · F · VEL ·  
 SECVNDIONI  
 EQVO · PVBLICO  
 PROPR · PROV · GALL ·  
 CVRAT · MVNICIP · NVMANAT ·  
 DECVR · EIVSDEM · MVNIC ·  
 PATRONO · COLON · AESIS  
 CVRAT · R · P · ATTIDAT · CVRAT ·  
 CASVENTIN · AD · AGR · DIVIDEN ·  
 DAT · AB · IMP · CAES · ANTONIN ·  
 AVG · P · COR · AVREA · HASTA · PVR ·  
 PLEBS · COLON · AES ·  
 OB · MERITA · EIVS · IN · C · D · C · D ·  
 L · D · D · D ·

nihil est in primo versu, si tribum excipias, quod non imitari possis. neque illa obscura nunc sint, PROPraetori PROVincia GALLiae: nota item illa CVRATORI, DECVRioni. tum si de finitimis urbibus sermo sit, vix opus, ut nomina scribantur integra, ut neque hic scripta: quippe facile quisque legebat NVMANATIUM, ATTIDATIUM, CASVENTINORUM, quos ab Aesinatibus, in quorum oppido inscriptio erat, haud procul sitos fuisse scimus (1). extremas etiam litteras L · D · D · D · eodem pacto usurpare non dubitem: nam locus monumentis nunc quoque a decurionibus datur. verum illa CORona AVREA, HASTA PVRa (supple) DONATO, si nunc usurpanda essent, omnibus litteris scriberem; neque enim dona huiusmodi ferre quisquam solet: et si quis in dedicatione statuac cenam, ut Oppius, dedisset, omnibus item litteris scriberem, IN CVIVS · DEDICATIONE · CENAM · DEDIT (2): quod morem nunc illum non retinemus. ac singulariis quidem litteris raro uti praestat, nisi quum una tantum sententia omnium iudicio subesse videatur. nam si eas alio etiam sensu commode interpretari quis possit, saepe jocandi ansam praebeas. id apud veteres quoque aliquando contigisse, non unus auctor tradidit: sed illud insigne est exemplum apud Tullium (3): *Vt, inquit, quum Scaurus accusaret Rutilium ambitus, quum ipse consul esset factus, ille repulsam tulisset, et in ejus tabulis ostenderet litteras A · F · P · R · idque diceret esse, Actum Fide P. Rutili; Rutilius autem Ante Factum, Post Relatum: C. Canius eques Romanus cum Rufo adesset, exclamat, neutrum illis litteris declarari. quid ergo? inquit Scaurus: Aemilius Fecit, Plectitur Rutilius.*

Huiusmodi autem interpretationes quam nunc multi vel cupide venari vel ingeniose comminisci solent? memini, titulum, dum haec scribimus, propositum alicubi temporarium, qui quamquam e genere inscriptionum historicarum erat, hisce tamen litteris, velut si sacer esset, concludebatur, L · L · M · Q · enimvero has tam litteras homines dicaculi, qui malitiose carpere vellent, mirum! quam varie explicarint: ac illud primum negabant plerique, sic esse legendas, *Laeti Libentes Merito Que*, quippe quia formula haec sacrarum inscriptionum propria est. alii autem hanc esse sententiam affirmabant, *Locus Locatus Magistris Quinquennialibus*, alii hanc potius, *Lyceum Lugens Magistros Quaerit*, quidam etiam hanc, *Laborem Levat Mercurius Quaestu*, et id genus alia, quae impudenter quidem, vix tamen intempestive dicta putabantur.

Iam in nominibus decurtandis cavendum est, ne casus discrimen tollas. veteres certe, quamquam CAES · passim scribebant, si sextus tamen casus designandus erat, quem alia nomina, ob similitudinem cum dativo casu, satis indicare non poterant, omnibus litteris scripsere CAESARE, ut hoc alisque in exemplis videre licet (4):

(1) Plin. l. 3. cc. 13. 14. nn. 18. 19.  
 Front. de colon. p. 103. edit. Goes.

(2) v. Reines. Cl. 6. n. 22.  
 (3) l. 2. de orat. c. 69. n. 286.

(4) Acad. Paris. t. 3. p. 242. v. inser.  
 65. etc.



TIB · CAESARE ·  
 AVG · IOVI · OPTVMO  
 MAXVMO · ARAM  
 NAVTAE · PARISIACI  
 PVBLICE · POSIERVNT

tum illud quoque curae esse debet, ne a vocabulis vel notissimis tot una litteras auferamus, ut eorum ambiguum fiat initium. inepte quis scripserit M · FABIVS · C · F · si Fabii patri nomen *Carolo* aut *Cornelio* fuerit: nec recte qui PRESBYTER est, duabus litteris PR · indicabitur; nam et PRAetor et PRAefectus legi possit. quae autem veterum formularum litterae singulares nostris conveniant titulis, quae item e priscis vocabulis trunca usurpari possint, ea omnia libro tertio digesta, et suis quaeque inscriptionum generibus adtributa reperiēs.

V. Denique ipsa etiam structura collocatioque verborum perspicuitati obesse potest. accedat qui Romanam historiam nunquam attigerit, legatque hunc Ferrarii titulum (1):

HAEC · LATA · LOCA  
 VIDERE · HANNIBALEM  
 PROGRESSVM · IN · INSUBRIAM  
 PRIMA · ROMANOS · CLADE  
 PELLERE

haud facile is victorem secernet a victis, atque illius de Pyrrhi victoria oraculi instar putabit: vel potius Hannibalem a Romanis pulsum existimaverit, quum is in Insubriam *progressus* dicatur. porro amphiboliae hujusmodi tollendae causa inscriptionem quamdam haud ita pridem in urbe exsculpi vidimus, pro qua novus est titulus incisus. omnino bene; quid enim proderat exstare inscriptionem, quam nemo intelligeret?

Scio equidem laudi quibusdam esse tributum, quod perspicuitatem aliqua in re consulto neglexissent: ut M. illi Marcello, qui tribus consulatibus gestis pergit in mari (2): quippe is, quum in monumentis avi sui ad Honorem et Virtutis aedem statuam sibi ac patri itemque avo poneret, subscripsit,

TRES · MARCELLI  
 NOVIES · CONSULES

fuerat autem, inquit Asconius (3), avus quinquies, pater semel, ipse ter: itaque neque ille mentitus, et apud imperitiores patris sui splendorem auxit. verum obscuritatis hujusmodi affectandae rara causa, nec semper probabilis: ac nihil fere diligentius in titulis suis curasse veteres mihi videntur, quam ne quid obscure efferrent: nam et a communibus aliquando regulis recessisse video, ne quid minus perspicue enunciatum esse videretur. sollemne erat, exempli gratia, ut ei, qui plus vice simplici consul fuisset, numerum consulatum post tres illas litteras COS · semper adscriberent: at in subiecta inscriptione, quia obscuritatem offundere poterat, praescriptus est (4):

(1) p. 92. n. 147.

(2) Cic. in Pison. c. 19. n. 44.

(3) in ennd. Tull. loc.

(4) Gor. Inscr. t. 1. p. 386. n. 142.

v. Hagemb. Ep. Ep. p. 348.

L · FVLVIO · C · F · POPIN ·  
 ABVRNIO · VALENTI  
 PONTIFICI · PRAEFECT ·  
 VRBI · FERIARVM · LATINAR ·  
 FACTO · AB  
 IMP · HADRIANO · AVG · II · COS ·  
 III · VIRO · A · A · A · F · F · QVAEST · AVG ·  
 TRIBVNO · PLEBIS · DESIGNATO  
 CANDIDATO · AVG ·  
 EQ · PVBL ·  
 D · D ·

alio in exemplo, quod superius allatum est (1), ante liberti nomen leges appositum *Sodalis Ejus* (Silvani) *Et Larum*, quod contra consuetudinem est, sed si infra scripsissent, sententia ambigua facta esset. sic quia genitivi duo casus, si alter alterum consequeretur, orationem obscurare poterant, rectus inter utrumque scriptus reperitur (2):

SILVANO · AVG · SACRVM  
 CRESCENS · ALYPIANVS  
 IMP · CAESARIS · NERVAE  
 TRAIANI · AVG · GERM ·  
 DACICI · DISP · FISCO · FR · (5)

nam nihil contra turbatum est, siquidem casus omnes ordine quodam grammatico distributi orationem dilucidam facere poterant; quod quum ex aliis passim exemplis, tum ex hoc discere possis (4):

DIS · MANIBVS  
 PIERI · AVG · L · PRAEC ·  
 PVERR · CAESARIS · N ·  
 FLAVIA · NICE · CONIVNX  
 B · M · TITVLVM · CVM · VALVIS  
 AENEIS · D · S · P · PERMISSV · HERMAE  
 AVG · L · A · CVB · DOMITIAE · AVG ·

atque hunc fere ordinem, qui maxime ad perspicuitatem utilis est, sequuti veteres sunt, quemadmodum infra ostendemus (5).

Eosdem vero, quum verbum, ut fit, aut nomen aliquod tanquam inutile omitterent, adeo considerate fecisse videmus, ut nemo desiderare id posset. in quo sane nos etiam diligentes atque attentos esse plurimum refert, ne minus recto brevitatis studio lumen inscriptioni adimamus: orationem enim, vel una vocula temere praetermissa, obscuram facile aut ambiguam feceris. si quid maxime geminum sit, et alterutrum tantum nominari oporteat, cave, ne personae aut rei mentionem sine discrimine facias: cave etiam, ne ullo dubiae significationis utaris verbo, quod in pejus detorqueri possit: nec vero illud minus, ne res sic attingas, ut curiosis hominibus plura sciendi injicias: desiderium, nec tamen expleas. mitto jam cetera: nam multa quidem tu ipse experiendo didiceris: quaedam etiam partitione prima adnotata sunt, quum de singulis inscriptionum generibus ageremus.

(1) part. 1. c. 1. §. 2. n. 5.

(2) Gor. Inscr. t. 1. p. 296. n. 25.

(3) *Dispensator Fisci Frumentarii.*

(4) Rein. Cl. 9. n. 34.

(5) cap. 6.

## CAPVT V.

*De dictionibus inscriptionum*

I. **B**ifariam, opinor, accipi *Dictio* potest: nam et orationis forma rerumque expositio sive *λογος* hoc nomine appellatur; et particula item orationis quaecumque, quam Graeci *φρασις* vocant. utrumque autem mihi hoc capite attingendum est.

Ac primum consideranda dictio sive simplex sive ornata, quam inscriptionum propriam habendam esse statuimus. suam nempe oratores etiam habent, suam poëtae: quae sic differunt inter se, ut si nullo artificio simul misceantur, non modo altera alteri repugnet; sed neutra etiam in titulorum structura apte unquam cohaerere, aut loco usurpari posse videatur. itaque communis inscriptionis sermo inter oratorium et poëticum medius est et utrinque reductus: ut ad alterutrum si excurrat, quidquid ipsius proprium est maxime, debeat anittere. et sanc, quamquam vocabula ab oratoribus poëtisque praerepta plerumque inscriptionibus, si sola spectes, idonea videntur; ea tamen poëta aut orator sic fere copulavit, ut ex ipsa conjunctione species existat et figura dicendi aut vehemens nimis et pugnax, aut mollis nimis et remissa, longiore etiam verborum circuitu, aliquando et brevior, quam inscriptionis stilus requirat. accedit eodem, multa, quae in oratoribus ac poëtis illustriora sint, numero quodam et concentu exsultare audacius, et inscriptionis gravitati quodammodo adversari. quin et illud non raro usuvenit, ut oratorum poëtarumque dictione eae etiam res fusius uberiusque excolantur, quas fere inscriptio negligit; rerum autem generibus et capitibus minus respondcant, quae potissimum inscriptio persequitur.

Quae tamen non eo quisquam a me dici putet, quod veterum scriptorum lectione nihil ego inscriptionum stilum arbitrer adjuvari. imo vero etiam utilitatis ex ea mirificum percipi fructum posse, libro tertio latius demonstrabo (1). hoc ego intelligi volebam, multum eos falli, qui praecellaram inscriptionem se confecisse putant, quum singula prope verba a Tullio ipso acceperint, nisi ea omnia ad veterum quoque inscriptionum stilum dictionemque detorserint.

Ac stilus quidem late patet, et omnia complectitur, quae hic de inscriptionibus vel singulatim vel generatim traduntur. at dictionem una orationis forma et proprius verborum textus definiunt. huius autem ea prope natura est, ut munda atque elegans sit, nec tamen fucata, aut alieno nitens ornatu: deinde ut modesta et parca et gravis, nihil aut sine caussa, aut sine modo, aut sine dignitate persequatur. quo fit, ut quum antiqua exempla legimus, nihil mutari aut loco moveri posse existinemus: semper autem scriptor ea verba, quae maxime cuiusque rei propria, quaeque essent ornatissima atque optima, occupasse videatur.

Quamquam ipsum inscriptionis artificium laud satis nosse possimus: quippe id ex rejectione verborum atque ex sententiarum delectu maxime pendet: quae uni scriptori nota sunt, ei nempe, quem vidisse nobis datum non est, quum (2)

*Detereret sibi multa, recideret omne, quod ultra*

*Perfectum traheretur: et in versu faciendo*

*Saepe caput scaberet, vivos et roderet ungues.*

sed tamen hoc ipsum artificium antiquis in exemplis non parum elucere videas, quo-

(1) partit. 2. c. 1.

(2) Horat. l. 1. sat. 10. v. 69.



tiescumque inscriptioni veteri recentiorem comparaveris. neque ego hic de aetatis nostrae titulis loquor, sed de iis, quos nunc quidam tamquam exempla et mirantur et imitantur. lege enim inscriptionem, quam subjeciam, aetatis minime eruditae, eamque cum illis confer, quas libro primo protulimus: facile, opinor, intelliges, quantum in illis succi et sanguinis sit, tantum in hac colorum et pigmentorum esse: atque ex illis nihil fere detrahi posse, quin totae pereant; hanc contra, ubi multa ademeris, meliorem plane futuram (1):

---

GREGARII · V · C ·

---

CHEIONIO · CONTVCIO · V · C ·  
 OB · EGREGIA · FACTA · ET · RA  
 RVM · VETERIS · SANCTITATIS  
 EXEMPLAR · INLYSTRATORI  
 PROSAPIAE · SVAE · CVIVS · OPE  
 AVCTAM · INSTAVRATAMQ ·  
 TOTA · SE · PICENI · ET · FLAMI  
 NIAE · PROVINCIA · GRATV  
 LATVR · QVO · IVDICANTE · QVA  
 SI · QVODAM · PARENTE  
 PRIMAEVO · SINGVLAE · CI  
 VITATES · IN · PRISTINAM · FA  
 CIEM · REVOCATAS · ESSE · LAETAN  
 TVR · FORONOVANI  
 DESIDERIA · TOTIVS  
 PROVINCIAE · PRAE  
 CEDENTES · STATV  
 AM · AD · VIVACEM · RECOR  
 DATIONEM · ET · SEMPITERNAM  
 MEMORIAM · POSVERVNT

norant utique veteres verbosissimos huiusmodi locos: non tardi sententiis, non inopēs verbis erant. sed ampullas huiusmodi et exquisitius dicendi genus in oratione interdum aut etiam in historia probabant; in inscriptionibus nullum esse illis locum arbitrabantur. lege exempli caussa, et perpende quae ex Vellejo subdam de Livia Augusta (2): *Mater, inquit, eminentissima, et per omnia Deis, quam hominibus similior femina: cujus potentiam nemo sensit, nisi aut levatione periculi, aut accessione dignitatis.* haec sane tamquam optima amplectantur, qui sequiorum inscriptionum formam suspiciunt: at veteres haec ipsa expeditissime duobus verbis designarunt: quippe Livia MATER · PATRIAE aut etiam GENETRIX · ORBIS appellata est (3): eodem modo qui barbaras gentes domuerat, urbes condiderat, colonias deduxerat, PROPAGATOR · ORBIS · TERRARVM appellabatur: quique urbem spoliis hostium ditaverat, militibus duplex stipendium dederat, plebem congiario donarat, hunc LOCUPLETOREM · CIVIVM vocabant. sic saepe alia atque alia magnorum virorum praecleara facta, ut alias attigi, brevissime indicarunt: hisque tamquam definitionibus propriam virtutis cujusque vim declarandam rati, cetera dicendi ornamenta poetis atque oratoribus reliquerunt.

II. Quin etiam non haec una dictionis ratio veteribus probata est: quidam enim multo etiam simplicius dicendi genus sequuti sunt; modo quod exiguis monumentis multa convenire verba non putarent, modo quod magnis operibus longiorem titulum inutilem esse arbitrarentur. sed ea tamen fere attigerunt, quae iis, qui omnia curiosius non exquirunt, satisfacere omniino possent.

(1) Fabr. p. 101. n. 229.

(2) Hist. l. 2. c. paenult.

(3) v. inser. 392.

Hoc autem simplicis dictionis maxime proprium esse videas, ut attributiones atque adjuncta negligat, nec nisi circa ea versetur, quae ad rei summam pertinent: sic tamen, ut hanc adsequatur. id factu perfacile esse dixeris: at non omnibus successisse video. antiquum enim exemplum proferatur (1):

C · MARCIVS · L · F · L · N ·  
CENSORINVS · ET · C · ASI  
NIVS · C · F · GALLVS · COS · (2)  
EX · S · C ·  
FIN · POMER · TERMIN ·

nihil sane hinc denique potest; at nec quid addi possit, facile quis dixerit, quo rei summa melius enuncietur. atque hujusmodi sunt ceteri eruditae aetatis tituli, quos quidem simplici dictione scriptos acceperimus. exempla nunc eorum consideremus, qui post ea tempora dictionem eandem exprimere conati sunt (3):

FABIVS · TITIANVS  
V · C · CONSVL  
PRAEF · VRBI  
CVRAVIT

tribus haec in basibus inscripta leguntur: itaque de statu sermo esse videtur: at cui liquet, statuas ne Titianus statuendas curaverit, an restituendas, an vero faciendas vel reficiendas? omnino id verbo designandum erat. addam et alterum ejusdem aetatis titulum, satis illum quidem elegantem, sed tamen qui simplicem dictionem excedat, ornata non adsequatur (4):

FLAVIVS · PHILIPPVS · VIR · CLA  
RISSIMVS · PRAEFECTVS · VRBI · NYMPHE  
VM · SORDIVM · SQVALORE · FOEDA  
TVM · ET · MARMORVM · NVDITATE  
DEFORME · AD · CVLTVM · PRISTINVM  
REVOCAVIT

veteres nimirum simplici dictione usi, minime in fontis ruina describenda morati essent: at ornata sequuti, primum Philippi honores omnes enumerassent, tum explicata operis causa, hoc etiam exposuissent, cujus id sumptu, quo anno, aut quorum ergo, et ejus auctoritate factum esset: quae fere libro primo in ornatae dictionis exemplis animadvertere potuisti.

II. Enimvero antequam inscriptionem aggrediare, statuendum erit, quae dictio conveniat maxime, quaeque etiam auctoribus monumentorum satisfacere possit: quamquam ornata plerique cujuscumque argumenti causa nunc probant. eliges autem, quae operi et loco et personis apta sit: ut neque magna extenuasse, neque, ut ajunt, tragodias in nugis egisse videre. id erit scilicet definire, quae tibi res attingendae, quae relinquendae sint; nam dictio ipsa rebus magis, quam verbis ornata fit. hinc jam formulas, quae singulis rebus respondeant, quaeres; et si qua occurret plenior atque sonantior, eam ornatae dictioni aptabis: quae pressior sit et paullo lenior, hac in simplici dictione utere. formularum vero omnis generis non exigua tibi copia libro tertio parata est. atque ab his potissimum utraque dictio colorem ducet, quo ab oratoria ratione et poetica distinguatur. neque enim vocabula tantum solitaria aut mera nomina, sed textum ipsum verborum integrasque sententias suppeditamus. quare judicio denique tuo illud fere unum relictum est, quae res formulis careant suis, eas latine reddere, et hac efferre

(1) Grut. p. 196. n. 2.

(2) Aun. Varr. 746.

(3) Grut. p. 193. n. 7.

(4) Manut. Orth. p. 349.

lege, nihil ut a ceteris discrepent: quod quidem latine scienti minime difficile esse debet, quum habeat ceteras formulas, ad quarum exemplar novas condat: nisi forte plusculum difficultatis affert ipsa conformatio conjunctioque verborum, qua de re capite sequenti agendum est.

Hic tamen adnotasse proderit, nulla re magis antiquam germanamque dictionem exprimi reddique posse, quam si natura veluti duce sensa animi nativis verbis ac propriis sine ulla eloquentiae aut elegantiae ostentatione expromamus. id nempe discernen inter antiquas inscriptiones, et quae post Philippos Augustos confectae sunt, plerumque invenies, ut illae quidem sponte e scriptoris fluxisse ingenio, hae vero multo expressae labore in lucem venisse videntur. illas sane ratio aut officium, has fastus aut adsentatio distinguit: et morum item antiquorum in illis species eminet, veritas in primis et moderatio et dignitas: at hae mores redolent externos, dissimulationem, prodigiam, obsequium: itaque verba ipsa in illis et sententiae vix unquam exquisitum aliquid habent atque insolens, in his contra tota dictio artificiosa turget atque inflata est; velut si eas Lucretius aut Tibullus, has Ansonius aut Claudianus dictasset. tu cave, audias, qui horum stilum quasi sublimem mirantur, nec optimum putant, nisi quod inusitatum novatumve est.

III. Nunc ut de particulis orationis dicamus, e quibus ipsa dictio conflatur, eas utique tiro non aliunde, quam ex veterum exemplis petere assuescat: ejusque rei causa antiquarum inscriptionum lectione ipsae ejus aures delectentur: nam sic cum legere par est, ut sonus verborum et numerus ad aures feratur; quippe harum denique sensu judicioque, ut ait Tullius, superbissimo optima quaeque facile ex veterum etiam scriptorum libris optare, atque ad titulorum structuram transferre poterit. dum is tamen in veterum inscriptionum lectione se exercet, formulasque inde ac varias dictiones decerpit; non et verba indidem singula nullo discrimine sibi petenda esse putet. scio equidem, qui antiquos titulos collegerunt, ab his priscorum verborum indices libris suis adjectos esse; perinde quasi hoc etiam in animo habuerint, ut longa nos conquisitionis cura et labore levarent. at neque inscriptionibus singulis, neque indicibus hujusmodi plane fidendum est. quum enim in libris inscriptiones cujuscumque aetatis simul descriptae sunt; tum in indicibus ea etiam verba prolata, quae nusquam apud bonos Latinitatis auctores reperire licet, quaeque non publicis inscripta marmoribus, sed privatis in titulis atque obscuris in epitaphiis leguntur. quare non ea horum auctoritas est, quae ceterorum: nec satis esse debet, in lapidibus haec incisa legi, nisi et a Latino homine aut certe Latinum sermonem docto profecta esse videamus.

Sed tamen in privatis monumentis si quis aliquando usurpare voluerit, quae in privatis item repererit, nec in Latinis scriptoribus legantur, non admodum repugnem: dum ne ex iis titulis sumpserit, quibus mendum aliquod et soloeecismus omnem auctoritatem eripuerit: ejusmodi sane hic non est, quem subjicio (1):

HIC · SITA · EST · AMYMONE · MARCI · OPTIMA · ET · PVLCHERRIMA  
LANIFICA · PIA · PVDICA · FRVGI · CASTA · DOMISEDA

istud *Domiseda* in antiquis scriptoribus non occurrit; sed tamquam Latinum quis verbum non inmerito usurpet: quum cetera epitaphii verba, electa omnino et Latina; illud a non rudi auctore prolatum demonstrent: cui quidem, si ipse vocabulum primus exedit, exemplo fuerunt alia hujusmodi, ut *Domicenium*, *Domiducus*, *Domiporta*.

Eodem modo quamquam cippos sive terminos e Tiburtino lapide nusquam *Tibur-*

(1) Fabr. p. 252. n. 35. v. Don. Cl. 15. n. 42.



*tinus* tantum in libris appellatos legerim, satis habet auctoritatis concinnus hic titulus, ne in privato monumento vocabulum huiusmodi usurpantem reprehendam (1):

D · M ·  
PETRONIAE  
Q · F · RVFINAE  
MATRI · PIENTISSIMAE  
FECIT  
APPIA · SEVERINA · FILIA  
LOCO · EMPTO · QVO · TIBVRTINI  
POSITI · QVATVOR · DEMONSTRANT  
IN · FR · P · VI · IN · AGR · P · VIII ·

*Tatam* et *Tatulam* pro nutritore satis bonae habent inscriptiones (2): ut ut *Tatam* unus fortasse Martialis eo sensu, idemque Iudibundus usurparit (3). idcirco in nutritoris epitaphio alumnus non male tanquam blandientis voce eo vocabulo utetur. atque hac lege ne quid e mendosis inscriptionibus sumas, alia huiusmodi inducas licebit, quotiescumque privata tractes.

At publicae inscriptioni conficiendae quis ea vocabula idonea esse putet, quae nusquam in publicis monumentis incisa sint? quum in his verba quaeque non modo certae auctoritatis, sed etiam legitima fere ac sollemnia esse debeant. quamobrem veteres publicos ubique titulos a viris doctis scribendos, et accurate simul incidendos semper curarunt: ut qui etiam sequioris aetatis sunt, nec ceterorum mendis deformatos, et propriis insignes formulis esse videamus. si quid enim etiamtum scribi poterat latine ac proprie, in publicis profecto monumentis id legi par erat, in quibus Princeps potissimum loquebatur. quae caussa est, cur non minori nunc cura inscriptiones publicae fiant, florentibus praesertim litteris, quae Principibus maxime, quorum praesidio vigent, famulari atque obsequi debent.

V. Enimvero ut optimis veterum dictionibus recte utaris, non tam exemplis opus erit, quam iudicio et intelligentia. nam exemplorum quidem vel optimorum ea copia est ac varietas, ut inscriptiones pangenti perpauca occurrant, quibus nihil illa prodesse possint. sed in dictionibus eligendis non raro fallimur, quod sententiae vim minime adsequuti, usum verborum ac formularum ignoramus.

Inscriptio est Tibure, quae paucis, ut fiebat, mutatis, ter incisa legitur, hoc modo (4),

L · OCTAVIVS · L · F · VITVLVS  
C · RVSTIVS · C · F · FLAVOS  
III · VIR · D · S · S · (5)  
VIAM · INTEGENDAM  
CVRAVER ·

si *Viam Integendam* idem esse putes, atque *Viam Sternendam* vel *Muniendam*, ut existimavit Maffejus, qui et inscriptionis auctoritatem hac de caussa labare scripsit (6); falleris utique, et dictione abutere: sermo enim hic est de via fornicata, cujusmodi et Romae fuit (7): id locus indicat, in quo inscriptio adhuc est ad fenestram, camera tectus perpetua.

Quaedam exstant militarium viarum columnae, in quibus sub Latina inscriptione non milliaria latine inscripta sunt, sed veteri Celtarum vocabulo *Legae*, *Leucae* aut *Leguae* (8) vel etiam *Leugae* (9): at non illud spatium hoc tum nomine designaba-

(1) Murat. p. 1271. n. 3. v. c. 4. part. II. §. 4. n. 1.

(2) Grut. p. 662. n. 6. etc. Fabr. p. 141. n. VIII. etc. Don. Cl. 4. n. 63.

(3) lib. 1. epigr. 101.

(4) Acad. Cort. t. 2. p. 163. v. Grut. p. 150. n. 1. 2. 3.

(5) *De Senatus Sententia*.

(6) Art. Cr. L. 1. 3. c. 4. p. 293.

(7) Liv. 1. 22. c. 21. n. 36.

(8) Berg. de V. M. 1. 3. c. 37. Wesseling. ad It. Ant. p. 254.

(9) Ac. Paris. t. 3. p. 250.

tur, quod indicari nunc solet: quippe et *Leguam* et *Milliarium* in Gallia eodem spatio definita fuisse tradit Bellejus (1): passibus scilicet mille et quingentis. itaque ea voce qui utatur, non id jam in Latina inscriptione indicaverit, quod sibi proposuisse videatur.

Formula est inscriptionum honorariarum, nec tamen quae in optimis et antiquissimis legatur, verbum *Locavit* in fine usurpatum, cujus verbi casus erat *Statuam*, quem scilicet subaudiri aliquando voluerunt; quippe ipsa statua cuique conspicua erat: sed casum nihilominus, quem omitterent, ornarunt appositis: itaque legimus (2),

ORDO · CAPVENSIS · VOTI · ET · OBSEQUII  
SVI · PIGNVS · LOCAVIT

*Statuit* nempe, sive *Posuit*, ut voti et obsequii sui pignus statua ipsa esset et haberetur. id quidam quum non animadvertisset, inscriptionem edidit perlongam ex eo genere honorariarum, quod per haec tempora nullo veterum exemplo inductum est, ejusque ultima haec fecit verba,

NVNC · NOVO · GAUDIO · PLAVDENS  
ET · EXVLTANS  
FAVSTAE · GRATVLATIONIS · ET  
PERENNIS · OBSEQUII · PIGNVS  
LOCAVIT

quae quum de statua accipi non possent, chartam illam, in qua inscriptio esset, utendam mercede concessisse, aut eam fenori dedisse, argutuli homines dictitarunt.

Legerant alii in statu Graecorum ΑΥΤΙΟΧΗΣ ΑΘΗΝΑΙΟΣ ΕΠΟΙΕΙ, ΜΕΓΕΛΑΟΣ ΣΤΕΦΑΝΟΥ ΜΑΘΗΤΗΣ ΕΠΟΙΕΙ (3) et his similia: quid deinde? caussam quum ignorarent, cur Graeci artifices *Faciebat* non *Fecit* scripsissent, hoc sibi etiam licere existimarunt, ut in monumentis inscriberent *Exornabant*, *Restituebant*, *Dedicabant*, non *Exornarunt*, ut veteres, et *Restituerunt* et *Dedicarunt*: inepte vero illi et mendose; audi enim a Plinio, quid suspensum illud ΕΠΟΙΕΙ apud Graecos significaret (4): *Et ne, inquit, in totum videar Graecos insectari, ex illis nos velim intelligi pingendi fingendique conditoribus, quos in libellis his invenies, absoluta opera, et illa quoque, quae mirando non satiamur, pendenti titulo inscripsisse: ut APELLES FACIEBAT aut POLYCLETVS: tamquam inchoata semper arte et imperfecta, ut contra judiciorum varietates superesset artificii regressus ad veniam, velut emendaturo, quidquid desideretur, si non esset interceptus.* num vero id unquam spectasse aut cogitasse illi videntur, qui signum posuisse aut donum dedisse dicuntur? quique aquam in urbem perduxerunt, viam straverunt, porticum aut theatrum dedicarunt? imo de hoc maxime gloriari dixeris, quod opus a se absolutum perfectumque sit. ceterum fieri aliquando potest, ut suspensio verbo uti debeas; tum nempe, quum inscriptio non una de eodem opere, nec eodem tempore incidenda fuerit. ut si extrema opus perfectum, aliae inchoatum aut productum debeant ostendere. hujusmodi fuit, quae a Bonfadio, ut fertur, condita est, quum Genuates urbem a mari etiam, moenibus cingerent, quod annorum aliquot opus fuit (5):

AVCTA · S · C · MOLE · EXTRVCTAQVE  
PORTA · PROPVGNA CVLO · MVNITA  
VRBEM · CINGEBANT · MOENIBVS  
QVACVNQVE · ALLVITVR · MARI  
ANNO · MDLIII ·

(1) Acad. Paris. t. 19. p. 636.

(2) Grut. p. 459. n. 1.

(3) Maff. M. V. p. 318. n. 4. 5.

(4) H. N. in praef. sub fin.

(5) Zachar. Excurs. lit. p. 29.



hanc et Latini veteres probassent, nisi forte scire voluissent, quibus a magistratibus opus illud susceptum aut probatum esset.

VI. Sed tamen permulta alia sunt, quae in recentiorum inscriptionibus temere usurpata reperiuntur, quamquam verissime iidem affirmant, ea se in antiquis marmoribus invenisse: in aliam enim sententiam nec opinantes detorserunt, et ea significatione accepere, quam nunquam habuerunt: ut qui *Comitia* appellant, ad quae, non populus, sed civitatum primores tantum et optimates convenisse dicuntur: qui aream ante domum aut templum vocant *Forum*, et quod forum est *Plateam* dicunt: qui *Aulam* nominant, quae Graecis et Vitruvio (1) *Oecus* est sive *Cenatio* aut *Conclave* in aedibus maximum; nam *Aula* locus est subdialis, sive, ut ait Athenaeus, ὁ διατρεχόμενος τόπος (2). idem faciunt qui *Officinam* esse putant, in qua non opus fit, sed aliquid venale prostat, quae proprie *Taverna* est: quique *Clastrum* recte appellari existimant, quod Atrium aut Peristylum dici debet; et quae templi Cella est, *Navim* vocant. male etiam *Praesules* vocantur, qui Antistites sacrorum sunt; nam *Praesul* idem ac Praesultor, itaque hoc nomine princeps Saliorum appellabatur (3): sero autem eodem designari coeptus, qui universum rei alicui praeesset. fuit nuper, qui Pontificem Maximum in temporaria inscriptione *Regem Sacrorum* appellavit: omnino inscienter; id enim sacerdotium diserte Livius Pontifici Maximo subjectum fuisse tradidit (4): et erant aliae caussae, cur eo vocabulo abstineret. nec vero erudite ille alius, qui Principis sui nomini apposuit *Patrono Indulgentissimo*: nam privati ea viri appellatio est: itaque Augustos suos Romani *Dominos* potius aut *Principes* aut *Parentes* aut *Conservatores* et huiusmodi vocaverunt.

Iam et a quibusdam minus proprie, qui Tullii aetate aut antea unquam inanum Deorum cultores erant, *Pagani* dicuntur: quae appellatio rectius iis tribuetur, qui Christianis temporibus superstitione veteri etiam tum infecti erant, quasi ex alio pago sive societate sacrorum (5). nec bene litterati viri, quod nunc vulgo fit, *Viri Clarissimi* vocantur, quum ea formula veteres dignitatem virorum, non doctrinam designarent: itaque senatores potissimum sic audierunt; eaque de causa quum eo titulo Praefecti praetorio carerent, quod ex equestri ordine creabantur, Severus Alexander senatoriam, inquit Lampridius (6), his addidit dignitatem, ut *Viri Clarissimi* et essent et dicerentur. idem etiam peccavit, qui pridianam Natalis Christi sollemnitatem *Pervigilium* dixit, quo nomine sacrum nocturnum et integrae noctis vigiliatio designabatur: qui *Aes Precarium* pro stipe induxit, *Protectorem* vocavit, qui Patronus aut Defensor dicendus erat: et alia huiusmodi, quae in recentiorum inscriptionibus haud immerito Grammatici notaverunt; quamquam et ea interdum iidem culparunt, quae laudanda essent: ut qui *Cooptatum* quem in collegium Patrum Cardinalium, haud recte dici pronuntiavit; quod nempe Cardinalem quemque, non qui sunt ex eo collegio, sed Pontifex Maximus ipse legat: *Cooptare* autem non unius, sed multorum esse contendat virum unum communi sententia adlegendum. atqui *Cooptare* non aliud est, quam aggregare in multorum numerum, sive unus sive plures virum eundem legant. itaque, ut alios mittam, Cicero de Verre Siciliae praetore, qui multos multis in civitatibus senatores fecerat, nec quemquam suffragiis, ut leges earum erant, sic loquutus est: *Atque in his omnibus senatoribus Cooptandis non modo suffragia nulla fuisse, sed ne genera quidem spectata esse, ex quibus in eum ordinem Cooptari liceret* (7). idemque de Cn. Pompeii filio quum ageret, quem a senatu in patrimonio suo collocari volebat,

(1) lib. 6. c. 10.

(2) lib. 5. c. 3.

(3) Capit. in M. Aur. c. 3.

(4) lib. 2. c. 1. n. 2.

(5) v. Ac. Cor. t. 4. p. 197.

(6) in Alex. c. 21.

(7) l. 2. in Verr. c. 49. n. 120.



*Haec, inquit, senatus, reliqua populus Romanus in ea familia, quam vidit amplissimam, persequetur: in primis paternum Auguratus locum, in quem ego eum, ut quod a patre accepi, filio reddum, mea nominatione Cooptabo* (1).

Negant etiam quidam, qui Rex sit et regiam in stipendiarios dominationem habeat, eum recte *Principem* nominari: quippe sic a Romanis appellatum, qui nomine Principis rempublicam sub imperium ita accepisset, ut ipse in senatus potestate esset; Regis vero ampliore, quam Principis, auctoritatem esse dominatumque majorem: quum huic omnes et pareant et parere debeant. quod sane inficiari nemo potest; sed ne illud quidem, etsi non omnes, qui Principes dicantur, iidem et Reges sunt, omnes tamen, qui regnum obtinent, eosdem et principatum obtinere: itaque quem initio Regem appellaveris, eundem recte *Optimum Principem* subinde dici posse, tanquam si Praesidem Rectoremve *γενητος* voces. quod ni ita esset, minus bene loquutus videretur Augustus, cujus ea fertur sententia (2), *Pietate et justitia Principes Dii fiunt*; nec melius Seneca, qui quum de placidi tranquillique Regis felicitate multa dixisset, adjecit, *Hic Princeps suo beneficio tutus, nihil praesidiis eget* (3): cujus et in libris *de Clementia* quicumque imperium habeant summum, qua Reges qua Principes nominantur.

Sunt praeterea, quibus is, quem rex apud regem rerum suarum procuratorem constituerit, haud proprie *Legatus* nec latine dici videatur: quia nempe Legatus, transacta re, ipse totius negotii nuncius redibat; at qui nunc a regibus mittuntur, annos saepe complures in statione sua manent: itaque *Oratores* rectius appellari putant: quasi vero non eo vocabulo Virgilius Aeneae Legatos nominarit (4). his porro Tullii opponenda sunt verba in Vatinium (5), quae Legati descriptionem munusque continent: nam intelligent, *Legati* appellationem stationariis aequae oratoribus convenire, quicumque Principis sui nomine apud externos negotium publicum agant. sic enim ille adversarium insectatur suum: *Ne hoc quidem Senatui relinquebas, quod nemo unquam ademit, ut Legati ex ejus ordinis auctoritate legarentur? adeone tibi sordidum consilium publicum visum est, adeo afflictus Senatus, adeo misera et prostrata respublica, ut non Nuntios pacis ac belli, non Curatores, non Interpretes, non bellici consilii Auctores, non Ministros muneris provincialis Senatus more majorum deligere posset?*

At vero quanto illi rectius alia quaedam expungenda censuissent? non solum quod alieno sensu usurparentur, sed etiam quod Latina nullo modo essent. vidi ego, et ingemui: vidi sub praeclara statua ex aere, nobilissimi municipii nomine inscriptum in basi, *Benefactori*, quod plane barbarum est; quum inscribi posset *Conditori*, aut *Restitutori*, aut *Locupletatori*, aut denique *Parenti Municipii*. externa etiam illa sunt *Typographia*, *Typographica Ars*, *Typographus*: pro quibus rectius scribatur *Officina Libraria*, *Ars Libraria*, *Officinator Librarius*. atque in eorum verborum numero habenda cetera, quae Latini aut nunquam usurparunt, aut Graecis semper litteris scribere: nomina quaedam excipe, quae novis rebus imposita, latine exprimi non potuerunt: quamquam nec omnia ejusdemmodi sunt; quique latine sciat, plura felicius efferet, quam hactenus prolata videamus.

Hic tamen non dissimulabo, ut apud Latinos auctores, ita in ipsis inscriptionibus aliquando, quae Graeca passim appellatione indicarentur, vocibus iisdem et litteris enunciari: quod nuperrime in eleganti titulo vidimus ad aream Sancti Marci invento, unde nova etiam dictio *Pupillatus* iterum in Latinae linguae censum relata est:

(1) Phil. 13. c. 5. n. 12.

(2) Lips. Civ. Doctr. l. 2. c. 10.

(3) de Cl. l. 1. c. 13.

(4) Aen. l. 7. v. 153. etc.

(5) c. 15. n. 35.

## DIIS · PROPITIS

CLAVDIA · TI · F · QVINTA  
 C · IVLIO · HYMETO · AEDITVO  
 DIANAE · PLANCIAE  
 PAEDAGOGO · SVO · KAI  
 KAΘHΓHTH · ITEM  
 TVTORI · A · PVPILLATV  
 OB · REDDITAM · SIBI  
 AB · EO · FIDELISSIME  
 TVTELAM · ET · C · IVLIO  
 EPITYNCHANO · FRATRI  
 EIVS · ET · IVLIAE · SPORIDI  
 MAMMAE · SVAE · F ·

LIB · LIBERTABVSQ · POSTER · EOR ·

nempe quia Hymetus Claudiae puellae non modo custos ac morum rector, sed etiam deductor et adsecla fuerat, Graccum et tralatitium ejus muneris nomen (1) rectius usurpatum est, quam *Deductori* aut *Adseclae*: quod his vocabulis Romae non mercenariam deductionem designabant. eodem modo, quamquam Litteris Latinis, ad Hieronicarum nomina in honorariis inscriptionibus additum legimus, HIERONICAE · CORONATO · ET · DIAPAN · DON (2), BIS · CORONATO · ET · DIAPANTON (3), IN · VRBE · CORONATO · DIAPANTON · AB · IMPP · DD · NN · SEVERO · ET · ANTONINO · AVGG · (4) quod ea jam *ῥησι* Pentathli, opinor, sive Quinquertiones vulgo prodebantur. ceterum Gracca ejusmodi nomina in ore hominum esse desierunt, et alia quis inepte fere ac sine causa nunc revocare videatur.

Denique veterum dictiones ii quoque pervertunt, qui antiquas formulas nullius generis proprias, sed communes omnium habent: itaque, quod jam questi sumus, indiscriminatim utuntur, et omnibus omnes monumentis scite aptari putant. atqui veterum exempla suo quasque generi addictas fuisse demonstrant: quod quum Maffejus saepe animadvertisset (5), Gruterianas inscriptiones non paucas non alia de causa commentitias esse censuit, quam quod propria alienis miscerentur. ex his est Veronensis quaedam *Petronii Probi* (6): quippe *incipit*, ut ille ait, *Vivus Fecit, qua formula funebri constituitur: pergit* Iunoni Sacrum, *quibus verbis in votivam transilit: deinde* Petronio Probo, *e quibus demum honoraria cognoscitur* (7). huic porro similem, nisi quod temporaria erat, paucis abhinc annis in Capitolio propositam legimus: nec raro lapidibus ipsis incisae reperiuntur.

Sed tamen si qua opellae hujus nostrae apud doctos erit auctoritas, vix jam hoc nomine in posterum culpari ulla inscriptio poterit, quum non modo hoc libro multa de his monuerimus, sed etiam formulas ipsas libro tertio in sua quasque genera distributuri simus: quo etiam libro non minus adjumenti tironibus afferemus, quum optimarum dictionum vim, non exiguo jam labore comparatam, apta partitione usi, explicabimus.

Quid jam reliquum est, nisi ut tironem moneamus, ne Latini sermonis inscitia humiles voces et abjectas, quibus vix comici utuntur, dignas unquam putet, quae inscriptionibus inserantur? ne in infini quidem hominis epitaphio, ne dum iis in titulis, qui publice inscribi debent, committendum est, ut sine venustate loquuti esse videamur. scio vetera exstare epitaphia, quae hujusmodi adspersa sint maculis (8), et esse etiam, qui nunc de faece aliquando haurire malint, quam de fonte. quid tamen? apage istiusmodi e plebe ornamenta: quae non minus repudianda sunt, quam ea, quae contra Grammaticorum leges scripta esse reperiamus. utraque enim a recta abeunt norma, nec eorum propria esse potuerunt, qui nobis potissimum imitandi sunt.

(1) Poll. Onom. l. 3. c. 16.

(2) Grut. p. 313. n. 8.

(3) Don. Cl. 4. n. 53.

(4) Murat. p. 659. n. 1.

(5) Art. Cr. L. l. 3. c. 2. p. 180.

(6) Grut. p. 450. n. 1.

(7) Art. Cr. L. l. 3. c. 4. p. 340.

(8) Fabr. p. 705. n. 263. p. 115. n. 291. etc.

## CAPVT VI.

*De iunctura verborum et particulis inscriptionum connexivis*

I. **Q**uamquam multa jam de rerum ac verborum serie atque ordine dicta sunt, quum de singulis inscriptionum generibus ageremus; quaedam tamen supersunt, quae omnium fere inscriptionum communia quum sint, hoc loco exponenda mihi esse putavi. primum enim quosdam esse video, qui in verborum conjunctione nulla se lege teneri existiment, quos, velim, mecum animadvertere, non pauca esse, quae hac ipsa in re a veteribus summa religione servata sint.

Mitto hic, quod jam adnotavi, et Deorum et hominum nominibus eam semper sedem esse tributam, unde si dimoveas, vix alium reperire his locum possis, quo apte collocentur. hoc quoque veteres non minus accurate praestiterunt, ut in apposis adscribendis ordinem quemdam grammaticum simplicemque tenerent. atque his res quasque subnecterent ea maxime dispositione, quae prima postremis dilucide numeroque conjungeret. inscriptionem enim Sutrinam satis implicatam atque abnormem, quam hic subjiciam, exemplum e paucissimis unum esse scias, quae priscis in monumentis jure displiceant (1):

C · LEPIDIO · C · F · PAP ·  
 VICTORI  
 II · VIRO · IVRE · DIC · CVR ·  
 PEC · PVBL · ET · OPERVM · PV  
 BLICORVM · QVIBVS · EX · FIDE  
 REFECTIS · OB · MERITA · EIVS  
 DECVRIONES · ET · AVGVST ·  
 ET · POPVLVS  
 STATVAM · PONENDAM  
 EX · AERE · CONLATO · DECRE  
 VERVNT · QVI · HONORE  
 CONTENTVS · EX · SVO · PO  
 SVIT · ET · CONLATIONEM  
 REDDIDIT

Enimvero si veteres Deorum titulos consideremus, in his quidem *ἐπιθετοῦ* ante postve nomen scripsere; itaque eruditae aetatis lapides habent *Omnipotenti Deo Mithrae* (2), *Virgini Victrici Sanctae Deae Nemese* (3), *Sanctis Draconibus* (4), *Deo Sancto Mercurio Augusto* (5); et contra *Soli Sanctissimo* (6), *Minervae Pacificae* (7), *Dianae Invictae* (8) et pleraque hujusmodi. verum ea apposita, quae substantiva essent, ac vim Deorum numenque praesens significarent, ea semper nomini subiecta sunt; ut *Iovi Depulsori* (9), *Neptuno Adiutori* (10), *Herculi Servatori* (11). neque hisce apposis, ut plerique nunc faciunt, patrios casus praescribere, sed omnino subscribere solebant: cujus moris exempla vulgo occurrent hoc modo: *Fortunae Conservatrici Horreorum Galbiano- rum* (12), *Iunoni Reginae Conservatrici Libero- rum Domus Augustae* (13), *Herculi Comiti Et Conservatori Dominorum Nostro-*

(1) Grut. p. 428. n. 6.

(2) id. p. 34. n. 1.

(3) id. p. 80. n. 5.

(4) Don. Cl. 1. n. 59.

(5) id. Tab. 4. n. 1.

(6) Grut. p. 36. n. 1.

(7) Reines. Cl. 1. n. 228.

(8) Don. Cl. 1. n. 17.

(9) Murat. p. 9. n. 8.

(10) Oederic. p. 183. n. 7.

(11) Vit. Ant. Ben. t. 1. p. 73.

(12) Grut. p. 75. n. 2.

(13) id. p. 25. n. 4.



rum (1), *Diis Deabusque Praesidibus Provinciarum* (2). excipe tamen ex adjectivis nominibus *Potens*, quod fere genitivum casum subsequitur: sic enim efferebant, *Iovi O. M. Tempestatum Divinarum Potenti* (3), *Deo Neptuno Aquarum Potenti* (4), *Mercurio Lucrorum Potenti Et Conservatori* (5).

II. Iam post Deos hominum ciendorum ea ratio fuit, ut nominibus prius fere loco praescriptis apposita omnino subjicerent, tum appositis adderent patrios casus, hoc plane modo (6):

LABERIA . FELICLA  
SACERDOS . MAXIMA  
MATRIS . DEVM . M . I . (7)

sic alia sacerdotia enunciantur: *Magister Collegii Fratrum Arvalium* (8), *Flamen Divorum Vespasiani, Traiani, Hadriani* (9), *Pontifex Tolentinatum* (10). sic et magistratus ac curationes, quotiescunque patrio etiam casu designanda essent: *Quatuorvir Viarum Curandarum* (11), *Praefectus Vigilum Et Armorum* (12), *Curator Pecuniae Alimentariae* (13), *Legatus Augusti, Procurator Augusti Alpium Maritimarum, Proconsul Provinciae Asiae* et sexcenta huiusmodi: nec aliter tituli illi, quos landis caussa adscribebant: *Conservatori Orbis Terrarum, Parenti Patriae, Locupletatoribus Municipii*.

Hanc rationem veteres constantissime retinuerunt, nec fortasse aliud eruditae aetatis exemplum proferri potest, in quo patrii casus praepostere scripti legantur, quam quod e Grutero subjiciam, ut ut suspiciosum ambiguumque (14):

IMP . VESPASIANO . AVG .  
PONT . MAX . TRIB . POT . IIII .  
COS . VIII . DESIG . VIII . P . P .  
SACRARVM . AEDIVM  
RESTITVTORI  
ET . RITVVM . ANTIQVOR .  
CONSERVATORI  
SODALES . TITII

adnotavit scilicet Spanhemius (15), in tribuniciae potestatis numero mendum esse; ea quippe octavum ornatus fuerat Vespasianus, quum Consul nonum est designatus. addo, apud eundem Gruterum bina exstare exempla, quorum alterum exhibet *Conservatori Aedium Sacrarum Sodales Titii* (16), alterum *Conservatori Aedium Publicarum Et Restitutori Aedium Sacrarum Sodales Flavii* (17): ut vix credibile sit, eosdem Sodales Titios alium tenere sequutos ordinem, ac eum, quem et ipsi et alii alibi tenuerunt. nam quod nummum Augusti protulerim (18), in quo legimus *Libertatis P. R. Vindex*, primum non illa communis generis inscriptio est: deinde quum ea verba in orbem scripta sint, aliter fortasse legenda, quam Vaillantius putavit. ac Latinorum certe propriam diu habitam esse hanc casuum et appositorum distributionem, sequioris etiam aevi exempla declarant (19):

(1) Grut. p. 45. n. 7.  
(2) Rein. Cl. 1. n. 4.  
(3) Spon. Misc. p. 76.  
(4) Murat. p. 56. n. 2.  
(5) Don. Cl. 1. n. 168.  
(6) id. ib. n. 28.  
(7) *Magnae Idacae*.

(8) Don. Cl. 9. n. 28.  
(9) id. Cl. 2. n. 51.  
(10) id. Cl. 9. n. 20.  
(11) Rein. Cl. 2. n. 26.  
(12) id. Cl. 6. n. 60.  
(13) Don. Cl. 1. n. 169.  
(14) Grut. p. 243. n. 5.

(15) Diss. 12. p. 474. v. inscr. 77.  
(16) p. 243. n. 7.  
(17) p. 244. n. 7.  
(18) part. 2. cap. 2. §. 2.  
(19) Mall. M. V. p. 251. p. 3.

DIVO • AC • VENERABILI  
 PRINCIPI • CONSTANTINO  
 PATRI • PRINCIPVM  
 MAXIMORVM  
 L • CREPEREIVS • MADALIANVS • V • C •  
 PRAEF • ANN • CVM • IVRE • GLAD •

Porro dativi etiam casus et ablativi, quibus maxime munera indicabantur, post apposita item scripti reperiuntur, ut *Decemvir Stilitibus Iudicandis*, *Triumvir Auro Argento Aeri Flando Feriundo*, *Curator Pecuniae Publicae Exigendae Et Adtribuendae In Ludos*, *Quatuorvir Aedilicia Potestate*, *Procurator Augustorum A Rationibus Vicesimae Hereditatum*, et similia: sed tamen ex apposis ca, quae adjectiva sunt nomina, obliquos fere casus sequuntur, ut *Principi Castrorum Equo Publico Exornato Et Donis Donato* (1), *Omnibus Honoribus In Patria Sua Functus* (2), *Duumviralibus Ornamentis Suffragio Sancti Ordinis Honoratus* (3) *Praefectus Iuri Dicundo Ab Decurionibus Creatus* (4). nomen tantum Principis fere adjectivo subicitur, ut *Curatori Reipublicae Dato Ab Imp. Trajano* (5), *Adlecto Inter Patricios Ab Imp. Caes. Trajano Hadriano Aug.* (6), *Misso Ab Imp. Antonino Aug. Pio Ad Deducendas Vexillationes In Syriam Ob Bellum Parthicum* (7).

Sunt et ΕΠΙΘΕΤΑ laudis caussa substantivis nominibus juncta: quae, si de Principe sermo est, fere nomen antecedunt: itaque legimus passim *Optimo Principi*, *Nobilissimo Principi*, *Optimo Sanctissimoque Principi*, *Optimo Fortissimo Providentissimoque Principi*, et hujusmodi. at ceteris nominibus fere subjeiuntur, ut *Praesidi Abstinentissimo*, *Praesidi Optimo Et Rarissimo*, *Patrono Optimo*, *Patrono Optime Merito*, *Patrono Praestantissimo*, *Amico Incomparabili*, *Civi Munificentissimo*, *Viro Innocentissimo*, *Pantomimo Sui Temporis Primo*: contra legi apud Fabretum, *Bono Civi*, et *Rarissimo Innocentissimoque Cur. R. P. Et Patrono* (8).

Quod si ΕΠΙΘΕΤΩ muneris aut arti designandis nomini conjungeretur, ne tum quidem praebat: excipe qui *Summus Curator* (9) dicebatur, reliqua eodem modo enunciarı videmus: ut *Pontifex Maximus*, *Flamen Perpetuus*, *Frater Arvalis*, *Tribunus Laticlavius*, *Legatus Augustalis*: et *Faber Argentarius*, *Faber Ferrarius*, *Fabri Tignarii*, *Fabri Navales Ostienses*, *Negotiator Sagarius*, *Negotiator Frumentarius*, *Mercatores Frumentarii*, et *Olearii*. adjectiva item nomina, quae substantivis addita conditionem cujusque et gradum in republica declarabant, secundo passim loco scripta reperies: ut illa, *Vir Clarissimus*, *Vir Spectabilis*, *Vir Industrius*, *Vir Egregius*, *Vir Perfectissimus* (10): itaque non bene Muratorius, quum apud Gruterum (11) ei occurrisset *Martinianus V. P. Praeses Provinciae Norici Mediterr.* legendum putavit (12) *Vrbi Praefectus*: quippe veteres litteris P. V. *Praefectum Vrbis*, litteris vero V. P. *Firum Perfectissimum* certo discrimine designabant. tum in castris quoque hanc appositorum rationem valuisse videas: nec solum cognomina legionum nomini ac numero singularum subjecta sunt, sed cohortes etiam et alae militum appositum, quo maxime distinguuntur, extremum referunt: ut *Ala Thracum Herculania*, *Ala I. Tungrorum Frontoniana*, *Cohors II. Gallorum Macedonica*, *Cohors I. Aquitanorum Equitata*, et quae in Gruteri et aliorum voluminibus in promptu sunt. atque in Gruteri quidem συλλογῇ urbis etiam regiones ac vicos eodem modo indicari reperias: idem enim e basi

(1) Don. Cl. 6. n. 20.

(2) Grut. p. 522. n. 9.

(3) id. p. 431. n. 1.

(4) id. p. 195. n. 4.

(5) id. p. 392. n. 7.

(6) id. p. 393. n. 6.

(7) id. p. 471. n. 4.

(8) p. 603. n. 35. p. 118. n. 1.

(9) Grut. p. 431. n. 1.

(10) v. inser. 50.

(11) p. 283. n. 5.

(12) Anecd. Graec. p. 5.

statuae, quam Hadriano Aug. posuere *Magistri Vicorum Urbis Regionum XIII.* quinque regionum vicos descriptos edidit (1), hisce appellationibus: *Vico Camoenarum, Vico Drusiano, Vico Veneris Alnae, Vico Piscinae Publicae, Vico Larum Ruralium*, et hujusmodi.

Porro ut apposita, sic et pronomina primarios fere casus subsequuntur (2):

PRO·SALVTE·ET·GLORIA·IMP·CAES·M·  
AVRELI·ANTONINI·AVG·L·ARRVNTIVS  
PHILIPPVS · ET · Q · CODIVS  
IASON · MERCYRIVS · FILIVS · HVIVS  
D · D ·

alia hujusmodi exempla habes libro primo: *Ob Merita Patris Et Ipsius* (3), *Tribuno Militum Leg. IX. Hispan. Vexillariorum Ejusdem* (4), *Insignibus Virtutibus Eorum* (5), *Limocincti Tribunalis Ejus* (6), *Qui Et Dedicatione Ejus* (7), *Per Legatum Ejus* (8), *In Solacium C. Vallii Postumi Patroni Municipii Patris Ejus* (9), idem tamen pronomem inter similes casus medium aliquando leges, ut *Ob Adsidia Ejus In Hanc Rempublicam Merita* (10): item ante geminum casum, ut *Quod Ejus Ductu Auspicis* (11).

II. Numerorum etiam adscribendorum regulam quamdam veteres habuere, honores quoties quisque cepisset eosdem, numero post magistratum nomina scripto indicabant, ut *Dictator Quintum, Cos. III., Duumvir Iterum, Quinquennalis II.*, quod ab Hagenbuchio etiam animadversum est (12). eodem modo vitae annos numero post nomen expresso demonstrari videmus, *Vixit Annos XXXX.* et appellatione ipsa aliquando praescripta, *Vixit Annos Numero XXX.* (13) quam ad personarum etiam numerum designandum a veteribus usurpatam esse, libro primo admonui (14).

Contia ubi de sestertiis nummis agitur, primum nota sestertii occurrit HS, deinde numerus fere, exempli caussa, XXX. tum N., id est *sestertiis triginta nummis*. si autem totidem sestertium millia significanda erant, nulla post numerum scribi littera solebat, aut N. tantum ante ipsum numerum, *Pecunia N. HS. XX.* id est *numero sestertiorum viginti* (15). ceterum in aliarum rerum numero prodendo de notarum ordine ac loco minus veteres laborarunt: id ex Pompeii disces inscriptione (16), in qua notarum aliae ante nomina scriptae sunt, aliae vero subsequuntur. nisi quod ratum illud fixumque erat, ut ordinalia quae vocant nomina a numero orta, quibus maxime legiones et cohortes distinguere solebant, inter nomen cujusque et cognomen media collocarent: sic enim vulgo cientur, *Legio I. Adjutrix, Legio II. Adjutrix Pia Fidelis, Legio V. Macedonica, Cohors I. Aelia Dacica, Cohors XII. Urbana, Cohors V. Antoniniana* et hujusmodi.

III. Varios jam casus, varia nomina et apposita, nisi certis orationis particulis utamur, raro conjungi recteque componi posse, manifestum est. nec tamen iis omnibus usi veteres sunt, quas poëtae oratoresque licentius usurparunt. primum enim iis fere abstinerunt, quae inutiles essent. itaque quum Deos suos apposis ornarent, nullo ea nexu jungebant (17):

(1) Grut. p. 250.

(2) Waleh. Marm. Stroz. p. 13. n. 14.

(3) v. inser. 85.

(4) v. inser. 101.

(5) v. inser. 95.

(6) v. inser. 84.

(7) v. inser. 252.

(8) v. inser. 251.

(9) v. inser. 100.

(10) v. inser. 86.

(11) v. inser. 88.

(12) Ep. Ep. p. 330. v. c. 4. hujus

partit. n. 5.

(13) Hagenb. ib. p. 495.

(14) ad inser. 121.

(15) V. N. ad inser. 108.

(16) inser. 32.

(17) Grut. p. 50. n. 3.



HERCVLI · VICTORI  
 POLLENTI · POTENTI  
 INVICTO · D · D · L · M · (1)  
 C · VLPIVS · FRONTO  
 VIATOR · Q · (2)  
 DEDIC · III · K · IVL ·  
 L · VETTIO · PAVLLO  
 T · IVNIO · MONTANO COS · (3)

iidem tamen, si plures Dii nominandi erant, ne quis unum multis nominibus Deum esse putaret, non raro particula ET alterum ab altero distinguebant (4):

SILVANO · SANCTO  
 ET · MERCVRIO  
 ET · LIBERO · PATRI  
 SACRVN  
 M · VARGVNTEIVS · M · F ·  
 PAL · AVGVRIVS  
 SVA · PECVNIA · D · D ·  
 III · IDVS · AVGVST ·  
 PETRONIO · TVRPILIANO  
 ET · CAESONIO · POETO · COS · (5)

sic et nomina dedicantium enunciabant, si plures essent: nisi quod primum aliquando recto casu, alterum ablativo efferebant, particula CVM praeposita, et verbis nihilominus plurali numero usurpatis (6):

IOVI · O · M ·  
 FORTVNAEQVE  
 MELIORI · AVG ·  
 ET · DIS · DEABVS  
 QVE · COMMVN  
 IBVS · M · GELLIVS  
 STEPHANVS · IVN ·  
 CVM · STEPHANO · PATRE  
 DOMV · TERTIANA · EX  
 DIRVTION · RESTIT · DEDICAVNTQ ·

Magistratus autem, curationes, gradus militares, sacerdotia sine ulla conjunctione recenseri item solebant; atque idem potius nomen ter quaterque insertum est, quam ulla nexus particula illius loco recepta (7):

C · IVNIO · C · F · QVIR ·  
 FLAVIANO  
 PRAEF · ANNONAE  
 PROC · A · RATIONIBVS · PROC ·  
 PROVINCIARVM · LVGDVNENSIS  
 ET · AQVITANICAE · PROC · HEREDITAT ·  
 PROC · HISPANIAE · CITERIORIS  
 PER · ASTVRICAM · ET · GALLAECIAM  
 PROC · ALPIVM · MARITIMARVM  
 PROMAGISTRO · XX · (8) HEREDITATIVM  
 TR · MIL · LEG · VII · GEM · PONTIF · MINORI  
 MERCATORES · FRVMENTARI  
 ET · OLEARI · AFRARI

(1) *Donum Dedit Libens Merito*,

(2) *Viator Quaestorius*,

(3) Cos. an. Varr. 921.

(4) Grut. p. 62. n. 7.

(5) an. Varr. 814.

(6) Grut. p. 3. n. 9. v. inscr. 42. l. 1.

(7) Grut. p. 426. n. 5.

(8) *Vicesimae*.

verum si quis rei uni munere gemino praeesset, vel etiam bina negotia unius magistratus nomine administraret, tum vero et munera et negotia connexivis particulis copulabantur (1):

TI · IVLIO · AVG · L ·  
OPTATO · PONTIANO  
PROCVRATORI · ET  
PRAEFEC · CLASSIS  
TI · IVLIVS · TI · F · FAB ·  
OPTATVS · II · VIR ·

(2)

L · CASVRIO · L · F ·  
CLV · (5) SPECVLATORI ·  
AED · IIII · VIR · I · D · Q · ARK ·  
PVBL · (4) ET · PEC · ALIMENTAR ·  
DEFENSORI · R · P · CVR · ANN ·  
POPVLO · PRAEBITAE  
COSCONIVS · SECVNDINVS  
ET · SAFINIA · IVSTINA · ET · COSCONI  
GRATVS · SECVNDINVS · ET · IVSTINVS

ut autem hic in personarum etiam enumeratione particula ET usurpata est, sic eadem usi veteres plerumque, quum diversos civitatis ordines nominarent (5):

C · IVLIO · AVGVSTI · L ·  
HELENO  
EX · DECRETO · DECVR ·  
MVNICIPII · ALETRINAT ·  
ET · POLLICITATIONE · SEVIR ·  
ET · MVNICIPVM · ET · INCOLAR ·  
OB · MERITA · EIVS

itaque nuper, quum Bononiae non unius generis conditionisve homines pecuniam ad Zannotti simulacrum contulissent, in ejus, quam condidi, inscriptione particulam ET bis inserendam putavi, ne cui forte ambigua designatio illa videretur:

FRANCISCO · MARIAE  
ANDR · F · CAVAZONIO · ZANOTTO  
CIVI · BONONIENSI  
DOCTORI · DECVRIALI · DISCIPLINAE · MORVM · TRADENDAE  
SYMMO · SCRIBAE · AB · ACTIS · INSTITVTI · MARSILIANI  
PRAESIDI · EIVSDEM  
POETAE · ORATORI · PHILOSOPHO  
QVOD · NOMINIS · BONONIENSIS · GLORIAM  
DOCTRINAE · SYAE · LAVDE · AVCTAM  
LITTERARVM · ETIAM · MONVMENTIS  
POSTERITATI · PROPAGARIT  
AMICI · VETERES · ET · COLLEGAE  
ET · AVDITORES  
AVCTORI  
STVDIORVM · OPTIMORVM  
ANNO · M · DCC · LXXVIII ·

(1) Grut. p. 423. n. 8.

(2) id. p. 386. n. 4.

(3) Cluentina tribu.

(4) Quaestori Arcae Publicae.

(5) Grut. p. 422. n. 3. v. inser. 79. 81. 84. etc.

Ad summam conjunctio ab antiquis libenter recepta, quotiescumque ad perspicuitatem utilis esset: magis vero particulam ET probarunt, quam AC aut ATQVE. nec saepe iis nisi particulis, quae αὐξισιν sapiunt; quippe inscriptionem illis plus aequo producere, ac paene inflare videbantur. sed si quando adsciverunt, ita circumloquutionem amplexi sunt, ut περιτρολογίαν tamen vitarent (1):

DIVO · ANTONINO · AVG ·  
 SENATVS · POPVLVSQVE · LAVRENS  
 QVOD · PRIVILEGIA · EORVM · NON  
 MODO · CVSTODIVERIT · SED · ETIAM  
 AMPLIAVERIT · CVRATORE  
 M · ANNIO · SABINO · LIBONE · C · V ·  
 CVRANTIBVS · TI · IVLIO · NEPOTIANO  
 ET · P · AEMILIO · DONATIANO · PRAET ·  
 II · Q · Q · LAVRENTIVM

Videas etiam, particula ET rejecta, CVM placuisse, ac simul verbum plurali numero adscriptum esse, perinde quasi casibus rectis jungeretur duobus (2):

DIS · MANIBVS · SACRVM  
 VIVENIAE · L · F · HELIADI  
 VIXIT · ANNIS · XVI · MENSIB · VI ·  
 FECER · HELIVS · AFFINIANVS · PVBLICVS  
 AVGV RV M · CVM · SEX · PSYCHE · CONIVGE  
 FILIAE · PIEN TISSIMAE

rursus pro ET usurpatum aliquando est ITEM (3):

IMP · CAES · DOMITIANO · AVG ·  
 GERMANICO · XV ·  
 M · COCCEIO · NERVA · II · COS ·  
 THALLVS · AGITATOR · L · AVILLI · PLANTAE · SER ·  
 DOMINVM · SILVANVM · DE · SVO  
 POSVIT · ITEM · DEDICAVIT

nec raro conjunctionis caussa, praesertim si oratio longiuscula esset, IDEM interponebant, quo scilicet posteriora quoque ab eodem viro gesta esse admonerent: sive etiam ut multa ab uno perfecta esse apertius ac luculentius demonstrarent (4):

C · TORASIVS · C · F · HOR · SEVERVS · IIII · VIR · I · D ·  
 AVGV R · SVO · ET · P · MECLONI · PROCVLI · TORASIANI · PONTIF ·  
 FILI · SVI · NOMINE · LOCO · ET · PECVNIA · SVA · FECIT · IDEM  
 AD · CELEBRANDVM · NATALEM · FILI · SVI · IN · PVBL · DEDIT · IIS · CCL ·  
 EX · QVORVM · REDITV · III · K · SEPT · OMNIBVS · ANNIS · DECVRIONES · IN  
 PVBLICO · CENARENT · ET · MVNICIPES · PRAESENTES · ACCIPERENT  
 AERIS · OCTONOS · ITEM · DEDIT · VI · AVG · ET · COMPITALARIBVS  
 AVG · ET · MAG · VICORVM · HS · CXX · VT · EX · REDITV · EIVS · SVMMAE  
 EODEM · DIE · IN · PVBLICO · VESCERENTVR · HVNC · OB · MERITA · EIVS  
 ERGA · REMPVBLICAM · ORDO · DECVRIONVM · PATRONVM  
 MVNICIPI · ADOPTAVIT

alias, clari viri nomine inscripto, et honore monumenti indicato, narrationem subnectebant, initio facto ab pronomine HIC: cujus moris exempla habes libro primo (5).

V. Ceterum haec in Imperatorum titulis non occurrent, quorum oratio una ac perpetua esse solet. quin et privatis plerumque curae fuit, ut eodem modo inscriptionem

(1) Fabr. p. 682. n. 67. Grut. p. 256.  
 n. 7.

(2) Fabr. p. 356. n. 505. v. inscr. 42.  
 (3) Fabr. p. 274. n. 158.

(4) Grut. p. 179. n. 3.  
 (5) v. inscr. 105. 106. etc.



ad ipsum exitum sermone nunquam interrupto deducerent (1): idque interdum in epitaphiis quoque servatum esse reperies; quidam enim vitae etiam aut matrimonii annos relativo pronomine QVI extulere, ne quid scilicet in tota inscriptione disjunctum relinquerent (2):

D · M · S ·  
TI · CLAVDIO · SALVIO · ET  
RVBRIAE · CHRYSIDI · F ·  
TI · CLAVDIVS · CHRYSIPPVS  
PARENTIBVS · B · M ·  
QVI · VIXERVNT · VNA · ANNIS · L ·

alii eodem pronomine usi in obliquos casus declinato, ut res alias sententia continuata subnecterent (3):

DIIS · MANIBVS  
TI · CLAVDI · AVG · LIB ·  
THALETIS · VINICIANI  
NOMENCLATORIS  
A · CENSIBVS  
THALLVS · ET · IANVARIA  
LIB · DE · SVO · POSVERVNT  
LOCO · LEGATO · AB  
IVLIO · ALCIDE · COLL · (4) EIVS  
CVIVS · HERES · FVIT

atque hoc pacto addebant in honorariis inscriptionibus, quae quisque in statuae suae dedicatione civibus divisisset: nihil enim crebrius in municipalibus monumentis, quam illa legimus: *Cujus Dedicatione Decurionibus Sportulas Et Municipibus Epulas Divisit* (5), atque alia hujusmodi.

At si res gestae, si magnae virtutes, si praeclara beneficia prodenda erant, alias fere particulas, easque feliciter usurparunt. hae sunt QVOD (6), AD (7), VT (8), EX (9), OB (10). atque has quidem magno olim usui in dictionis ornatae exemplis fuisse facile agnosces: nam in iis, quae simplicis dictionis sunt, aliae saepius occurrunt, PRO, IN, CVM, SVB et similes harum, quae fere longam post se orationem non requirunt. cujusmodi illa sunt *Pro Salute Arriae Suae* (11), *In Memoriam Minei Prisci* (12), *Clypea Cum Imaginibus* (13), *Sub Quorum Tutela Augusti Militant* (14), *Per Collegium Pontificum* (15), *De Senatus Sententia* (16). nec tamen conjunctionibus istis ad inscriptiones condendas ita opus est, ut nullae sine illis justae perfectaeque esse possint. nam si res gestae, aut causae monumentorum sexto casu effciantur, sive simplici sive ornata dictione utaris, egregiae saepe inscriptiones atque optimae existant: quarum sane exempla quaedam primo item libro (17) prolata sunt.

Quid vero, si utramque aliquando rationem sequaris, orationemque primum conjunctione aliqua suspendas, deinde sexti casus figura protrahas, ut tandem numerose desinentem apta sententiae terminatione concludas? id equidem usui tibi futurum arbitror, inceptumque commode successurum, quotiescumque uno in titulo res inter se diversae jungendae fuerint. sic enim facile illud adsequere, ut inscriptionis sententiam una perpetuaeque oratione efferas. atque hoc ipsum expertus dico: datum enim mihi argu-

(1) Fabr. 267. n. 108. v. inser. 298.  
237. etc.  
(2) Fabr. p. 267. n. 108. v. inser.  
166. etc.  
(3) Grat. p. 599. n. 4.  
(4) *Colliberto*.  
(5) Fabr. p. 664. n. 514.

(6) v. inser. 47. 88. 89. 90. 92.  
(7) v. inser. 91. 273.  
(8) v. inser. 277.  
(9) v. inser. 55.  
(10) v. inser. 94. 95. 99.  
(11) v. inser. 14.  
(12) v. inser. 13.

(13) v. inser. 18.  
(14) v. inser. 10.  
(15) Grat. p. 13. n. 11.  
(16) id. p. 43. n. 5.  
(17) v. inser. 23. 32. 33. 42. 72.

mentum nuper est inscriptionis satis implicatum, quod fuit huiusmodi: Pium vi. Pont. Max. ne praeclara pictorum, statuariorum, architectorum monumenta penitus amitterentur, Bibliothecae Vaticanae e proximo satis magnum conclave adtribui jussisse, in quo ea volumina adservarentur, quae ibidem non exiguo jam numero ex egregiis veterum recentiumque operum exemplis compacta sunt, quaecumque hactenus aereis incisa tabulis et inde in chartis efficta habemus. porro consilium et munus singulare optimi Principis sic exposui:

PIVS • VI • PONT • MAX •  
 ANNO • SACRI • PRINCIPATVS • SEXTO  
 VT • MEMORANDA • ARTIFICVM • EXCELLENTIVM • INVENTA  
 LINEARIS • PICTVRAE • EXEMPLIS • EXPRESSA  
 POSTERITATI • PROROGARET  
 AVCTIS • BIBLIOTHECAE • VATICANAE • SEDIAEVS  
 NOVOS • LAVDATORVM • DIAGRAMMATVM • CODICES  
 SVA • IMPENSA  
 INSTITVENDOS • ORDINANDOSQVE • CVRAVIT

VI. Reliquum est, ut quae hactenus de junctura verborum ac de connexivis particulis dicta sunt, nemo tamquam levia et exigua contemnat. parum certe vidisse dixerim, qui non ab his titulos saepe colorem ducere, atque ad antiquorum formam perfici animadverterit. quid, quod recentiorum inscriptiones quum offendimus, si quid praeter veterum ordinem ac dispositionem initio peccatum est, cetera jam praetereuntes negligimus, nec meliora esse putamus? quod perturbatio nempe illa indicio sit, scriptorem, quicumque fuerit, ex iis non fuisse, qui de stilo inscriptionum ex antiquis exemplis praecepta hauserint. at contra si qua inscriptio, non illa quidem optima, sed tamen recte inchoata, ab antiquorum norma abluere non videtur; eam quisque ab erudito viro prodiisse non dubitat, dignamque esse censet, quae tota perlegatur. quare qui rectum conjunctionum usum et priscam verborum juncturam studiosius retinuerit, hoc etiam facile adsequatur, ut ipse eruditi famam occupet, inscriptiones a stili veteris forma commendentur.

Neque ego tamen, quae plerisque inscriptionibus convenire dixi, ea omnia in monumentis etiam sacrorum et in fastis quibuslibet et in constitutionibus publicis accuratissime servanda semper esse statuerim: quae veteres quoque liberius paullo ac solutius scribenda putaverunt. id tute videris, et usu maxime atque imitatione definieris. equidem quae sint eorum propria et sollemnia quaeque arbitrii nostri et iudicii, satis jam superius exposui.

## CAPVT VII.

*De figuris inscriptionum*

I. Valde errant profecto, qui nullam sive verborum sive sententiarum figuram inscriptionibus convenire censent; at graviore in errore versari puto, qui omnes inscriptiones figuris ornandas pluribus distinguendasque arbitrantur. facilius enim probabiles inscriptiones ab illis fient, qui figurarum ornatum repudient omnem, quam ab iis, qui eas studiose et avide consecretur. has certe ex quo avi nostri aucupari coeperunt, nullum tolerabilem titulum nobis prodidere: quorum tamen majores, rejecta poetarum licentia, antiquam plane inscriptionum simplicitatem multis expressam monumentis reliquerant.

Enimvero qui optima quaeque veterum exempla perlegerit, et diu singula eorum genera considerarit, ita figuris in inscriptione locumtribuendum existimet, ut plerasque omnino rejiciat, aliis parce nec sine causa utatur, quasdam ultro amet ac licentius identidem internisceat. nam et nullam ferme e multis, quae avis nostris placuere, in germanis veterum exemplis se invenisse meminerit, et alias in plerisque exemplis desiderari jam noverit, et quae modestae aut graves aut tenues sunt, eas maxime antiquis probatas esse didicerit.

Primum igitur eas sententiarum figuras, quae poeticae plane sunt, aut oratoris quodam animi impetu concitati propriae videntur, inscriptioni minime aptas esse, veteres putaverunt: neque enim inter antiqua exempla numeres nescio quas inscriptiones plane ineptas, quae tamen eruditorum quorundam indulgentia diu inter priscas probasque sedem impune habuerunt. hujusmodi sunt, quae in Dacia repertae dicuntur, quibus olim Leunclavius, quod Trajani res gestas celebrarent, commentarios in Dionem suos (1) ornari nonnihil posse existimavit: at nemo sanus non eas commentitias habeat, et funditus omnes repudiet: esto, Gruterus etiam adsciverit, nec omnes in suspicionem vocaverit sublestae fidei; sero illae, atque unius omnes, nec tamen Itali hominis stilo conscriptae sunt: qui haud rectis innutritus studiis, Latinam dignitatem ignorabat, nec Trajani aevi inscriptiones viderat, quibus nihil grandius fere aut elegantius usquam reperies. pudet me vel unum ex illis exemplum afferre; sed tamen non est omitendum, quo tirones melius noseant, quid improbemus (2):

FORTVNAE · AVG · OMNIPOTENT ·  
 VBI · ERAS · RHAMNVSIA  
 VBI · ERAS · QVANTVM · ABFVIT  
 NE · ROMA · LVGERET · SED · VIVIT  
 TRAIANVS · VE · TIBI · DECEBALE  
 MILSS · LEG · VI · ET · XII · G ·  
 DEVOTIS · CAPITIBVS

ex eodem genere Hispaniae quaedam sunt satis notae, e quibus digna haec, quae familiam ducat (3):

(1) p. 1040.

(2) Grut. p. 75. n. 8. v. p. 25. n. 3.

et p. 105. n. 5. etc.

(3) Grut. Spur. p. 2. n. 1.



PALLADI · VICTRICI · SACRVM  
 HIC · HOSTIVM · RELIQVIAS · PROFLI  
 GAVIT · CATO · VBI · ET · SACELLVM · MIRO  
 ARTIFICIO · STRVCTVM · ET · AEREAM  
 PALLADIS · EFFIGIEM · RELIQVIT  
 PAREANT · ERGO · ET · NOSCANT · O  
 MNES · SENATVS · ET · POPVLI · ROMANI  
 IMPERIVM · ET · DEORVM · NVMI  
 NE · ET · MILITVM · FORTITVDINE  
 ET · TVERI · ET · REGI

hanc tamen inscriptionem, quod miror, Noghera vir doctus tamquam priscum exemplum attulit (1), ut figuratam dictionem tironibus repraesentaret.

Porro antiqua exempla non modo figuris hujusmodi immunia sunt, sed iis etiam carent, quae in verborum notatione versantur: e Dacia enim est atque e Latii officina, quam hic subijciam, quamquam Fleetwoodus (2) in Danubii ponte, Trajani aetate, fixam putavit, et inter germanas inscriptiones recepit:

PROVIDENTIA · AVG · VERE · PONTIFICIS  
 VIRTVS · ROMANA  
 QVID · NON · DOMET  
 SVB · IVGV  
 ECCE · RAPITVR · ET · DANVIVS

Varronis scilicet notationem recens tituli hujus scriptor legerat, quae hujusmodi est (3): *Sacerdotes universi a sacris dicti Pontifices, ut Q. Scaevola Pontifex Maximus dicebat, a posse et facere; ego a ponte arbitror: nam ab iis Sublicius est factus primum et restitutus saepe, quod eo sacra et uls et cis Tiberim non mediocri ritu fiant.* nec vero, si quod aliud exemplum lusibus hujusmodi aut agnominationibus inspersum occurreret, non id recens habeas et commentitium: quippe haec Latini partim Grammaticis quaerenda linguebant, partim sibi ad jocularis sermones reservabant; neque illi ad hunc gustum ea scribenda arbitrabantur, in quibus et serio et saepe publice atque etiam ad posteros loquerentur.

II. Sed tamen non omnes sive verborum sive sententiarum figurae a veteribus repudiatae: quin aliae atque aliae apparent in exemplis bene multis, e quibus dictio illa exstitit, quam singularem appellavimus; quae multis fortasse opportuna atque percommoda videatur, qui ingenio nempe dare aliquid, et a communi norma plus aequo etiam recedere solent. verum ne in hac quidem Latini illi veteres voluptati magis, quam rationi indulgere: ut in ipsa licentia modum plane servasse videantur.

Graecorum erat mos, ut ipsas Deorum suorum effigies, quas dedicabant, loquentes inducerent: itaque in templo, quod Pisis Elei extruxerant, ad Iovis pedes, ut ait Pausanias (4), haec legebantur,

ΦΕΙΔΙΑΣ · ΧΑΡΜΙΔΟΥ · ΥΙΟΣ · ΑΘΗΝΑΙΟΣ  
 Μ' ΕΠΟΙΗΣΕ

hunc et Latini morem aliquando sequuti, quod jam adnotavimus (5). sed ea magis forma delectati, quae auctorem monumenti primae personae figura loquentem faceret, sermone etiam ad Deos converso: ut hoc in exemplo (6):

(1) ad inser. Ferrar. p. 24.

(2) p. 65. n. 2.

(3) de L. L. l. 4. c. 15.

(4) lib. 5. c. 10. *Phidias Charmidae  
 filius Athenicnsis me fecit.*

(5) v. inser. 60.

(6) Grut. p. 82. n. 2. v. inser. 57. 53.

TE · TIBI  
VNA · QVAE  
ES · OMNIA  
DEA · ISIS  
ARRIVS · BAL  
BINVS · V · C ·

statuam nempe Isidis Balbirus ipsi dicavit Isidi: nam simulacra ipsa Deos appellabant, uti superius animadvertimus.

Eodem modo in epitaphiis loquentes inducuntur, qui tumulum condiderunt (1):

ASCLEPIADES  
VALERIAE · SABINAE  
CONIVGI  
BENEMERENTI  
ANIMAE · INNOCENTI  
QVAE · VIXIT · MECVM  
A · XXV · M · III · D · X ·  
MONVMENTVM  
FECI

iidemque sepultos adloquuntur, aut sepulti ipsi garriunt aliquid, aut viatores compellant (2). quin viator interdum salutem primus sepulto dicit, tum hic viatorem resalutat (3):

D · M · S ·  
MACEDO · HAVE  
BENE · VALEAS  
QVISQVIS · ES  
FECER · C · MODESTVS  
MACEDO · PATRI  
PIISSIMO · ET  
FORTVNATA  
CONIVX · CVRANTE  
RVFINO · COLLIBERTO

Iam acclamationes atque omina cum in epitaphiis, tum aliis in titulis legimus (4), in quibus verbum fere subaudiendum est, nihil in his tamen translatum audacius, nihil longius petium, quam res ipsa ferat: ut in singulari illa dictione quotquot exstant exempla, forma quidem aliquid, re nihil ab aliis dissentiant. saepe autem uno tantum rerum ordine differunt, variatis scilicet casibus, ut quae primo loco in aliis leguntur, illic extrema sint, et verbum passiva potius, quam activa significatione usurpetur. hoc modo confectae aliquando historicae inscriptiones, quas inter egregiam dixeris, quae nuper in agro Faleriensi reperta, Romam advecta est:

(1) Grut. p. 758. n. 5. v. inscr. 147.  
177. etc.

(2) v. inscr. 151. 152. etc.  
(3) Grut. p. 732. n. 13.

(4) v. inscr. 150. et not. ad inscr. 441.

(1)

IMP. CAESARE  
 TRAIANO · HADRIANO  
 AVG. III · COS ·

VIA · NOVA · STRATA · LAPIDE  
 PER · MEDIVM · FORVM · PECVAR ·  
 A · SVMMO · VICO · LONGO · AD  
 ARCV · IVNCTVM · CAPITOLIO  
 EX · CONLATIONE · MANIPRETH  
 POSSESSORVM · CIRCA · FORVM · ET · NE  
 GOTIANTIVM · ITEM · COLLEGIA · QVAE  
 ATTINGVNT · EIDEM · FORO  
 II · VIRATV · . . . . .  
 . . . . .

nolim, illa nimium displiceant, *Item Collegia Quae Attingunt Eidem Foro*: Graecorum haec more scripta videri possint, ut si diceres *Item Ex Conlatione Collegiorum, quae Collegia Attingunt Eidem Foro* id est *ἐκπτεται τῇ ἀγορᾷ*: ejusmodi multa Latinis poetis placuerunt. in fine nomina duumvirorum vetustate deleta sunt.

Vt autem hic quisque quarto versu subaudiet EST, sic in aliis alia verba omissa videmus, quae tamen nemo impensius requirat: idcirco nuper in titulo viae suburbanae ad Velitras nullum ultra haec verbum necessario addendum putavi:

ANNO · M · DCC · LXXXVIII ·  
 EX · DECRETO · ORDINIS  
 VIAE · LIMITES  
 FERIATIS · CIVIBVS  
 AD · APRICANDVM  
 PROLATI

tum verba alibi si minus omissa, at praesenti potius tempore, quam praeterito (2), vel primae potius, quam tertiae personae figura usurpantur (3). in iisdem exemplis, *Canusini more bilinguis*, latine iidem aliquando et graece loquuti in epitaphiis potissimum, quibus moralem nempe sententiam subscripsere. honorariae vero inscriptiones subnexae saepe habent narrationem aliquam a demonstrativo pronomine fere inchoatam, in qua tamen sine pigmentis fucoque puerili res singulas enumerari, magis, quam celebrari dixeris: cujus moris exempla libro primo invenies non pauca. addo, et sacris aliquando narrationes hujusmodi satis longas subscriptas esse: quorum eximium hic exemplum subijciam (4):

(1) in Mus. Vatic. v. inser. 251. 252.  
 254.

(2) v. inser. 256. etc.  
 (3) v. inser. 110. etc.

(4) Grut. p. 256. n. 10.



## DIVO · ANTONINO

PIO

C · EGNATIVS · FESTVS · AEDIL · II · VIR ·  
 HVIC · CVM · PLEBS · VRBANA · LVDS · PVB  
 LIC · EDENTI · AD · STATVAM · PONENDAM  
 PECVNIAM · OBTVLISSET · IS · HONORE  
 CONTENTVS · IMPENSAM · REMISIT  
 ET · IMPETRATA · VENIA · AB · ORDINE  
 PERVSINOR · OPTIMO · MAX · Q · PRINC ·  
 DE · SVA · PEC · POSVIT · CVIVS  
 OB · DEDICATIONEM · DARI · IVSSIT  
 AB · HEREDE · SVO · DECVRIONIB ·  
 SING · HS · III · N · PLEBI · HS · II · N ·

L · D · D · D ·

Atque haec maxima sunt, quae Latini, quum soluti legibus, exspatiari latius vel-  
 lent, permissa sibi atque integra esse putaverunt. catenus scilicet Latinarum litterarum  
 et liberae scriptionis patere fines; quod ultra progredieretur, a Latino more atque a na-  
 tiva venustate abhorreere arbitrabantur.

III. Venio ad figuras, quas communis etiam recipit stilus. eae paucae omnino, ac fere  
 in verbis consistunt. primum quidem, ut res alias, sic aedificia aliquando non propriis  
 sed aliunde petitis nominibus apte appellarunt: ut apud Beneventanos Vidijs Pollio,  
 qui curiam a se exstructam *Caesareum* nominavit (1), et Romae Augustus, qui sepul-  
 crum Caesarum, quod propter Tiberim aedificarat, *Mausoleum* dici voluit (2). sic Ro-  
 mae item ingenuarum artium ludus ab Hadriano constitutus *Athenaeum* dictus est (3).  
 atque ille idem in Tiburtina villa plerisque locorum Graeca nomina imposuit. in qua  
*Lyceum*, *Academiam*, *Prytaneum*, *Canopum*, *Poecilen*, *Tempe* fuisse scimus (4):  
 quemadmodum quaedam iisdem nominibus loca in Tusculano suo Tullius habuerat.

Translata quoque veteres quaedam usurparunt laudis causa, ut quum Imperatores  
 suos *Parentes Patriae* appellarunt, Augustus vero *Matres Castrorum Senatus Ac  
 Patriae* (5). cave tamen, antiqua censeas, quae Emeritae vetusto in lapide inscripta  
 feruntur (6):

IMP · TITVS · CAES · VESP ·  
 AVG · PON · M · TRIB · P · V ·  
 COS · VIII · P · P · GENERIS  
 HUMANI · AMOR · ET · DE  
 SIDERIVM · ETIAM · VIVENS  
 III ·

quorsum haec quaeso in milliario? aut quid sapiunt? inepte omnino atque intempestive  
 a Svetonio haec sumpta detortaque, qui Titi vitam sic inchoavit, *Titus cognomine pa-  
 terno, amor ac deliciae generis humani*.

Nec tamen pro ipso nomine rei aliquando definitionem descriptionemque non re-  
 cte usurpes: ut quum veteres pro *Natali Aug.* dixere *Qua Die Eum Saeculi Feli-  
 citas Orbi Terrarum Rectorem Edidit* (7): vel quum pluvialium imbrium rivos vo-  
 cavere *Aquam Caelestem Dilabentem Montibus* (8), et similia. itaque nuper quum  
 mihi quodam in titulo appellanda *Medicina* esset, hanc, Celsi usus periphrasi (9), *Ar-  
 tem Salutis humanae praesidem* nuncupavi:

(1) v. inscr. 234.

(2) v. inscr. 279.

(3) Viet. in Hadr.

(4) Spart. in Hadr. c. 26.

(5) Maff. M. V. p. 312. n. 4.

(6) Grut. p. 155. n. 3. Nogher. ad in-  
scr. Ferrar. p. 24.

(7) Grut. p. 229.

(8) id. p. 180. n. 2.

(9) in praef. p. 11. ed. Coru.

PLO · VI · PONTIFICE · MAXIMO  
 PRAEFECTVS · ET · CVRATORES · VALETVDINARI  
 DEPOSITORVM  
 EX · AVCTORITATE  
 IOAN · BAPTISTAE · REZZONICI · CARD · PATRONI  
 SCHOLAM · ANATOMICAM  
 ARTI · SALVTIS · HVMANAE · PRAESIDI  
 APERTAM · EXCVLTAMQVE  
 INSTRVMENTO · OMNI · ORNANDAM · CVRAVERVNT

has, opinor, periphrases, si neque inanis sententia subsit, neque longa oratione content, jure nemo rejiciat: quod plane dignitatem inscriptioni afferre videantur. sed nisi modum retineas, vereor, ut doctis eas viris probare possis. adnotatum id jam a Longino (1), periphrasim in oratione, nisi moderate et scienter usurpes, ceteris figuris multo esse periculosiorem: εὐδὺς γὰρ, inquit, ἀβλεμὲς προστιπτεῖ, κοινολογίαστέ οἷον, καὶ παχυτάτῃς, quidquid nempe circumloquutione immodice auxeris. quod si oratori etiam obesse id potest, quanto nobis magis, quorum scriptio tam angustis finibus continetur! nullis certe veterum exemplis tueri se ille possit, qui periphrases in titulis amet longiores.

Saepius autem συνεκδοχῇ sive ἐλλειψίς occurret, ut TRIB · POT · pro *Tribunicia Potestate Ornatus*, EQ · PVB · pro *Equo Publico Honoratus*, AGRIPPINA · GERMANICI pro *Agrippina Germanici Vxor*, TRIB · MIL · A · POPVLO (2) pro *Tribunus Militum A Populo Creatus*. nonnulla etiam, quia non minus, quam haec, sermone ipso trita erant, paucioribus explicata vocabulis sunt, quam rei natura posceret: ut illa, *Ornatus Sententia II. Virali* (3) id est *Cui tributum, ut Sententiam in curia dicere possit inter Duumviralicios*: quod in honorariis inscriptionibus legimus, *Publice*, ut significaretur, statuam et auctoritate et pecunia publica esse constitutam (4): tum quae in epitaphiis saepissime scripta sunt, IN · FR · P · X · IN · AGR · P · XII ·, quibus indicabant, locum religiosum tot pedes quaquaversum patere. sic in honoraria Vespasiani inscriptione paucis verbis magistratuum notata incuria est (5): *Quod Vias Urbis Negligentia Superiorum Temporum Corruptas Impensa Sua Restituit*.

Nec *Denominationem* in titulis raro veteres usurparunt. *Vicus* pro *Vicani*, *Colonia* pro *Coloni*, *Municipium* pro *Municipes*, vulgare est. *Domus* etiam aliquando pro ipsa familia legitur (6):

DOMVS · C · VALERI · HERMAISCI  
 TEMPLVM · SERAPIS · SCHOLA · (7)  
 FAVSTINIANA · FECIT · C ·  
 VALERIVS · HERMAISCVS · DEDIC · ID ·  
 DEC · BARBARO  
 ET · REGVLO · COS · (8)

quod ampliori etiam significatione Tullius de Academicorum secta veteri et nova (9), Seneca de omni familia philosophorum (10) usurparunt. quare eodem modo appellari posse duxi, qui Romae publica auctoritate rem familiarem administrant Nosocomii Rochiani, quo scilicet praegnantibus mulierculis valetudinaria ad puerperium patent, inscriptionemque hujusmodi rogatus olim confeci, quae tamen rejecta est:

(1) de sublim. n. 29.

(2) v. inser. 82. 248.

(3) v. inser. 134.

(4) v. inser. 112.

(5) v. inser. 89.

(6) Don. Cl. 2. n. 10.

(7) nempe *In Schola*.

(8) an. Varr. 910.

(9) Acad. l. 1. c. 4. n. 13.

(10) epist. 29. sub fin.

Quae denum figurae verborum sunt paullo luculentiores, et apertiores habent artem ac magis affectatam, eae, si gradationem exceperis, omnes repudiatæ: atque ipsa etiam gradatione sic usi veteres, ut oratorum vim numerosque vitarent. exemplo esse potest pulcherrima illa Pompeii Magni inscriptio in delubro Minervæ (1): vix enim in ea eminet figura, quamquam rerum gestarum enumeratio ita est instituta, ut a magnis ad maiora semper progressio fiat. nam enunciata confecti belli diuturnitate, hoc primum indicatur, quot captæ aut depressæ hostium naves: tum quot oppida, quot castella in fidem recepta, denique quanta orbis terrarum pars imperio adjecta sit: atque ob hæc tandem delubrum, quod tantus ille dux voverat, merito Minervæ dicatum dicitur. enimvero id Pompejus hac ratione adsequutus est, ut qui titulum legeret, non verba sibi, sed res propositas esse intelligeret, quas admiraretur. in his vero quam cavendum est, ne illa quoque enumeremus, quæ ob humilitatem vel omnino omittenda, vel certe generatim tantum indicanda sint? eo nomine Theopompum a Longino perstringi video (2), quod scilicet Persarum regis iter per Aegyptum describens, et munera referens, quæ undique a civitatibus ad eum per legatos mittebantur, vel materia singula vel artificio praeclara, his utres etiam et condimenta et saccos admiscuerit, itaque culinæ quamdam imaginem adumbravit. nec minori curæ esse debet, ne quæ postremum in locum reservemus, ea minus respondere prioribus videantur. quisque enim, quum multa uno in titulo enumerari videt, nescio quid maximum ultimo loco scriptum animo praesumit, idemque ad ultima quum devenerit, falsum se deceptumque, aegre ferre solet. id mihi etiam contigit, quum inscriptionem legerem, quæ Mutinæ nostra ætate in equestri statuæ basi incisa est:

FRANCISCO • III • ATESTIO

QVOD

PROLATIS • IMPERII • FINIBVS

VHS • MILITARIBVS

PER • ARDVA • MONTIVM • PATEFACTIS

VRBE • RENOVATA

ORDINATIS • LEGIBVS

AD • PAVPERES • EXCIPIENDOS

ALENDOSQVE • AMPLISSIMIS • AEDIEVS

EXSTRVCTIS

LITTERARVM • BONARVMQ • ARTIVM

STVDII • EXCITATIS

REIPVBLICAE • COMMODO

CONSVLVERIT

M V T I N E N S E S

PEC • PVBL • P • P • ANNO • MDCCLXXIII •

(1) inser. 52.

(2) de sublim. n. 45.



nam qui tot illa beneficia in civitatem contulisset, hunc reipublicae commodo consuluisse, jam initio noveram, nec solum omnibus, sed singulis etiam beneficiis plurimum profuisse putabam: itaque tot simul bonis aucta amplificataque republica, nescio quid majus de optimo Principe praedicandum videbatur.

Hae fere sunt verborum figurae, quas communis dictionis exempla exhibent. quae sententiarum appellantur, ex his non alia fortasse recepta, quam *Epiphonema*, quo item modestius usi veteres, quam poëtae aut oratores solent. neque enim a reliqua, ut fit, oratione sejunxerunt, sed in eadem inclusum latere quodammodo voluerunt. exemplum habes in ea inscriptione, quae in columnae Trajanæ basi legitur (1); sic enim, perinde quasi Trajani operibus celebrandis minus verba suppetere, inscriptum est, *Ad Declarandum Quantae Altitudinis Mons Et Locus Tantis Operibus Sit Egestus*. eodem spectat additamentum illud in Metelli ellogio (2), *Quod A Condito Aevo Nulli Alii Contigit*: tum etiam laus illa in epitaphio, quod supra attuli (3), *Conjugi Plus De Se Meritae Quam Titulo Scribi Potuit*. cetera de genere hoc: ut plane constet, studio cavisse veteres, ne quid inscriptio exquisitum nimis aut fucatum habere videretur.

Quare nobis haud minus curae esse debet, ne plura verba, quam res ipsas faciamus: idque tironem meminisse juvabit, nulla re magis extenuari inscriptiones atque auctoritatem amittere, quam si rerum forte inopia laborantes, grandia tenues conemur, atque a levibus tropis et inanibus verborum sonis temere ornamenta petamus. nisi quod illud, opinor, unum in his aliquid conferat, nec certe a prisca consuetudine abhorreat, si Graeca Latinave sententia tempestive utamur: cui sane in epitaphiis saepe est locus, siquidem haec ad privatos spectent. nam quia clausulae eam loco subijcimus, ut ut insignem figura faciat, nihil de epitaphii forma detrahit, nihil immutat: et leporis tamen aliquid affert ac venustatis, quod lectoris animum nec opinantis ad gravem aliquam cogitationem adducat.

(1) *inscr.* 91.(2) *inscr.* 239.(3) *part.* 1. c. 3. §. 3. n. 3.

## CAPVT VIII.

*De numeris modisque inscriptionum*

I. **R**udem equidem atque in his litterarum studiis hospitem dixerim, si quis inscriptioni, quo possit certare cum optimis, minime necessarium putet, ut ea numerose volubiliterque fundatur. nam venustatis plurimum et dignitatis in ipso numero est, quo dempto ea etiam, quae magna sunt atque praeclara, lucem amittunt. verum non ita de inscriptionis numero disserendum est, ut eam fere magis probemus, quae verum imitari melius videatur. imo ut Graeci olim Latinique oratores delectationis atque aurium caussa numerum a poetica sic ad eloquentiam traduxerunt, quemadmodum orationis severitas pati posset; ita nobis ornandi gratia eum esse in numero modum adhibendum existimo, ut quantum inscriptionis genus postulet, tantum cuique tribuentes et auribus iidem et rebus ipsis servire videamur.

Vt autem non unum est inscriptionum genus, ita nec idem cuique numerus convenire potest. quis enim non videt, variis rebus diversisque personis saepe brevem orationem aptam esse, interdum longiorem; ac modo grandem, modo lenem omnino congruere? quo fit, ut nec semper eodem numero cadere possit, et modo incideunda sit, ne turgeat, modo fulcienda ac sustentanda, ne humi repere videatur. quin etiam tituli aliquando existant ejusmodi, necesse est, ut numerum in his, de quo loquimur, propter eorum brevitatem, nullum esse contendas: in quibus non ego me illum esse dicam, qui sonum unus audiam planeque hauriam: quamquam si verba vel pauca sic ad aures ferantur, ut non modo rem perspicue nos doceant, sed nullus etiam sit verborum, nullus litterarum asper concursus, in his quoque numerus jam esse aliquis videtur. nam contra quidem, si absurdius quid aut durius dictum fuerit, ut in fidibus vel in tibiis quamvis paullum discrepent, id fere a multis animadverti solet. neque is tamen est numerus, quem in plerisque inscriptionibus quaerimus, in quibus varii praeterea pedes, modo brevibus vocibus modo longis una periodo circumscripti, quendam quasi concentum efficiant, sententiamque totam apte cadentes numerose suaviterque concludant. nam hic utique ille est numerus, quem maxime veteres sequuti sunt: sed iidem etiam ostenderunt, non eum semper, qui in uno inscriptionum genere apprime utilis sit, aequè bene in aliis usurpari: et esse genera quaedam, in quibus leni atque adstricta dictione utendum sit; alia, quibus sonantior numerus et magis volubilis sermo apte respondeat: ut quemadmodum tibicines ad cantus moderationem qua remissiores modos faciunt, qua intentiores; ita inscriptionibus numerus modo exilior a nobis atque modestior, modo grandior ac plenior aptandus sit.

II. Enimvero ad sacras primum inscriptiones quod pertinet, ob ipsam argumenti dignitatem liberius fere numerosa oratione veteres delectati sunt. atque ea quidem in simplicis dictionis exemplis minus percellit; quippe brevi haec verborum ambitu plerumque concluduntur: ita tamen in his etiam gravis est ac decora, ut numerum saepe satis jucunde hauriamus. nonne hic ipse votivae tabellae titulus numerose et apte cadit (1)?

(1) Fabr. p. 470. n. 109.

PROSERPINAЕ  
SERVATRICI  
SEX · VOLVMNIVS  
PRO · AEMILIA · PETE  
LINA · CONIVGE · SIBI  
RESTITVTA  
EX · VOTO · SVSCEPTO  
ARAM · CONSECRAVIT

At iis in exemplis, quae ornatae dictionis sunt, cujus aures tam hebetes inveniantur, ut vocalem eorum numerum non accipiat? eminet sane inter illa Pompeii inscriptio, quae incitati annis instar non sine sonitu et fragore devolvitur (1). sed aliarum etiam numeri fere modique insignes sunt. lege iterum quae in librum primum exempla conguessimus (2): eam esse verborum collocationem animadvertes, ut nihil suavius nihil plenius ad aures ferri possit. et auget inscriptionum numerum ipsa Principis appellatio, ut etiam granditate verborum crescere videantur. nam res quidem non ita aliquando magnae, ut splendidis vocabulis omnes offerri possint. cujusmodi est, quae sequenti inscriptione designatur, quam numero tamen ceteris parum concedere fatearis (3):

LARIBVS · PVBLICIS · SACRVM  
IMP · CAESAR · DIVI · F · AVGVSTVS  
PONTIFEX · MAXIMVS  
TRIBVNIC · POTESTAT · XVIII ·  
EX · STIPE · QVAM · POPVLVS · EI  
CONTVLIT · K · IANVAR · APSENTI  
G · CALVISIO · SABINO  
L · PASSIENO · RVFO · COS · (4)

nec multa hoc alio in titulo narrantur; sed auctus idem est ac sonantior factus, adiectis ad notam temporis qui templo Dianae Nemorensis prope Ariciam praecerant, quique sacra ejus et reditus curabant. sublato enim *Rege Nemorensi*, qui fugitivus erat (5), ritus mutatos per ea tempora dixerim, quum Trajanus ipse Dictatorem se fieri passus sit (6):

DIANAE  
NEMORESI · VESTAE  
SACRVM · DICT · (7)  
IMP · NERVA · TRAIANO · AVG ·  
GERMANICO · III · COS ·  
PRAEF · EIVS · T · VOLTEDIO · MAMILIANO  
QVAESTORIB ·  
L · CAECILIO · VRSO · II · M · LVCRETIO  
SABINO · II · AEDILIB · Q · VIBENNA · QUIETO  
TI · CLAVDIO · MAGNO  
P · CORNELIVS · TROPHIMVS · PISTOR  
ROMANIENSIS · EX · REG · XIII · IDEM · CVR ·  
VICI · QVADRATI · ET · LANIA · C · F · THYONOE · CONIVX  
EIVS · VOTVM · LIBENS · SOLVERVNT

Iam inscriptiones honorariae, quae fere publice positae sunt, numeros habent multo etiam insigniores: caet maxime, quae honores Imperatorum landesque continent, senatus nempe populiue Romani nomine celebratas. relege quaeso Augusti titulum ob Alpinas gentes devictas (8), relege qui Trajani potissimum nomen habent (9): non eos plane pro summa principis populi amplissimique consilii dignitate magnum quiddam so-

(1) v. inser. 32.

(2) v. inser. 33. 34. 35. 36. etc.

(3) Grut. p. 106. n. 4.

(4) an. Varr. 750.

(5) v. Svet. in Cajo c. 35. n. 7. et  
Serv. in Aen. l. 6. v. 137.

(6) Grut. p. 41. n. 7.

(7) Dictatore.

(8) v. inser. 88.

(9) v. inser. 90. 91. 92.



nare et aures complere inficiaberis. nec vero municipalium inscriptionum remissiores numeri sunt, quas saepe longa munerum publicorum enumeratio intendit atque sustentat (1):

T · VARIO · CLEMENTI · PROC ·  
 PROVINCIARVM · BELGICAE  
 GERMANIAE · SUPERIORIS · GERMANIAE  
 INFERIORIS · RAETIAE · MAVRETANIAE · CAESARENS ·  
 LVSITANIAE · CILICIAE · PR · EQ · AL · BRITANNIC · MILIAR ·  
 PRAEF · AVXILIORVM · IN · MAVRETANIAM · TINGITANAM · EX  
 HISPANIA · MISSORVM · PRAEF · EQ · AL · II · PANNONIOR · TRIB · MIL ·  
 LEG · XXX · V · V · PRAEF · COII · II · GALLORVM · MACEDONICAE  
 CIVES · ROMANI · EX · ITALIA · ET · ALIIS · PROVINCIIS  
 IN · RAETIA · CONSISTENTES

quibus interdum militarium quoque donorum mentio subnectitur (2), aut etiam laudatio aliqua ob rem publicam in magistratu recte administratam (3).

Quae autem inscriptiones in simplici dictione consistunt, ne illae quidem numeris carent suis, quod oratio earum perpetua sit, unoque exitu tota concludatur. lege, sis, exempla libri primi (4): nullum reperies, cuius non ea complexio verborum sit, quae volvi uno spiritu et possit et debeat.

Contra in epitaphiis rarius veteres longo anfractu et oratione perpetua usi, modos probarunt leniores: nam et sententias identidem diviserunt, et unamquamque ad spiritum vocis aptam esse voluere. id scilicet moerori etiam significando magis idoneum visum est: vix enim qui gravius dolent, sermone utuntur perpetuo. tum illud viderant, uno in epitaphio multa saepe commemoranda, quae cohaerere inter se, et una claudi periodo non possent. exemplo sit Scii nescio cuius epitaphium, quod si quis perpetua oratione efferre velit, non modo numeros tollat, sed ipsas quoque sententias perturbet (5):

D · M ·  
 C · IVL · C · F · FABIA · ROMA  
 SEIO · IVNIORI · VETERANO  
 AVG · MILITAVIT · IN · CHORTE  
 XI · VRB · 7 · VALERI · ANNIS · X ·  
 MISSVS · HONESTA · MISSIONE  
 V · IDVS · IANVARIAS · APPIO  
 ANNIO · ATILIO · BRADVA  
 T · VIBIO · VARO · COS · (6) VIXIT  
 ANNIS · XXXX · DIEBUS · XX ·  
 FECIT · IVLIA · PALESTRICE · CO  
 IVGI · BENEMERENTI

quaedam tamen clarorum virorum epitaphia invenias, quae magistratuum, curationum, militarium graduum enumeratione insigniora fiunt: sed haec etiam incisa quodammodo sunt, ut in his sententiae sint, quarum altera defuncti laudes et vitae anni, altera eorum officia extrema aut formulae quaedam sollemnes concluduntur (7). quae autem una perpetuaeque sententia scripta sunt, ea fere brevissima, etiamsi ornata dictione constant; eademque aequabili orationis lenitate deducta esse animadvertes (8).

Porro huiusmodi pleraeque ex historicis sunt, Fasti in primis et quas *Indices* appellavimus: neque enim in his longae ornataeque dictioni locus, sine qua numeros remissiores esse necesse est. ceterum ab his longe abeunt operum publicorum inscri-

(1) Maff. M. V. p. 241. n. 5.

(2) v. inscr. 97. 98. 101.

(3) v. inscr. 99. 102.

(4) ab inscr. 71. ad 87.

(5) Fabr. p. 128. n. 50.

(6) an. Varr. 913.

(7) v. inscr. p. 138. 140.

(8) v. inscr. 139. 141.

ptiones, praesertim imperatoriae, in quibus stilus ipse adsurgit atque eminet, itaque et modos capit plane manifestos: quos potissimum in dictionis ornatae exemplis quisque sentit, nec sine jucunditate auribus accipit, ut etiam regustare saepius legendo velit. ex his Trajani inscriptiones numero ceteris fere antecellunt, e quibus haec quoque est (1):

IMP · CAESAR · DIVI · NERVAE · F · NERVA  
 TRAIANVS · OPTIMVS · AVG · GERMANICVS  
 DACICVS · PONTIFEX · MAX · TRIBVNIC ·  
 POTEST · XVIII · IMP · VII · COS · VI · SACRARIA  
 NUMINVM · VETVSTATE · DILAPSA  
 A · SOLO · RESTITVIT

huic tamen non impar, quam Hadrianus templo Cuprae Maritimae inscripsit (2):

IMP · CAESAR · DIVI · TRAIANI · PARTHICI · F · DIVI · NERVAE · NEP ·  
 TRAIANVS · HADRIANVS · AVG · PONT · MAX · TRIB · POT · XI · COS · III ·  
 MVNIFICENTIA · SVA · TEMPLVM · DEAE · CVPRAE · RESTITVIT

creseere vero numerus ac sonantior fieri solet, si et operis publici caussam suspensa paullulum oratione exponere atque ornare possis: quod nuper ipse tentare ausus, inscriptionem quum conderem, quae via Veliterna figeretur.

EX · AVCTORITATE  
 IOAN · FRANCISCI · ALBANI  
 EPISC · OST · VELIT · DEC · CARD ·  
 ORDO · POPVLVSQ · VELITERN ·  
 VT · VIAM · APPIAM · TRAIANAM  
 PROVIDENTIA · PH · VI · PONT · MAX ·  
 POST · IMMEMORABILIS · AEVI · SPATIA · RESTITVTAM  
 CONSENSV · OPTIMI · PRINCIPIS  
 MVNICPIO · CONIYNGERET  
 VELITERNAM · QVAE · VETVSTATE · INTERCIDERAT  
 SVBACTO · IVGO · PONTIEVSQ · CONSTRVCTIS  
 AD · APPIAE · MILLIARIVM · XVIII ·  
 MVNIENDAM · CVRAVIT

In ellogiis autem hos quidem numeros non invenies: studio enim veteres rerum multarum complexione abstinuisse videntur, ne oratio exsultaret audacius. sed singulae res singulis sententiis, et numerose tamen apteque ad spiritum vocis expositae sunt. nam et spatio circumscriptae brevi, verbo item singulae ad certas mensuras clauduntur; nec dissimilitudine soni atque vocum ita inter se differunt, ut modi in tota oratione diffusi omnino lateant. itaque ellogium etiam impressiones habet quasdam numeris non continuis, sed tamen ejusmodi, ut orationem aequalibus prope intervallis metiri possis. atque haec distinctio et aequalium fere intervallorum percussio numerum conficit non injucundum: quippe illud caverunt diligentissime, ne verba extrema eodem syllabarum concentu ingratos auribus atque insuaves ederent sonos.

Constitutionibus denique publicis suus item est numerus, non idem omnino in singulis, sed tamen lenior fere atque remissior in omnibus. in legibus quidem, in decretis, in edictis prope oratorium esse dixeris; nam saepe in his relativo pronomine oratio inchoatur, et enumerationes fiunt et exornationes et narrationes: nec raro periodi

(1) Fabr. de C. Tr. p. 293.

(2) Grut. p. 1016. n. 2.

occurrunt insignes, quae in locupletis etiam oratione legi possint. ceterum formulas singula suas habent et clausulas, quibus verborum ambitus infringuntur nonnihil, et oratorius ille retunditur numerus, ne aures nimium percellat. reliqua autem minus etiam adsurgunt, et tenui deducta filo epistolarum lenitatem aut moderatam historicorum dictionem imitantur. itaque vel articulis distincta brevibus, vix alium habent numerum, quam qui ex sono et varietate efflorescit verborum extremorum (1); vel si longior oratio, ea est in his verborum comprehensio, ut modico saepe initio, nec suspensa diu sententia, res, de qua agitur, ceteris protinus iudiciis designetur; quae autem consequuntur, leniter singula molliterque considant (2); in quibus scilicet iudicio aurium multa digesta, nec alia lege, quam quae Principis aut magistratuum orationem et dilucidam et gravem esse iubet.

nl. iam vero illud scire ex me pervelis, quonam pacto numerosa fieri inscriptio possit, vel etiam quatenus esse debeat. ego vero de inscriptionum numeris, quid tradendum sit, haud facile invenio. res quidem ipsa difficilis factu esse non debet; *nihil est enim*, inquit Tullius (3), *tam tenerum neque tam flexibile neque quod tam facile sequatur, quocumque ducas, quam oratio*: tum, ut ait idem (4), *hominum aures vocem natura modulantur ipsa*: ut ad numerosam inscriptionem quidquid opus est, id in promptu cuique esse videatur. sed quum praecepta et regulae requiruntur, ad veterum exempla tandem veniendum est; quae tiro quum perlegerit, eum iam aures melius, quam magister, edoceant.

Sed tamen a collocatione verborum oriri numerum constat. haec enim inscriptionem junctam efficit, atque, ut ita dicam, levem et aequabiliter fluentem, quibus fere in rebus numerus consistit. de ipsa autem collocatione hoc praecipi potest, ne verba priora, cuicunque ea sint, cum consequentibus ita jungamus, ut aspere concurrant aut vastius diducantur; deinde ut vocum delectu habito, quae maxime illustres sint, disyllabas rarius recipiamus, iambumque pedem ac trochaicum frequentem segregemus, ut bacchio saepius et anapaesto et paeone utamur; tum etiam ut caveamus, ne quum ad intervallorum percussiones venerimus, similitudo litterarum et sonus idem redeat; neve praecipua tituli sententia, quae rem totam complectitur, ultra unius periodi fines excurrat; denique ne circuitu verborum utamur aut brevior, quam aures expectent, aut longior, quam angustiae spiritus patiantur.

Quia vero fit interdum, ut non omnibus vocabulis abstinere possis, quorum extremae syllabae eundem efficiunt sonum; hoc etiam addi potest, ea, ne alterum alteri obsonet, coniungenda esse, ut nihil sit intermedium. id quum Ciceroni in orationibus familiare fuit, tam antiquis in titulis servatum esse animadverti (5):

L · ATEIVS · M · F · CAPITO  
DVOM · VIR · QVINQ ·  
CVRIAM · TABVLARIVM  
SCAENARIVM · SVBSELLARIVM · (a) LOCO  
PRIVATO · DE · SVA · PECVNIA · C · C · N · F · (6) · COERAVIT  
PORTICVS · CENACVLA · EX · DECVRIONVM · DECRETO · DE  
SVA · PECVNIA · C · C · N · FACIVNDA · COERAVIT · IDENQ · PROBAVIT

sed tamen si minus nomina, verba certe, nisi ad formulas pertineant, loco movenda erunt, aut alia supponeunda, ut varia sint sonoque diversa: quae sane mirum, quantum

(1) v. inser. 312.

(2) v. inser. 314. 315. etc.

(3) de Orat. l. 3. c. 43. n. 176.

(4) ibid. c. 43. n. 185.

(5) repert. an. 1777. prope Centumcellas.

(a) Novum hocce vocabulum non *subsellarium*, ut dederat Cl. Auctor, sed *subsellarium* reponendum curavi, fretus auctoritate Caj. Marini, qui Fr. Arv. p. 527. et 608.

lapidem hunc nitidissimis litteris insculptum accuratissime se legisse testatur.

(6) *Castronovani facienda*.



ad numerum conferant. id satis declarat inscriptio nec antiquissima, Caracallae scilicet, quae ad portam Exquilinam sive Tiburtinam, quam nunc Laurentianam dicunt, in veteri aquae Marciae ductu legitur (1):

IMP · CAES · M · AVRELIUS · ANTONINVS · PIVS · FELIX · AVG · PARTH · MAXIM ·  
BRIT · MAXIMVS · PONTIFEX · MAXIMVS  
AQVAM · MARCIAM · VARIIS · KASIBVS · IMPEDITAM · PVRGATO · FONTE · EXCISIS · ET · PERFORATIS  
MONTIBVS · RESTITVTA · FORMA · ADQVISITO · ETIAM · FONTE · NOVO · ANTONIANO  
IN · SACRAM · VRBEM · SVAM · PERDVENDAM · CVRAVIT

quamquam autem historicarum inscriptionum ea fere numerosior habetur, quae uno in verbo tota conquiescat, ob eamque rem reliqua verba per casus tantum declinantur; id tamen valeat, si opus unum et unus operis auctor exstiterit; nam si bini fuerint, binae etiam quodammodo inscriptiones esse poterunt (2). tum ne is quidem improbetur, qui gemino utatur verbo, quo ejusdem operis duplicem molitionem fuisse, geminamque una in re curam susceptam esse demonstret. id antiquitus quoque aliquando factum scias, quin numerus inscriptionis periret (3):

IMP · TITVS · CAESAR · DIVI · F · VESPASIANVS · AVG · PONTIF · MAX ·  
TRIBVNICIAE · POTESTAT · XI · IMP · XV · CENS · COS · VII · DESIG · VIII ·  
RIVOM · AQVAE · MARCIAE · VETVSTATE · DILAPSVM · REFECIT  
ET · AQVAM · QVAE · IN · VSV · ESSE · DESIERAT · REDVXIT

ideirco inscriptionem nuper amicus quum peteret, quam Bibliothecae convenire putarem, quae Neapoli Regis Optimi munificentia instructa est, hanc minime haesitans exaravi:

REX · FERDINANDVS · IIII ·  
REGIS · CAROLI · III · CATH · F · REGIS · PHILIPPI · V ·  
CATH · NEP · PIVS · FELIX · AVGVSTVS  
ANNO · REGNI · XVIII ·  
BIBLIOTHECAM · FARNESIANAM  
VETVSTORVM · CODICVM · MONVMENTIS · INSIGNEM  
OPERIBVS · A · SOLO · AMPLIATIS · DIGESSIT  
LIBRORVMQ · OMNIS · GENERIS · COPIA · LOCVPLETATAM  
PVBLICAVIT,

Numerum inscriptionum infringunt nonnumquam annorum notae, magistratuum nomina, formulae etiam, quibus publica auctoritas designatur: neque enim initio semper, aut paucis, ut opus est, verbis efferri possunt. haec autem omnia, quum omitti nequeunt, commode ad calcem inscriptionis rejeceris, ut extra illius ambitum solitaria subscribas: atque id ex veterum praescripto fiet, quorum exempla exstant (4). haec sane sequutus, non aliter honorariam inscriptionem, quae Anconae in curia incisa est, haud ita pridem, pertexendam putavi.

(1) Grut. p. 177. n. 1.

(2) v. inser. 240.

(3) Grut. p. 177. n. 1.

(4) v. inser. 38. 42. etc.

PIO · VI · BRASCHIO

PONT · MAX · PATRI · PATRIAE

QVOD · NOVAE · MOLIS · OPERIEVS · IVSSV · EIVS · COMMVNITIS

SYMPTIBVSQVE · PORTVI · PERFICIVNDO · SVPPEDITATIS

COMMODA · VRBIS · SVPERIORVM · PONTIFICVM

BENEFICIIS · AVCTA

LIBERALITATE · OPTIMI · PRINCIPIS · CVMVLATA · SINT

ORDO · ANCONITANVS

LOCVPLETATORI · CIVIVM

AEDERTORI · FELICITATIS · PERPETVAE

ANNO · MDCCLXX ·

MAGISTERO

PETRI · FRANCISCI · CAMERATAE · COM ·

FRANCISCI · TORRIGLIONI · COM ·

CAIETANI · EVANGELISTAE

MODERATORVM

REI · PVBLICAE

MICHAELIS · FAZIOLI

CAR · IGNATH · NAPPI · COM ·

ALEX · NEMBRINI · GONZAGAE · MARCH ·

ALOIS · ANTONI · FERRETTI · COM ·

CAIETANI · EVANGELISTAE

CVRATORVM

III. Reliquum est, ut eos inscriptionibus numeros modosque aptemus, quos forma cuiusque, argumentique dignitas poscat: quo rei magis quam aurium rationem habuisse videamur. id nunc quosdam minus spectare dixeris: adco vel minimis in rebus sesquipedalia verba ad speciem atque pompam festive contexunt. atqui nihil ineptum aut intempestivum moliri nos decet; minusque illum peccasse arbitrer, qui exiguo in argumento inscriptionem humi repentem fecerit, quam qui turgidam et alienis superbientem ornamentis. atque in privatorum quidem titulis remissiores fere modos optandos puto, ne quis insolentius gloriari videatur: nam ipse numerus orationem attollit et grandiolem facit: qui si lenis sit ac moderatus, monumenti quoque auctorem a pudore ac modestia commendabit. si autem de Principe agatur, stilo utique sublimi et numerosa oratione recte utemur, ut majestati ejus par in sermone dignitas esse videatur. tum ne illae quidem inscriptiones, quae senatus aut civitatis nomine fiant, attenuate potius ac presse, quam sublata ampleque fundantur: publica enim auctoritas eminere in his debet, quae maxime sermonis gravitate verborumque splendore proditur. quamquam si magistratus ipsos loquentes induxeris, qui ex senatus consulto aut decreto civitatis opus aliquod faciendum curaverint; nolim ita subiixi rem narrent, ut rempublicam universam humeris suis sustinere videantur. veterum inscriptiones, quae exstant, id generis, remissione fere numero omnes deductae sunt. lege quae libro primo descriptae sunt, lege quas hic subijciam; nihil utraeque habent, unde veteres magistratus de curatione sua magnifice gloriari videantur (1):

C · LVCTIVS · L · F · AVLIAN · Q · PLAVSVRIVS · C · F · VARVS  
L · VENTILIVS · L · F · BASSVS · C · OCTAVIVS · C · F · GRAECHIN ·

III · VIRI

PORTICVS · P · CCLX · ET · EXSEDAM · ET · PRONAON · ITER

ET · PORTICVM · PONE · SCAENAM · LONG · P · CXL ·

S · C · F · C ·

haec in Tiburtino municipio quatuorvirii; nec plura fere in urbe consules inscribent (2):

(1) Grut. p. 172. n. 3.

(2) id. p. 176. n. 2.

P · CORNELIVS · P · F · DOLABELLA · CoS.  
 C · IVNIVS · C · F · SILANVS · FLAMEN · MARTIAL ·  
 EX · S · C ·  
 FACIENDVM · CVRAVERVNT · IDEMQVE · PROBAVERVNT

Inscriptionis tum honore contenti magistratus, non alias sibi laudes inanibus verbis ab operum cura vindicabant. has legeris in iis monumentis, quae post eruditam aetatem constituta sunt: quae interdum in ipsis Principum titulis occurrunt, ut in regis Theodorici inscriptione Tarracinensi (1), quae Pomptinas paludes ab eo siccatas testatur, *Operi Injuncto Naviter Insudante Adque Clementissimi Principis Feliciter Deserviente Praeconiis Ex Prosapia Deciorum Caet. Mau. Basilio Decio V. C. Et Inl. Expf. Urb. Exppo. Excons. Ord. Pat. Qui Ad Perpetuandam Tanti Domini Gloriam Per Plurimos Qui Ante Non Erant Albeos Deducta In Mare Aqua Ignotae Atavis Et Nimis Antiquae Reddidit Siccitati*: quibus plane verbis multo plura Decio tributa, quam Theodorico relictas sint.

Denique illud etiam animadvertisse juverit, quo te in genere inscriptionum exerceas. neque enim veteres, quod paullo ante indicavimus, eodem in singulis generibus numero usi sunt, eosdemque passim modos probaverunt. quare hoc statuas, velim, antiqua exempla ex eo ipso genere, quod attingere debeas, multa tibi ante legenda: sic fiet, ut quum lectioni aures adsueverint, ipsi se offerant numeri et respondeant non vocati; nec tamen alii sint, quam qui potissimum condendae inscriptioni apte conveniant.

(1) Grut. p. 152. n. 8.



## CAPVT VIII.

*De scriptura inscriptionum*

**P**arvis sane de rebus hoc capite acturi sumus, sed quas nosse non parvi interest. nam et a scriptura diligenti venustatem tituli habent, vel certe ipsa litterarum ac versuum elegantia legendi cupiditatem injiciunt. duo autem sunt, quae hic a nobis consideranda arbitror: primum quae verborum efferendorum ratio amplexenda sit; deinde quae litterarum, notarum, versuum forma esse debeat: quorum alterum quidem scriptor potissimum noscat, oportet, alterum lapicida; sed utrumque tamen a me tradendum est, quo, si necesse sit, rudis saepe atque indocti sculptoris manus industria alterius ad certam veterum normam dirigatur. at non hic uberem de Orthographia tractatum expectes, de qua jam scripsere abunde post Manutium Pauli filium et Lipsius et Dausquius et Cellarius. illi te quid recte usurpari possit, quid non, accurate edocebunt. a me hoc habebis, quae scribendi ratio in titulis praeceptanda sit, quum antiqui etiam inter se dissentire videntur, et exempla nobis in utramque partem praesto sunt.

Nam quia ad inscriptionis cultum quemdam ornatumque conferre aliquid creditur antiquitatis imitatio; ideirco haerent nunc quidam in scribendo, neque litem audent dirimere, incerti utrum vetustiore scribendi formulam sequantur, an quam Grammatici recentiores instituerunt. enimvero risum nunc debeat, si quem ipsa omnino Catonis scriptura delectet, de qua Iulii Pontederac praeclara exstat epistola (1): eam Latini magna ex parte jam repudiarant, quum inscriptiones in urbe frequentari coeptae. ex ea, quae diutius in titulis quoque mansere vestigia, haec fere sunt: AI pro AE, ut *Cai-sar*, *Bonai Deai*, *Serviliai*, *Aviolai*: EI pro E, ut *Civeis*, *Omneis*, *Genuateis*: EI pro I, ut *Devicteis*, *Salentinei*, *I'bei*: EI pro II, ut *Eidem*, *Spoleis*, *Doleis*: I pro II, ut *Deicito*, *Idem*, *Imperi*: O pro V, ut *Divos*, *Voluus*, *Perpetuom*: OE pro V, ut *Coeravit*, *Moenicipiis*, *Loedos*: V pro I, ut *Optumus*, *Maxumus*, vel pro E, ut *Faciundum*, *Dicundo*. sic et B pro P, ut *Collabsus*, *Obtio*, *Stibendium* et contra P pro B, ut *Apsens*, *Opsequenti*, *Optinuit*; quam in rem Quintilianus haec adnotavit (2): *Quum dico Obtinuit*, B litteram ratio poscit, aures magis audiunt P: quare aures quidam sequuti videntur, alii rationem. eadem de causa D pro T usurpatum, ut *Quodannis*, *Adque*, et contra T pro D, ut *Aput*, *Set*. diu etiam placuit K pro C, ut *Evokati*, *Karissimus*, et N pro L, ut *Conlapsum*, *Conlato*, *Conlegium*; et Q pro C, ut *Pequunia*, *Aquitur*, et S post X, ut *Vxsor*, *Maxsumus*, *Vixsit*, *Paxs*, *Rexs*, et AD in compositis, ut *Adsertori*, *Adsignata* et huiusmodi, sed per-raro ante P.

Haec ne vero omnia recipiemus, quia scripturae huius veterum auctoritas aliquando suffragata est? equidem quum de iis vocabulis quaeritur, quae duplici ratione scribi posse, antiqua exempla demonstrant, eam maxime scripturam probandam puo, quae nihil offerat asperum, nihil reddat obscenum: nam quae una semper fuit, ab ea, vel omnibus invitis litteratoribus, recedendum non est. quod si neutra e duabus vel asperior dici possit vel obscurior, tum denique eam potius usurpem, quae Augusti aevq

(1) Antiq. Epist. 1.

(2) lib. 1. c. 7. al. 15.

aut Tiberii in usu fuit, quam quae subinde invecta sit: quippe ejus item aetatis scriptoribus primas tribuimus. itaque non ego auctor sim, ut priscas diphthongos restituas, quae lectorem torqueant, vel O pro V, scribasque HOC pro HVC, quod sententiae obscuritatem afferre possit: neque ut N in compositis vocabulis passim retineas, quod plane aures respuunt, aut V malis, quam I, quod tristius mihi ac severius videtur. verum recte, opinor, cum vetustioribus scripseris *Praef. Iuri Dicundo, Pontem faciundum Curav., Loca Adsignata, Adsertori Libertatis, Kalendis Ianuariis.*

Antiqua etiam illa sunt, et omnino retinenda, e quibus subinde littera detracta est, *Parentium, Civitatum*, Varroni etiam probata (1): et quae intacta originem produnt suam (2), *Totiens, Quotiens, Aliquotiens, Quadragiens, Compluriens* et similia. sed quaedam reperies, quae aevo eodem alii alia ratione scripserunt; de quibus, quia litem nemo diremit, parum laborandum est, eaque praecoptanda cuique, quae magis adriserunt. ex eo sunt numero *Inchoavit* et *Incohavit, Consumtum* et *Consumptum, Hic* et *Heic, Monimentum* et *Monumentum*, aliaque id genus, quae in eorum libris invenies, quos de Orthographia scripsisse diximus.

Ad nomina Graeca quod attinet, quaedam in OΣ desinentia Latini more suo in ER extulerunt, ut *Periander, Menander, Phaeder, Antipater*. tum *Plato* saepius, quam *Platon*, contraque *Solon*, quam *Solo* legitur (3). feminarum autem littera H in recto terminata, si dativo casu efferrentur, sine diphthongo veteres scribebant (4):

D · D ·  
VALERIAE  
NICE  
C · VALERIVS  
AMERIMNVS  
CONIVGI  
B · M · F ·

neque id raro antiquis in exemplis animadvertes, quorum a me etiam alibi quaedam prolata sunt. at cetera verba, quae Graeca quidem origine, sed usu Romana esse viderent, vix unquam peregrina scripsere littera: *Hiems, Silva, Stilus, Lacrima, Inclitus, Clipeus* fere sine Y antiquis in lapidibus apparent: cujus loco interdum adscivere V: nam et *Clupea* et *Inclutum* et *Lacrumas* legimus. *Tropaeum* sine adspiratione Graeci etiam scripsere, nedum Latini: neque *Sepulcrum* cum H medio scribendum, quae Latina vox est a *Sepultum*, ne duabus consonantibus media intercedat adspiratio, quod minime rectum antiquis visum esse, ait Varro (5). cetera de genere hoc, quae tirones ante discant, quam ad haec studia se conferant.

II. Venio jam ad ipsas litterarum figuras, quibus verba reddenda sunt, lapidarias igitur litteras non modo antiqua omnes forma et primaria, sed, si titulus sublime locandus fuerit, omnino grandes insculpi oportere, primus omnium meminervis. quod quidam quum non animadvertissent, inscriptiones eorum adeo minutis incidendae litteris fuerunt, ut de plano legi non possent. ob eam rem si fas, adire te locum velim, et monumenti lapidem inspicere; quo scias demum, quot verba singulis in versibus, quotque tota in tabula versus includi possint. quamquam non id eo consilio faciendum est, ut si tabula longe lateque pateat, plura unum in titulum congerantur, quam quae opus sint: quippe spatium illud totum, ut par est, impleri facile potest, aucta productaque litterarum forma omnium. hoc potius spectare debes, num tabula ejusmodi sit, ut ob spatii angustias inscriptionem simplici dictione confectam requirat, an ornatam etiam et plenam admittat.

(1) L. L. I. 7. c. 38.  
(2) v. Ponted. ep. 2.

(3) habet Grut. p. 627. n. 13.  
(4) Fabr. p. 306. n. XXXIII.

(5) apud Caris. p. 56. ed. Putsch.

Titulum deinde accurate in charta ipse scribes perfectum emendatumque, ea usus litterarum figura, qua incidendus sit, ut praeter litterarum mensuram sculpturamque nihil lapicidae arbitrio relinquatur. tale autem exemplar paraveris, ut singulis versibus litterae magnitudine inter se pares sint. nam si vel primos versus majusculis vel postremos aut medios minusculis totos litteris perscripseris; nemo id, dum quadratae omnes fuerint, contra veterum exempla factum arguerit. marmora sane in urbe ostendere possis permulta, in quibus inscriptionum partes quasdam majoribus litteris, ceteras minoribus incisas videamus: nec unus interdum aut alter tantum, sed plures admodum variant versus, ut in fratrum Arvalium actis, in decretis municipiorum, in Kalendaris, in legibus dedicationum, et hujusmodi: quippe, ut Maffejus quoque animadvertit (1), quae cuique jucunda aut magnifica, ea quisque illustriora esse volebat. illud non vidi, quod librariis placuit, qui Ferrarii inscriptiones iterum edidit (2), versus alternos majoribus perpetuo litteris scriptos. sed tamen praenomina et nomina et cognomina Principum majoribus fere litteris, quam cetera inscriptionum verba, antiqui lapides incisa esse demonstrant (3):

IMP . CAESARI . DIVI  
 TRAIANI . PARTHICI . FIL.  
 DIVI . NERVAE . NEPOTI  
 TRAIANO . HADRIANO  
 AVG . PONTIF . MAXIMO  
 TRIBVNIC . POTESTAT . XX.  
 IMP . II . COS . III . P . P .  
 MAGISTRI . VICORVM . VRBIS  
 REGIONVM . XIII.

eodemque modo Deorum suorum nomina incidenda curabant, item aliquando et propria: scilicet monumentum intuenti auctores in oculos statim incurrerent (4):

MERCVRIO  
 C . ALBINVS . C . F . OVF .  
 MASCELLIO . III . VIR . A . P . (5)  
 PRAEF . I . D . IVDEX . V . DEC . (6)  
 NOMINE . SVO . ET  
 IVLIAE . INGENVAE  
 VXORIS . ET  
 ALBINORVM  
 IVLIANI . MASCELLIONIS  
 INGENVAE . MONTANAE  
 LIBERORVM . SVORVM  
 V . S . L . M .

quam sane versuum et litterarum varietatem nemo non libenter oculis usurpat, sive quod elegantiae argumentum est, sive quod legentem non parum juvat.

Practerea animadversum est a Mazochio (7), quum inscriptiones in fronte excelso-  
 rum operum inciderentur, litteras secundi versus minores aliquanto factas, quam primi,  
 et tertii minores item, quam secundi, et sic deinceps: ut qui a terra spectarent, iis  
 omnes prope aequales viderentur. hoc se ille in titulo Campani Amphitheatri depre-  
 hendisse affirmat: hoc et Bandinius in Augusti obelisco se notasse testatur (8): nec uno

(1) Art. Cr. L. 1.3. c. 3. p. 166. in fin.

(2) Mediol. 1772.

(3) Grut. p. 249. n. 8.

(4) id. p. 51. n. 2.

(5) *Aedilicia Potestate*.

(6) *Quinque Decuriarum*.

(7) Tit. Camp. Amph. p. 2.

(8) c. 9. p. 44.



Romae in monumento videre adhuc licet, quamquam *ingentes*, quos Plinius memorat, *arcus* (1) *excessurosque templorum fastigium titulos* vetustas omnes delevit.

Addo et illud, veteribus monumentis, quae restituta essent, si praeter antiquam inscriptionem altera incideretur, quae operis restitutorem posteritati proderet, hanc secundam, nisi Principis nomen referret, minoribus omnino litteris inscriptam esse (2):

TI · CAESARI · DIVI  
AVGVSTI · F · DIVI  
IVLI · N · AVGVSTO  
PONTIF · MAXIMO · COS · IIII ·  
IMP · VIII · TRIB · POTESTAT · XXXII ·  
AVGVSTALES  
RESPVBICA · RESTITVIT

ac minoribus item litteris tsi veteres, etiamsi de restitutione operis versu primo mentionem facerent (3):

SVLPICIVS · COSMVS · REST ·  
LARIBVS · AVG ·  
SACRV · ET  
MINERVAE  
NEMAVSO  
VRNIAE  
AVICANTO  
T · CASSIVS · T · L ·  
FELICIO · EXS  
VOT ·

Dixi paullo ante litteras, ejusdem versus quae sint, pares esse debere: ita sane, si quasdam exceperis, quas veteres lege solutas esse voluerunt. eae sunt I potissimum et T: quamquam et aliae nonnullae fines suos aliquando praetergressae reperiuntur: huiusmodi est littera C (4):

I · O · M · SACR ·  
VOTO · SVSCEPTO · PRO · SALVTE  
IMP · DOMITIANI · CAESARIS  
AVG · GERMANICI  
PONT · MAXIMI · TR · POT ·  
D · VETVRIVS · ANTIGONVS  
D · VETVRIVS · SP · F · PHILO  
D · VETVRIVS · ALBANVS  
PATER · CVM · FILIIS · POSVIT

ac litterae C respondet interdum littera S, ut quum scribebant CoS. praeter has L quoque aliquando procerior quam reliquae litterae, eminet (5):

(1) in paneg.

(2) Brotier. ad Tacit. l. 2. c. 48. Fabr.  
p. 728. n. 447. v. inscr. 428.

(3) Maff. Gall. Antiq. ep. 5. v. inscr.  
238.

(4) Grut. p. 12. n. 2.

(5) id. p. 64. n. 1.

SILVANO  
AVG · SACRVM  
IN · MEMORIAM  
C · RVFI · ANTHI  
INVI · VIRI  
THALLVS · LIB ·  
D · D ·

tum et Graecorum Y non semel exstare vidi (1):

V · F ·  
C · VALERIVS  
AGRIPPAI · L · ISMARVS  
SIBI · ET  
VALERIAI · C · L · APRILI  
VALERIAI · ISMARI · L ·  
PRISCAI  
C · VALERIO · ISMARI · L ·  
IMERO  
VALERIAI · ISMARI · L ·  
ISMVRINE  
M · SATRIO · SVRO · GENERO

quaeres autem, quid caussae fuerit, cur litterae hujusmodi ultra altitudinem proximarum producerentur? nam ne I quidem vel ad geminas vocales vel ad longam designandam ceteris major facta recte dicitur; quippe ea forma usi veteres, sive EI referret, sive II, sive I longam sive etiam I brevem, ut hoc in exemplo (2), nec raro in aliis:

FLAVIAE  
ATHENAIDI  
AVGVSTALIS  
AVG · LIB · TABVL ·  
A · MVNERIB · ET  
APPIA · IVSTINA  
FILIAE · DVLCISSIMAE

reliquae autem litterae unam plane ac certam habent significationem, sive pares sive majores ceteris effictae sint. equidem hanc olim consuetudinem necessitate primum inductam puto, quum spatium litteris deesset, quo, T et I productis, ceterae his succederent ac spissius scribi possent: eandem deinde venustatis ergo esse celebratam, ut plerique inscriptionum ostendunt libri: quamquam, qui tot millia edidit, Fabrettus eas litteras, ut invenerat, reddere neglexit. cuivvero probabilis etiam antiquis visa causa est ejus consuetudinis, quotiescumque litterae ob vicinitatem perperam conjungi posse viderentur: nam exempli gratia DIVI si arctius scribantur, exsistat DM, et PONTIF. fiat PONTIF. quae vel alienam rem vel nullam designent.

III. Iam litterarum singularum qualis esse forma debeat, Trajani, opinor, Hadriani-que monumenta demonstrant, quorum litteras in quadrato omnes descriptas dixeris atque ad quadrati fere mensuram aequis intervallis incisas: nihil certe distinctius scribi, nihil expeditius legi potest. ante ea tempora litterae oblongae placuerant; quae item venustate non carent, praesertim quum sulcus altius est actus; quem fere levissimum

(1) Maff. M. V. p. 141. n. 10. et p. 252. n. 4. etc.

(2) Grat. p. 591. n. 11. et p. 417. n. 3. 6. etc.

deprehendes in iis monumentis, quae post Antoninos statuta sunt; quamquam non ego hic contendo, quaecumque inscriptiones ejusmodi forma incisae sint, eas ad prima illa tempora solas pertinere; neque a Maffejo dissentio, quem verissime scripsisse puto (1), lapidas singulis aetatibus exstitisse, qui rectas, quique distortas litteras facerent; titulosque ab his modo accurate atque eleganter, modo negligenter atque inconciantie inscriptos esse, ut ii omnino fallantur, qui plerumque a scriptura aetateni inscriptionum certe se nosse dictitant; publicis nempe in monumentis tantummodo formam apparere litterarum constantiorem, unde aetas monumendi aliquatenus significetur. illud addo antiquitatis olim repraesentandae causa quosdam etiam fuisse, qui litterarum formas revocarent praeis tantum usurpatis temporibus; ut Herodes ille Atticus in villa sua Triopia fecit, quam propter Appiam habebat ad tertium ab urbe lapidem. exstant enim, quae inde avectae Neapolim sunt, columnae binae Ionice inscriptae litteris (2)(a), quibus tum nemo Graecorum utebatur; Trajani quippe Hadrianique Augustorum aetate ille floruit. cujus quidem exemplo si quis ludos posteris facere velit, in nummis veterum atque aereis maxime in tabulis, praeas illas Latinarum litterarum figuras facile inveniet; sed tamen qui seriam rem agat, insolens id atque ineptum jure existimabit.

Auctor igitur lapidibus esto, ut elegantibus utantur exemplis, nec formas litterarum, nisi optimas perfectasque, probato. ob eam rem operi identidem adfuisse proderit, ne quam illi novae formae litteram temere inducant. A exempli causa Graecorum communis et Latinorum littera habetur: at quum linea transversa hoc modo Α in angulum flectitur, Graeca ab origine littera est (3), eaque forma in Latina inscriptione locum habere non debet, praeterquam in illo epitaphiorum initio

Α Ϟ Ω

Herma sane Tibure inventus, in Museo Vaticano nuper dedicatus est cum Graeca inscriptione, αλφα ejusmodi ter exhibente: quale Latinis in monumentis non apparet, in Graecis nec antiquissimis haud raro occurrit:

ΠΕΡΙΚΛΗΣ  
ΞΑΝΘΙΠΠΟΥ  
ΑΘΗΝΑΙΟΣ

neque vero alia I consonantis, alia I vocalis forma esse debet, quemadmodum quidam sine auctore priseo voluerunt: nisi quod et I consonans ceteris procerior effingi potest, qualem in titulo vides, quem modo protuli. tum ne V quidem vocalis, more hoc recenti, in arcum inferne curvabitur: quamquam ea figura in vetustatis monumentis reperire aliquando sibi visus est Buonarrotus (4): nam V et vocalis et consonantis forma item in optimis eruditae aetatis exemplis eadem vulgo est: excipe Claudii Ang. tempora, quibus pro V consonante, eodem auctore Principe, digamma Ϟ receptum est; quae littera non inutiliter, ut ait Quintilianus, adjecta ceteris (5), usui eo imperitante fuit, post obliterata est (6): ut jam a Flavio aevi, nullo usquam in titulo digamma illud reperitur (7).

(1) Art. Cr. L. lib. 5. c. 2.

(2) v. Montfauc. Palaeogr. lib. 2. c. 4.

(a) Harum columnarum inscriptiones edidit illustravitque Enn. Quir. Visconti in opere, cui titulus: *Iscrizioni Greche Triopce, ora Borgliesiane con versioni ed osservazioni*. Roma, 1791. 4.<sup>o</sup>

(3) Martor. Th. Cal. lib. 2. c. 5. p. 426.

(4) Oss. Vetr. p. XXII.

(5) Inst. 1. 1. c. 7.

(6) Tacit. Ann. l. 11. c. 14.

(7) v. inser. 259. et Grut. p. 119. etc.



Quid de apicibus dicam, quos ipso Augusti aeo vocalibus quibusdam superpositos vidimus (1)? consuetudinem hanc Vossius (2) recentiorem putabat, quam ut ejus ratio haberetur (a). at inscriptionibus, quas libro primo protulimus, addi etiam possunt Caii et Lucii Caesarum Pisana monumenta, quorum ipsam scripturam nemo non magni faciat, quum eam non aetas solum, sed publica etiam commendet auctoritas. non est tamen iudiciandum, apices istiusmodi, nullo vocalium longarum aut brevium discrimine, saepe appositos temere ac sine causa, ut qui castigate uti velit, huic a Quintiliano potius, quam a veteribus lapicidis petenda ratio sit. ejus autem sententiam ex ipsius verbis ediscito (3): *Longis syllabis omnibus apponere apicem ineptissimum est, quia plurimae natura ipsa verbi, quod scribitur, patent: sed interim necessarium, quum eadem littera alium atque alium intellectum, prout correpta, vel producta est, facit; ut Malus utrum arborem significet, an hominem non bonum, apice distinguitur. Palus aliud priore syllaba longa, aliud sequenti significat. et cum eadem littera nominativo casu brevis, ablativo longa est, utrum sequamur, plerumque hac nota monendi sumus.* hanc autem notam saepius fortasse ad vocalium latus, quam in ipsarum vertice effectam reperias, hoc scilicet modo (4):

DIS · MA'NIBVS  
Q · VILIO' · CHRESIMO  
B · M · VIXIT · A'N ·  
LXXVI · FECE'RVNT  
CASTVS · F · CLARVS  
• LIB ·

ita certe in plerisque Fabretti (5) exemplis apices appositos video: sed quae vetustiora sunt, in vocalium verticibus omnia fere notatos habent.

Illud etiam nosse interest, qua linea nunc utimur in fine versus, quum verbum ultimum deficiente spatio dividitur, et pars ejus ad sequentem transfertur, eam apud veteres quoque in usu fuisse: quam binac apud Fabrettum exhibent inscriptiones. earum haec prima est. *Fratriarum* mentione nobilis, de quibus tam scite ac luculenter a Martorellio (6) scriptum est (7):

P · SVFENATI · P · F · PAL · MYRONI  
- EQVITI · ROMANO · DECV -  
RIALI · SCRIBARVM · AEDILI  
VM · CVRVIVM · LVPERCO · LAVRENTI  
LAVINATI · FRETRIACO · NEAPOLI · ANTI  
NOITON · ET · EVNOSTIDON · DE  
CVRIONI · IIII · VIRO · ALBA  
NI · LONGANI · BOVILLEN ·  
SES · DECVRIONES · OB · ME  
RITA · EIVS · L · D · D · D ·

aliis in exemplis quas versus litteras non caperet, superne illas aut etiam inferne ad oram extremam adscriptas videmus (8): quod quidam in charta quoque scribentes fecerunt: nam de Augusto Svetonius (9), *Notavi, inquit, et in chirographo ejus illa*

(1) v. inscr. 33. etc.

(2) de Art. Gramm. l. 2. c. 8.

(a) Hanc Vossii opinionem docte admodum convellit Marinus Fr. Arv. p. 709. et seqq. ubi multa ad rem

illustrandam more suo attulit.

(3) Inst. l. 1. c. 7. al. 13.

(4) Fabr. p. 168. n. 317.

(5) a pag. 167. ad 171.

(6) Th. Cal. lib. 2. c. 8. pag. 591.


(7) Fabr. p. 456. n. XVI.

(8) id. p. 260. n. 91. etc.

(9) in Aug. c. 87. n. 7.

*praecipue: non dividit verba, nec ab extrema parte versuum abundantes litteras in alterum transfert, sed ibidem statim subjicit, circumducitque. nihil tamen his opus erit, siquidem ante tabulam ipse inspexeris, quam inscriptionis exemplar lapidario tradas: nam verba sic distribuere, ut singulis versibus omnia integra sint, nullius negotii rem esse, expertus fatebere. atque hoc pacto nexu etiam et contractione litterarum facile abstinere possis, quae elegantiae nihil habent, molestiae afferunt plurimum, haerentibus fere qui titulos legunt, et scriptorem maxime culpantibus, quod aequa ipse verborum partitione usus non sit.*

Fateor equidem multas veterum exstare inscriptiones, in quibus ipsae diphthongi junctis vocalibus effictae sint, ac binae etiam aut ternae litterae paene unius spatio comprehensae: quid tamen? haec ne demum sunt, quae in antiquorum monumentis suspicere atque imitari debemus? adde, si nummos exeluseris, in quibus ob spatii angustias litterarum nexu saepe opus fuit (1), inscriptiones, quae publica auctoritate incisae fuerint, enodes esse omnes nec ulla nexili littera deformatas: ut quae maxime nobis in pretio esse debent, quasque potissimum imitandas scimus, eae suum litteris quibusque spatium tribuendum esse declarent. ne tamen, si te aliquando nec opinantem necessitas premat, alios inducas litterarum nexus, quam qui a veteribus inventi sunt, exempla vidisse proderit, quae in Museo Veronensi vulgavit Maffejus (2), vel id saltem considerasse, quod tibi ab Hagembuechio deprompsi (3):




(1) v. num. famil. Vaillant,  
(2) p. 147. n. 1. 2.

(3) Epist. Epigr. p. 475. et Maff. M.  
V. p. 454. n. 7.

id autem exempli ille idem sic legit, qui et praeclare illustravit: *Diis Manibus, Hic Situs Est Lucius Aelius Urbicus, Qui Vixit Anno Vno Mensibus Quinque Diebus Quinque: Vnio Augusti Libertus Praepositus Stationis Turicensis Quadragesimae Galliarum Et Aelia Secundiua Puero Dulcissimo Fecerunt.* animadversum item ab Hagenbuchio (1), quosdam ex antiquis marmorariis, ubi geminari litteram locus non patiebatur, eam grandiore aliquando fecisse, ut vel binis vocabulis inter se junctis ipsa magnitudo pro duabus eam habendam significaret: ecce tibi e Grutero exemplum (2), in quo pro *Pompeii Iusti* leges *PompeIusti*:

TIB · POMPEIO  
 POMPEIVSTI · FIL ·  
 PRISCO · CADVR  
 CO · OMNIBVS · HO  
 NORIB · APVD · SVOS  
 FVNCT · TRIB · LEG · V ·  
 MACEDONICAE  
 IVDICI · ARCAE  
 GALLIARVM · III ·  
 PROVINC · GAL ·

vidi etiam ob spatii angustias litteram litterae superpositam, utraque imminuta (3):

Q · CERVIVS'   
 PHILOMVS<sup>s</sup>  
 VARIASIA · SEX · L · CAESIA

tum notam quoque superadditam extremae vocali, quae litteram M desiderari indicaret, et supplere posset (4):

IN  
 HONORE  
 DOMVS · DIVI  
 NAE · DIS · MAIRABVS  
 VICANI · VICI · PACIS

Ceterum haec emendationis caussa usurpaveris, ne mendum a scriptore ipso prodiisse videatur. exemplar vero nihil horum exhibeat: in quo singulae quoque litterae ac decurtata vocabula auctoris manu scripta sint, ne lapidarii, qui fere sibi aliquid sapere videntur, imperite aliquid atque intempestive novare audeant. cave autem verbo cuiquam litteras adimas intermediarum: prisea monumenta habent COS · pro *Consulibus* CES · pro *Censoribus*; praeter haec vix aliud exemplum huiusmodi proferri possit. itaque veterem morem retineamus, ut quae verba non omnibus litteris scribenda censem, ab his extremae tantum detrahantur. simul et illud servandum est, ut litterarum, quae remanent, ultima consonans sit: hanc enim veterum consuetudinem fere fuisse animadverteris: sic, exempli caussa, in titulo viae Flaminiae ad Intercisa, supra fornecem perfossi montis, quamquam vocabula octo sunt mutila, nullum tamen vocali finitur (5);

(1) Ep. Ep. p. 553.  
 (2) p. 455. n. 19.

(3) Mss. Giovenaz.  
 (4) Grut. p. 92. n. 1.

(5) id. p. 149. n. 7.



IMP · CAESAR · AVGVSTVS  
 VESPASIANVS · PONT · MAX ·  
 TRIB · POTEST · VII · IMP · XVIII · COS · VIII ·  
 CENSOR · FACIEND · CVRAVIT

antiquae etiam consuetudinis est, si vocabulum, quod omnibus litteris non scripseris, pluralis sit numeri, ultima ut littera geminetur (1):

MERCVRIO · ET  
 MINERVAE · DIS  
 TVTELARR · S ·

neque id tamen semper servatum est: ut de hoc valde laborandum non sit, nisi forte indicio illo opus esse contingat, ne quis legendo haereat, et vocabuli numerum ne quaerat.

Porro ad verba in primis, quae trunca scriberent, passim veteres interpunctione utebantur: tum plerique ad singula vel omnibus perscripta litteris: mitto quae puncta ad singulas prope syllabas apposita videmus; pauci enim haec iidemque inepti marmorarii induxerunt (2). sed permulta utique monumenta, praesertim publica, singulas inscriptionum voces puncto notatas exhibent: quae causa fuit, cur Gruterus ea fere, ubi deessent, supplenda putaret: quippe veterem scribendi rationem a publicis monumentis petendam esse arbitrabatur. in quibus quum puncta vulgo appareant, marmorariorum inscitia vel negligentia, ubi haec desiderarentur, omissa esse existimabat. hic vero non dissimulabo, in exemplis describendis mihi etiam Gruteri rationem placuisse: ut sicubi puncta non invenerim, ego quoque, culpa in lapidam aut librarium rejecta, audacter apposuerim. satis nimirum ex antiquis exemplis constare videbatur, morem hunc apud eruditos homines per diu obtinuisse.

At non ii tamen punctum, ut quidam nunc faciunt imperite, ad ea quoque verba adfigebant, quae singulorum versuum ultima essent: nisi forte verbum ibi mutilum aut numerus aut singularia littera legeretur: haec enim apposite puncto notabantur, ut ea lector supplenda esse intelligeret; quamquam puncta ibidem loci vel in publicis monumentis non raro omissa esse, fatendum est; sive quod nulla sequente littera, quam quis perperam legendo conjungeret, inutilis ea nota videbatur, sive etiam quod lapidarii quidam hoc statuerant, verborum, quae in fine versus insculpta essent, eandem omnium rationem habendam esse. illud plerique servarunt, ne interpunctione uterentur ante QVE et VE: has quippe particulas nominibus verbisque conjunctas legendo pronuntiabant: ubi tamen hae singulariis iungebantur litteris, interpunctio apparet (3).

Monendus demum erit marmorarius, ne puncta, ut multi mendose, ad litterae basim insculpat, sed ad ejus latus medioque fere in spatio, quod vocabula discriminat: monumenta eruditae aetatis non alio loco habent (4). praeter puncta autem, sententiarum quoque discrimina distinctionesque, de quibus Diomedes Grammaticus loquitur (5), aliquis forsitan usurpanda censeat: huic tamen auctor sim, ut communem scribendi rationem, si inscriptiones breves fuerint, non relinquat: in constitutionibus autem publicis, quae fere longa oratione exponuntur, eam, si libeat, notam usurpet, quam in Centumvirorum Vejentium publica Auctoritate (6) bis interpositam esse jam vidimus.

III. Sequitur, ut de numeris notisve sollemnibus aliquid attexamus. fuit qui Arabum notas, ut vocant, quas Arithmeticis jamdiu receperunt, omnes Romanas esse con-

(1) Grut. p. 50. n. 7.

(2) v. Lup. Epit. Sev. Mart. §. 10. p. 67.

(3) v. inser. 78. etc. et hic part. 1. cap. 6. §. 2. n. 2. etc.

(4) Matf. Art. Cr. L. 1. 3. c. 2. p. 176.

(5) lib. 2. c. de Discret. p. 432.

(6) v. inser. 309.

tenderet (1): easque in notarum libro, quae Tironis et Senecae appellantur, accurate descriptas demonstraret: easdemque in antiquo codice Geometricorum Boethii se vidisse testaretur, rationibus, ut nunc fit, ineundis subducendisque dicatas. huic vero gratiam Latini habeant, quod sibi hujus quoque felicissimi inventi laus tribuatur. quia tamen in titulis suis alias omnino, quam istas numerorum notas constantissime obtulerunt: profecto aegre ferant, si quis nunc lapidarias atque sollemnes Arithmeticis hisce plane obscuris privatisque posthabeat. nec vero hae specie formaeque cum iis notis possunt contendere, quas in antiquis marmoribus incisas videmus: ut illae, elegantiae etiam retinendae causa, rejiciendae sint.

Iamvero harum omnium, quas retinere debemus, varias figuras libro tertio dabimus. hic primum adnotandum est, non semper numeris usos veteres, quum magistratus recenserent: quod te jam animadvertisse arbitror nonnullis in titulis, qui praefereunt COS · TERT · COS ·, QVINCT · id est *Consul Tertium*, *Consul Quinctum*, ut Varro tradit (2), non *Tertio* et *Quinto*, ut alii olim legi posse existimabant. eodemque modo anni etiam, quot quisque vixisset, in epitaphiis expressi non semel (3):

DIS · MANIBVS  
TITO · COCCEIO  
PHILOCALO  
FECIT · TITVS · COCCE ·  
HERMES · PATRONO  
SVO · BENEMERENTI  
VIX · ANN · SEPTVAGINTA

verum figurae numerorum quum crebrius omnino in titulis usurpatae, quam nomina, quotiescumque non unius generis magistratus saepius ab eodem singuli gesti essent; tum fere semper, quum ceterarum rerum qualiscumque numerus prodendus esset, quemadmodum exempla superioris libri passim ostendunt. quaedam autem notae non semper magnitudine ceteris pares: nam veteres, quum iterum, tertium, quartum indicarent, notam postremam non raro produxerunt, hoc modo II · III · IIII · utrinque vero, quum Seviros designarent, IIII · hoc forsitan rati se consequuturos, ut extremis superne productis ceterae etiam notae fierent numeranti insigniores.

Nec primam numerorum notam vetustiores, ut nunc plerique ante V aut X ponebant, si numeros quatuor aut quatuordecim aut novem scribere vellent: notam potius quater usurpabant eandem, sic IIII · VIIII · XIIII · itemque ut quadraginta et quadringenta significarent, scribebant XXXX · et CCCC · potius quam XL · et CD · ceterum hanc quoque rationem florentibus etiamtum litteris usu Latini comprobant. atque iisdem temporibus linea superinducta numeros distinguere solebant, hoc pacto,

XIII · CLXI ·

quo numeros scilicet, quos forma a litteris non discriminat, linea demonstrarent. num autem ea numerum etiam augerent, ut nota

X ·

totidem millia designarent, libro tertio quaeremus.

Discriminis item causa, in viarum militarium columnis, quae omnino ad iter metiendum statuebantur, atque ut numeri miliariorum insignes essent, paullulum fere infra titulum, eosdemque maximis notis incidendos curabant. tales potissimum apparent

(1) v. Calog. t. 48. p. 21. et Nicol. de Sigl. Vet. c. 16. §. 6.

(2) Gell. N. A. l. 10. c. 1. sed v. Grosippum sive Scioppium in Pa-

radox. litterar. epist. 1. (3) Grut. p. 93. n. 15.



iis in columnis, quas nostra aetate detexit Ricolvius. propter viam, quae Nicea Mo-  
noecum ducit: hic autem quartae titulus est plane integer (1):

IMP · ANTONINVS  
PIVS · FELIX · AVG ·  
PONI · CVRAVIT

## DCIII.

quin eadem de caussa non raro hisce in monumentis numerus ante titulum inscriptus  
eminet, ut in milliariis viae Appiae (2):

## VIII.

IMP · CAESAR  
DIVI · NERVAE · FIL ·  
NERVA · TRAIANVS  
AVG · GERM · PONT · MAX ·  
TR · POT · VI · IMP · II · COS · III ·  
PATER · PATRIAE  
INCHOATAM · A · DIVO · NER  
VA · PATRE · SVO · PERFI  
CIENDAM · CVRAVIT

Sunt vero et aliae antiquorum monumentorum notae, quae nobis etiam usui esse  
possunt, ut quae centuriam aut centurionem significant: et quibus denarius aut assis  
partes vel mensurarum aut ponderum, et alia hujusmodi indicantur. ex his quae tem-  
poribus moribusque nostris conveniunt, jam elegi, earumque figuras libro tertio exhi-  
bebo: ceteras, a quibus ob earum obscuritatem et insolentiam nobis abstinendum est,  
in Ioannis Nicolai tractatu *de siglis veterum* reperiēs.

V. Restat, ut de inscriptionum etiam versibus nonnulla tradamus. nam etsi de his  
nihil apud veteres ratum diu atque firmum fuisse multis videtur; quaedam tamen dili-  
gentius servata, quam ut contemni possint. ac vetustiora quidem monumenta, quod  
Gracis familiare est (3), versus fere exhibent ejusdem omnes longitudinis. nec vero si  
deinde versibus alternis brevioribus longioribusve tituli maxime honorarii et sepulcrales  
scribi coepti, leges etiam et decreta eodem modo exarata sunt. prisco haec more pas-  
sim scripta videas, paribus versibus; nisi quod singulorum capitum initium sinistrorsum  
a margine ducitur. tum ellogia etiam ab his raro discrepant: sacrae demum et histo-  
ricae inscriptiones modo hac modo illa descriptae forma: ut cum cuique rationem se-  
qui liceat, cui aptius marmor esse videatur.

Sed qui versibus imparibus titulum scribere voluerit, nolim ita partes ejus distri-  
buat, ut elegiam quis lapidi inscriptam putare possit. vetus fortasse exemplum est nul-  
lum, cujus alterni versus omnes sint pares. ac primus fere brevior, aut si longior,  
brevissimum illi subjectum videas: qui autem medii sunt, ii omnibus latius patere so-  
lent. extremi saepe sic alternant, ut ultimus uno tantum aut altero verbo constet. ne-  
que tamen haec ad anussim omnia exigenda sunt: nec si versus paullo longior sen-  
tentiam commode circumscribat, hunc tu breviorē feceris, ut distributionis elegantiae  
servias impensius. imo tibi curae esse velim, ut ea sit, quantum fieri potest, versuum  
mensura, quae orationis partes aequis intervallis exhibeat, sententiis lucem afferat, le-  
ctori, ad res intelligendas, aliquid prodesse possit.

Enimvero si majus unquam studium majorque in his diligentia collocanda est,

(1) Maff. M. V. p. 231. n. 8.

(2) Pratill. l. 2. c. 7.

(3) Maff. Art. Cr. L. 1. 3. c. 1. cap. 2.



eam in honorariis inscriptionibus describendis recte posueris: quo nempe ipsa tituli forma et concinna membrorum distributio statuae ipsi quodammodo atque basi ornameto esse possit. earum certe versus acuratissime ab antiquis distributos saepe animadverti: neque hic ego praelarum tibi exemplum inuidebo (1):

C · IVLIO · C · F · VEL · OPPIO  
 CLEMENTI  
 X · VIRO · STLTIB · IVDIC ·  
 TRIB · LATICL · LEG · III · FL · FEL ·  
 QVAESTOR · PROVINC ·  
 BAETICAE  
 TRIB · PLEBIS · CANDIDAT ·  
 IMP · ANTONINI · AVG ·  
 PRAETORI · CANDIDATO  
 EIVSDEM  
 PATRONO · COLONIAE  
 COLONI

quia vero deerant aliquando verba, quae apte versum implerent, nec loco movenda videbantur, quae superiori adtribuissent; sic bina haud raro vocabula diducta videas; ut latum sola versuum occupent, spatium utrinque medium complexa, quod illi venustum et intuenti non injucundum fore putabant (2):

CVRTILIAE · C · F · PRISCILLAE  
 SACERDOTI  
 DIVAE · AVGVSTAE  
 ORDO · VI · VIRAL ·

nec minus haec placuere, quum versus longitudine pares essent (3):

AELIAE · IVCVNDAE  
 COIVGI · B · M ·  
 ET · VICTORI · FILIO  
 EIVS · ITMARVS  
 AVG · LIB · FECIT

atque illud quoque antiquis in monumentis, quae multa sive militum sive sodalium, vel etiam libertorum servorumve nomina referunt, haud raro servatum diligenter animadvertas, ut extremam cognominis, saepe et nominis cuiusque litteram a reliquis separarent, quo versus omnes longitudine pares facerent (4): quod haud ita pridem quum minime subolisset, nactus quidam fragmentum antiquae inscriptionis, in quo unius laterculi extremae nominum litterae S tantum, et cognomina integra legebantur, elenchum se invenisse putavit sanctorum Martyrum, quorum in Vaticano templo reliquiae conditae essent. porro collegarum ejusmodi nomina quo pacto inciderentur, hic quoque exemplo indicemus (5):

(1) Murat. p. 1163. n. 7.

(2) Grut. p. 320. n. 12. v. Maff. M.

V. p. 199. n. 1.

(3) id. p. 615. n. 5. v. inser. 96.

(4) v. inser. 96. l. 1.

(5) Fabr. p. 143. n. 162.

## V · V · DE · S · P · (1) FECER ·

P · IVLIVS · P · L ·	ZENA	S	P · IVLIVS · D · L ·	STIPHALIV	S
P · IVLIVS · P · L ·	LARISTV	S	P · IVLIVS · D · L ·	PACCIV	S
P · IVLIVS · P · L ·	SOPHV	S	P · IVLIVS · D · L ·	SELEVCHV	S
P · IVLIVS · P · L ·	ZALEVCHV	S	P · IVLIVS · D · L ·	NEMEV	S
P · IVLIVS · P · P · L ·	AGASIA	S	P · IVLIVS · D · L ·	PEDERO	S
P · IVLIVS · P · P · L ·	ANTHERO	S	P · IVLIVS · D · L ·	DIADVMENV	S
P · IVLIVS · P · P · D · L ·	TAMPIANV	S	P · IVLIVS · D · L ·	GRAPTV	S
P · IVLIVS · P · D · L ·	PHONV	S	P · IVLIVS · P · P · C · L ·	HEGESANDRV	S
P · IVLIVS · P · D · L ·	HEVTVCA	S	P · IVLIVS · P · C · L ·	TELESPHORV	S
P · IVLIVS · P · D · L ·	STEPHANV	S	P · IVLIVS · P · L ·	TATVLV	S
P · IVLIVS · P · L ·	CHRISOPHV	S	P · IVLIVS · P · L ·	ZETHV	S
P · IVLIVS · P · L ·	GALV	S	P · IVLIVS · P · P · P · L ·	ZENO	N
P · IVLIVS · P · L ·	DAPHANGORA	S	P · IVLIVS · P · P · P · L ·	MEBOCV	S
P · IVLIVS · P · L ·	GALVTIV	S	P · IVLIVS · P · P · P · L ·	NARDV	S
P · IVLIVS · P · L ·	TARPV	S	P · IVLIVS · P · L ·	AMATO	R
P · IVLIVS · P · L ·	THALAMV	S	P · IVLIVS · P · L ·	ASELLV	S
P · IVLIVS · P · L ·	THELEPHV	S	P · IVLIVS · P · L ·	GRATV	S
P · IVLIVS · P · L ·	PHILONICV	S	P · IVLIVS · D · L ·	ANASTASIV	S
P · IVLIVS · P · L ·	THYLLV	S			
P · IVLIVS · P · L ·	ARGVSERO	S			

## IN · FR · P · XXXS ·

Vt vero hic Iuliorum libertos, ne quis legendo haesitaret, lineae ad perpendicularum ductae discriminant; sic aliis in titulis, quotiescumque versus binis sint aut pluribus ceris descripti, lineam intermediam videas, aut certe spatii aliquid relictum, in quo nulla littera. *Ceras* appello, quas quidam mendose *Columnas* dicunt: *ceras codicum* memorat Quintilianus (2), et *ceram primam et secundam* testamentorum Suetonius (3), quae utique in chartis membranisque scribebantur. versus igitur geminos purus veluti sulcus sic dividebat distinguebatque, ut inscriptio tamquam duabus in tabellis exarata videretur: itaque non ante pars illa altera legenda erat, quam quis primam oculo percurrisset (4):

C · SAVFEIVS · C · L ·  
PAMPHILVS  
SIBI · ET

HILARAE  
LIBERTAE  
SVAE

quaedam praeterea inscriptiones occurrent, quarum primi tantum et secundi versus, spatium divisi gemini sunt; qui autem subjiciuntur, singuli omnes; quo e genere est Hadriani et Sabinae titulus (5), item epitaphium a Publicia Glypte Niconi filio et Eutycheti verna positum (6), quae superius protulimus. tertium a Grutero exemplum peti possit (7) tribus veluti inscriptionibus constans, quae versus infra binos habent communes: sed jam Maffejus (8) commentitiis haud immerito adnumeravit. neque enim credibile, quod ibi legitur, statuas tres ex auri pondo X · a Centurione Vespasiano Aug. et filiis positas, ne dum eas lapidea in basi locatas.

Ceterum si qua huiusmodi inscriptio tibi conficienda fuerit, haud inutile erit, ducta tum quoque linea priores versus dividere, ne quis legendo conjungat: discrimen sane aliquod vetera quoque marmora ostendunt (9):

(1) *Vivi De Sua Pecunia*. v. Fabr. p. 605. n. 48. et p. 612. n. 102.

(2) *Inst.* l. 10. c. 3.

(3) in *Ner.* c. 17. n. 2.

(4) Fabr. p. 7. n. XLIII.

(5) *part.* 1. c. 2. §. 3. n. 5.

(6) *ibid.* c. 3. §. 4. n. 1.

(7) p. 211. n. 2.

(8) *Art. Cr.* l. 1. 3. c. 4. p. 310.

(9) Fabr. p. 153. n. XXIV. v. Grut. p. 969. n. 11. p. 1100. n. 9. etc. *Don.* Cl. 5. n. 171. Cl. 7. n. 118. etc.

CN · TVCCIVS	✕	VETTIDIA
SEX · F · COL ·		○ · L ·
PROCVLVS	?	HILARA
○		○
SEX · TVCCIVS ·		SEX · L · ZENO
EMIT · A · CN ·		MINVCIO
STEPHANO ·		OLLAS · III ·

contra alia quaedam, ut quae fastos referunt aut leges, vel decurionum, militum, collegarum quorumcumque nomina, quum haec pluribus fere laterculis sive ceris descripta sint, titulum initio habent communem, maioribus inscriptum litteris, qui spatium laterculorum superius, nulla linea sectum percurrat (1): quemadmodum paullo superius a Iuliorum libertis in monumento suo servatum esse vidimus, ac saepe alibi videre licet.

Antiquae item consuetudinis est, quum verbum nomenve commune duobus, post geminos versus, medio in spatio ad latus adscribitur; ut in ponte Ariminensi ad utramque loricam ultro citroque comiteantes adhuc legunt (2):

IMP · CAESAR · DIVI · F · AVGVS TVS · PONTIFEX · MAXIM · COS · XIII · IMP · XX · TRIBVNIC · POTEST · XV · P · P · DEDERE  
TI · CAESAR · DIVI · AVGVS TI · F · DIVI · IVLI · N · AVGVS T · PONTIF · MAXIM · COS · IIII · IMP · VIII · TRIB · POTEST · XXII.

eodemque modo post consulum nomina saepe apponebant COS. quod multis jam in exemplis vidimus. sic et duorum legatorum nominibus adjectum est LEG. (3) et alia aliis, quae pluribus communia essent. quin etiam, ne quis legendo haesitaret, adeo nempe veteres de inscriptionis perspicuitate laborabant, si qua forte adscripsissent nomina, quae multis convenirent, ea non intervallo solum, sed curvis quoque discreta lineis aliquando reperiatis: cuiusmodi exemplum Maffejus nobis suppeditat (4):

C · IVLIVS · AVG · L · HELLEN

SIBI · ET

EROTI · PATRI		ET
ZMYRNAE · MATRI		ET
TRYPHAENAE · NVTRICI		ET
EVPATORIDI (	CAESARIS	ET
PHOEBE (		ET
SECVNDO (	VERNIS	ET
AEQVALI (		ET
ILAIRE (		ET

LIBERTIS · ET · LIBERTABVS · ET · POSTERISQVE · EORVM

IN · FR · P · XII · IN · AGR · P · XII ·

sic nempe Hellen vernas quinque sejuuxit a suis, et genus eorum expedite indicavit.

Illud extremo subijciam, etsi pleraeque inscriptiones versibus constant in rectum exaratis, non paucas tamen esse, quae in orbem curvatos habeant: ut olim in Iphiti disco legebantur verba, quibus Elei Olympiorum inducias indicebant, qua de re Pausanias (5), *Ες κυκλου σχημα περιεισιν επι τω δισκω τα γραμματα*. quaedam huiusmodi exempla Gruterus aliique exhibent: sed si lateres tegulasque exceperis, ceteros titulos in

(1) v. inser. 96. lib. 1. et Fabr. p. 448.

n. XII. et p. 598. n. 9.

(2) Maff. M. V. p. 365. n. 2.

(3) v. inser. 315.

(4) M. V. p. 136. n. 1.

(5) lib. 5. c. 20. in circuli figuram  
litterae discum ambiunt.



orbem scriptos aliis in operibus non leges, quam quae orbiculata essent, ut clypei, ut paterae, ut nomismata, ut urnarum sepulchralium opercula, et id genus alia.

Magnis autem operibus, apud veteres, ut nunc intra templa in summa testudinum curvatura, nescio, an ullus unquam titulus in orbem inscriptus sit. ut ut res se habeat, id unum addo, quod jam a Caesare Domenico adnotatum reperi (1), titulum, qui in summo tholo ad orbitam extremam legendus sit, ita scribi oportere, ut litterarum veluti pedes in centrum vergant, vertex exeat a centro: quemadmodum numerorum quoque tituli scripti sunt. sic enim signa etiam et effigies quaecumque in suprema hemisphaeriorum parte locari pingive solent.

(1) Ortogr. delle lett. majusc. c. 16. ed. Rom. 1693.

## CAPVT X.

*De loco et ornatu inscriptionum*

I. **Q**uamquam scriptori perraro de tituli loco statuere licet; id enim juris architecti plerumque atque etiam fabri sibi solent vindicare: tamen, ne, si sententiam forte rogetur, aqua illi, ut ajunt, haereat, quaedam de hoc quoque praemonenda arbitror: simul haud inutile futurum puto, si quid etiam de inscriptionum ornatu addidero, ut ineptias idem, quantum fieri potest, removeat, et inscriptiones barbarie infici non patiatur.

Ad locum quod attinet, non ille semper eligitur, quem inscriptio sibi poscit: saepe omnino contingit, ut tituli ita sublimes figantur, ut legi non possint, vel ita abditis prostent sedibus, ut quaerendi sint: saepe etiam solitarios et procul a monumentis, de quibus loquuntur, temere incisos videas, ut quorsum spectent, pauci adsequantur. mihi autem de singulis inscriptionibus sic est agendum, ut quo quaeque loco olim legerentur, edocti, quamminimū a veterum praescripto recedamus.

Atque ut a sacris initium sumam, alium sibi locum dedicationes templorum, alium votiui donariorum tituli, alium denique monumenta sacrorum vindicabant. dedicationes enim in fronte ipsa aedium sacrarum grandibus inscriptae litteris legebantur. ac nullum quidem inscriptioni locum in templorum fronte adsignavit Vitruvius, qui de zophoro quum ageret, hoc tantum adnotavit (1), sigilla interdum in eo designari, quorum causa zophorum quarta parte altiores fieri jubet, quam epistylum, uti auctoritatem habeant sculpturae. sed dedicationes in zophoro etiam incisas esse, et nummi veteres ostendunt et templa ipsa, quae vetustatem pertulerunt (2). quaedam vero in epistylis tantum apparent, quaedam partim in zophoro partim in epistylis, quas Romae insignes adhuc templorum reliquiae ostentant: in tympano, id est triangulo illo in spatio, quod fastigii coronis clauditur, vix unquam inscriptionem fuisse puto. quippe illud anaglyphis et signis plerumque ornabant: Tiberii tamen nomisma exstat (3) cum templi pulcherrimi exemplo titulum in tympano referentis, S · P · Q · R.

Non igitur suum inscriptioni locum tribuerunt, qui aut intra templum, aut in supero portae liminae incidendam curarunt; nec qui sic in zophoro inscripserunt, ut non frontem solum, sed etiam alterum aut utrumque templi latus pereurreret. et mausoleis quoque magis, quam templis convenit inscriptio inter epistylum, et portam tamquam in tabula proposita, vel si haec corona et sima includatur; nisi forte rotunda aedes sit, nec habeat pronaon. neque enim tituli hujusmodi conspicui tantum esse debent, sed etiam alte eminere: quo nempe altius protuleris, eo apertius de toto aedificio loqui videantur, et legentium simul oculos ad totius molis adspectum attollant. idcirco in ipsis etiam aediculis, quas ad alas templorum excitamus, dedicationis titulus sublimis sit, ac fere in summo altaris fastigio legatur: quamquam si infra absidem atque inter columnas signum stet praecipuum magna in basi locatum, in hac inscriptio recte incidetur, camque ad ipsam quoque aediculam quisque referet.

Votivis contra titulis locus in templo quilibet aptus videri possit: veteres sane nusquam non affixisse, jure dixerim. declarat hoc Plinius junior in epistola ad Roma-

(1) lib. 5, c. 3.


(2) Montfauc. Antiq. t. 2, p. 1, p. 102.  
122.

(3) Vaill. t. 3, p. 105.

num (1), quem ad Clitumni templum invisendum invitat; situm id via Flaminia inter Spoletum et Fulginiam, ejusque multa adhuc vestigia manent: *Nihil, inquit, erit, ex quo non capias voluptatem. nam studebis quoque et leges multa multorum omnibus columnis, omnibus parietibus inscripta, quibus fons ille Deusque celebratur.* similia vero de Aesculapii templo apud Epidaurum refert Pausanias (2); qui et columnas memorat non alia de caussa constitutas, quam ut in iis nomina eorum inscriberentur, quibus Aesculapius medicinam fecisse videretur, historia etiam morbi et curationis adjecta; ΣΤΗΛΑΙ, inquit, δ' ΕΙΣΤΗΚΕΣΑΝ ΕΝΤΟΣ ΤΟΥ ΠΕΡΙΒΟΛΟΥ, ΤΟ ΜΕΝ ΑΡΧΑΙΟΝ ΚΑΙ ΠΛΕΟΝΕΣ, ΕΠ' ΕΜΟΥ ΔΕ ΕΞ ΛΟΙΠΑΙ. ΤΑΥΤΑΙΣ ΕΓΓΕΓΡΑΜΜΕΝΑ ΚΑΙ ΑΝΔΡΩΝ ΚΑΙ ΓΥΝΑΙΚΩΝ ΕΣΤΙΝ ΕΝΟΜΑΤΑ ΑΚΕΣΘΕΝΤΩΝ ΥΠΟ ΑΣΚΛΗΠΙΟΥ, ΠΡΩΤΕΤΙ ΔΕ ΚΑΙ ΝΟΣΗΜΑ, Ο ΤΙ ΕΚΑΣΤΟΣ ΕΝΟΣΙΚΕΣ, ΚΑΙ ΟΠΩΣ ΙΑΘΗ. γεγραπται δε φωνη τη Δωριδι. neque ab his discrepat Graeca inscriptio apud Gruterum (3), quae olim in insula Tiberina ad Aesculapii templum stetit fectur. tum titulos aliquando vel extra templa fixos esse, inscriptio ostendit a Velsero vulgata (4):

MERCVRIO  
CVIVS · SEDES · A · TERGO  
SVNT  
APPIVS · CL · LATERANVS  
XV · VIR · SACR · FAC ·  
COS · DESIGN ·  
LEG · AVG · PR · PR ·  
LEG · III · (5) ITAL ·  
V · S · L · M ·

Quia tamen qui vota Diis solvebant, donum fere aliquod dabant, idcirco inscriptiones pleraeque in ipsis donariis incidebantur, quae caussa fuit, cur rei dono datae nomen non raro omitterent. quaedam autem e donariis insignia erant, ut arae e marmore, in quibus praeter anaglypta longae saepe inscriptiones visebantur. ex his nulla celebratior, quam ara Lugdunensis in templo, quod civitates Galliae Caesari Aug. decreverant; quippe in ea, ut auctor est Strabo (6), inscriptio erat gentium sexaginta, et imago singularum; ΕΣΤΙ ΔΕ ΒΑΜΟΣ ΑΞΙΟΛΟΓΟΣ ΕΠΙΓΡΑΦΗΝ ΕΧΩΝ ΤΩΝ ΕΘΝΩΝ Ξ ΤΩΝ ΑΡΙΘΜΟΝ ΚΑΙ ΕΙΚΟΝΕΣ ΤΟΥΤΩΝ, ΕΚΑΣΤΟΥ ΜΙΑ: quindecim nempe imagines totidemque nomina singulis lateribus expressa fuisse verisimile est. aliae tamen arae quamvis operosae brevem omnino titulum contractumque referunt, quem sertum e frondibus fere ambit; cujusmodi est ara Heidelbergae quadrifrons, signis nobilis et corona inscriptionem cingente (7);



(1) lib. 8. ep. 8.

(2) lib. 2. c. 27. columnae vero intra septium constitutae sunt, pleraeque antiquitas, mea autem actate sex reliquae. in his nomina inscripta virorum et mulierum, qui ab Aesculapio sanati sint, atque

etiam morbus, quo quisque laboraverit, et qua ratione convalescerit, scripta porro sunt haec lingua Dorica.

(3) p. 71. n. 1.

(4) Mon. Aug. Vind. n. 4. Grut. p. 51. n. 1.

(5) Supple Legato Leg. III.


(6) l. 4. p. 192. B. ara autem est memorabilis, quae inscriptionem habet populorum numero sexaginta, et totidem imagines sunt, cujusque una.

(7) Grut. p. 15. n. 9.



porro titulos hujus generis recte nunc quidam aereis argenteisque indere candelabris solent, quae in sacra altaria dedicantur, cereis ferendis, quos Caelitum sanctorum honori incendimus; eodemque modo in argenteis loricis inscribi possint, quibus per festos dies altaria proteginus.

II. Iam et parva veterum donaria, ut votivi clypei et sigilla et imagines marmoreae palmares saepe aut bipalmes titulo vix unquam carebant; in basi autem fere scriptus erat: etsi Graeci Hetruscique, quam statuas Diis donum darent, inscriptionem in dextro ipsarum latere incidebant (1); hunc scilicet morem satis barbarum jure Latini repudiarunt. sed non unum tantummodo basis latus, sed bina saepe inscriptioni adtribuerunt; ut in exigua basi, quae nuper Praeneste reperta est, signum olim sustinente, qualecumque fuerit, Fortunae Primigeniae Praenestinae dicatum; haec vero in illa duarum quasi partium distributio est,



torquet vero adhuc multos illud THESIS, quod aut idem est, atque ANAΘHMA sive *Donarium*; vel ablativum dixeris casum, velut si THESIAS locum appellarent, in quo aedicula altera esset e duabus, quas in templo Fortunae fuisse indicat Tullius (2)(a).

Si nulla in donario basis, quae titulum capere posset; non ideo omittebant: hic, exempli caussa, in aenei serpentis dorso legitur (3):

ASCLEPIO · ET · SALVTI · SACRVM  
EX · VOTO · CALLIXSTVS · D ·

sic aliis in donariis occurrent, quaquaversus scripti: vasa vero et quidquid rotundum est, ad oram fere inscriptionem habent, eaque orbem plerumque implet (4). in puteo illo sacro, quem Paciaudus commentario illustravit, paullo infra labrum haec incisa per ambitum (5):

(1) Passer. Lett. Roncagl. XI. Calog. t. 23.

(2) de Divin. I. 2. c. 41. n. 86.

(a) Viscontius tamen Mus. Pio-Clem. T. 2. p. 88. edit. Mediol. existimat, vocem *thesin* idem significare ac certam pecuniae vim, quae a litigatoribus ante iudicium de-

ponebatur, quamque auferebat qui iudicio vicerat: hinc acute conjicit, Q. Cosidium ita donarium suum appellasse, ut omnibus innotesceret, se illud Deae dicare, dummodo imperator incolunus reverteretur. Litteras vero D. D. recte

interpretandas esse *Donum Dedit*, satis aperie ostendit Zacchar. Inst. Lapid. I. 3. c. 4. lit. D. D. et Marin. Frat. Arval. p. 556.

(5) Fabr. p. 689. n. 109.

(4) Grut. p. 1011. n. 3. etc.

(5) edit. Rom. 1761.

## APOLLINI · GENIOQVE · AVGVSTI · CAESARIS

L · APVSVLENVS · L · L · EROS · MAGISTER · PVTEVM · PVTEAL · LAVRVS

SACRVM · D · S · P ·

Quae monumenta sacrorum appellavimus, his locus in templo aut quae templo adhaerent, aedibus esse debet (1): pertinent enim ad religionem. itaque Kalendaria etiam sive Fastos in templis olim dedicatos legimus: in aede certe Herculis Musarum a Fulvio Nobiliore positos, tradit Macrobius (2); esto, suos Verrius Flaccus Praeneste in hemicyclo contra forum publicavit (3). maxime autem curandum, ut singulae hujusmodi inscriptiones quam minimum ab eo loco absint, de quo loquuntur: equidem, si, aedieula in templo aedificata, lex dedicationis incidenda sit, hanc in introitu atque in ejusdem columnis aut pilis legere velim. sic statim intelligam, quae in ea res designentur. ceterae tamen si anaglyphis aut musivo operi aut picturis subjectae fuerint, minus jam de templi loco laborabo, quum in ipsa horum conjunctione vel hospes rem facile possit attingere.

UL. Venio ad inscriptiones honorarias, quae pessime a quibusdam acceptae, sede saepe sua carere coguntur. in ipsa urbe non unam ad parietes quoscumque legi solitariam, ingloriam, non statuae, non sigao, non picturae subjectam: ut quid demum honoris causa positum esse indicaret, reperire non possem. nam ridiculum est, quod quidam reponunt, inscriptionem de ipso lapide loqui, in quo incisa sit: id enim eo re-cidit, ut inscriptio de se ipsa loquatur; quod absurdum est, nec de ulla cujuscumque generis inscriptione affirmari potest. itaque si veteres unquam honorem hujusmodi lapidarium cuiquam tribuissent, alio infra titulo id ipsum declarandum esse existimassent. eodem vero spectant honorariae id temporis inscriptiones quae chartis tantum impressae, ubi quis magistratum aut curationem adeptus sit, aliae atque aliae sparguntur in vulgus: quarum ea elegantior atque illustrior haberi solet, quae ceteras versuum numero et siglorum, ut vocant, novitate antecellit. quid vero tot verba tanto hiato sonant, aut quid tandem ob tot virtutes tot merita ejus, quem ornare volunt, factum esse narrant? hunc fere cantilenarum harum exitum esse video, ut scriptores ipsi *Perpetuum Grati Animi Monumentum Bene Merenti Se Fecisse* testentur: monumentum autem ipsa chartula est et inscriptio, quanquam id ne uno quidem indicant verbo: ut sepulcrum potius ab his paratum esse videatur. qui autem plus sapiunt, se *plaudere*, se *gratulari*, se *fausta omnia precari* subscribunt. verum post clarissimarum virtutum et factorum egregiorum praedicationem quis hanc quasi clausulam diu jam suspensus expectet, quae nec praenium ullum nec laudem honoremve rependat? equidem sic existimo, si apud veteres genus hoc titulorum obtinisset, numquam eos usuros fuisse, quin ad eum, quem laudarent, satis amplum munus cum inscriptione domum mitterent: simul eosdem gratulationem suam paucioribus verbis ac minime ambitiosis fuisse facturos.

Enimvero nulla est veterum inscriptio honoraria, quae non in arcu aut in basi vel statuae vel columnae, aut certe sub signo aliquo aut pictura incisa fuerit. id nos ipsa docet nunquam immutata verborum collocatio: dativo enim casu nomen ubique legas ejus, cui honos deferitur; recto autem, eorum, qui detulerunt: tum verbum, sive scriptum sit, sive subaudire debeas, ejusmodi est, ut accusativum poscat, quem si adscripsere, non aliud sonat, quam *Arcum, Statuam, Bigam, Imaginem*, et si quid aliud

(1) v. Liv. l. 40. c. 28. n. 52.

(2) Saturn. l. 1. c. 12.

(3) Svet. de Gram. c. 17. n. 4.



clarorum virorum honori dedicabatur; si omiserunt, monumentum tamen non abfuisse intelligis, cui etiam constituendo locus qua senatus consulto qua decurionum decreto datus dicitur.

Sed luculentius testimonium ipsae sunt veterum monumentorum bases, in quibus pedum vestigia videmus, quae diem dedicationis ad latus inscriptum habent, quo die statuæ nimirum non sine celebritate populo ostensae primum ac publicatae essent. in his basibus honorarias inscriptiones ab antiquis acceperimus, vix unquam in sectili lapide: nam si quas nunc ejusmodi tabulae ostentant, ideo fit, quod transvectionis causa ab immani basi per nostros lapicidas desectae sunt.

Extra basim vix aliud quidquam inscriptum legas: Graecorum enim veterum mos ille fuit titulum aliquem in ipsa statua inseribendi; ut in signis Sesostris circa Ioniam positus scriptas tradit Herodotus (1) sacras litteras Aegyptias ab humero ad humerum in pectore, hac sententia:

ΕΓΩ · ΤΗΝΔΕ · ΤΗΝ · ΧΩΡΗΝ  
ΩΜΟ ΣΙ · ΤΟΙΣΙ · ΕΜΟΙΣΙ  
ΕΚΤΗΣΔΑΜΗΝ

quaedam tamen Latinorum monumenta exstant honoris causa constituta, quae voces aliquot extra titulum referunt, easque, ut Fabrettus animadvertit (2), modo in sima, modo in coronae regula, aut etiam in ipso statuarum quasi plintho incisae. nomen nimirum aut pars nominis ibi esse solet ejus, cui honos ille habitus sit, id est ultimum fere cognominum, quo maxime appellabatur, quod modo patrio, modo dativo, aliquando et accusativo casu efferebant. quin curatoris quoque nomen ibidem legas (3), interdum et oppidi, sive quod id, ut putavit Fabrettus (4), in ejus clientela esset, cui muniepes statuae decreverant; sive potius, quod eo in oppido monumentum ab ejusmodi artificie factum esset, qui opera sua non sibi solum, sed patriae etiam laudi esse putaret. ceterum moris hujus in vetustioribus basibus nulla vestigia: neque ejus elegantiae inventum duxerim, ut revocare debeamus.

Perraro autem una in basi sive statuæ sive columnæ bis eandem veteres inscriptionem incidendam curarant: contra fornices omnes utraque in fronte eandem referebant: in quibus non ad exiguae tabulae angustias contracta, sed versibus frontem totam, quantum patebat, percurrentibus explicata legebatur. atqui arcus quidam, uti quos Domitianus dicari sibi voluit, tantum patebant, ut eos Statius aliquando Iridi compararit (5).

III. Nonnulla jam de loco epitaphiorum dicenda, quae olim in columbariorum ollis, in sarcophagis, in cippis, sed stantibus semper erectisque; nusquam humi porrectis incisa sunt: si qui vero musoleis inscribenda erant, marmorea in tabula, grandibus inculpta literis, media in fronte locabantur. at pleraeq; nunc inscriptiones in templis ultro citroque eomneantium pedibus teruntur: quarum permultae jam Romae periissent, nisi eas clari viri, qui descripsit ediditque, sollertia ab interitu vindicasset. quae autem epitaphia marmore parietibus incluso prostant, saepe sine sepulcro posita videntur; nullas enim cineram loculus, nulla urna apparet. id quam scite fiat, viderint architecti: equidem non intelligo, quid filii parentibus, quid viri uxoribus fecisse dicantur, ubi nullum sepulcri vestigium, nulla monumenti forma sit. si tamen cippus a terra surgit, facile cuique occurret, humatum infra esse, cujus in cippo nomen legat.

(1) lib. 2. n. 106. ego hanc regionem  
humeris hūc meis a. l. ptus su n.

(2) p. 99. D.

(3) Grut. p. 1024. n. 5. etc.

(4) p. 100. L.

(5) Silv. 3. lib. 4. v. 97.



Sepulcrorum olim geminae interdum inscriptiones fuerunt eodem exemplo, nisi quod in prima numerus pedum *in fronte*, in altera numerus erat pedum *in agro* (1); nunc quia sepulcra parietibus haerent, una in fronte epitaphia incidimus: sed ad cipporum latera recte addes, quidquid epitaphiis adnecti solet. itaque ibidem non modo vitae anni et nota temporis, quo quisque decessit, sed salutationes etiam et sententiae morales et iura sepulcrorum incidi poterunt: haec scilicet veteres quoque non raro ab epitaphio separata in alterum aut in utrumque latus rejecerunt.

At si monumenti lapis opere anaglypho nobilis simulacrum defuncti referat, ita incidi epitaphium poterit, ut media imago sit, litterae partim initio, partim ad latera, ceterae infra legantur: ecce enim tibi ex Fabretti penu exemplum non inelegans (2): iconica in medio mulieris imago est pateram dextra tenentis, litterae vero sic distributae, ut distinctius nihil esse possit.



pleraque tamen sepulcra inscriptionem infra imagines habent totam; aut si defunctorum nominibus in summa fronte locus est datus; qui monumentum posuerunt, in ima fere leguntur.

Quod si sepulcrum veteris mausolei instar exstructum sit, in eoque praeter titulum tabulae etiam figendae sint, quae summi viri res gestas contineant; quem his denique locum tribuimus? id quidem superius jam attigi (3); sed addam hoc loco, quod a Svetonio accepimus (4), aeneas tabulas cum indice rerum ab Augusto gestarum, cujus exemplum Ancyrae est, non in Mausoleo ipso, sed ante Mausoleum statutas esse: quas Dio (5) *χαλκας στήλας* appellat *πρὸς τῷ ἡρώϊ αὐτοῦ σταδευτάς*. eae geminae fuere (6) ac singulae ternis lateribus inscriptae; nam et Ancyrae totidem sunt versuum series;

(1) Gioven. Aveja p. 109.

(2) p. 231. n. 17.

(3) part. 1. c. 3. §. 2. n. 3.

(4) in Aug. c. 101. n. 7.

(5) l. 56. p. 832. B. *acreas pilas jux-*

*ta heroum ejus positas.*

(6) Grut. p. 230 init.

neque sane par erat pilas inseribi, qua parte Mausoleo obversae spectandi legendique copiam non facerent.

V. Inscriptionum historicarum varia plane sedes; pluribus enim rebus aptantur. ut fastos illos forenses qui primus divulgavit Cn. Flavius, circa forum in albo proposuit (1), sic qui consulares deinde in tabulis marmoreis inciderunt, eos item in foro publicarunt; ibidem enim inventi, qui nunc Capitolini Fasti appellantur, aut prope forum in Comitio, ut tradit Gruterus (2). publico certe in loco legi debent, quum rei publicae annales sint, et omnibus noti esse debeant. pluribus autem tabulis incidendi sunt, ut de plano legi possint. qui singulis in tabulis singula decennia aut vicennia descripserit, is non parum cavisse videatur, ne diu laborent, qui certorum annorum magistratus aut illustria facta reperire velint.

Iam operum publicorum inscriptiones in ipsis fere eorum fastigiis eminebant. in zophoro habet arcus Emporii Iaderensis (3); in zophoro item antiquae Veronae portae (4), Pantheon vero Agrippae alteram in zophoro exhibet, alteram in epistylío. at ultra epistylium et zophorum ipsumque tympanum quaedam adhuc apparent in urbis portis aut aquarum antiquis castellis; nec fortasse ullum Romae aedificium publicum murorum mole adsurgebat, cuius non summum veteres ac praecipuum in fronte locum inscriptioni tribuissent. contra in pontibus, quo facile a comitantibus legi posset, in utroque eorum margine incidendam curabant; eademque de causa quae viarum restitutores indicarent, columnis milliariis inscriptae: quamquam has in arcubus etiam sive janis aliquando insculptas esse constat (5), nonnumquam et in pontibus (6). ipsae vero columnae, quas nempe veteres secus vias statuebant, ut facientibus iter fatigationis multum notata inscriptis lapidibus spatia detraherent, Romam venientibus omnes ad dexteram occurrebant; quod milliaria nuper in agro Poniptino propter Appiam reperta docuerunt.

Quaeret hic aliquis, num plures uno in monumento inscriptiones ex veterum consuetudine locum habere possint? dico autem binas ternasque simul ab antiquis probatas, quum unum idemque earum genus esset, nec ratio sive causa dissimilis: ut ad statuam *Herculis Tunicati*, de qua haec Plinius (7); *In hac tres sunt tituli, L. Luculli Imperatoris de mauubiis, alter pupillum Luculli filium ex S. C. dedicasse, tertius T. Septimium Sabinum Aedilem curulem ex privato in publicum restituisse: tot certaminum tantaeque dignationis simulacrum id fuit.* et binas adhuc aut ternas inscriptiones alia in urbe monumenta ostendunt, ea praesertim, quae ad aquarum ductus pertinent: in quibus suas primum conditores addiderunt, deinde restitutores suas. nec sane ingratum id hospitii esse potest, cui tota simul operis historia ob oculos ponatur. ceterum veteres, linea non raro transverse ducta, alteram ab altera discriminabant: quod in milliariis etiam columnis servasse video, exemplum ex Donio subijciam e columna, quam olim septimum viae Appiae ab urbe lapidem fuisse existimo (8).

(1) Liv. l. 9. c. 34. n. 46.

(2) p. 239. init.

(3) v. inser. 237.

(4) Maff. M. V. p. 195. 197. v. Cleviss. Mon. Nism. pl. 2.

(5) Grat. p. 149. n. 2. 7. etc.

(6) id. p. 151. n. 4.

(7) H. N. l. 34. c. 8. n. 19. §. 36.

(8) Dou. Cl. 2. n. 87.

VII.	
IMP · CAESAR	
VESPASIANVS · AVG ·	
PONTIFEX · MAX ·	
TRIB · POTEST · VII ·	
IMP · XVII · P · P · CENSOR	
COS · VII · DESIGN · VIII ·	
IMP · NERVA · CAESAR	
AVGVSTVS · PONTIFEX	
MAXIMVS · TRIBVNICA	
POTESTATE · COS · III · PATER	
PATRIAE · REFECIT	

at uno in opere magnae molis, cujusmodi erant fora, theatra, circi, thermae, praeter inscriptiones sive singulas sive geminas, quae ad introitum in fronte eminebant, aliae etiam intus aliis in locis saepe erant, quae tamen a primis pendebant, nec ad opus universum, sed ad res singulas spectabant. tropaeis fori Trajani subscriptum fuisse EX MANVBIIS, superius adnotavimus. in Circo Neronis obeliscus is, qui nunc in aréa medius stat contra templum Vaticanum, in imo saxo dedicationem praeferebat, quam adhuc legimus (1).

DIVO · CAESARI · DIVI · IVLII · F · AVGVSTO  
 TI · CAESARI · DIVI · AVGVSTI · F · AVGVSTO  
 SACRVM

Qui autem locorum publicorum privatorumque indices sunt, iis locus in ipsis finibus, quos designant, tribuitur: pro terminis enim statui solent, ac plures fere eodem exemplo; nisi quod numero quisque suo distinguitur (2). quosdam et muris veteres includebant, si murorum ambitus pro fine esset (3). ceterae huiusmodi inscriptiones, in quibus contractus donationesve recensentur, iis utique locis figendae, de quibus loquuntur; ac si picturae, statuae, signa legata aut dono data sint, titulus sub ipsis recte scribetur, quemadmodum in templorum donariis fiebat.

VI. De ellogiorum loco satis jam libro primo dictum est. in foro illa atque in atriis domorum sub ipsis statuīs legebantur. addo, his ne bibliothecas quidem caruisse: quippe ibidem veterum ac praecipuorum auctorum imagines dedicabantur (4): aliquando et viventium: qui honor M. Varroni in Asinii Pollionis bibliotheca habitus est (5) (a): harum imaginum bases ellogiis inscriptas fuisse, diserte tradit Sidonius (6): quamquam pleraque versibus confecta, quod jam superius indicavimus (7).

Veterum autem ducum ellogia, quae olim Romae descripta, in municipiis iterum incidebantur, parvis fere in tabulis inscripta esse videntur: neque enim Romanorum Imperatorum sumptus aequare municeps poterat: ac quidam certe veterum ellogiorum, qui exstant, lapides municipales et exigui sunt et parvis apti basibus, quales non ma-

(1) Grut. p. 288. n. 6,

(2) v. inser. 259.

(3) v. inser. 266. 267. etc.

(4) Plin. lib. 4. ep. 28. Svet. in Tib.  
c. 70. n. 5. et in Cajo c. 34. n. 5.

(5) Plin. H. N. l. 35. c. 2. n. 2.

(a) At si cit. Plinii locum attentius consideraveris, arguere inde haud possis, huiusmodi honorem viventibus concessum fuisse, sed potius Varronem illius artis inventorem ha-

beri, qua illustrium virorum imagines typo quodam facillime chartis imprimi coepissent.

(6) epist. 16. l. 9.

(7) part. 2. c. 4. §. 5. n. 1.



guo foro conveniebant. porro hujusmodi bases, si forte quispiam domi aut in publico statuere nunc velit, non humi, non sublime locari par est, sed ad eam altitudinem, ut ellogia legi possint: ceteras, si quae Romano more magnis subjectae statuis, ellogium grandibus litteris insculptum capiant, quocumque has loco architectus constituerit, nemo minus commode locatas esse queratur.

Sed quid ego in his immoror? statuariam artem olim familiarem Italiae pauci jamdum exercent: quare vel nullis, vel antiquis fere iisque ignotorum saepe virorum statuis et domorum atria et urbium ornantur fora: ut ellogia his raro aptari possint. picturae honor durat: itaque ellogia pictis potius tabulis subscribuntur, quae nobilium virorum pinacothecas implent.

vii. Suum denique locum constitutionibus publicis adsignemus, quem sane insignem nobilemque sibi vindicant. Capitolium plerisque sedem olim datam accepimus: de Antonio nimirum questus est Tullius: *Falsas leges C. Caesaris nomine, falsa decreta in aes incidenda, et in Capitolio figenda* curasse (1): ibidem et foedera, ut ait Polybius, servabantur (2), *ἐν χαλκομασί παρὰ τὸν Δία τὸν Καπιτωλίῳ*. senatus quoque consulta, quibus C. Caesari honores illi humano fastigio ampliores decreti sunt, ad ipsos Iovis Capitolini pedes, ut Dio tradit (3), in argenteis columnis legebantur, aureis inscripta litteris. tabulae ipsae aeneae nominibus militum incisis, quibus honesta missio data esset, pleraeque in Capitolio figebantur (4): quo loco ipsa ponderum et mensurarum publicarum archetypa fuisse jam vidimus (5). itaque bello Vitelliano aerearum tabularum tria millia, Capitolio incenso, conflagrasse dicuntur (6).

At quaedam ex his extra Capitolium visebantur. de foedere cum Latinis omnibus icto illa sunt Tullii verba (7), *Quod quidem nuper in columna aenea meminimus post Rostra incisum et perscriptum fuisse*. aliorum foederum tabulas in templis depositas, veteres historici prodidere (8): in quibus aliquando et S. C. affixa sunt, ea nempe, quae ad religionem pertinerent. nam S. C. memorans Tacitus sub Tiberio facta de jure asylorum, quae Graecas per urbes plura jam statuta erant, quam opus esset, *Iussi*, inquit (9), *ipsis in templis figere aera sacrandam ad memoriam, ne specie religionis in ambitionem delaberentur*. ceteris vero senatus consultis in Curia etiam locus est datus (10). jam quae tabulae hospitales erant, eae in patronorum domibus et in municipiorum curiis adservatae (11). decreta actaque collegiorum in eorum scholis prostabant: sed decretorum aliquando exempla ad patronos etiam missa (12). Imperatorum rescripta, quae municipiis saepe pro legibus fuerunt, non aliter custodita puto, quam Romae leges. itaque Rescriptum Domitiani de subsecivis Falerienses in Capitolio fortasse servabant (13): nam apud eos quoque Capitolium fuisse, ex praeclara inscriptione nuper didicimus (14).

Quid edicta? quo tandem ea loco proposita? declarat Ausonius in oratione ad Gratianum Aug. (15), *Has ego, inquit, litteras tuas si in omnibus pilis atque porticibus, unde de plano legi possint instar Edicti pendere mandavero, nonne tot statuis honorabor, quot fuerint paginae libellorum?* sed haec ad tempus, ut leges ipsae, quum primum promulgarentur, in membranis linteisve perscriptae, e quibus fuit, quam Cajus Aug. de vectigalibus proposuit, sed contra consuetudinem, *minutissimis litteris*, ut ait Svetonius (16), *et angustissimo loco, uti ne cui describere liceret*. si autem edicta

(1) Phil. 3. c. 12. n. 30.

(2) Hist. l. 3. c. 26. *in tabulis aereis apud Iovem Capitolinum*. v. Liv. l. 26. c. 19. n. 24. etc.

(3) l. 44. p. 385. D.

(4) v. inser. 318. 319.

(5) v. inser. 320. 327.

(6) Svet. in Vesp. c. 8. n. 12.

(7) pro Balbo c. 23. n. 53.

(8) v. Maff. Diplom. p. 12.

(9) Ann. l. 3. c. 63.

(10) id. ibid. c. 57.

(11) v. inser. 314.

(12) v. inser. 328.

(13) v. inser. 316.

(14) c. 7. hujus part. n. 2.

(15) p. 722. ed. Amstel. 1671.

(16) in Cajo c. 41. n. 1.

circa ea versarentur, quae perpetuo servanda essent; non secus ac leges, aeri aut marmori incisa publicoque in loco proposita sunt (1). atque haec satis; neque enim a veterum consuetudine multum descivimus, nec si quid mutatum est, id me auctore corrigendum quisquam putabit.

VI. Vbi jam suam inscriptioni sedem tribueris, fiet aliquando, ut titulos quosdam breves addere debeas, more plane antiquo, quibus seorsum locus quaerendus est. nam et in veterum anaglyphis aliquando, in quibus exempli causa militaria signa expressa sunt, nomina cohortium legimus, quae ea signa sequebantur. sic in ara apud Gruterum (2) aquila ad utrumque latus insculpta dicitur, atque hinc subscriptum AQVIL · LEG · V · MACED · illinc vero AQVIL · LEG · III · SCYT · nihil haec fere ad inscriptionem, quamquam ordinum ductorem fuisse designant, qui aram dedicavit. ob eam rem si alicubi titulos huiusmodi addere debeas, sic perscribas velim, ut litteris utaris minoribus, quam quae inscriptioni monumenti adtributae sint, et in effigie ipsa, quam designant, aut paullo infra inscribendos cures.

Eodem modo architectorum quoque et artificum nomina insculpenda sunt. fuere olim ex architectis, qui nomen suum signo potius, quam verbo in publicis operibus declararent: ut duo illi Lacones Saurus et Batrachus, qui fecere, inquit Plinius (3), *templa Octaviae porticibus inclusa: quidam et opibus praepotentes fuisse eos putant, ac sua impensa construxisse, inscriptionem sperantes*, primariam nempe in fronte monumenti, quae templa ab se dedicata ostenderet: *qua negata hoc tamen alio loco et modo usurpasse: sunt certe etiamnum in columnarum spiris insculpta, nominum eorum argumento, rana atque lacerta*: quippe Σαυρος Graecis lacertus est, Βατραχος rana. Winckelmannus legendum mavult in *Capitulum spiris*, quod nempe capitulum adhuc Romae exstat Ionicum, in cuius spiris lacerta et rana efficta est: quod ille non inmerito ad Batrachi Saurique templa pertinuisse existimabat (4). at architectorum plerique, litteris usi, nomen operibus suum addidere, ad latera fere aut in angulo, sic, ut prope lateret. Veronae in arcu Gaviorum ad latus introrsum minutis litteris inscriptum legi,

L · VITRVVIVS · L · L · CERDO  
ARCHITECTVS

qui titulus duplex ibidem est, sed qui ingredientibus ad laevam occurrit, additus fortasse recenti manu, ut putavit Maffejus (5). huic similis alter Puteolis legitur, ad veteris templi latus (6):

L · COCCEIVS  
C · POSTVMI · L ·  
AVCTVS · ARCHIT ·

ceterum in epistyllo theatri Herculanensis post inscriptionem, atque in versu ejusdem extremo, quod paullo arrogantius factam videatur, non exiguis litteris apparet (7), P · NVMISIVS · P · F · ARCHITECTVS: quem honorem Sannichelio quoque in Veronensi portae novae inscriptione tributum esse, Maffejus adnotavit (8). id nempe loci architectorum titulis vel datum vel non negatum, ut inscriptio ad totum opus referretur, cuius machinatores fuissent. artifices vero nomen quisque opusculis addebant suis, quae saepe uno in aedificio multa erant. sic aeneae illi pineae, quae olim in summo Hadriani Mausoleo stetisse dicitur, artificis titulus in zona adscriptus huiusmodi (9):

(1) v. part: 1. c. 6. §. 2. n. 4.

(2) p. 13. n. 17.

(3) H. N. l. 36. c. 5. n. 4. §. 14.

(4) Mon. ined. p. 4. p. 269.

(5) Art. Cr. L. l. 3. c. 3. p. 197. etc.

(6) Grut. p. 227. n. 2.

(7) Gor. Symb. Fl. t. 1. p. 42. 155.

(8) Art. Cr. L. l. 3. c. 3. p. 198. 199.

(9) Grut. p. 187. n. 6.




si tamen opera uno in aedificio plura, nec ubius omnia artificis essent, inscriptionem quandoque ipsi auctores addidere solitariam, quae sua cuique tribueret: *Plastae laudatissimi*, inquit Plinius (1), *fuere Damophilus et Gorgasus, iidemque pictores: qui Cereris aedem Romae ad Circum maximum utroque genere artis suae excoluerunt, versibus inscriptis graece, quibus significarunt, a dextra opera Damophili esse, a parte laeva Gorgasi.*

At statuas quod attinet, nomina artificum Graecorum non raro in ipsis simulacris insculpta: ut in signo Apollinis pulcherrimo, quod Verres Agrigenti ex Aesculapii fano sustulit, *cujus in femine*, inquit Tullius (2), *litterulis minutis argenteis nomen Myronis erat inscriptum.* aliorum nomina statuæ in urbe habent non ita paucae, fimbriae interdum aut caligae aut plintho ipsi inscripta, in quo insistent: atque haec fortasse basis erat statuæ Herculis, de qua Martialis (3),

*Inscripta est basis, indicatque nomen:*

*Ἀντίππῳ lego, Phidiae putavi.*

sed tamen in fulcro etiam statuæ, in quo inscriptio dedicationis esse solet, sculptoris incisum nomen videas, minoribus utique litteris ac seorsum ab inscriptione, ut hoc in exemplo (4):



Idem vero pictoribus quoque placuisse, saepe testatur Plinius (8); atque eum morem nostri jamdiu servant pictores, maxime a principe illo veterum monumentorum studiosissimo Raphaële Sancio, cujus olim egregiam tabulam Firmi in aedibus viri optimi Hannibalis Maggiori Comitis otiose sum contemplantus. est autem picturae argumentum Virgo sanctissima divinum puerum dormientem viro suo ostendens, velamine tenuissimo

(1) H. N. l. 35. c. 12. n. 45.

(2) Verr. l. 4. c. 43. n. 93.

(3) l. 9. epigr. 45.

(4) Maff. M. V. p. 230. n. 1.

(5) tribu Pollia.

(6) Quaestori Aerarii Publici Et Alimentarii.

(7) Industria opp. Liguria.

(8) v. l. 35. c. 4. n. 10. et 12. n. 45.


Val. Max. l. 8. c. 14. n. 6.



a cunis utraque manu reducto. porro in sancti senis Iosephi baculo ab eo scriptum deprehendi litteris perexiguis R · S · V · A · A · XVII · P · nempe *Raphael Sancius Vrbinas Anno Aetatis Decimoseptimo Pinxit.*

VIII. Denique de ornatu etiam inscriptionum addendum aliquid, ac primum de ipsa lapidis forma, unde non exiguum titulus ornamentum habere solet. sunt qui famam ab artificio expetentes, pro tabula marmorea aulaeum sibi in saxo durissimo effingi volunt vento agitatam, aut erispam papyrum repraesentari nondum omni ex parte evolutam, quae nempe titulum sic capiat, ut litterarum non paucae in latebra occultet: his macandros et lemniscos addunt, et quas iidem volunt phaleras. quam riderent veteres illi architeeti, si tantum portentorum nunc cernerent! de iis nempe inscriptionibus hic loquor, quae primariae sint, et quibus proprius in monumenti fronte locus tribuatur. nam pittaia interdum cetypis sculpturis expressa, inque his breves titulos antiqui etiam lapides referunt argumento anaglyptorum fere respondentes. quin et volumen magna ex parte explicatum videre licet inseulptum veteri basi sive tabulae, donario ne-seioeui a P. Aelio Hilario subjectae, quae etiam nunc in Museo Kircheriano est: in ipso autem volumine legas, DEDIC · K · IVN · IMP · T · AELIO · HADRIANO · ANTONINO · AVG · PIO · II · C · BRITTIO · PRAESENTE · II · COS · quasi hoc indicare Hilarius voluerit, carmen, quo donarii dedicatio peracta sit, de scripto dictum esse: nam et in Fratrum Arvalium actis, quae Marinius edidit, diserte legimus: IBI · SACERDOTES · CLVSI · SVCCINCTI · LIBELLIS · ACCEPTIS · CARMEN · DESCIDENTES · TRIPODAVERVNT · IN · VERBA · HAEC · . . . ceterum tituli ejusmodi non tam ad monumenti inscriptionem, quam ad ejus anaglypta pertinent: quare qui primariae quoque inscriptionis tabulam in eas formas figuret varietque, cum utique veterum exemplis abuti contendo: esto, artificis manum plerique mirentur, qui eam sibi speciem effinxerit marmore, et linteum aut chartam graphice expresserit: certe laudare volenti subeunt illa, *Non erat hic locus.* num enim quae sempiterna esse volumus, ea telis chartisque mandamus? veteres sane titulum quemque non modo lapidibus incidendum curabant, sed etiam muri compagibus inclusum corona fere ac sima, id est dupliei quasi septo eingebant. quare non solum nullo in titulo stabili fixoque, sed ne in temporaria quidem inscriptione ea mihi linteae aut papyri imitatio placeat, si quid nimirum tela et tabulis ita compactum exstructumque sit, ut picturae ope stabilitatem operum publicorum referre videatur. Geniorum autem eminentes expressiones, qui saepe titulis ad decus et ornamentum adjiciuntur, ista conditione probari possunt, dum nulla inscriptionis pars porrectis manibus aut alarum oppositu obtegatur. nam si quis forte erit, qui inscriptionis suae alia quidem verba legi velit, alia vero omnino nolit, is facilius profecto adsequetur propositum, haec si omiserit.

Inscriptionis tabulam corona definire, aut ductis lineis spatium in lapide ad scripturam designare, veteris consuetudinis est. quadrata autem forma fere plaevit, nisi quod saepe elegantiae causa trigona quaedam utrinque expressa videas, hoc modo (1):




hunc multosque alios hac figura lapides ad quodcumque fere inscriptionum genus vidit

(1) Lup. Ep. Sev. p. 49.

vulgavitque Lupius (1), et Latinis et Graecis notatos titulis, ut plerique veterum eam tabularum formam probasse videantur.

Bases tamen statuarum raro coronam, vix unquam lineas habent; quippe nec opus erat, quum basis vel ad parietem locata satis emineret, et angulis scripturam utrinque terminaret. illud in atriis nobilium singulare olim ellogiorum simul et imaginum ornamentum fuit, quod stemma sive sertum variis macandris singulos majorum vultus et titulos cingeret: quo de more haec sunt Senecae verba (2): *Qui imagines in atrio exponunt, et nomina familiae suae longo ordine ac multis stemmatum illigata flexuris in parte prima aedium collocant, noti magis, quam nobiles sunt.* eodem spectat, quod de Galba Aug. scripsit Svetonius (3), stemma ab eo, postquam Imperator renunciatus esset, in atrio propositum esse, quo paternam originem ad Iovem, maternam ad Pasiphaën Minois uxorem referebat.

Iam suus et litteris a colore ornatus accessit. *Minium*, inquit Plinius (4), *in voluminibus quoque scriptura usurpatur, clarioresque litteras vel in auro vel in marmore etiam in sepulcris facit.* consuetudinem autem ejusmodi perantiquam esse, nuper nos rubricati Scipionum tituli ad Capenam inventi docuerunt. aereae contra duariorum tabellae non raro litteras argenteas habuere, ut quam olim Romae descripsit Suetius (5):



huc pertinet, quod de Neronis Aug. carminibus narrat Svetonius (6): *Recitavit et carmina non modo domi sed in theatro, tanta universorum laetitia, ut ob recitationem supplicatio decreta sit, atque pars carminum aureis litteris Iovi Capitolino dicata.* monstrarant id Graeci, ut Plinius indicat his verbis (7): *Rursus mortales oraculorum societatem dedere Chiloni Lacedaemonio tria praecepta ejus Delphis consecrando aureis litteris.* porro et senatus consulta, quibus honores Augustis Caesaribusve decreti essent, argenteis interdum aureisque perscripta litteris, quod paullo ante Iulii Caesaris caussa factum vidimus. sed tamen quum haec et similia a senatu ob tribuniciam Drusi potestatem decreta essent, caerimonias Tiberius, ut a Tacito accepimus (8), temperavit, *nominatim arguens insolentiam sententiae, aureasque litteras contra patrum morem.* sed aereae in publicis monumentis passim receptae; et apparent adhuc antiquis in arcubus vestigia carum, hiantibus in sulco foraminibus clavorum, quibus infixae fuerant (9). eas saepe inauratas fuisse, item constat, quaedam auro illitae nunc quoque in Museis visuntur.

Quibus autem census brevis esset, neque his sumptibus par, ii aliquando elegantiae nonnihil inscriptioni se addituros putaverunt, si ad singula verba, punctorum loco, qua corcula, qua palmarum ramulos, qua flosculos quosdam affinxissent: quae sane non paucis adhuc in monumentis videmus, hominum tamen privatorum, quae fere exiguam habent auctoritatem, quum a ceterorum ratione dissentiunt. itaque jocularum eorum licentiam recte is demum imitabitur, qui molestiam legentis augere aut risum captare

(1) Lup. Ep. Sev. §. 8.

(2) de Ben. l. 3. c. 28.

(3) in Galba c. 2. n. 2.

(4) H. N. l. 33. c. 7. n. 40. Lup. Ep.

Sev. p. 33.

(5) Grut. p. 55. n. 7.

(6) in Ner. c. 10. n. 9.

(7) H. N. l. 7. c. 32. n. 32.

(8) Ann. l. 3. c. 59.

(9) v. inser. 73. 95.



velit. at in epitaphiis anchoras, pisces, ceteras religionis nostrae notas ac *συμβολα*, non inter verba, sed vel in ipso initio, vel infra titulum exprimere, id vero ex optimo more, atque ex antiqua consuetudine nemo esse inficietur, qui veterum sepulera paullo diligentius considerarit. quae quidem etsi a privatis usurpata sunt, jure tamen ac merito revocaveris, non modo quia monumentum ornant illustrantque, sed etiam quia non paucorum temeritate, sed communi propé usu sunt et judicio comprobata.

Neque enim novum hoc plane Christianorum inventum putandum est, ad sepulcorum tacitam laudem, et ad privatum religionis suae testimonium: imo hoc Romani vel ad mortuos commendandos; vel ad superstitionem suam declarandam jamdiu factitabant, quum majores nostri de ea consuetudine pie primum sancteque cogitarunt. Graeci nempe exemplo Latinis fuerant, qui in eorum sepulcris saepe hujusmodi ornamenta animadvertenter, referam hoc loco Tullii verba, qui, quum esset in Sicilia quaestor, Archimedis sepulcrum a Syracusanis ignoratum primum indagavit (1): *Ego, inquit, quum omnia collustrarem oculis; est enim ad portas Agragianas magna frequentia sepulcrorum: animadverti columnellam non multum e dunis eminentem: in qua inerat sphaerae figura et cylindri. atque ego statim Syracusanis, erant autem principes mecum, dixi me illud ipsum arbitrari esse, quod quaererem. immissi cum falcibus multi purgarunt et aperuerunt locum. quo quum patefactus esset aditus, ad adversam basin accessimus: apparebat epigramma exesis posterioribus partibus versiculorum dimidiatis fere.*

Porro nihil in Latinis monumentorum cippis frequentius, quam sacerdotiorum, magistratuum, militiae, studiorum etiam atque artium vel insignia vel instrumenta. qui haec addere non possent aut nollent, ea effingenda curarunt, quae superstitionem eorum et mysteria significarent. enimvero ista omnia Christiani veteres sic adseiverunt, ut quum rejicienda profanorum hominum pleraque *συμβολα* merito ducerent, pro eorum papilionibus, lacertis, aquilis, cupidinibus, proque pateris, hydriis, sistris, lituis et hujus generis notis, suos ipsi pisces et columbas et palmas, cetera denique optarent sanctissimae religionis signa atque indicia, quorum delectum libro tertio instituemus.

Atque haec nunc in sepulcris usurpata parce et expressa eleganter quis non probet? praesertim si ad ejus religionem pietatenque referri possint, cujus memoriam monumento consignamus? equidem illa etiam veterum signa, quaecumque ab eorum superstitione remota sint, libenter recipio, quum egregiis virtutibus et claris factis designandis apta videantur. quare nuper, quum nobilissimi adolescentis epitaphium scripsissem, in quo is, qui monumentum fecerat vir clarissimus, vitam se bis ei debuisse profitebatur; auctor fui, ut coronae civicae duae in lapide inculperentur. sic alii, ad studia litterarum et disciplinas doctorum hominum indicandas, Archimedei sepulcri ornamenta imitati sunt: quidam etiam, quum sibi sepulcrum pararent, ipsi incidenda curarunt: ut Basileae magnus ille mathematicus Iacobus Bernoullius, qui lineam illam suam in spiram progredientem, de qua egregie scripserat, exprimi voluit, quae et mathematicum proderet et christianum: nam et hemistichio adscripto spem ipse suam indicavit:

EADEM • MUTATA • RESVRGO

At ornamenta hujusmodi epitaphiorum propria habeantur. haec enim, imo alia omnia ceterae inscriptiones repudiant: Kalendaria excipe, in quibus aliquando ad singulos menses singula signa expressa sunt (2). quae ornamenta in aris aut in statuarum apparent basibus, ea in lateribus efficta; in quibus nunc clypei cum gentis insignibus effin-

(1) Tusc. Disp. l. 5. c. 25. n. 65. (2) v. Bucher, de Doct. temp. p. 279.



gi possint: frontem inscriptio implet; cui sane nos quoque, quantum in lapide spatii erit, vel auctis intervallis et litterarum forma producta, totum recte tribuamus.

Haec habui, quae de toto inscriptionum artificio, multa veterum exempla scrutatus, in medium proferrem: quo antiqua titulorum ratio atque forma revocaretur. tertio jam libro ea exponenda sunt, quae ex veterum penu deprompta scriptorem titulorum ad priscam elegantiam exprimendam juvare possunt vel maxime.



PATAVII

TYPIS SEMINARIJ

AN. M. DCCC. XX